

全 唐 诗

（第九部）

· 全唐诗 ·

第三百零一卷

卷 301_1 【题柏岩禅师影堂】

王建

山中砖塔闭，松下影堂新。恨不生前识，今朝礼画身。

卷 301_2 【送人】

王建

河亭收酒器，语尽各西东。回首不相见，行车秋雨中。

卷 301_3 【春意二首】

王建

去日丁宁别，情知寒食归。缘逢好天气，教熨看花衣。
谁是啊园主，一枝临古岐。从伤早春意，乞取欲开枝。

· 全唐诗 ·

卷 301_4【夜闻子规】

王建

子规啼不歇，到晓口应穿。况是不眠夜，声声在耳边。

卷 301_5【四望驿松】

王建

当初北涧别，直至此庭中。何意闻鞞耳，听君枝上风。

卷 301_6【江馆】

王建

水面细风生，菱歌慢慢声。客亭临小市，灯火夜妆明。

卷 301_7【题江台驿】

王建

水北金台路，年年行客稀。近闻天子使，多取雁门归。

· 全唐诗 ·

卷 301_8【赠谪者】

王建

何罪过长沙，年年北望家。重封岭头信，一树海边花。

卷 301_9【戏酬卢秘书】

王建

芸香阁里人，采摘御园春。取此和仙药，犹治老病身。

卷 301_10【小松】

王建

小松初数尺，未有直生枝。闲即傍边立，看多长却迟。

卷 301_11【秋夜】

王建

夜久叶露滴，秋虫入户飞。卧多骨髓冷，起覆旧绵衣。

· 全唐诗 ·

卷 301_12【水精】

王建

映水色不别，向月光还度。倾在荷叶中，有时看是露。

卷 301_13【香印】

王建

闲坐烧印香，满户松柏气。火尽转分明，青苔碑上字。

卷 301_14【秋灯】

王建

向壁暖悠悠，罗帏寒寂寂。斜照碧山图，松间一片石。

卷 301_15【落叶】

王建

陈绿向参差，初红已重叠。中庭初扫地，绕树三两叶。

· 全唐诗 ·

卷 301_16 【园果】

王建

雨中梨果病，每树无数个。小儿出入看，一半鸟啄破。

卷 301_17 【野菊】

王建

晚艳出荒篱，冷香著秋水。忆向山中见，伴蛩石壁里。

卷 301_18 【荒园】

王建

朝日满园霜，牛冲篱落坏。扫掠黄叶中，时时一窠薤。

卷 301_19 【南涧】

王建

野桂香满溪，石莎寒覆水。爱此南涧头，终日谿潺湲。

· 全唐诗 ·

卷 301_20 【晚蝶】

王建

粉翅嫩如水，绕砌乍依风。日高出露解，飞入菊花中。

卷 301_21 【田家】

王建

啾啾雀满树，霏霏东坡雨。田家夜无食，水中摘禾黍。

卷 301_22 【新嫁娘词三首】

王建

邻家人未识，床上坐堆堆。郎来傍门户，满口索钱财。

锦幃两边横，遮掩侍娘行。遣郎铺簟席，相并拜亲情。

三日入厨下，洗手作羹汤。未谙姑食性，先遣小姑尝。

· 全唐诗 ·

卷 301_23 【故行宫】

王建

寥落古行宫，宫花寂寞红。白头宫女在，闲坐说玄宗。

卷 301_24 【酬从侄再看诗本】

王建

眼暗没功夫，慵来剪刻粗。自看花样古，称得少年无。

卷 301_25 【别自栽小树】

王建

去年今日栽，临去见花开。好住守空院，夜间人不来。

卷 301_26 【早发汾南】

王建

桥上车马发，桥南烟树开。青山斜不断，迢递故乡来。

· 全唐诗 ·

卷 301_27【宫中三台词二首】

王建

鱼藻池边射鸭，芙蓉园里看花。
日色柘袍相似，不著红鸾扇遮。

池北池南草绿，殿前殿后花红。
天子千年万岁，未央明月清风。

卷 301_28【江南三台词四首】

王建

扬州桥边少妇，长安城里商人。
二年不得消息，各自拜鬼求神。

青草湖边草色，飞猿岭上猿声。
万里湘江客到，有风有雨人行。

树头花落花开，道上人去人来。
朝愁暮愁即老，百年几度三台。

闻身强健且为，头白齿落难追。
准拟百年千岁，能得几许多时。

· 全唐诗 ·

卷 301_29 【御猎】

王建

青山直绕凤城头，浐水斜分入御沟。
新教内人唯射鸭，长随天子苑东游。

卷 301_30 【长门烛】

王建

秋夜床前蜡烛微，铜壶滴尽晓钟迟。
残光欲灭还吹著，年少宫人未睡时。

卷 301_31 【过绮岫宫】

王建

玉楼倾倒粉墙空，重叠青山绕故宫。
武帝去来罗袖尽，野花黄蝶领春风。

· 全唐诗 ·

卷 301_32 【朝天词十首寄上魏博田侍中】

王建

山川初展国图宽，未识龙颜坐不安。
风动白髯旌节下，过时天子御楼看。
相感君臣总泪流，恩深舞蹈不知休。
初从战地来无物，唯奏新添十八州。
催修水殿宴沂公，与别诸侯总不同。
隔月太常先习乐，金书牌纛彩云中。
无人敢夺在先筹，天子门边送与球。
遥索彩箱新样锦，内人舁出马前头。
御马牵来亲自试，珠球到处玉蹄知。
殿头宣赐连催上，未解红缨不敢骑。
老作三公经献寿，临时犹自语差池。
私从班里来长跪，捧上金杯便合仪。
四海无波乞放闲，三封手疏犯龙颜。
他时若有边尘动，不待天书自出山。
胡马悠悠未尽归，玉关犹隔吐蕃旗。
老臣一表求高卧，边事从今欲问谁。
威容难画改频频，眉目分毫恐不真。
有诏别图书阁上，先教粉本定风神。
重赐弓刀内宴回，看人城外满楼台。
君臣不作多时别，收尽边旗当日来。

· 全唐诗 ·

卷 301_33【霓裳词十首】

王建

弟子部中留一色，听风听水作霓裳。
散声未足重来授，直到床前见上皇。

中管五弦初半曲，遥教合上隔帘听。
一声声向天头落，效得仙人夜唱经。

自直梨园得出稀，更番上曲不教归。
一时跪拜霓裳彻，立地阶前赐紫衣。

旋翻新谱声初足，除却梨园未教人。
宣与书家分手写，中官走马赐功臣。

伴教霓裳有贵妃，从初直到曲成时。
日长耳里闻声熟，拍数分毫错总知。

弦索摐摐隔彩云，五更初发一山闻。
武皇自送西王母，新换霓裳月色裙。

敕赐宫人澡浴回，遥看美女院门开。
一山星月霓裳动，好字先从殿里来。

· 全唐诗 ·

传呼法部按霓裳，新得承恩别作行。
应是贵妃楼上看，内人舁下彩罗箱。

朝元阁上山风起，夜听霓裳玉露寒。
宫女月中更替立，黄金梯滑并行难。

知向华清年月满，山头山底种长生。
去时留下霓裳曲，总是离宫别馆声。

卷 301_34 【宫前早春】

王建

酒幔高楼一百家，宫前杨柳寺前花。
内园分得温汤水，二月中旬已进瓜。

卷 301_35 【奉同曾郎中题石瓮寺得嵌韵】

王建

寺门连内绕丹岩，下界云开数过帆。
遥指上皇翻曲处，百官题字满西嵌。

· 全唐诗 ·

卷 301_36 【旧宫人】

王建

先帝旧宫宫女在，乱丝犹挂凤凰钗。

霓裳法曲浑抛却，独自花间扫玉阶。

卷 301_37 【新授戒尼师】

王建

新短方裙叠作棱，听钟洗钵绕青蝇。

自知戒相分明后，先出坛场礼大僧。

卷 301_38 【太和公主和蕃】

王建

塞黑云黄欲渡河，风沙眯眼雪相和。

琵琶泪湿行声小，断得人肠不在多。

· 全唐诗 ·

卷 301_39【元太守同游七泉寺】

王建

盘磴回廊古塔深，紫芝红药入云寻。

晚吹箫管秋山里，引得猕猴出象林。

卷 301_40【望定州寺】

王建

回看佛阁青山半，三四年前到上头。

省得老僧留不住，重寻更可有因由。

卷 301_41【道中寄杜书记】

王建

西南东北暮天斜，巴字江边楚树花。

珍重荆州杜书记，闲时多在广师家。

· 全唐诗 ·

卷 301_42【听琴】

王建

无事此身离白云，松风溪水不曾闻。

至心听著仙翁引，今看青山围绕君。

卷 301_43【赠陈评事】

王建

识君虽向歌钟会，说事不离云水间。

春夜酒醒长起坐，灯前一纸洞庭山。

卷 301_44【寄画松僧】

王建

天香寺里古松僧，不画枯松落石层。

最爱临江两三树，水禽栖处解无藤。

· 全唐诗 ·

卷 301_45 【花褐裘】

王建

对织芭蕉雪毳新，长缝双袖窄裁身。

到头须向边城著，消杀秋风称猎尘。

卷 301_46 【夜看美人宫棋】

王建

宫棋布局不依经，黑白分明子数停。

巡拾玉沙天汉晓，犹残织女两三星。

卷 301_47 【上田仆射】

王建

一方新地隔河烟，曾接诸生听管弦。

却忆去年寒食会，看花犹在水堂前。

· 全唐诗 ·

卷 301_48【江陵道中】

王建

菱叶参差萍叶重，新蒲半折夜来风。

江村水落平地出，溪畔渔船青草中。

卷 301_49【冬至后招于秀才】

王建

日近山红暖气新，一阳先入御沟春。

闻闲立马重来此，沐浴明年称意身。

卷 301_50【别曲】

王建

毒蛇在肠疮满背，去年别家今别弟。

马头对哭各东西，天边柳絮无根蒂。

· 全唐诗 ·

卷 301_51 【长安别】

王建

长安清明好时节，只宜相送不宜别。

恶心床上铜片明，照见离人白头发。

卷 301_52 【宫人斜】

王建

未央墙西青草路，宫人斜里红妆墓。

一边载出一边来，更衣不减寻常数。

卷 301_53 【春词】

王建

良人朝早半夜起，樱桃如珠露如水。

下堂把火送郎回，移枕重眠晓窗里。

· 全唐诗 ·

卷 301_54【野池】

王建

野池水满连秋堤，菱花结实蒲叶齐。

川口雨晴风复止，蜻蜓上下鱼东西。

卷 301_55【题崔秀才里居】

王建

自知名出休呈卷，爱去人家远处居。

时复打门无别事，铺头来索买残书。

卷 301_56【酬柏侍御答酒】

王建

茱萸酒法大家同，好是盛来白碗中。

这度自知颜色重，不消诗里弄溪翁。

· 全唐诗 ·

卷 301_57【别药栏】

王建

芍药丁香手里栽，临行一日绕千回。

外人应怪难辞别，总是山中自取来。

卷 301_58【长门】

王建

长门闭定不求生，烧却头花卸却簪。

病卧玉窗秋雨下，遥闻别院唤人声。

卷 301_59【题渭亭】

王建

云开远水傍秋天，沙岸蒲帆隔野烟。

一片蔡州青草色，日西铺在古台边。

· 全唐诗 ·

卷 301_60【过喜祥山馆】

王建

夜过深山算驿程，三回黑地听泉声。

自离军马身轻健，得向溪边尽足行。

卷 301_61【送迁客】

王建

万里潮州一逐臣，悠悠青草海边春。

天涯莫道无回日，上岭还逢向北人。

卷 301_62【废寺】

王建

废寺乱来为县驿，荒松老柏不生烟。

空廊屋漏画僧尽，梁上犹书天宝年。

· 全唐诗 ·

卷 301_63 【题禅师房】

王建

浮生不住叶随风，填海移山总是空。

长向人间愁老病，谁来闲坐此房中。

卷 301_64 【看石楠花】

王建

留得行人忘却归，雨中须是石楠枝。

明朝独上铜台路，容见花开少许时。

卷 301_65 【长安县后亭看画】

王建

水冻横桥雪满地，新排石笋绕巴篱。

县门斜掩无人吏，看画双飞白鹭鸶。

· 全唐诗 ·

卷 301_66 【华岳庙二首】

王建

女巫遮客买神盘，争取琵琶庙里弹。
闻有马蹄生拍树，路人来去向南看。

自移西岳门长锁，一个行人一遍开。
上庙参天今见在，夜头风起觉神来。

卷 301_67 【酬赵侍御】

王建

年少同为邺下游，闲寻野寺醉登楼。
别来衣马从胜旧，争向边尘满白头。

卷 301_68 【镊白】

王建

总道老来无用处，何须白发在前生。
如今不用偷年少，拔却三茎又五茎。

· 全唐诗 ·

卷 301_69 【送山人二首】

王建

嵩山古寺离来久，回见溪桥野叶黄。
辛苦老师看守处，为悬秋药闭空房。

山客狂来跨白驴，袖中遗却颖阳书。
人间亦有妻儿在，抛向嵩阳古观居。

卷 301_70 【扬州寻张籍不见】

王建

别后知君在楚城，扬州寺里觅君名。
西江水阔吴山远，却打船头向北行。

卷 301_71 【宿长安县后斋】

王建

新向金阶奏罢兵，长安县里绕池行。
喜欢得伴山僧宿，看雪吟诗直到明。

· 全唐诗 ·

卷 301_72【夜看扬州市】

王建

夜市千灯照碧云，高楼红袖客纷纷。

如今不似时平日，犹自笙歌彻晓闻。

卷 301_73【寄韦谏议】

王建

百年看似暂时间，头白求官亦未闲。

独有龙门韦谏议，三征不起恋青山。

卷 301_74【寻补阙旧宅】

王建

知得清名二十年，登山上坂乞新篇。

除书近拜侍臣去，空院鸟啼风竹前。

· 全唐诗 ·

卷 301_75【初冬旅游】

王建

远投人宿趁房迟，僮仆伤寒马亦饥。

为客悠悠十月尽，庄头栽竹已过时。

卷 301_76【江馆对雨】

王建

鸟声愁雨似秋天，病客思家一向眠。

草馆门临广州路，夜闻蛮语小江边。

卷 301_77【雨过山村】

王建

雨里鸡鸣一两家，竹溪村路板桥斜。

妇姑相唤浴蚕去，闲看中庭栀子花。

· 全唐诗 ·

卷 301_78【山店】

王建

登登石路何时尽，泱泱溪泉到处闻。

风动叶声山犬吠，一家松火隔秋云。

卷 301_79【雨中寄东溪韦处士】

王建

雨中溪破无干地，浸著床头湿著书。

一个月来山水隔，不知茅屋若为居。

卷 301_80【乞竹】

王建

乞取池西三两竿，房前栽著病时看。

亦知自惜难判割，犹胜横根引出栏。

· 全唐诗 ·

卷 301_81 【人家看花】

王建

年少狂疏逐君马，去来憔悴到京华。

恨无闲地栽仙药，长傍人家看好花。

卷 301_82 【未央风】

王建

五更先起玉阶东，渐入千门万户中。

总向高楼吹舞曲，秋风还不及春风。

卷 301_83 【归山庄】

王建

长安寄食半年余，重向人边乞荐书。

山路独归冲夜雪，落斜骑马避柴车。

· 全唐诗 ·

卷 301_84 【寒食忆归】

王建

京中曹局无多事，寒食贫儿要在家。

遮莫杏园胜别处，亦须归看傍村花。

卷 301_85 【留别张广文】

王建

谢恩新入凤凰城，乱定相逢合眼明。

千万求方好将息，杏花寒食的同行。

卷 301_86 【送郑山人归山】

王建

玉作车辕蒲作轮，当初不起颍阳人。

一家总入嵩山去，天子何因得谏臣。

· 全唐诗 ·

卷 301_87【伤堕水乌】

王建

一乌堕水百乌啼，相吊相号绕故堤。

眼见行人车辗过，不妨同伴各东西。

卷 301_88【看棋】

王建

彼此抽先局势平，傍人道死的还生。

两边对坐无言语，尽日时间闻下子声。

卷 301_89【设酒寄独孤少府】

王建

自看和酿一依方，缘看松花色较黄。

不分君家新酒熟，好诗收得被回将。

· 全唐诗 ·

卷 301_90 【赠人二首】

王建

金炉烟里要班头，欲得归山可自由。
每度报朝愁入阁，在先教示小千牛。

多在蓬莱少在家，越绯衫上有红霞。
朝回不向诸余处，骑马城西检校花。

卷 301_91 【楼前】

王建

天宝年前勤政楼，每年三日作千秋。
飞龙老马曾教舞，闻著音声总举头。

卷 301_92 【寄刘蕡问疾】

王建

年少病多应为酒，谁家将息过今春。
赊来半夏重熏尽，投箸山中旧主人。

· 全唐诗 ·

卷 301_93【听雨】

王建

半夜思家睡里愁，雨声落落屋檐头。

照泥星出依前黑，淹烂庭花不肯休。

卷 301_94【新晴】

王建

夏夜新晴星校少，雨收残水入天河。

檐前熟著衣裳坐，风冷浑无扑火蛾。

卷 301_95【秋日后】

王建

住处近山常足雨，闻晴晒曝旧芳茵。

立秋日后无多热，渐觉生衣不著身。

· 全唐诗 ·

卷 301_96 【哭孟东野二首】

王建

吟损秋天月不明，兰无香气鹤无声。
自从东野先生死，侧近云山得散行。

老松临死不生枝，东野先生早哭儿。
但是洛阳城里客，家传一本杏殇诗。

卷 301_97 【寄蜀中薛涛校书】

王建

万里桥边女校书，枇杷花里闭门居。
扫眉才子于今少，管领春风总不如。

卷 301_98 【路中上田尚书】

王建

去路何词见六亲，手中刀尺不如人。
可怜池阁秋风夜，愁绿娇红一遍新。

· 全唐诗 ·

卷 301_99【于主簿厅看花】

王建

小叶稠枝粉压摧，暖风吹动鹤翎开。

若无别事为留滞，应便抛家宿看来。

卷 301_100【江楼对雨寄杜书记】

王建

竹烟花雨细相和，看著闲书睡更多。

好是主人无事日，应持小酒按新歌。

卷 301_101【观蛮妓】

王建

欲说昭君敛翠蛾，清声委曲怨于歌。

谁家年少春风里，抛与金钱唱好多。

· 全唐诗 ·

卷 301_102【送顾非熊秀才归丹阳】

王建

江城柳色海门烟，欲到茅山始下船。
知道君家当瀑布，菖蒲潭在草堂前。

卷 301_103【老人歌】

王建

白发老人垂泪行，上皇生日出京城。
如今供奉多新意，错唱当时一半声。

卷 301_104【和元郎中从八月十二至十五夜玩月五首】

王建

半秋初入中旬夜，已向阶前守月明。
从未圆时看却好，一分分见傍轮生。

乱云遮却台东月，不许教依次第看。
莫为诗家先见镜，被他笼与作艰难。

· 全唐诗 ·

今夜月明胜昨夜，新添桂树近东枝。
立多地湿舁床坐，看过墙西寸寸迟。

月似圆来色渐凝，玉盆盛水欲侵棱。
夜深尽放家人睡，直到天明不炷灯。

合望月时常望月，分明不得似今年。
仰头五夜风中立，从未圆时直到圆。

卷 301_105【对酒】

王建

为病比来浑断绝，缘花不免却知闻。
从来事事关身少，主领春风只在君。

卷 301_106【晓望华清宫】

王建

晓来楼阁更鲜明，日出阑干见鹿行。
武帝自知身不死，看修玉殿号长生。

· 全唐诗 ·

卷 301_107【赠李愬仆射二首】

王建

和雪翻营一夜行，神旗冻定马无声。
遥看火号连营赤，知是先锋已上城。

旗幡四面下营稠，手诏频来老将忧。
每日城南空挑战，不知生缚入唐州。

卷 301_108【秋夜对雨寄石瓮寺二秀才】

王建

夜山秋雨滴空廊，灯照堂前树叶光。
对坐读书终卷后，自披衣被扫僧房。

卷 301_109【华清宫前柳】

王建

杨柳宫前忽地春，在先惊动探春人。
晓来唯欠骊山雨，洗却枝头绿上尘。

· 全唐诗 ·

卷 301_110【别杨校书】

王建

从军秣马十三年，白发营中听早蝉。
故作老丞身不避，县名昭应管山泉。

卷 301_111【和门下武相公春晓闻莺】

王建

侵黑行飞一两声，春寒啜小未分明。
若教更解诸余语，应向宫花不惜情。

卷 301_112【田侍郎归镇】

王建

去处长将决胜筹，回回身在阵前头。
贼城破后先锋入，看著红妆不敢收。

熨帖朝衣抛战袍，夔龙班里侍中高。
对时先奏牙间将，次第天恩与节旄。

· 全唐诗 ·

踏著家乡马脚轻，暮山秋色眼前明。
老人上酒齐头拜，得侍中来尽再生。

功成谁不拥藩方，富贵还须是本乡。
万里双旌汾水上，玉鞭遥指白云庄。

鼓吹幡旗道两边，行男走女喜骈阗。
旧交省得当时别，指点如今却少年。

广场破阵乐初休，彩纛高于百尺楼。
老将气雄争起舞，管弦回作大缠头。

笳声万里动燕山，草白天清塞马闲。
触处不如别处乐，可怜秋月照江关。

将士请衣忘却贫，绿窗红烛酒楼新。
家家尽踏还乡曲，明月街中不绝人。

卷 301_113【寄广文张博士】

王建

春明门外作卑官，病友经年不得看。
莫道长安近于日，升天却易到城难。

· 全唐诗 ·

卷 301_114 【早春书情】

王建

渐老风光不著人，花溪柳陌早逢春。

近来行到门前少，趁暖闲眠似病人。

卷 301_115 【唐昌观玉蕊花】

王建

一树笼：玉刻成，飘廊点地色轻轻。

女冠夜觅香来处，唯见阶前碎月明。

卷 301_116 【眼病寄同官】

王建

天寒眼痛少心情，隔雾看人夜里行。

年少往来常不住，墙西冻地马蹄声。

· 全唐诗 ·

卷 301_117【九日登丛台】

王建

平原池阁在谁家，双塔丛台野菊花。

零落故宫无入路，西来涧水绕城斜。

卷 301_118【题酸枣县蔡中郎碑】

王建

苍苔满字土埋龟，风雨销磨绝妙词。

不向图经中旧见，无人知是蔡邕碑。

卷 301_119【江陵使至汝州】

王建

回看巴路在云间，寒食离家麦熟还。

日暮数峰青似染，商人说是汝州山。

· 全唐诗 ·

卷 301_120 【十五夜望月寄杜郎中】

王建

中庭地白树栖鸦，
蛩露无声湿桂花。
今夜月明人尽望，
不知秋思在谁家。

卷 301_121 【寄同州田长史】

王建

除听好语耳常聋，
不见诗人眼底空。
莫怪出城为长史，
总缘山在白云中。

卷 301_122 【外按】

王建

夹城门向野田开，
白鹿非时出洞来。
日暮秦陵尘土起，
从东外按使初回。

· 全唐诗 ·

卷三百零二

卷 302-1【宫词一百首】

王建

蓬莱正殿压金螭，红日初生碧海涛。
闲著五门遥北望，柘黄新帕御床高。

殿前传点各依班，召对西来八诏蛮。
上得青花龙尾道，侧身偷觑正南山。

龙烟日暖紫瞳瞳，宣政门当玉殿风。
五刻阁前卿相出，下帘声在半天中。

白玉窗前起草臣，樱桃初赤赐尝新。
殿头传语金阶远，只进词来谢圣人。

内人对御叠花笺，绣坐移来玉案边。
红蜡烛前呈草本，平明舁出阁门宣。

千牛仗下放朝初，玉案傍边立起居。
每日进来金凤纸，殿头无事不多书。

· 全唐诗 ·

延英引对碧衣郎，江砚宣毫各别床。
天子下帘亲考试，宫人手里过茶汤。

未明开著九重关，金画黄龙五色幡。
直到银台排仗合，圣人三殿对西番。

少年天子重边功，亲到凌烟画阁中。
教觅勋臣写图本，长将殿里作屏风。

丹凤楼门把火开，五云金辂下天来。
阶前走马人宣尉，天子南郊一宿回。

楼前立仗看宣赦，万岁声长拜舞齐。
日照彩盘高百尺，飞仙争上取金鸡。

集贤殿里图书满，点勘头边御印同。
真迹进来依数字，别收锁在玉函中。

秘殿清斋刻漏长，紫微宫女夜焚香。
拜陵日近公卿发，卤簿分头入太常。

新调白马怕鞭声，供奉骑来绕殿行。
为报诸王侵早入，隔门催进打球名。

对御难争第一筹，殿前不打背身球。
内人唱好龟兹急，天子鞘回过玉楼。

· 全唐诗 ·

新衫一样殿头黄，银带排方獭尾长。
总把玉鞭骑御马，绿鬟红额麝香香。

罗衫叶叶绣重重，金凤银鹅各一丛。
每遍舞时分两向，太平万岁字当中。

鱼藻宫中锁翠娥，先皇行处不曾过。
如今池底休铺锦，菱角鸡头积渐多。

殿前明日中和节，连夜琼林散舞衣。
传报所司分蜡烛，监开金锁放入归。

五更三点索金车，尽放宫人出看花。
仗下一时催立马，殿头先报内园家。

城东北面望云楼，半下珠帘半上钩。
骑马行人长远过，恐防天子在楼头。

射生宫女宿红妆，把得新弓各自张。
临上马时齐赐酒，男儿跪拜谢君王。

新秋白兔大于拳，红耳霜毛趁草眠。
天子不教人射杀，玉鞭遮到马蹄前。

内鹰笼脱解红绦，斗胜争飞出手高。
直上青云还却下，一双金爪掬花毛。

· 全唐诗 ·

竞渡船头掉采旗，两边溅水湿罗衣。
池东争向池西岸，先到先书上字归。

灯前飞入玉阶虫，未卧常闻半夜钟。
看著中元斋日到，自盘金线绣真容。

红灯睡里唤春云，云上三更直宿分。
金砌雨来行步滑，两人抬起隐花裙。

一时起立吹箫管，得宠人来满殿迎。
整顿衣裳皆著却，舞头当拍第三声。

琵琶先抹六么头，小管丁宁侧调愁。
半夜美人双唱起，一声声出凤凰楼。

春池日暖少风波，花里牵船水上歌。
遥索剑南新样锦，东宫先钓得鱼多。

十三初学擘箜篌，弟子名中被点留。
昨日教坊新进入，并房宫女与梳头。

红蛮杆拨贴胸前，移坐当头近御筵。
用力独弹金殿响，凤凰飞下四条弦。

春风吹雨洒旗竿，得出深宫不怕寒。
夸道自家能走马，团中横过觅人看。

· 全唐诗 ·

粟金腰带象牙锥，散插红翎玉突枝。
旋猎一边还引马，归来鸡兔绕鞍垂。

云駮花骢各试行，一般毛色一般纓。
殿前来往重骑过，欲得君王别赐名。

每夜停灯熨御衣，银熏笼底火霏霏。
遥听帐里君王觉，上直钟声始得归。

因吃樱桃病放归，三年著破旧罗衣。
内中人识从来去，结得金花上贵妃。

欲迎天子看花去，下得金阶却悔行。
恐见失恩人旧院，回来忆著五弦声。

往来旧院不堪修，近敕宣徽别起楼。
闻有美人新进入，六宫未见一时愁。

自夸歌舞胜诸人，恨未承恩出内频。
连夜宫中修别院，地衣帘额一时新。

闷来无处可思量，旋下金阶旋忆床。
收得山丹红蕊粉，镜前洗却麝香黄。

蜂须蝉翅薄松松，浮动搔头似有风。
一度出时抛一遍，金条零落满函中。

· 全唐诗 ·

合暗报来门锁了，夜深应别唤笙歌。
房房下著珠帘睡，月过金阶白露多。

御厨不食索时新，每见花开即苦春。
白日卧多娇似病，隔帘教唤女医人。

丛丛洗手绕金盆，旋拭红巾入殿门。
众里遥抛新摘子，在前收得便承恩。

御池水色春来好，处处分流白玉渠。
密奏君王知入月，唤人相伴洗裙裾。

移来女乐部头边，新赐花檀木五弦。
缠得红罗手帕子，中心细画一双蝉。

新晴草色绿温暾，山雪初消渐出水。
今日踏青归校晚，传声留著望春门。

两楼相换珠帘额，中尉明朝设内家。
一样金盘五千面，红酥点出牡丹花。

尽送春来出内家，记巡传把一枝花。
散时各自烧红烛，相逐行归不上车。

家常爱著旧衣裳，空插红梳不作妆。
忽地下阶裙带解，非时应得见君王。

· 全唐诗 ·

别敕教歌不出房，一声一遍奏君王。
再三博士留残拍，索向宣徽作彻章。

行中第一争先舞，博士傍边亦被欺。
忽觉管弦偷破拍，急翻罗袖不教知。

私缝黄帔舍钗梳，欲得金仙观里居。
近被君王知识字，收来案上检文书。

月冷江清近猎时，玉阶金瓦雪澌澌。
浴室门外抄名入，公主家人谢面脂。

未承恩泽一家愁，乍到宫中忆外头。
求守管弦声款逐，侧商调里唱伊州。

东风泼火雨新休，舁尽春泥扫雪沟。
走马犊车当御路，汉阳宫主进鸡球。

风帘水阁压芙蓉，四面钩栏在水中。
避热不归金殿宿，秋河织女夜妆红。

圣人生日明朝是，私地教人属内监。
自写金花红榜子，前头先进凤凰衫。

避暑昭阳不掷卢，井边含水喷鸦雏。
内中数日无呼唤，拓得滕王蛱蝶图。

· 全唐诗 ·

内宴初秋入二更，殿前灯火一天明。
中宫传旨音声散，诸院门开触处行。

玉蝉金雀三层插，翠髻高丛绿鬓虚。
舞处春风吹落地，归来别赐一头梳。

树叶初成鸟护窠，石榴花里笑声多。

众中遗却金钗子，拾得从他要赎么。

小殿初成粉未乾，贵妃姊妹自来看。
为逢好日先移入，续向街西索牡丹。

内人相续报花开，准拟君王便看来。
逢着五弦琴绣袋，宜春院里按歌回。

巡吹慢遍不相和，暗数看谁曲校多。
明日梨花园里见，先须逐得内家歌。

黄金合里盛红雪，重结香罗四出花。
一一傍边书敕字，中官送与大臣家。

未明东上阁门开，排仗声从后殿来。
阿监两边相对立，遥闻索马一时回。

宫人早起笑相呼，不识阶前扫地夫。
乞与金钱争借问，外头还似此间无。

· 全唐诗 ·

小随阿姊学吹笙，见好君王赐与名。
夜拂玉床朝把镜，黄金殿外不教行。

日高殿里有香烟，万岁声长动九天。
妃子院中初降诞，内人争乞洗儿钱。

宫花不共外花同，正月长生一半红。
供御樱桃看守别，直无鸦鹊到园中。

殿前铺设两边楼，寒食宫人步打球。
一半走来争跪拜，上棚先谢得头筹。

太仪前日暖房来，嘱向朝阳乞药栽。
敕赐一窠红踯躅，谢恩未了奏花开。

御前新赐紫罗襦，步步金阶上软舆。
宫局总来为喜乐，院中新拜内尚书。

鹦鹉谁教转舌关，内人手里养来奸。
语多更觉承恩泽，数对君王忆陇山。

分朋闲坐赌樱桃，收却投壶玉腕劳。
各把沈香双陆子，局中斗累阿谁高。

禁寺红楼内里通，笙歌引驾夹城东。
裹头宫监堂前立，手把牙鞘竹弹弓。

· 全唐诗 ·

春风院院落花堆，金锁生衣掣不开。
更筑歌台起妆殿，明朝先进画图来。

舞来汗湿罗衣彻，楼上人扶下玉梯。
归到院中重洗面，金花盆里泼银泥。

宿妆残粉未明天，总立昭阳花树边。
寒食内人长白打，库中先散与金钱。

众中偏得君王笑，偷把金箱笔砚开。
书破红蛮隔子上，旋推当直美人来。

教遍宫娥唱遍词，暗中头白没人知。
楼中日日歌声好，不问从初学阿谁。

青楼小妇研裙长，总被抄名入教坊。
春设殿前多队舞，朋头各自请衣裳。

水中芹叶土中花，拾得还将避众家。
总待别人般数尽，袖中拈出郁金香。

玉箫改调箏移柱，催换红罗绣舞筵。
未戴柘枝花帽子，两行宫监在帘前。

窗窗户户院相当，总有珠帘玳瑁床。
虽道君王不来宿，帐中长是炷牙香。

· 全唐诗 ·

雨入珠帘满殿凉，避风新出玉盆汤。
内人恐要秋衣着，不住熏笼换好香。

金吾除夜进雉名，画袴朱衣四队行。
院院烧灯如白日，沈香火底坐吹笙。

树头树底觅残红，一片西飞一片东。
自是桃花贪结子，错教人恨五更风。

金殿当头紫阁重，仙人掌上玉芙蓉。
太平天子朝迎日，五色云车驾六龙。

鸳鸯瓦上瞥然声，昼寝宫娥梦里惊。
元是我王金弹子，海棠花下打流莺。

忽地金舆向月陂，内人接著便相随。
却回龙武军前过，当处教开卧鸭池。

画作天河刻作牛，玉梭金镊采桥头。
每年宫里穿针夜，敕赐诸亲乞巧楼。

春来睡困不梳头，懒逐君王苑北游。
暂向玉花阶上坐，簸钱赢得两三筹。

步行送入长门里，不许来辞旧院花。
只恐他时身到此，乞恩求赦放还家。

· 全唐诗 ·

缣罗不著索轻容，对面教人染退红。
衫子成来一遍出，明朝半片在园中。

弹棋玉指两参差，背局临虚斗著危。
先打角头红子落，上三金字半边垂。

后宫宫女无多少，尽向园中笑一团。
舞蝶落花相觅著，春风共语亦应难。

宛转黄金白柄长，青荷叶子画鸳鸯。
把来不是呈新样，欲进微风到御床。

供御香方加减频，水沈山麝每回新。
内中不许相传出，已被医家写与人。

药童食后送云浆，高殿无风扇少凉。
每到日中重掠鬓，衩衣骑马绕宫廊。

卷 302_2【句】

王建

单于不向南牧马，席萁遍满天山下。

却公不易胜，莫著外家欺。

· 全唐诗 ·

锦江诗弟子，时寄五花笺。

花烧落第眼，雨破到家程。

一朝金凤庭前下，当是虚皇诏沈曦。

宣城四面水茫茫，草盖江城竹夹墙。

· 全唐诗 ·

卷三百零三

卷 303_1 【铜雀妓】

刘商

魏主矜蛾眉，美人美于玉。高台无昼夜，歌舞竟未足。
盛色如转圜，夕阳落深谷。仍令身歿后，尚纵平生欲。
红粉泪纵横，调弦向空屋。举头君不在，惟见西陵木。
玉辇岂再来，娇鬟为谁绿。那堪秋风里，更舞阳春曲。
曲罢情不胜，凭阑向西哭。台边生野草，来去芻罗穀。
况复陵寝间，双双见麋鹿。

卷 303_2 【哭韩淮端公兼上崔中丞】

刘商

坚贞与和璧，利用归干将。金玉徒自宝，高贤无比方。
挺生岩松姿，孤直凌雪霜。亭亭结清阴，不竞桃李芳。
读书晒霸业，翊赞思皇王。千载有疑议，一言能否臧。
儒风久沦弊，颜闵寿不长。邦国岂殄瘁，斯人今又亡。
别离长春草，存没隔楚乡。闻问尚书恸，泪凝向日黄。

· 全唐诗 ·

奄忽薤露晞，杳冥泉夜长。贤愚自修短，天色空苍苍。
铭旌敛归魂，荆棘生路傍。门柳日萧索，繡帷掩空堂。
灯孤晦处明，高节歿后彰。芳兰已灰炆，幕府留馥香。
常爱独坐尊，綉衣如雁行。至今虚左位，言发泪沾裳。

卷 303_3 【秋夜听严绅巴童唱竹枝歌】

刘商

巴人远从荆山客，回首荆山楚云隔。思归夜唱竹枝歌，
庭槐叶落秋风多。曲中历历叙乡土，乡思绵绵楚词古。
身骑吴牛不畏虎，手提蓑笠欺风雨。猿啼日暮江岸边，
绿芜连山水连天。来时十三今十五，一成新衣已再补。
鸿雁南飞报邻伍，在家欢乐辞家苦。天晴露白钟漏迟，
泪痕满面看竹枝。曲终寒竹风袅袅，西方落日东方晓。

卷 303_4 【乌夜啼】

刘商

绕树哑哑惊复栖，含烟碧树高枝齐。月明露湿枝亦滑，
城上女墙西月低。愁人出户听乌啼，团团明月堕墙西。
月中有桂树，日中有伴侣。何不上天去，一声啼到曙。

· 全唐诗 ·

卷 303_5【随阳雁歌送兄南游】

刘商

塞鸿声声飞不住，终日南征向何处。大漠穷阴多沍寒，
分飞不得长怀安。春去秋来年岁疾，湖南蓟北关山难。
寒飞万里胡天雪。夜度千门汉家月。去住应多两地情，
东西动作经年别。南州风土复何如，春雁归时早寄书。

卷 303_6【赋得射雉歌送杨律表弟赴婚期】

刘商

昔日才高容貌古，相敬如宾不相睹。手奉蘋蘩喜盛门，
心知礼义感君恩。三星照户春空尽，一树桃花竟不言。
结束车舆强游往，和风霁日东皋上。鸾凤参差陌上行，
麦苗萦陇雉初鸣。修容尽饰将何益，极虑呈材欲导情。
六艺从师得机要，百发穿杨含绝妙。白羽风驰碎锦毛，
青娥怨处嫣然笑。杨生词赋比潘郎，不似前贤貌不扬。
听调琴弄能和室，更解弯弧足自防。秋深为尔持圆扇，
莫忘鲁连飞一箭。

· 全唐诗 ·

卷 303_7【泛舒城南溪，赋得沙鹤歌奉饯张侍御赴河南、元博士赴扬州拜覲仆射】

刘商

终日间阎逐群鸡，喜逢野鹤临清溪。绿苔春水水中影，
夜月平沙沙上栖。惊谓汀洲白蘋发，又疑曲渚前年雪。
紫顶昂藏肯狎人，一声嘹亮冲天阙。素质翩翩带落晖，
湖南渭阳相背飞。东西分散别离促，宇宙苍茫相见稀。
皇华地仙如鹤驭，乘驾飘飘留不住。延望乘虚入紫霞，
陌头回首空烟树。会使抟风羽翮轻，九霄云路随先鸣。

卷 303_8【姑苏怀古送秀才下第归江南】

刘商

姑苏台枕吴江水，层级鳞差向天倚。秋高露白万林空，
低望吴田三百里。当时雄盛如何比，千仞无万根立平地。
台前夹月吹玉鸾，台上迎凉撼金翠。银河倒泻君王醉，
滟酒峨冠眄西子。宫娃酣态舞娉婷，香飙四飒青城坠。
伍员结舌长嘘噓，忠谏无因到君耳。城乌啼尽海霞销，
深掩金屏日高睡。王道潜隳伍员死，可叹斗间瞻王气。
会稽勾践拥长矛，万马鸣蹄扫空垒。瓦解冰销真可耻，
凝艳妖芳安足恃。可怜荒堞晚冥濛，麋鹿呦呦达遗址。
君怀逸气还东吴，吟狂日日游姑苏。兴来下笔到奇景，

· 全唐诗 ·

瑶盘进洒蛟人珠。大鹏矫翼翻云衢，嵩峰霁后凌天孤。
海潮秋打罗刹石，月魄夜当彭蠡湖。有时凝思家虚无，
霓幢仿佛游仙都。琳琅暗戛玉华殿，天香静袅金芙蕖。
君声日下闻来久，清贍何人敢敌手。我逃名迹遁西林，
不得灞陵倾别酒。莫便五湖为隐沦，年年三十升仙人。

卷 303_9【金井歌】

刘商

文明化洽天地清，和气氤氲孕至灵。瑞雪不散抱层岭，
阳谷霞光射山顶。薤草披沙石窦开，生金曜日明金井。
虞衡相贺为祯祥，畏人采攫持殳戕。羊驰马走尘满道，
郡邸封章开建章。君王俭德先简易，贍国肥家在仁义。
山泽藏金与万人，宣言郡邑无专利。闾阎少长竞奔凑，
黄金满袖家富有。欢心蹈舞歌皇风，愿载讴歌青史中。

卷 303_10【柳条歌送客】

刘商

露井夭桃春未到，迟日犹寒柳开早。高枝低枝飞鹂黄，
千条万条覆宫墙。几回离别折欲尽，一夜东风吹又长。
毵毵拂人行不进，依依送君无远近。青春去住随柳条，
却寄来人以为信。

· 全唐诗 ·

卷 303_11【胡笳十八拍·第一拍】

刘商

汉室将衰兮四夷不宾，动干戈兮征战频。
哀哀父母生育我，见离乱兮当此辰。纱窗对镜未经事，
将谓珠帘能蔽身。一朝胡骑入中国，苍黄处处逢胡人。
忽将薄命委锋镝，可惜红颜随虏尘。

卷 303_12【胡笳十八拍·第二拍】

刘商

马上将余向绝域，厌生求死死不得。戎羯腥膻岂是人，
豺狼喜怒难姑息。行尽天山足霜霰，风土萧条近胡国。
万里重阴鸟不飞，寒沙莽莽无南北。

卷 303_13【胡笳十八拍·第三拍】

刘商

如羈囚兮在縲紲，忧虑万端无处说。使余刀兮剪余发，
食余肉兮饮余血。诚知杀身愿如此，以余为妻不如死。
早被蛾眉累此身，空悲弱质柔如水。

· 全唐诗 ·

卷 303_14【胡笳十八拍·第四拍】

刘商

山川路长谁记得，何处天涯是乡国。自从惊怖少精神，
不觉风霜损颜色。夜中归梦来又去，朦胧岂解传消息。
漫漫胡天叫不闻，明明汉月应相识。

卷 303_15【胡笳十八拍·第五拍】

刘商

水头宿兮草头坐，风吹汉地衣裳破。羊脂沐发长不梳，
羔子皮裘领仍左。狐襟貉袖腥复膻，昼披行兮夜披卧。
毡帐时移无定居，日月长兮不可过。

卷 303_16【胡笳十八拍·第六拍】

刘商

怪得春光不来久，胡中风土无花柳。天翻地覆谁得知，
如今正南看北斗。姓名音信两不通，终日经年常闭口。
是非取与在指撝，言语传情不如手。

· 全唐诗 ·

卷 303_17【胡笳十八拍·第七拍】

刘商

男儿妇人带弓箭，塞马蕃羊卧霜霰。寸步东西岂自由，
偷生乞死非情愿。龟兹鬻策愁中听，碎叶琵琶夜深怨。
竟夕无云月上天，故乡应得重相见。

卷 303_18【胡笳十八拍·第八拍】

刘商

忆昔私家恣娇小，远取珍禽学驯扰。如今沦弃念故乡，
悔不当初放林表。朔风萧萧寒日暮，星河寥落胡天晓。
旦夕思归不得归，愁心想似笼中鸟。

卷 303_19【胡笳十八拍·第九拍】

刘商

当日苏武单于问，道是宾鸿解传信。学他刺血写得书，
书上千重万重恨。髯胡少年能走马，弯弓射飞无远近。
遂令边雁转怕人，绝域何由达方寸。

· 全唐诗 ·

卷 303_20 【胡笳十八拍 · 第十拍】

刘商

恨凌辱兮恶腥膻，憎胡地兮怨胡天。生得胡儿欲弃捐，
及生母子情宛然。貌殊语异憎还爱，心中不觉常相牵。
朝朝暮暮在眼前，腹生手养宁不怜。

卷 303_21 【胡笳十八拍 · 第十一拍】

刘商

日来月往相催迁，迢迢星岁欲周天。无冬无夏卧霜霰，
水冻草枯为一年。汉家甲子有正朔，绝域三光空自悬。
几回鸿雁来又去，肠断蟾蜍亏复圆。

卷 303_22 【胡笳十八拍 · 第十二拍】

刘商

破瓶落井空永沈，故乡望断无归心。宁知远使问姓名，
汉语泠泠传好音。梦魂几度到乡国，觉后翻成哀怨深。
如今果是梦中事，喜过悲来情不任。

· 全唐诗 ·

卷 303_23【胡笳十八拍·第十三拍】

刘商

童稚牵衣双在侧，将来不可留又忆。还乡惜别两难分，
宁弃胡儿归旧国。山川万里复边戍，背面无由得消息。
泪痕满面对残阳，终日依依向南北。

卷 303_24【胡笳十八拍·第十四拍】

刘商

莫以胡儿可羞耻，恩情亦各言其子。手中十指有长短，
截之痛惜皆相似。还乡岂不见亲族，念此飘零隔生死。
南风万里吹我心，心亦随风度辽水。

卷 303_25【胡笳十八拍·第十五拍】

刘商

叹息襟怀无定分，当时怨来归又恨。不知愁怨情若何，
似有锋铓扰方寸。悲欢并行情未快，心意相尤自相问。
不缘生得天属亲，岂向仇讎结恩信。

· 全唐诗 ·

卷 303_26【胡笳十八拍·第十六拍】

刘商

去时只觉天苍苍，归日始知胡地长。重阴白日落何处，
秋雁所向应南方。平沙四顾自迷惑，远近悠悠随雁行。
征途未尽马蹄尽，不见行人边草黄。

卷 303_27【胡笳十八拍·第十七拍】

刘商

行尽胡天千万里，唯见黄沙白云起。马饥跑雪衔草根，
人渴敲冰饮流水。燕山仿佛辨烽戍，鼙鼓如闻汉家垒。
努力前程是帝乡，生前免向胡中死。

卷 303_28【胡笳十八拍·第十八拍】

刘商

归来故乡见亲族，田园半芜春草绿。明烛重燃煨烬灰，
寒泉更洗沈泥玉。载持巾栉礼仪好，一弄丝桐生死足。
出入关山十二年，哀情尽在胡笳曲。

· 全唐诗 ·

卷 303_29 【杂言同豆卢郎中郭南七里桥哀悼姚仓曹】

刘商

桥边足离别，终日为悲辛。登桥因叹逝，却羡别离人。
桥下东流水，芳树樱桃蕊。流水与潮回，花落明年开。
可怜三语掾，长作九泉灰。宿昔欢游在何处，
花前饮足求仙去。

卷 303_30 【春日卧病】

刘商

楚客经年病，孤舟人事稀。晚晴江柳变，春暮塞鸿归。
今日方知命，前身自觉非。不能忧岁计，无限故山薇。

卷 303_31 【题禅居废寺】

刘商

凋残精舍在，连步访缁衣。古殿门空掩，杨花雪乱飞。
鹤巢松影薄，僧少磬声稀。青眼能留客，疏钟逼夜归。

· 全唐诗 ·

卷 303_32 【题山寺】

刘商

扁舟水淼淼，曲岸复长塘。古寺春山上，登楼忆故乡。
云烟横极浦，花木拥回廊。更有思归意，晴明陟上方。

卷 303_33 【题杨侍郎新亭】

刘商

毗陵过柱史，简易在茅茨。芳草如花种，修篁带笋移。
径幽人未赏，檐静燕初窥。野客怜霜壁，静松画一枝。

卷 303_34 【同徐城季明府游重光寺题晃师壁】

刘商

野寺僧房远，陶潜引客来。鸟喧残果落，兰败几花开。
真性知无住，微言欲望回。竹风清磬晚，归策步苍苔。

· 全唐诗 ·

卷 303_35【送林袞侍御东阳秩满赴上都】

刘商

几年乌府内，何处逐凫归。关吏迷骢马，铜章累绣衣。
野亭山草绿，客路柳花飞。况复长安远，音书从此稀。

卷 303_36【送人之江东】

刘商

含香仍佩玉，宜入镜中行。尽室随乘兴，扁舟不计程。
渡江霖雨霁，对月夜潮生。莫虑当炎暑，稽山水木清。

卷 303_37【送李元规昆季赴举】

刘商

见诵甘泉赋，心期折桂归。凤雏皆五色，鸿渐又双飞。
别思看衰柳，秋风动客衣。明朝问礼处，暂觉雁行稀。

· 全唐诗 ·

卷 303_38 【送杨闲侍御拜命赴上都】

刘商

贺客移星使，丝纶出紫微。手中霜作简，身上绣为衣。
骢马朝天疾，台乌向日飞。亲朋皆避路，不是送人稀。

卷 303_39 【赋得月下闻蛩送别】

刘商

物候改秋节，炎凉此夕分。暗虫声遍草，明月夜无云。
清迥檐外见，凄其篱下闻。感时兼惜别，羁思自纷纷。

卷 303_40 【重阳日寄上饶李明府】

刘商

重阳秋雁未衔芦，始觉他乡节候殊。旅馆但知闻蟋蟀，
邮童不解献茱萸。陶潜何处登高醉，倦客停桡一事无。
来岁公田多种黍，莫教黄菊笑杨朱。

· 全唐诗 ·

卷 303_41 【同诸子哭张元易】

刘商

盛德高名总是空，神明福善大朦胧。游魂永永无归日，
流水年年自向东。素帷旅榭乡关远，丹旆孤灯客舍中。
伯道共悲无后嗣，孀妻老母断根蓬。

卷 303_42 【合肥至日愁中寄郑明府】

刘商

失计为卑吏，三年滞楚乡。不能随世俗，应是昧行藏。
白璧空无玷，黄沙只自伤。暮天乡思乱，晓镜鬓毛苍。
灰管移新律，穷阴变一阳。岁时人共换，幽愤日先长。
拙宦惭知己，无媒悔自强。迍邅羞薄命，恩惠费余光。
众口诚难称，长川却易防。鱼竿今尚在，行此掉沧浪。

卷 303_43 【送庐州贾使君拜命】

刘商

考绩朝称贵，时清武用文。二天移外府，三命佐元勋。
佩玉兼高位，攄金阅上军。威容冠是铁，图画阁名芸。

· 全唐诗 ·

人咏甘棠茂，童谣竹马群。悬旌风肃肃，卧辙泪纷纷。
特达恩难报，升沈路易分。侯嬴不得从，心逐信陵君。

· 全唐诗 ·

卷三百零四

卷 304_1 【怨妇】

刘商

净扫黄金阶，飞霜皎如雪。下帘弹箜篌，不忍见秋月。

卷 304_2 【绿珠怨】

刘商

从来上台榭，不敢倚阑干。零落知成血，高楼直下看。

卷 304_3 【古意】

刘商

达晓寝衣冷，开帷霜露凝。风吹昨夜泪，一片枕前冰。

· 全唐诗 ·

卷 304_4【哭萧抡】

刘商

何处哭故人，青门水如箭。当时水头别，从此不相见。

卷 304_5【送从弟赴上都】

刘商

车骑秦城远，囊装楚客贫。月明思远道，诗罢诉何人。

卷 304_6【登相国寺阁】

刘商

晴日登临好，春风各望家。垂杨夹城路，客思逐杨花。

卷 304_7【酬濬上人采药见寄】

刘商

玉英期共采，云岭独先过。应得灵芝也，诗情一倍多。

· 全唐诗 ·

卷 304_8【曲水寺枳实】

刘商

枳实绕僧房，攀枝置药囊。洞庭山上橘，霜落也应黄。

卷 304_9【酬问师】

刘商

虚空无处所，仿佛似琉璃。诗境何人到，禅心又过诗。

卷 304_10【殷秀才求诗】

刘商

倾盖见芳姿，晴天琼树枝。连城犹隐石，唯有卞和知。

卷 304_11【行营即事】

刘商

万姓厌干戈，三边尚未和。将军夸宝剑，功在杀人多。

· 全唐诗 ·

卷 304_12 【送刘寰北归】

刘商

南巢登望县城孤，半是青山半是湖。

知尔素多山水兴，此回归去更来无。

卷 304_13 【送王閏归苏州】

刘商

深山穷谷没人来，邂逅相逢眼渐开。

云鹤洞宫君未到，夕阳帆影几时回。

卷 304_14 【送人往虔州】

刘商

莫叹乘轺道路賒，高楼日日望还家。

人到南康皆下泪，唯君笑向此中花。

· 全唐诗 ·

卷 304_15 【送僧往湖南】

刘商

闲出东林日影斜，稻苗深浅映袈裟。

船到南湖风浪静，可怜秋水照莲花。

卷 304_16 【送元使君自楚移越】

刘商

露冕行春向若耶，野人怀惠欲移家。

东风二月淮阴郡，唯见棠梨一树花。

卷 304_17 【移居深山谢别亲故】

刘商

不食皇精不采薇，葛苗为带草为衣。

孤云更入深山去，人绝音书雁自飞。

· 全唐诗 ·

卷 304_18 【送王永二首】

刘商

君去春山谁共游，鸟啼花落水空流。
如今送别临溪水，他日相思来水头。

绵衣似热夹衣寒，时景虽和春已阑。
诚知暂别那惆怅，明日藤花独自看。

卷 304_19 【送别】

刘商

灞岸青门有弊庐，昨来闻道半丘墟。
陌头空送长安使，旧里无人可寄书。

卷 304_20 【送王贞】

刘商

清阳玉润复多才，邂逅佳期过早梅。
槿花亦可浮杯上，莫待东篱黄菊开。

· 全唐诗 ·

卷 304_21 【送薛六暂游扬州】

刘商

志在乘轩鸣玉珂，心期未快隐青萝。

广陵行路风尘合，城郭新秋砧杵多。

卷 304_22 【送杨行元赴举】

刘商

晚渡邗沟惜别离，渐看烽火马行迟。

千钧何处穿杨叶，二月长安折桂枝。

卷 304_23 【行营送人】

刘商

鞞鼓喧喧对古城，独寻归鸟马蹄轻。

回来看觅莺飞处，即是将军细柳营。

· 全唐诗 ·

卷 304_24 【滑州送人先归】

刘商

河水冰消雁北飞，寒衣未足又春衣。

自怜漂荡经年客，送别千回独未归。

卷 304_25 【送濬上人】

刘商

木落前山霜露多，手持寒锡远头陀。

眼看庭树梅花发，不见诗人独咏歌。

卷 304_26 【高邮送弟遇北游】

刘商

门临楚国舟船路，易见行人易别离。

今日送君心最恨，孤帆水下又风吹。

· 全唐诗 ·

卷 304_27 【送豆卢郎赴海陵】

刘商

烟波极目已沾襟，路出东塘水更深。

看取海头秋草色，一如江上别离心。

卷 304_28 【送女子】

刘商

青娥宛宛聚为裳，乌鹊桥成别恨长。

惆怅梧桐非旧影，不悲鸿雁暂随阳。

卷 304_29 【酬道芬寄画松】

刘商

闻道铅华学沈宁，寒枝淅沥叶青青。

一株将比囊中树，若个年多有茯苓。

· 全唐诗 ·

卷 304_30 【山翁持酒相访以画松酬之】

刘商

白社风霜惊暮年，铜瓶桑落慰秋天。

怜君意厚留新画，不著松枝当酒钱。

卷 304_31 【题潘师房】

刘商

渡水傍山寻石壁，白云飞处洞门开。

仙人来往行无迹，石径春风长绿苔。

卷 304_32 【谢自然却还旧居】

刘商

仙侣招邀自有期，九天升降五云随。

不知辞罢虚皇日，更向人间住几时。

· 全唐诗 ·

卷 304_33【寄李甫】

刘商

挂却衣冠披薜荔，世人应是笑狂愚。

年来渐觉髭须黑，欲寄松花君用无。

卷 304_34【赠头陀师】

刘商

少壮从戎马上飞，雪山童子未缁衣。

秋山年长头陀处，说我军前射虎归。

卷 304_35【赠严四草屨】

刘商

轻微菅蒯将何用，容足偷安事颇同。

日入信陵宾馆静，赠君闲步月明中。

· 全唐诗 ·

卷 304_36 【题刘偃庄】

刘商

何事退耕沧海畔，闲看富贵白云飞。

门前种稻三回熟，县里官人四考归。

卷 304_37 【题黄陂夫人祠】

刘商

苍山云雨逐明神，唯有香名万岁春。

东风三月黄陂水，只见桃花不见人。

卷 304_38 【题道济上人房】

刘商

何处营求出世间，心中无事即身闲。

门外水流风叶落，唯将定性对前山。

· 全唐诗 ·

卷 304_39【梨树阴】

刘商

福庭人静少攀援，雨露偏滋影易繁。
磊落紫香香亚树，清阴满地昼当轩。

卷 304_40【秋蝉声】

刘商

萧条旅舍客心惊，断续僧房静又清。
借问蝉声何所为，人家古寺两般声。

卷 304_41【归山留别子侄二首】

刘商

车马驱驰人在世，东西南北鹤随云。
莫言贫病无留别，百代簪缨将付君。

不逐浮云不羨鱼，杏花茅屋向阳居。
鹤鸣华表应传语，雁度霜天懒寄书。

· 全唐诗 ·

卷 304_42 【与湛上人院画松】

刘商

水墨乍成岩下树，摧残半隐洞中云。

猷公曾住天台寺，阴雨猿声何处闻。

卷 304_43 【白沙宿窦常宅观妓】

刘商

扬子澄江映晚霞，柳条垂岸一千家。

主人留客江边宿，十月繁霜见杏花。

卷 304_44 【上巳日两县寮友会集，时主邮不遂驰赴，辄题以寄方寸】

刘商

踏青看竹共佳期，春水晴山祓禊词。

独坐邮亭心欲醉，樱桃落尽暮愁时。

· 全唐诗 ·

卷 304_45 【怀张璪】

刘商

苔石苍苍临涧水，阴风袅袅动松枝。

世间唯有张通会，流向衡阳那得知。

卷 304_46 【与于中丞】

刘商

万顷荒林不敢看，买山容足拟求安。

田园失计全芜没，何处春风种蕙兰。

卷 304_47 【袁十五远访山门】

刘商

僻居谋道不谋身，避病桃源不避秦。

远入青山何所见，寒花满径白头人。

· 全唐诗 ·

卷 304_48 【行营病中】

刘商

心许征南破虏归，可言羸病卧戎衣。

迟迟不见怜弓箭，惆怅秋鸿敢近飞。

卷 304_49 【合溪水涨寄敬山人】

刘商

共爱碧谿临水住，相思来往践莓苔。

而今却欲嫌溪水，雨涨春流隔往来。

卷 304_50 【不羡花】

刘商

惆怅朝阳午又斜，剩栽桃李学仙家。

花开花落人如旧，谁道容颜不及花。

· 全唐诗 ·

卷 304_51【醉后】

刘商

春草秋风老此身，一瓢长醉任家贫。
醒来还爱浮萍草，漂寄官河不属人。

卷 304_52【题水洞二首】

刘商

桃花流出武陵洞，梦想仙家云树春。
今看水入洞中去，却是桃花源里人。

长看岩穴泉流出，忽听悬泉入洞声。
莫摘山花抛水上，花浮出洞世人惊。

卷 304_53【代人村中悼亡二首】

刘商

花落茅檐转寂寥，魂随暮雨此中销。
迩来庭柳无人折，长得垂枝一万条。

· 全唐诗 ·

虚室无人乳燕飞，苍苔满地履痕稀。
庭前唯有蔷薇在，花似残妆叶似衣。

卷 304_54【观猎三首】

刘商

梦非熊虎数年间，驱尽豺狼宇宙闲。
传道单于闻校猎，相期不敢过阴山。

日隐寒山猎未归，鸣弦落羽雪霏霏。
梁园射尽南飞雁，淮楚人惊阳鸟啼。

松月东轩许独游，深恩未报复淹留。
梁园日暮从公猎，每过青山不举头。

卷 304_55【画石】

刘商

苍藓千年粉绘传，坚贞一片色犹全。
那知忽遇非常用，不把分铢补上天。

· 全唐诗 ·

卷 304_56 【咏双开莲花】

刘商

菡萏新花晓并开，浓妆美笑面相隈。
西方采画迦陵鸟，早晚双飞池上来。

卷 304_57 【夜闻邻管】

刘商

何事霜天月满空，鹧雏百啭向春风。
邻家思妇更长短，杨柳如丝在管中。

卷 304_58 【山中寄元二侍御二首】

刘商

心期汗漫卧云扃，家计漂零水上萍。
桃李向秋凋落尽，一枝松色独青青。

拖紫锵金济世才，知君倚玉望三台。
深山穷谷无人到，唯有狂愚独自来。

· 全唐诗 ·

卷 304_59 【上崔十五老丈】

刘商

天汉乘槎可问津，寂寥深景到无因。
看花独往寻诗客，不为经时谒丈人。

卷 304_60 【袁德师求画松】

刘商

柏偃松N 势自分，森梢古意出浮云。
如今眼暗画不得，旧有三株持赠君。

卷 304_61 【早夏月夜问王开】

刘商

清风首夏夜犹寒，嫩笋侵阶竹数竿。
君向苏台长见月，不知何事此中看。

· 全唐诗 ·

卷 304_62 【裴十六厅即事】

刘商

主人能政讼庭闲，帆影云峰户牖间。
每到夕阳岚翠近，只言篱障倚前山。

卷 304_63 【春日行营即事】

刘商

风引双旌马首齐，曹南战胜日平西。
为儒不解从戎事，花落春深闻鼓鼙。

卷 304_64 【画树后呈濬师】

刘商

翔凤边风十月寒，苍山古木更摧残。
为君壁上画松柏，劲雪严霜君试看。

· 全唐诗 ·

卷 304_65 【吊从甥】

刘商

日晚河边访茆独，衰柳寒芜绕茅屋。
儿童惊走报人来，孀妇开门一声哭。

卷 304_66 【句】

刘商

邮筒不解献茱萸。
赵侯首带鹿耳巾，规模出自陶弘景。

· 全唐诗 ·

卷三百零五

卷 305_1【登城楼作】

陈翊

井邑白云间，严城远带山。沙墟阴欲暮，郊色淡方闲。
孤径回榕岸，层峦破枳关。寥寥分远望，暂得一开颜。

卷 305_2【宴柏台】

陈翊

华台陈桂席，密榭宴清真。柏叶犹霜气，桃花似汉津。
青尊照深夕，绿绮映芳春。欲忆相逢后，无言岭海人。

卷 305_3【过马侍中亭】

陈翊

草色照双扉，轩车到客稀。苔衣香屐迹，花绶少尘飞。

· 全唐诗 ·

薄望怜池净，开畦爱雨肥。相过忘日昃，坐待白云归。

卷 305_4【寄邵校书楚苕】

陈翊

爱酒时称僻，高情自不凡。向人方白眼，违俗有青岩。
云际开三径，烟中挂一帆。相期同岁晚，闲兴与松杉。

卷 305_5【龙池青草】

陈翊

青春光凤苑，细草遍龙池。曲渚交蘋叶，回塘惹柳枝。
因风初冉冉，覆岸欲离离。色带金堤静，阴连玉树移。
日光浮霾靡，波影动参差。岂比生幽远，芳馨众不知。

卷 305_6【郊行示友人】

陈翊

水开长镜引诸峦，春洞花深落翠寒。

· 全唐诗 ·

卷 305_7【送别萧二】

陈翊

橘花香覆白蘋洲，江引轻帆入远游。
千里云天风雨夕，忆君不敢再登楼。

卷 305_8【游仙】

刘复

税驾倚扶桑，逍遥望九州。二老佐轩辕，移戈戮蚩尤。
功成弃之去，乘龙上天游。天上见玉皇，寿与天地休。
俯视昆仑宫，五城十二楼。王母何窈眇，玉质清且柔。
扬袂折琼枝，寄我天东头。相思千万岁，大运浩悠悠。
安用知吾道，日月不能周。寄音青鸟翼，谢尔碧海流。

卷 305_9【寺居清晨】

刘复

高枕对晓月，衣巾清且凉。露华朝未晞，滴沥含虚光。
隔竹闻汲井，开扉见焚香。幽心感衰病，结念依法王。
青冥早云飞，杳霭空鸟翔。此情皆有释，悠然知所忘。

· 全唐诗 ·

卷 305_10 【出东城】

刘复

步出东城门，独行已彷徨。伊洛泛清流，密林含朝阳。
芳景虽可瞩，忧怀在中肠。人生几何时，苒苒随流光。
愿得心所亲，尊酒坐高堂。一为浮沉隔，会合殊未央。
双戏水中鳬，和鸣自翱翔。我无此羽翼，安可以比方。

卷 305_11 【经禁城】

刘复

日没路且长，游子欲涕零。荒城无人路，秋草飞寒萤。
东南古丘墟，莽苍驰郊垌。黄云晦断岸，枯井临崩亭。
昔人竟何之，穷泉独冥冥。苍苔没碑版，朽骨无精灵。
俯仰寄世间，忽如流波萍。金石非汝寿，浮生等臊腥。
不如学神仙，服食求丹经。

卷 305_12 【出三城留别幕中三判官】

刘复

翔禽托高柯，倦客念主人。恩义有所知，四海同一身。

· 全唐诗 ·

况皆旷大姿，翰音见良辰。陈规佐武略，高视据要津。
常愿投素诚，今果得所申。金罍列四座，广厦无氛尘。
留连徂暑中，观望历数旬。河山险以固，士卒勇且仁。
饬装去未归，相追越城闉。愧无青玉案，緘佩永不泯。

卷 305_13 【送刘秀才南归】

刘复

鸟啼杨柳垂，此别千万里。古路入商山，春风生灞水。
停车落日在，罢酒离人起。蓬户寄龙沙，送归情讵已。

卷 305_14 【送王伦】

刘复

春江日未曛，楚客酣送君。翩翩孤黄鹤，万里沧洲云。
四方各有志，岂得常顾群。山连巴湘远，水与荆吴分。
清光日修阻，尺素安可论。相思寄梦寐，瑶草空氛氲。

卷 305_15 【长相思】

刘复

长相思，在桂林，苍梧山远潇湘深。秋堂零泪倚金瑟，

· 全唐诗 ·

朱颜摇落随光阴。长宵嘹唳鸿命侣，河汉苍苍隔牛女。
宁知一水不可渡，况复万山修且阻。彩丝织绮文双鸳，
昔时赠君君可怜。何言一去瓶落井，流尘歇灭金炉前。

卷 305_16【长歌行】

刘复

淮南木落秋云飞，楚宫商歌今正悲。青春白日不与我，
当垆举酒劝君持。出门驱驰四方事，徒用辛勤不得意。
三山海底无见期，百龄世间莫虚弃。
君不见金城帝业汉家有，东制诸侯欲长久。
奸雄窃命风尘昏，函谷重关不能守。龙蛇出没经两朝，
胡虏凭陵大道销。河水东流宫阙尽，五陵松柏自萧萧。

卷 305_17【春游曲】

刘复

春风戏狭斜，相见莫愁家。细酌蒲桃酒，娇歌玉树花。
裁衫催白纻，迎客走朱车。不觉重城暮，争栖柳上鸦。

· 全唐诗 ·

卷 305_18【杂曲】

刘复

宝剑饰文犀，当风似切泥。逢君感意气，貰酒杜陵西。

赵女颜虽少，宛驹齿正齐。娇多不肯别，更待夜乌啼。

卷 305_19【春雨】

刘复

细雨度深闺，莺愁欲懒啼。如烟飞漠漠，似露湿凄凄。

草色行看靡，花枝暮欲低。晓听钟鼓动，早送锦障泥。

卷 305_20【夕次襄邑】

刘复

何处成吾道，经年远路中。客心犹向北，河水自归东。

古戍飘残角，疏林振夕风。轻舟难载月，那与故人同。

· 全唐诗 ·

卷 305_21 【夏日】

刘复

映日纱窗深且闲，含桃红日石榴殷。银瓶绠转桐花井，
沉水烟销金博山。文簟象床娇倚瑟，彩奁铜镜懒拈环。
明朝戏去谁相伴，年少相逢狭路间。

卷 305_22 【送黄晔明府岳州湘阴赴任】

刘复

拟占名场第一科，龙门十上困风波。三年护塞从戎远，
万里投荒失意多。花县到时铜墨贵，叶舟行处水云和。
遥知布惠苏民后，应向祠堂吊汨罗。

卷 305_23 【禅门寺暮钟】

刘复

簾簾高悬于阗钟，黄昏发地殷龙宫。
游人忆到嵩山夜，叠阁连楼满太空。

· 全唐诗 ·

卷 305_24 【同张深秀才游华严寺】

冷朝阳

同游云外寺，渡水入禅关。立扫窗前石，坐看池上山。
有僧飞锡到，留客话松间。不是缘名利，好来长伴闲。

卷 305_25 【中秋与空上人同宿华严寺】

冷朝阳

扫榻相逢宿，论诗旧梵宫。磬声迎鼓尽，月色过山穷。
庭簇安禅草，窗飞带火虫。一宵何惜别，回首隔秋风。

卷 305_26 【宿柏岩寺】

冷朝阳

幽寺在岩中，行唯一径通。客吟孤峤月，蝉噪数枝风。
秋色生苔砌，泉声入梵宫。吾师修道处，不与世间同。

· 全唐诗 ·

卷 305_27【登灵善寺塔】

冷朝阳

飞阁青霞里，先秋独早凉。天花映窗近，月桂拂檐香。
华岳三峰小，黄河一带长。空闻指归路，烟处有垂杨。

卷 305_28【瀑布泉】

冷朝阳

潺湲半空里，霖落石房边。风激珠光碎，山欹练影偏。
急流难起浪，迸沫只如烟。自古惟今日，凄凉一片泉。

卷 305_29【冬日逢冯法曹话怀】

冷朝阳

分襟二年内，多少事相干。礼乐风全变，尘埃路渐难。
秋林新叶落，霜月满庭寒。虽喜逢知己，他乡岁又阑。

· 全唐诗 ·

卷 305_30 【送唐六赴举】

冷朝阳

秋色生边思，送君西入关。草衰空大野，叶落露青山。
故国烟霞外，新安道路间。碧霄知己在，香桂月中攀。

卷 305_31 【送远上人归京】

冷朝阳

夏腊岁方深，思归彻曙吟。未离销雪院，已有过云心。
寒磬清函谷，孤钟宿华阴。别京游旧寺，月色似双林。

卷 305_32 【别郎上人】

冷朝阳

过云寻释子，话别更依依。静室开来久，游人到自稀。
触风香气尽，隔水磬声微。独傍孤松立，尘中多是非。

· 全唐诗 ·

卷 305_33 【立春】

冷朝阳

玉律传佳节，青阳应此辰。土牛呈岁稔，彩燕表年春。
腊尽星回次，寒馀月建寅。风光行处好，云物望中新。
流水初销冻，潜鱼欲振鳞。梅花将柳色，偏思越乡人。

卷 305_34 【送红线】

冷朝阳

采菱歌怨木兰舟，送客魂销百尺楼。
还似洛妃乘雾去，碧天无际水空流。

卷 305_35 【南至日太史登台书云物】

于尹躬

至日行时令，登台约礼文。官称伯赵氏，色辨五方云。
昼漏听初发，阳光望渐分。司天为岁备，持简出人群。
惠爱周微物，生灵荷圣君。长当有嘉瑞，郁郁复纷纷。

· 全唐诗 ·

卷 305_36 【赠别二首】

柳郴

江浦程千里，离尊泪数行。无论吴与楚，俱是客他乡。
何处最悲辛，长亭临古津。往来舟楫路，前后别离人。

卷 305_37 【句】

柳郴

他乡生白发，旧国有青山。

卷 305_38 【望终南春雪】

李子卿

山势抱西秦，初年瑞雪频。色摇鹑野霁，影落凤城春。
辉耀银峰逼，晶明玉树亲。尚寒由气劲，不夜为光新。
荆岫全疑近，昆丘宛合邻。馀辉尚可借，回照读书人。

· 全唐诗 ·

卷三百零六

卷 306_1【九日登青山】

朱湾

昔人惆怅处，系马又登临。旧地烟霞在，多时草木深。
水将空合色，云与我无心。想见龙山会，良辰亦似今。

卷 306_2【秋夜宴王郎中宅赋得露中菊】

朱湾

众芳春竞发，寒菊露偏滋。受气何曾异，开花独自迟。
晚成犹待赏，欲采未过时。忍弃东篱下，看随秋草衰。

卷 306_3【奉使设宴戏掷笼筹】

朱湾

今日陪樽俎，良筹复在兹。献酬君有礼，赏罚我无私。

· 全唐诗 ·

莫怪斜相向，还将正自持。一朝权入手，看取令行时。

卷 306_4【咏双陆骰子】

朱湾

采采应缘白，钻心不为名。掌中犹可重，手下莫言轻。
有对唯求敌，无私直任争。君看一掷后，当取擅场声。

卷 306_5【咏壁上酒瓢呈萧明府】

朱湾

不是难提挈，行藏固有期。安身未得所，开口欲从谁。
应物心无倦，当垆柄会持。莫将成废器，还有对樽时。

卷 306_6【咏玉】

朱湾

歌玉屡招疑，终朝省复思。既哀黄鸟兴，还复白圭诗。
请益先求友，将行必择师。谁知不鸣者，独下董生帷。

· 全唐诗 ·

卷 306_7【送陈偃赋得白鸟翔翠微】

朱湾

不知鸥与鹤，天畔弄晴晖。背日分明见，临川相映微。
净中云一点，回处雪孤飞。正好南枝住，翩翩何所归。

卷 306_8【题段上人院壁画古松】

朱湾

石上盘古根，谓言天生有。安知草木性，变在画师手。
阴深方丈间，直趣幽且闲。木纹离披势搓捩，
中裂空心火烧出。扫成三寸五寸枝，便是千年万年物。
莓苔浓淡色不同，一面死皮生蠹虫。风霜未必来到此，
气色杳在寒山中。孤标可玩不可取，能使支公道场古。

卷 306_9【逼寒节寄崔七】

朱湾

闲庭只是长莓苔，三径曾无车马来。旅馆尚愁寒食火，
羁心懒向不然灰。门前下客虽弹铗，溪畔穷鱼且曝腮。
他日趋庭应问礼，须言陋巷有颜回。

· 全唐诗 ·

卷 306_10 【长安喜雪】

朱湾

千门万户雪花浮，点点无声落瓦沟。全似玉尘消更积，
半成冰片结还流。光含晓色清天苑，轻逐微风绕御楼。
平地已沾盈尺润，年丰须荷富人侯。

卷 306_11 【宴杨驸马山亭】

朱湾

垂杨拂岸草茸茸，绣户窗前花影重。鲙下玉盘红缕细，
酒开金瓮绿醅浓。中朝驸马何平叔，南国词人陆士龙。
落日泛舟同醉处，回潭百丈映千峰。

卷 306_12 【过宣上人湖上兰若】

朱湾

十年湖上结幽期，偏向东林遇远师。未道姓名童子识，
不酬言语上人知。闲花落日滋苔径，细雨和烟著柳枝。
问我别来何所得，解将无事当无为。

· 全唐诗 ·

卷 306_13【同达奚宰游奚子明仙坛】

朱湾

松桧阴深一径微，中峰石室到人稀。仙官不住青山在，
故老相传白日飞。华表问栽何岁木，片云留著去时衣。
今朝茂宰寻真处，暂驻双凫且莫归。

卷 306_14【平陵寓居再逢寒食】

朱湾

几回江上泣途穷，每遇良辰叹转蓬。火燧知从新节变，
灰心还与故人同。莫听黄鸟愁啼处，自有花开久客中。
贫病固应无挠事，但将怀抱醉春风。

卷 306_15【寻隐者韦九山人于东溪草堂】

朱湾

寻得仙源访隐沦，渐来深处渐无尘。初行竹里唯通马，
直到花间始见人。四面云山谁作主，数家烟火自为邻。
路傍樵客何须问，朝市如今不是秦。

· 全唐诗 ·

卷 306_16 【假摄池州留别东溪隐居】

朱湾

一官仍是假，岂愿数离群。愁鬓看如雪，浮名认是云。
暂辞南国隐，莫勒北山文。今后松溪月，还应梦见君。

卷 306_17 【咏柏板】

朱湾

赴节心长在，从绳道可观。须知片木用，莫向散材看。
空为歌偏苦，仍愁和即难。既能亲掌握，愿得接同欢。

卷 306_18 【箴柱子】

朱湾

散木今何幸，良工不弃捐。力微惭一柱，材薄仰群弦。
力微惭一柱，材薄仰群弦。
且喜声相应，宁辞迹屡迁。知音如见赏，雅调为君传。

· 全唐诗 ·

卷 306_19 【送李司直归浙东幕，兼寄鲍行军持节大夫初拜东平郡王】

朱湾

翩翩书记早曾闻，二十年来愿见君。今日相逢悲白发，
同时几许在青云。人从北固山边去，水到西陵渡口分。
会作王门曳裾客，为余前谢鲍参军。

卷 306_20 【七贤庙】

朱湾

常慕晋高士，放心日沈冥。湛然对一壺，土木为我形。
下马访陈迹，披榛诣荒庭。相看两不言，犹谓醉未醒。
长啸或可拟，幽琴难再听。同心不共世，空见薜门青。

卷 306_21 【同清江师月夜听坚正二上人怀州转法华经歌】

朱湾

若耶溪畔云门僧，夜闲燕坐听真乘。莲花秘偈药草喻，
二师身住口不住。凿井求泉会到源，闭门避火终迷路。
前心后心皆此心，梵音妙音柔软音。清冷霜磬有时动，

· 全唐诗 ·

寂历空堂宜夜深。向来不寐何所事，一念才生百虑息。
风翻乱叶林有声，雪映闲庭月无色。玄关密迹难可思，
醒人悟兮醉人疑。衣中系宝觉者谁，临川内史字得之。

卷 306_22【寒城晚角】

朱湾

高台高高画角雄，五更初发寒城中。寒城北临大河水，
淇门贼烽隔岸是。长风送过黎阳川，我军气雄贼心死。
羁人此夜寐不成，万里边情枕上生。乍似陇头戍，
寒泉幽咽流不住；又如巴江头，啼猿带雨断续愁。
忽忆嫖姚北征伐，空山宿兵寒对月。一声老将起，
三奏行人发；冀马为之嘶，朔云为之结。
二十年来天下兵，到处不曾无此声。洛阳陌，长安路。
角声朝朝兼暮暮，平居闻之尚难度。何况天山征戍儿，
云中下营雪里吹。

卷 306_23【重阳日陪韦卿宴】

朱湾

何必龙山好，南亭赏不暌。清规陈侯事，雅兴谢公题。
入座青峰近，当轩远树齐。仙家自有月，莫叹夕阳西。

· 全唐诗 ·

卷三百零七

卷 307_1【忆长安·四月】

丘丹

忆长安，四月时，南郊万乘旌旗。尝酌玉卮更献，
含桃丝笼交驰。芳草落花无限，金张许史相随。

卷 307_2【状江南·季冬】

丘丹

江南季冬月，红蟹大如 。湖水龙为镜，炉峰气作烟。

卷 307_3【和韦使君秋夜见寄】

丘丹

露滴梧叶鸣，秋风桂花发。中有学仙侣，吹箫弄山月。

· 全唐诗 ·

卷 307_4【奉酬韦苏州使君】

丘丹

久作烟霞侣，暂将簪组亲。还同褚伯玉，入馆忝州人。

卷 307_5【和韦使君听江笛送陈侍御】

丘丹

离樽闻夜笛，寥亮入寒城。月落车马散，凄恻主人情。

卷 307_6【奉酬韦使君送归山之作】

丘丹

侧闻郡守至，偶乘黄犊出。不别桃源人，一见经累日。

蝉鸣念秋稼，兰酌动离瑟。临水降麾幢，野艇才容膝。

参差碧山路，目送江帆疾。涉海得骊珠，栖梧惭凤质。

愧非郑公里，归扫蒙笼室。

· 全唐诗 ·

卷 307_7【奉酬重送归山】

丘丹

卖药有时至，自知来往疏。遽辞池上酌，新得山中书。
步出芙蓉府，归乘轂9车。猥蒙招隐作，岂愧班生庐。

卷 307_8【经湛长史草堂】

丘丹

身退谢名累，道存嘉止足。设醴降华幡，挂冠守空谷。
偶寻野外寺，仰慕贤者躅。不见昔簪裾，犹有旧松竹。
烟霞虽异世，风韵如在瞩。余即江海上，归辙青山曲。

卷 307_9【萧山祇园寺】

丘丹

东晋许徵君，西方彦上人。生时犹定见，悟后了前因。
灵塔多年古，高僧苦行频。碑存才记日，藤老岂知春。
车骑归萧警，云林识许询。千秋不相见，悟定是吾身。

· 全唐诗 ·

卷 307_10【奉使过石门观瀑】

丘丹

溪上望悬泉，耿耿云中见。披榛上岩岫，峭壁正东面。
千仞泻联珠，一潭喷飞霰。嵯濊满山响，坐觉炎氛变。
照日类虹霓，从风似绡练。灵奇既天造，惜处穷海甸。
吾祖昔登临，谢公亦游衍。天程惧淹泊，下磴空延眷。
千里雷尚闻，峦回树葱蒨。此来去贱役，探讨愧前彦。
永欲洗尘缨，终当惬此愿。

卷 307_11【秋夕宿石门馆】

丘丹

暝从石门宿，摇落四岩空。潭月漾山足，天河泻涧中。
杉松寒似雨，猿鸟夕惊风。独卧不成寝，苍然想谢公。

卷 307_12【状江南·孟夏】

贾弇

江南孟夏天，慈竹笋如编。蜃气为楼阁，蛙声作管弦。

· 全唐诗 ·

卷 307_13 【状江南 · 仲秋】

沈仲昌

江南仲秋天，D 鼻大如船。雷是樟亭浪，苔为界石钱。

卷 307_14 【忆长安 · 正月】

谢良辅

忆长安，正月时，和风喜气相随。献寿彤庭万国，
烧灯青玉五枝。终南往往残雪，渭水处处流澌。

卷 307_15 【忆长安 · 十二月】

谢良辅

忆长安，腊月时，温泉彩仗新移。瑞气遥迎凤辇，
日光先暖龙池。取酒虾蟆陵下，家家守岁传卮。

· 全唐诗 ·

卷 307_16【状江南·仲春】

谢良辅

江南仲春天，细雨色如烟。丝为武昌柳，布作石门泉。

卷 307_17【状江南·孟冬】

谢良辅

江南孟冬天，荻穗软如绵。绿绢芭蕉裂，黄金橘柚悬。

卷 307_18【忆长安·二月】

鲍防

忆长安，二月时，玄鸟初至祢祠。百啭宫莺绣羽，
千条御柳黄丝。更有曲江胜地，此来寒食佳期。

卷 307_19【状江南·孟春】

鲍防

江南孟春天，荇叶大如钱。白雪装梅树，青袍似葑田。

· 全唐诗 ·

卷 307_20 【杂感】

鲍防

汉家海内承平久，万国戎王皆稽首。天马常衔苜蓿花，
胡人岁献葡萄酒。五月荔枝初破颜，朝离象郡夕函关。
雁飞不到桂阳岭，马走先过林邑山。甘泉御果垂仙阁，
日暮无人香自落。远物皆重近皆轻，鸡虽有德不如鹤。

卷 307_21 【送薛补阙入朝】

鲍防

平原门下十余人，独受恩多未杀身。每叹陆家兄弟少，
更怜杨氏子孙贫。柴门岂断施行马，鲁酒那堪醉近臣。
赖有军中遗令在，犹将谈笑对风尘。

卷 307_22 【人日陪宣州范中丞传正与范侍御传真宴东峰亭】

鲍防

人日春风绽早梅，谢家兄弟看花来。吴姬对酒歌千曲，
秦女留人酒百杯。丝柳向空轻婉转，玉山看日渐裴回。
流光易去欢难得，莫厌频频上此台。

· 全唐诗 ·

卷 307_23【上巳寄孟中丞】

鲍防

世间禊事风流处，镜里云山若画屏。
今日会稽王内史，好将宾客醉兰亭。

卷 307_24【秋暮忆中秋夜与王璠侍御赏月，因怆远离聊以奉寄】

鲍防

前月月明夜，美人同远光。清尘一以间，今夕坐相忘。
风落芙蓉露，疑余绣被香。

卷 307_25【元日早朝行】

鲍防

乾元发生春为宗，盛德在木斗建东。东方岁星大明宫，
南山喜气摇晴空。望云五等舞万玉，献寿一声出千峰。
文昌随彩礼乐正，太平下直旌旗红。师旷应律调黄钟，
王良运策调时龙。玄冥无事归朔土，青帝放身入朱宫。
九韶九变五声里，四方四友一身中。天何言哉乐无穷，
广成彭祖为三公。野臣潜随击壤老，日下鼓腹歌可封。

· 全唐诗 ·

卷 307_26 【忆长安·三月】

杜奕

忆长安，三月时，上苑遍是花枝。青门几场送客，
曲水竟日题诗。骏马金鞭无数，良辰美景追随。

卷 307_27 【忆长安·六月】

郑概

忆长安，六月时，风台水榭逶迤。朱果雕笼香透，
分明紫禁寒随。尘惊九衢客散，赭珂滴沥青骊。

卷 307_28 【状江南·孟秋】

郑概

江南孟秋天，稻花白如毡。素腕惭新藕，残妆妒晚莲。

· 全唐诗 ·

卷 307_29【忆长安·七月】

陈元初

忆长安，七月时，槐花点散罽毼。七夕针楼竞出，
中元香供初移。绣毂金鞍无限，游人处处归迟。

卷 307_30【忆长安·八月】

吕渭

忆长安，八月时，阙下天高旧仪。衣冠共颁金镜，
犀象对舞丹墀。更爱终南灞上，可怜秋草碧滋。

卷 307_31【状江南·仲冬】

吕渭

江南仲冬天，紫蔗节如鞭。海将盐作雪，出用火耕田。

卷 307_32【贞元十一年知贡举挠阁不能定去留寄诗前主司】

吕渭

独坐贡闱里，愁多芳草生。仙翁昨日事，应见此时情。

· 全唐诗 ·

卷 307_33【皇帝移晦日为中和节】

吕渭

皇心不向晦，改节号中和。淑气同风景，喜名别咏歌。
湔裙移旧俗，赐尺下新科。历象千年正，醑醕四海多。
花随春令发，鸿度岁阳过。天地齐休庆，欢声欲荡波。

卷 307_34【经湛长史草堂】

吕渭

岩居旧风景，人世今成昔。木落古山空，猿啼秋月白。
谁同西府僚，几谢南平客。摧残松桂老，萧散烟云夕。
迹留异代远，境入空门寂。惟有草堂僧，陈诗在石壁。

卷 307_35【忆长安·九月】

范灯

忆长安，九月时，登高望见昆池。上苑初开露菊，
芳林正献霜梨。更想千门万户，月明砧杵参差。

· 全唐诗 ·

卷 307_36【状江南·季夏】

范灯

江南季夏天，身热汗如泉。蚊蚋成雷泽，袈裟作水田。

卷 307_37【忆长安·十月】

樊珣

忆长安，十月时，华清士马相驰。万国来朝汉阙，
王陵共猎秦祠。昼夜歌钟不歇，山河四塞京师。

卷 307_38【状江南·仲夏】

樊珣

江南仲夏天，时雨下如川。卢橘垂金弹，甘蕉吐白莲。

卷 307_39【忆长安·十一月】

刘蕃

忆长安，子月时，千官贺至丹墀。御苑雪开琼树，
龙堂冰作瑶池。兽炭毡炉正好，貂裘狐白相宜。

· 全唐诗 ·

卷 307_40 【状江南 · 季秋】

刘蕃

江南季秋天，栗熟大如拳。枫叶红霞举，苍芦白浪川。

· 全唐诗 ·

卷三百零八

卷 308_1【太寥歌】

张志和

化元灵哉，碧虚清哉，红霞明哉。冥哉茫哉，
惟化之工无疆哉。

卷 308_2【空洞歌】

张志和

无自而然，自然之元；无造而化，造化之端。廓然恣然，
其形团圞。反尔之视，绝尔之思，可以观。

卷 308_3【渔父歌】

张志和

西塞山前白鹭飞，桃花流水鳜鱼肥。青箬笠，绿蓑衣，

· 全唐诗 ·

斜风细雨不须归。

钓台渔父褐为裘，两两三三舴艋舟。能纵棹，惯乘流，
长江白浪不曾忧。

霅溪湾里钓渔翁，舴艋为家西复东。江上雪，浦边风，
笑著荷衣不叹穷。

松江蟹舍主人欢，菰饭莼羹亦共餐。枫叶落，荻花乾，
醉宿渔舟不觉寒。

青草湖中月正圆，巴陵渔父棹歌连。钓车子，橛头船，
乐在风波不用仙。

卷 308_4【上巳日忆江南禊事】

张志和

黄河西绕郡城流，上巳应无祓禊游。
为忆渌江春水色，更随宵梦向吴洲。

卷 308_5【渔父】

张志和

八月九月芦花飞，南谿老人重钓归。秋山入帘翠滴滴，

· 全唐诗 ·

野艇倚槛云依依。却把渔竿寻小径，闲梳鹤发对斜晖。
翻嫌四皓曾多事，出为储皇定是非。

卷 308_6 【和答弟志和渔父歌】

张松龄

乐是风波钓是闲，草堂松径已胜攀。太湖水，洞庭山，
狂风浪起且须还。

卷 308_7 【歌】

陆羽

不羨黄金罍，不羨白玉杯；不羨朝入省，不羨暮入台；
惟羨西江水，曾向金陵城下来。

卷 308_8 【会稽东小山】

陆羽

月色寒潮入剡溪，青猿叫断绿林西。
昔人已逐东流去，空见年年江草齐。

· 全唐诗 ·

卷 308_9【句】

陆羽

辟疆旧林间，怪石纷相向。

绝涧方险寻，乱岩亦危造。

泻从千仞石，寄逐九江船。

· 全唐诗 ·

卷三百零九

卷 309_1【寒食寄李补阙】

郭鄴

兰陵士女满晴川，郊外纷纷拜古埏。万井闾阎皆禁火，
九原松柏自生烟。人间后事悲前事，镜里今年老去年。
介子终知禄不及，王孙谁肯一相怜。

卷 309_2【仲月赏花】

韦同则

梅花似雪柳含烟，南地风光腊月前。
把酒且须拚却醉，风流何必待歌筵。

卷 309_3【西亭暇日书怀十二韵献上相公】

李夷简

胜赏不在远，恍然念玄搜。兹亭有殊致，经始富人侯。

· 全唐诗 ·

澄澹分沼沚，萦回间林丘。荷香夺芳麝，石榴当鸣球。
抚俗来康济，经邦去咨谋。宽明洽时论，惠爱闻氓讴。
代斫岂容易，守成获优游。文翁旧学校，子产昔田畴。
琬琰富佳什，池台想旧游。谁言矜改作，曾是日增修。
宪省忝陪属，岷峨嗣徽猷。提携当有路，勿使滞刀州。

卷 309_4【城南访裴氏昆季】

李约

相思起中夜，夙驾访柴荆。早雾桑柘隐，晓光溪涧明。
村蹊蒿棘间，往往断新耕。贫野烟火微，昼无乌鸢声。
田头逢饷人，道君南山行。南山千里峰，尽是相思情。
野老无拜揖，村童多裸形。相呼看车马，颜色喜相惊。
荒圃鸡豚乐，雨墙禾莠生。欲君知我来，壁上空书名。

卷 309_5【岁日感怀】

李约

曙气变东风，蟾壶夜漏穷。新春几人老，旧历四时空。
身贱悲添岁，家贫喜过冬。称觴惟有感，欢庆在儿童。

· 全唐诗 ·

卷 309_6 【从军行三首】

李约

看图闲教阵，画地静论边。乌垒天西戍，鹰姿塞上川。
路长唯算月，书远每题年。无复生还望，翻思未别前。

栅壕三面斗，箭尽举烽频。营柳和烟暮，斗榆带雪春。
边城多老将，碣路少归人。杀尽金河卒，年年添塞尘。

候火起雕城，尘沙拥战声。游军藏汉帜，降骑说蕃情。
霜落沱池浅，秋深太白明。嫖姚方虎视，不觉说添兵。

卷 309_7 【赠韦况】

李约

我有心中事，不与韦三说。秋夜洛阳城，明月照张八。

卷 309_8 【观祈雨】

李约

桑条无叶土生烟，箫管迎龙水庙前。
朱门几处看歌舞，犹恐春阴咽管弦。

· 全唐诗 ·

卷 309_9【江南春】

李约

池塘春暖水纹开，堤柳垂丝间野梅。
江上年年芳意早，蓬瀛春色逐潮来。

卷 309_10【过华清宫】

李约

君王游乐万机轻，一曲霓裳四海兵。
玉辇升天人已尽，故宫犹有树长生。

卷 309_11【病中宿宜阳馆闻雨】

李约

难眠夏夜抵秋赊，帘幔深垂窗烛斜。
风吹桐竹更无雨，白发病人心到家。

· 全唐诗 ·

卷三百一十

卷 310_1【江南曲】

于鹄

偶向江边采白蘋，还随女伴赛江神。
众中不敢分明语，暗掷金钱卜远人。

卷 310_2【山中寄樊仆射】

于鹄

却忆东溪日，同年事鲁儒。僧房闲共宿，酒肆醉相扶。
天畔双旌贵，山中病客孤。无谋还有计，春谷种桑榆。

卷 310_3【题宇文 é 山寺读书院】

于鹄

读书林下寺，不出动经年。草阁连僧院，山厨共石泉。

· 全唐诗 ·

云庭无履迹，龕壁有灯烟。年少今头白，删诗到几篇。

卷 310_4【赠兰若僧】

于鹄

一身禅诵苦，洒扫古花宫。静室门常闭，深萝月不通。
悬灯乔木上，鸣磬乱幡中。附入高僧传，长称二远公。

卷 310_5【题邻居】

于鹄

僻巷邻家少，茅檐喜并居。蒸梨常共灶，浇薤亦同渠。
传屐朝寻药，分灯夜读书。虽然在城市，还得似樵渔。

卷 310_6【山中自述】

于鹄

三十无名客，空山独卧秋。病多知药性，年长信人愁。
萤影竹窗下，松声茅屋头。近来心更静，不梦世间游。

· 全唐诗 ·

卷 310_7【山中寄韦钲】

于鹄

懒成身病日，因醉卧多时。送客出谿少，读书终卷迟。
幽窗闻坠叶，晴景见游丝。早晚来收药，门前有紫芝。

卷 310_8【南谿书斋】

于鹄

茅屋往来久，山深不置门。草生垂井口，花落拥篱根。
入院将雏鸟，寻萝抱子猿。曾逢异人说，风景似桃源。

卷 310_9【夜会李太守宅】

于鹄

郡斋常夜扫，不卧独吟诗。把烛近幽客，升堂戴接B。
微风吹冻叶，余雪落寒枝。明日逢山伴，须令隐者知。

· 全唐诗 ·

卷 310_10 【题柏台山僧】

于鹄

上方唯一室，禅定对山容。行道临孤壁，持斋听远钟。

枯藤离旧树，朽石落高峰。不向云间见，还应梦里逢。

卷 310_11 【寄续尊师】

于鹄

得道任发白，亦逢城市游。新经天上取，稀药洞中收。

春木带枯叶，新蒲生漫流。年年望灵鹤，常在此山头。

卷 310_12 【题南峰褚道士】

于鹄

得道南山久，曾教四皓棋。闭门医病鹤，倒篋养神龟。

松际风长在，泉中草不衰。谁知茅屋里，有路向峨嵋。

· 全唐诗 ·

卷 310_13【赠不食姑】

于鹄

不食非关药，天生是女仙。见人还起拜，留伴亦开田。

无窟寻溪宿，兼衣扫叶眠。不知何代女，犹带剪刀钱。

卷 310_14【送李明府归别业】

于鹄

寄家丹水边，归去种春田。白发无知己，空山又一年。

鹿裘长酒气，茅屋有茶烟。亦拟辞人世，何溪有瀑泉。

卷 310_15【题树下禅师】

于鹄

久行多不定，树下是禅床。寂寂心无住，年年日自长。

虫蛇同宿礫，草木共经霜。已见南人说，天台有旧房。

· 全唐诗 ·

卷 310_16【宿王尊师隐居】

于鹄

夜爱云林好，寒天月里行。青牛眠树影，白犬吠猿声。
一磬山院静，千灯溪路明。从来此峰客，几个得长生。

卷 310_17【题服柏先生】

于鹄

服柏不飞炼，闲眠闭草堂。有泉唯盥漱，留火为焚香。
新雨闲门静，孤松满院凉。仍闻枕中术，曾授汉淮王。

卷 310_18【哭凌霄山光上人】

于鹄

身没碧峰里，门人改葬期。买山寻主远，垒塔化人迟。
鬼火穿空院，秋萤入素帷。黄昏溪路上，闻哭竺乾师。

· 全唐诗 ·

卷 310_19【途中寄杨涉】

于鹄

萧萧卢荻晚，一径入荒陂。日色云收处，蛙声雨歇时。
前村见来久，羸马自行迟。闻作王门客，应闲白接B。

卷 310_20【送韦判官归蓟门】

于鹄

桑干归路远，闻说亦愁人。有雪常经夏，无花空到春。
下营云外火，收马月中尘。白首从戎客，青衫未离身。

卷 310_21【出塞】

于鹄

葱岭秋尘起，全军取月支。山川引行阵，蕃汉列旌旗。
转战疲兵少，孤城外救迟。边人逢圣代，不见偃戈时。

微雪军将出，吹笳天未明。观兵登古戍，斩将对双旌。
分阵瞻山势，潜兵制马鸣。如今青史上，已有灭胡名。

· 全唐诗 ·

单于骄爱猎，放火到军城。乘月调新马，防秋置远营。
空山朱戟影，寒碛铁衣声。度水逢胡说，沙阴有伏兵。

卷 310_22【赠李太守】

于鹄

几年为郡守，家似布衣贫。沽酒迎幽客，无金与近臣。
捣茶书院静，讲易药堂春。归阙功成后，随车有野人。

卷 310_23【送张司直入单于】

于鹄

若过并州北，谁人不忆家。寒深无伴侣，路尽有平沙。
碛冷唯逢雁，天春不见花。莫随征将意，垂老事轻车。

卷 310_24【惜花】

于鹄

夜来花欲尽，始惜两三枝。早起寻稀处，闲眠记落时。
蕊焦蜂自散，蒂折蝶还移。攀著殷勤别，明年更有期。

· 全唐诗 ·

卷 310_25【春山居】

于鹄

独来多任性，惟与白云期。深处花开尽，迟眠人不知。
水流山暗处，风起月明时。望见南峰近，年年懒更移。

卷 310_26【游瀑泉寺】

于鹄

日夕寻未遍，古木寺高低。粉壁犹遮岭，朱楼尚隔溪。
厨窗通涧鼠，殿迹立山鸡。更有无人处，明朝独向西。

卷 310_27【送宫人入道归山】

于鹄

十岁吹箫入汉宫，看修水殿种芙蓉。自伤白发辞金屋，
许著黄衣向玉峰。解语老猿开晓户，学飞雏鹤落高松。
定知别后宫中伴，应听缑山半夜钟。

· 全唐诗 ·

卷 310_28【巴女谣】

于鹄

巴女骑牛唱竹枝，藕丝菱叶傍江时。
不愁日暮还家错，记得芭蕉出槿篱。

卷 310_29【公子行】

于鹄

少年初拜大长秋，半醉垂鞭见列侯。马上抱鸡三市斗，
袖中携剑五陵游。玉箫金管迎归院，锦袖红妆拥上楼。
更向院西新买宅，月波春水入门流。

卷 310_30【长安游】

于鹄

久卧长安春复秋，五侯长乐客长愁。绣帘朱毂逢花住，
锦幃银珂触雨游。何处少年吹玉笛，谁家鹦鹉语红楼。
年年只是看他贵，不及南山任白头。

· 全唐诗 ·

卷 310_31 【别齐太守】

于鹄

花里南楼春夜寒，还如王屋上天坛。

归山不道无明月，谁共相从到晓看。

卷 310_32 【登古城】

于鹄

独上闲城却下迟，秋山惨惨冢累累。

当时还有登城者，荒草如今知是谁。

卷 310_33 【哭刘夫子】

于鹄

近问南州客，云亡已数春。痛心曾受业，追服恨无亲。

孀妇归乡里，书斋属四邻。不知经乱后，奠祭有何人。

· 全唐诗 ·

卷 310_34 【醉后寄山中友人】

于鹄

昨日山家春酒浓，野人相劝久从容。独忆卸冠眠细草，
不知谁送出深松。都忘醉后逢廉度，不省归时见鲁恭。
知己尚嫌身酩酊，路人应恐笑龙钟。

卷 310_35 【温泉僧房】

于鹄

云里前朝寺，修行独几年。山村无施食，盥漱亦安禅。
古塔巢溪鸟，深房闭谷泉。自言曾入室，知处梵王天。

卷 310_36 【题美人】

于鹄

秦女窥人不解羞，攀花趁蝶出墙头。
胸前空带宜男草，嫁得萧郎爱远游。

· 全唐诗 ·

卷 310_37【寻李暹】

于鹄

任性常多出，人来得见稀。
市楼逢酒住，野寺送僧归。
檐下悬秋叶，篱头晒褐衣。
门前南北路，谁肯入柴扉。

卷 310_38【寻李逸人旧居】

于鹄

旧隐松林下，冲泉入两涯。
琴书随弟子，鸡犬在邻家。
茅屋长黄菌，槿篱生白花。
幽坟无处访，恐是入烟霞。

卷 310_39【赠碧玉】

于鹄

新绣笼裙豆蔻花，路人笑上返金车。
霓裳禁曲无人解，暗问梨园弟子家。

· 全唐诗 ·

卷 310_40 【舟中月明夜闻笛】

于鹄

浦里移舟候信风，芦花漠漠夜江空。
更深何处人吹笛，疑是孤吟寒水中。

卷 310_41 【送迁客二首】

于鹄

得罪谁人送，来时不到家。白头无侍子，多病向天涯。
莽苍凌江水，黄昏见塞花。如今贾谊赋，不漫说长沙。

流人何处去，万里向江州。孤驿瘴烟重，行人巴草秋。
上帆南去远，送雁北看愁。遍问炎方客，无人得白头。

卷 310_42 【赠王道者】

于鹄

去寻长不出，门似绝人行。床下石苔满，屋头秋草生。
学琴寒月短，写易晚窗明。唯到黄昏后，溪中闻磬声。

· 全唐诗 ·

卷 310_43【题合溪乾洞】

于鹄

渡水傍山寻绝壁，白云飞处洞天开。
仙人来往行无迹，石径春风长绿苔。

卷 310_44【过张老园林】

于鹄

身老无修饰，头巾用白纱。开门朝扫径，辇水夜浇花。
药气闻深巷，桐阴到数家。不愁还酒债，腰下有丹砂。

卷 310_45【寓意】

于鹄

自小看花长不足，江边寻得数株红。
黄昏人散东风起，吹落谁家明月中。

· 全唐诗 ·

卷 310_46 【哭王都护】

于鹄

老将明王识，临终拜上公。告哀乡路远，助葬戍城空。
素幔朱门里，铭旌秋巷中。史官如不滥，独传说英雄。

卷 310_47 【钱司农宋卿立太尉碑了还江东】

于鹄

追立新碑日，怜君苦一身。远移深涧石，助立故乡人。
草色荒坟绿，松阴古殿春。平生心已遂，归去得垂纶。

卷 310_48 【送唐大夫让节归山】

于鹄

年老功成乞罢兵，玉阶匍匐进双旌。朱门鸳瓦为仙观，
白领狐裘出帝城。侍女休梳官样髻，蕃童新改道家名。
到时漫发春泉里，犹梦红楼箫管声。

· 全唐诗 ·

卷 310_49【买山吟】

于鹄

买得幽山属汉阳，槿篱疏处种桃榔。
唯有猕猴来往熟，弄人抛果满书堂。

卷 310_50【古词三首】

于鹄

素丝带金地，窗间掬飞尘。偷得凤凰钗，门前乞行人。
新长青丝发，哑哑言语黠。随人敲铜镜，街头救明月。
东家新长儿，与妾同时生。并长两心熟，到大相呼名。

卷 310_51【秦越人洞中咏】

于鹄

扁鹊得仙处，传是西南峰。年年山下人，长见骑白龙。
洞门黑无底，日夜唯雷风。清斋将入时，戴星兼抱松。
石径阴且寒，地响知远钟。似行山林外，闻叶履声重。
低碍更俯身，渐远昼夜同。时时白蝙蝠，飞入茅衣中。
行久路转窄，静闻水淙淙。但愿逢一人，自得朝天宫。

· 全唐诗 ·

卷 310_52【宿西山修下元斋咏】

于鹄

幽人在何处，松桧深冥冥。西峰望紫云，知处安期生。
沐浴溪水暖，新衣礼仙名。脱屣入静堂，绕像随礼行。
碧纱笼寒灯，长幡缀金铃。林下听法人，起坐枯叶声。
启奏修律仪，天曙山鸟鸣。分行布菅茅，列坐满中庭。
持斋候撞钟，玉函散宝经。焚香开卷时，照耀金室明。
投简石洞深，称过上帝灵。学道能苦心，自古无不成。

卷 310_53【过凌霄洞天谒张先生祠】

于鹄

戢戢乱峰里，一峰独凌天。下看如尖高，上有十里泉。
志人爱幽深，一住五十年。悬牋到其上，乘牛耕药田。
衣食不下求，乃是云中仙。山僧独知处，相引冲碧烟。
断崖昼昏黑，槎枒横只椽。面壁攀石棱，养力方敢前。
累歇日已没，始到茅堂边。见客不问谁，礼质无周旋。
醉卧枕欹树，寒坐展青毡。折松扫藜床，秋果颜色鲜。
炼蜜敲石炭，洗澡乘瀑泉。白犬舐客衣，惊走闻腥膻。
乃知轩冕徒，宁比云壑眠。

· 全唐诗 ·

卷 310_54【早上凌霄第六峰入紫溪礼白鹤观祠】

于鹄

路转第六峰，传是十里程。放石试浅深，M 壁蛇鸟惊。
欲下先褰衣，路底避枯茎。回途歇嵌窟，整带重冠缨。
及到紫石溪，唵唵已天明。渐近神仙居，桂花湿溟溟。
阴苔无人踪，时得白鹤翎。忽然见朱楼，象牌题玉京。
沈沈五云影，香风散萦萦。清斋上玉堂，窗户悬水精。
青童撞金屑，杵臼声丁丁。臃脰遥问谁，稽首称姓名。
若容在溪口，愿乞残雪英。

卷 310_55【山中访道者】

于鹄

触烟入溪口，岸岸唯怪栎。其中尽碧流，十里不通屐。
出林山始转，绝径缘峭壁。把藤借行势，侧足凭石脉。
V 牙断行处，光滑猿猱迹。忽然风景异，乃到神仙宅。
天晴茅屋头，残云蒸气白。隔窗梳发声，久立闻吹笛。
抱琴出门来，不顾人间客。山院不洒扫，四时自虚寂。
落叶埋长松，出地才数尺。曾读上清经，知注长生籍。
愿示不死方，何山有琼液。

· 全唐诗 ·

卷 310_56 【寄卢僦员外秋衣词】

于鹄

寄远空以心，心诚亦难知。篋中有秋帛，裁作远客衣。
缝制虽女功，尽度手自持。容貌常目中，长短不复疑。
斜缝密且坚，游客多尘缁。意欲都无言，浣濯耐岁时。
殷勤托行人，传语慎勿遗。别来年已老，亦闻鬓成丝。
纵然更相逢，握手唯是悲。所寄莫复弃，愿见长相思。

卷 310_57 【种树】

于鹄

一树新栽益四邻，野夫如到旧山春。
树成多是人先老，垂白看他攀折人。

卷 310_58 【哭李暹】

于鹄

驱马街中哭送君，灵车碾雪隔城闻。
唯有山僧与樵客，共舁孤榭入幽坟。

· 全唐诗 ·

卷 310_59【古挽歌】

于鹄

双轍出郭門，綿綿東西道。送死多于生，幾人得終老。
見此切肺肝，不如歸山好。不聞哀哭聲，默默安懷抱。
時盡從物化，又免生忧扰。世間壽者稀，盡為悲傷惱。
送哭誰家車，靈幡紫帶長。青童抱何物，明月與香囊。
可惜羅衣色，看舁入水泉。莫愁塋道暗，燒漆得千年。
陰風吹黃蒿，挽歌度秋水。車馬却歸城，孤坟月明里。

卷 310_60【悼孩子】

于鹄

年長始一男，心亦頗自娛。生來歲未周，奄然却歸無。
裸送不以衣，瘞埋于中衢。乳母抱出門，所生亦隨呼。
嬰孩無哭儀，禮經不可逾。親戚相問時，抑悲空嘆吁。
襁褓在舊床，每見立踟躕。靜思益傷情，畏老為獨夫。

卷 310_61【別舊山】

于鹄

旧伴同游盡却回，云中獨宿守花開。

· 全唐诗 ·

自是去人身渐老，暮山流水任东来。

卷 310_62【寄周恽】

于鹄

家在荒陂长似秋，蓼花芹叶水虫幽。
去年相伴寻山客，明月今宵何处游。

卷 310_63【野田行】

于鹄

日暮出古城，野田何茫茫。寒狐上孤冢，鬼火烧白杨。
昔人未为泉下客，若到此中还断肠。

卷 310_64【塞上曲】

于鹄

行人朝走马，直走蓟城傍。蓟城通汉北，万里别吴乡。
海上一烽火，沙中百战场。军书发上郡，春色度河阳。
袅袅汉宫柳，青青胡地桑。琵琶出塞曲，横笛断君肠。

· 全唐诗 ·

卷 310_65【襄阳寒食】

于鹄

烟水初销见万家，东风吹柳万条斜。

大堤欲上谁相伴，马踏春泥半是花。

卷 310_66【泛舟入后谿】

于鹄

雨余芳草净沙尘，水绿沙平一带春。

唯有啼鹃似留客，桃花深处更无人。

· 全唐诗 ·

卷三百一十一

卷 311_1【宝剑篇】

刘长川

宝剑不可得，相逢几许难。今朝一度见，赤色照人寒。
匣里星文动，环边月影残。自然神鬼伏，无事莫空弹。

卷 311_2【将赴东都上李相公】

刘长川

四海兵初偃，平津阁正开。谁知大炉下，还有不然灰。

卷 311_3【寄邢逸人】

郑常

羨君无外事，日与世情违。地僻人难到，溪深鸟自飞。
儒衣荷叶老，野饭药苗肥。畴昔江湖意，而今忆共归。

· 全唐诗 ·

卷 311_4【送头陀上人赴庐山寺】

郑常

僧家无住著，早晚出东林。得道非真相，头陀是苦心。
持斋山果熟，倚锡野云深。溪寺谁相待，香花与梵音。

卷 311_5【谪居汉阳白沙口阻雨，因题驿亭】

郑常

汉阳无远近，见说过湓城。云雨经春客，江山几日程。
终随鸥鸟去，只待海潮生。前路逢渔父，多惭问姓名。

卷 311_6【穆陵路】

陈存

西游匣长剑，日暮湘楚间。歇马上秋草，逢人问故关。
孤村绿塘水，旷野白云山。方念此中去，何时此路还。

· 全唐诗 ·

卷 311_7【清溪馆作】

陈存

指途清溪里，左右唯深林。云蔽望乡处，雨愁为客心。
遇人多物役，听鸟时幽音。何必沧浪水，庶兹浣尘襟。

卷 311_8【寓居武丁馆】

陈存

暑雨飘已过，凉飙触幽衿。虚馆无喧尘，绿槐多昼阴。
俯视古苔积，仰聆早蝉吟。放卷一长想，闭门千里心。

卷 311_9【楚州赠别周愿侍御】

陈存

漂泊楚水来，舍舟坐高馆。途穷在中路，孤征慕前伴。
风雨一留宿，关山去欲懒。淮南木叶飞，夜闻广陵散。

卷 311_10【送刘秀才南归】

陈存

鸟啼杨柳垂，此别千万里。古路入商山，春风去灞水。

· 全唐诗 ·

停车落日在，罢酒离人起。蓬户寄龙沙，送归情讵已。

卷 311_11【丹阳作】

陈存

暂入新丰市，犹闻旧酒香。抱琴沽一醉，尽日卧垂杨。

卷 311_12【早行】

王观

鸡唱催人起，又生前去愁。路明残月在，山露宿云收。

村店烟火动，渔家灯烛幽。趋名与趋利，行役几时休。

卷 311_13【赠营妓】

崔瓘

寒檐寂寂雨霏霏，² 馆萧条烛烬微。

只有今宵同此宴，翠娥佯醉欲先归。

· 全唐诗 ·

卷 311_14【酒席赋得匏瓢】

郑审

华阁与贤开，仙瓢自远来。幽林尝伴许，陋巷亦随回。
挂影怜红壁，倾心向绿杯。何曾斟酌处，不使玉山颓。

卷 311_15【奉使巡检两京路种果树事毕入秦因咏】

郑审

圣德周天壤，韶华满帝畿。九重承涣汗，千里树芳菲。
陕塞馀阴薄，关河旧色微。发生和气动，封植众心归。
春露条应弱，秋霜果定肥。影移行子盖，香扑使臣衣。
入径迷驰道，分行接禁闱。何当扈仙跸，攀折奉恩辉。

卷 311_16【丹阳作】

朱彬

暂入新丰市，犹闻旧酒香。抱琴沽一醉，尽日卧垂杨。

· 全唐诗 ·

卷 311_17【采桑】

李彦远

采桑畏日高，不待春眠足。攀条有余态，那矜貌如玉。

千金岂不赠，五马空踟躅。何以变真性，幽篁雪中绿。

卷 311_18【章仇公席上咏真珠姬】

范元凯

神女初离碧玉阶，彤云犹拥牡丹鞋。

应知子建怜罗袜，顾步裴回拾翠钗。

· 全唐诗 ·

卷三百一十二

卷 312_1【烂柯山四首】

刘迥

白云引策杖，苔径谁往还。渐见松树偃，时闻鸟声闲。
豁然喧氛尽，独对万重山。
石桥架绝壑，苍翠横鸟道。凭槛云脚下，颓阳日犹蚤。
霓裳倘一遇，千载长不老。
灵境偶一寻，洞天碧云上。烂柯有遗迹，羽客何由访。
日暮怅欲还，晴烟满千嶂。
绳床宴坐久，石窟绝行迹。能在人代中，遂将人代隔。
白云风飏飞，非欲待归客。

卷 312_5【前年春，与独孤常州兄花时为别，倏已三年矣。今莺花又尔，睹物增怀，聊以奉寄】

李幼卿

近日霜毛一番新，别时芳草两回春。不堪花落花开处，
况是江南江北人。薄宦龙钟心懒慢，故山寥落水瀛沦。

· 全唐诗 ·

缘君爱我疵瑕少，愿窃仁风寄老身。

卷 312_6【游烂柯山四首】

李幼卿

拂雾理孤策，薄霄眺层岑。迥升烟雾外，豁见天地心。
物象不可及，迟回空咏吟。
巨石何崔嵬，横桥架山顶。傍通日月过，仰望虹霓迥。
圣者开津梁，谁能度兹岭。
二仙自围棋，偶与樵夫会。仙家异人代，俄顷千年外。
笙鹤何时还，仪形尚相对。
石室过云外，二僧俨禅寂。不语对空山，无心向来客。
作礼未及终，忘循旧形迹。

卷 312_7【游烂柯山四首】

李深

寻源路不迷，绝顶与云齐。坐引群峰小，平看万木低。
双林春色上，正有子规啼。
嵌空横洞天，磅礴倚崖巘。宛如虹势出，可赏不可转。
真兴得津梁，抽簪永游衍。
羽客无姓名，仙棋但闻见。行看负薪客，坐使桑田变。
怀古正怡然，前山早莺啭。

· 全唐诗 ·

稽首期发蒙，吾师岂无说。安禅即方丈，演法皆寂灭。
鸣磬雨花香，斋堂饭松屑。

卷 312_8【游烂柯山】

羊滔

步登春岩里，更上最远山。聊见宇宙阔，遂令身世闲。
清辉赏不尽，高驾何时还。

石梁耸千尽，高盼出林。巨壑蹑丹虹，排云弄清影。
路期访道客，游衍空井井。

采薪穷冥搜，深路转清映。安知洞天里，偶坐得棋圣。
至今追灵迹，可用陶静性。

沙门何处人，携手俱灭迹。深入不动境，乃知真圆寂。
有时归罗浮，白日见飞锡。

卷 312_9【游烂柯山】

薛戎

登岩已寂历，绝顶更岩峩。响像如天近，窥临与世遥。
悠然畅心目，万虑一时销。

· 全唐诗 ·

圣游本无迹，留此示津梁。架险知何适，遗名但不亡。
只今成佛宇，化度果难量。

二仙行自适，日月徒迁徙。不语寄手谈，无心引樵子。
蒙分一丸药，相偶穷年祀。

仙山习禅处，了知通李释。昔作异时人，今成相对寂。
便是不二门，自生瞻仰意。

卷 312_10【游烂柯山】

谢勳

独凌清景出，下视众山中。云日遥相对，川原无不通。
自致高标末，何心待驭风。

宛演横半规，穹崇翠微上。云扃掩苔石，千古无人赏。
宁知后贤心，登此共来往。

仙弈示樵夫，能言忘归路。因看斧柯烂，孙子发已素。
孰云遗迹久，举意如旦暮。

仙僧会真要，应物常渊默。惟将无住理，转与信人说。
月影清江中，可观不可得。

· 全唐诗 ·

卷三百一十三

卷 313_1【奉和圣制三日书怀因以示百僚】

崔元翰

佳节上元巳，芳时属暮春。流觞想兰亭，捧剑传金人。
风轻水初绿，日迟花更新。天文信昭回，皇道颇敷陈。
恭己每从俭，清心常保真。戒兹游衍乐，书以示群臣。

卷 313_2【奉和圣制重阳旦日百寮曲江宴示怀】

崔元翰

偶圣睹昌期，受恩惭弱质。幸逢良宴会，况是清秋日。
远岫对壶觞，澄澜映簪绂。炮羔备丰膳，集凤调鸣律。
薄劣厕英豪，欢娱忘衰疾。平皋行雁下，曲渚双凫出。
沙岸菊开花，霜枝果垂实。天文见成象，帝念资勤恤。
探道得玄珠，斋心居特室。岂如横汾唱，其事徒骄逸。

· 全唐诗 ·

卷 313_3 【奉和圣制中元日题奉敬寺】

崔元翰

妙道非本说，殊途成异名。圣人得其要，俱以化群生。
风吹从上苑，龙宫连外城。花鬘列后殿，云车驻前庭。
松竹含新秋，轩窗有馀清。缅怀崆峒事，须继箫管声。
离相境都寂，忘言理更精。域中信称大，天下乃为轻。
屈己由济物，尧心岂所荣。

卷 313_4 【奉和登玄武楼观射即事书怀赐孟涉应制】

崔元翰

宁岁常有备，殊方靡不宾。禁营列武卫，帝座彰威神。
讲事一临幸，加恩遍抚巡。城高凤楼耸，场迥兽侯新。
饮羽连百中，控弦逾六钧。拣材尽爪士，受任皆信臣。
光赏文藻丽，便繁心膺亲。复如观太清，昭烂垂芳辰。

卷 313_5 【清明节郭侍御偶与李侍御、孔校书、王秀才游开化寺，卧病不得同游，赋得十韵，兼呈马十八郎丞公】

崔元翰

山色入层城，钟声临复岫。乘闲息边事，探异怜春候。

· 全唐诗 ·

曲阁下重阶，回廊遥对霏。石间花遍落，草上云时覆。
钻火见樵人，饮泉逢野兽。道情亲法侣，时望登朝右。

执宪纠奸邪，刊书正讹谬。茂才当时选，公子生人秀。
赠答继篇章，欢娱重朋旧。垂帘独衰疾，击缶酬金奏。

卷 313_6【杂言奉和圣制至承光院见自生藤，感其得地因以成咏应制】

崔元翰

新藤正可玩，得地又蓬时。罗生密叶交绿蔓，
欲布清阴垂紫蕤。已带朝光暖，犹含轻露滋。

遥依千华殿，稍上万年枝。余芳连桂树，积润傍莲池。
岂如幽谷无人见，空覆荒榛杂兔丝。圣心对此应有感，

隐迹如斯谁复知。怀贤劳永叹，比物赋新诗。
聘丘园，访茅茨，为谢中林士，王道本无私。

卷 313_7【雨中对后檐丛竹】

崔元翰

含风摇砚水，带雨拂墙衣。乍似秋江上，渔家半掩扉。

· 全唐诗 ·

卷 313_8【赋得沉珠于泉】

独孤良器

皎洁沈泉水，荧煌照乘珠。沈非将宝契，还与不贪符。
风折璫成浪，空涵影似浮。深看星并入，静向月同无。
光价怜时重，亡情信道枢。不应无胫至，自为暗投殊。

卷 313_9【雪席口占】

高崇文

崇文宗武不崇文，提戈出塞号将军。
那个髑儿射雁落，白毛空里乱纷纷。

卷 313_10【行县至浮查山寺】

罗珣

三十年前此布衣，鹿鸣西上虎符归。行时宾从过前寺，
到处松杉长旧围。野老竞遮官道拜，沙鸥遥避隼旗飞。
春风一宿琉璃地，自有泉声惬素机。

· 全唐诗 ·

卷 313_11【赋四相诗·中书令汉阳王张柬之】

皇甫湜

周历革元命，天步值艰阻。烈烈张汉阳，左袒清诸武。
休明神器正，文物旧仪睹。南向翊大君，西宫朝圣母。
茂勋镂钟鼎，鸿劳食茅土。至今称五王，卓立迈万古。

卷 313_12【赋四相诗·中书令钟绍京】

皇甫湜

景龙仙驾远，中禁奸衅结。谋猷叶圣朝，披鳞奋英节。
青宫闾阖启，涤秽氛沴灭。紫气重昭回，皇天新日月。
从容庙堂上，肃穆人神悦。唐元佐命功，辉焕何烈烈。

卷 313_13【赋四相诗·礼部尚书门下侍郎平章事李峤】

皇甫湜

时来遇明圣，道济宁邦国。猗欤瑚琏器，竭我股肱力。
进贤黜不肖，错枉举诸直。宦官既却坐，权奸亦移职。
载践每若惊，三已无愠色。昭昭垂宪章，来世实作则。

· 全唐诗 ·

卷 313_14【赋四相诗·门下侍郎平章事王缙】

皇甫澈

舟楫济巨川，山河资秀气。服膺究儒业，屈指取高位。
北征戮骄悍，东守辑携贰。论道致巍巍，持衡无事事。
知己不易遇，宰相固有器。瞻事华壁中，来者谁其嗣。

卷 313_15【上巳泛舟得迟字】

张登

令节推元巳，天涯喜有期。初筵临泛地，旧俗祓禊时。
枉渚潮新上，残春日正迟。竹枝游女曲，桃叶渡江词。
风鸂今方退，沙鸥亦未疑。且同山简醉，倒载莫褰帷。

卷 313_16【送王主簿游南海】

张登

平生推久要，留滞共三年。明日东南路，穷荒雾露天。
旷怀常寄酒，素业不言钱。道在贫非病，时来丑亦妍。
过山乘蜡屐，涉海附楼船。行矣无为恨，宗门有大贤。

· 全唐诗 ·

卷 313_17【重阳宴集同用寒字】

张登

锡宴逢佳节，穷荒亦共欢。恩深百日泽，雨借九秋寒。
望气人谣诼，临风客以难。座移山色在，杯尽菊香残。
欲识投醪遍，应从落帽看。还宵须命烛，举首谢三官。

卷 313_18【仲秋夜郡内西亭对月】

张登

天高月满影悠悠，一夜炎荒并觉秋。气与露清凝众草，
色如霜白怯轻裘。高临华宇还知隙，静映长江不共流。
直西倾河汉曙，遗风犹想武昌楼。

卷 313_19【冬至夜郡斋宴别前华阴卢主簿】

张登

虎宿方冬至，鸡人积夜筹。相逢一尊酒，共结两乡愁。
王俭花为府，卢谿幄内璆。明朝更临水，怅望岭南流。

· 全唐诗 ·

卷 313_20 【小雪日戏题绝句】

张登

甲子徒推小雪天，刺梧犹绿槿花然。

融和长养无时歇，却是炎洲雨露偏。

卷 313_21 【招客游寺】

张登

江城吏散卷春阴，山寺鸣钟隔雨深。

招取遗民赴僧社，竹堂分坐静看心。

卷 313_22 【句】

张登

孤高齐帝石，萧洒晋亭峰。

境旷穷山外，城标涨海头。

· 全唐诗 ·

卷 313_23【陪韩退之、窦贻、周同寻刘尊师不遇，得师字】

韦执中

早尚逍遥境，常怀汗漫期。星郎同访道，羽客杳何之。

物外求仙侣，人间失我师。不知柯烂者，何处看围棋。

卷 313_24【寻人偶题】

邵真

日昃不复午，落花难归树。人生能几何，莫厌相逢遇。

卷 313_25【墙阴残雪】

何频瑜

积雪还因地，墙阴久尚残。影添斜月白，光借夕阳寒。

皎洁开帘近，清荧步履看。状花飞著树，如玉不成盘。

冰薄方宁及，霜浓比亦难。谁怜高卧处，岁暮叹袁安。

· 全唐诗 ·

卷 313_26 【题度支杂事典庭中柏树】

骆浚

干耸一条青玉直，叶铺千叠绿云低。
争如燕雀偏巢此，却是鸳鸯不得栖。

卷 313_27 【梢云】

罗让

殊质资灵贶，凌空发瑞云。梢梢含树彩，郁郁动霞文。
不比因风起，全非触石分。叶光闲泛滟，枝杪静氛氲。
隐见心无宰，裴回庆自君。翻飞如可托，长愿在横汾。

卷 313_28 【闰月定四时】

罗让

月闰随寒暑，畴人定职司。馀分将考日，积算自成时。
律候行宜表，阴阳运不欺。气薰灰琯验，数扞卦辞推。
六律文明序，三年理暗移。当知岁功立，唯是奉无私。

· 全唐诗 ·

卷三百一十四

卷 314_1【享文恭太子庙乐章】

陈京

歌以德发，声以乐贵。乐善名存，追仙礼异。
鸾旌拱修，凤鸣合次。神听皇慈，仲月皆至。

卷 314_2【步虚词十九首】

韦渠牟

玉简真人降，金书道箓通。烟霞方蔽日，云雨已生风。
四极威仪异，三天使命同。那将人世恋，不去上清宫。

羽驾正翩翩，云鸿最自然。霞冠将月晓，珠珮与星连。
镂玉留新诀，雕金得旧编。不知飞鸾鹤，更有几人仙。

上帝求仙使，真符取玉郎。三才闲布象，二景郁生光。
骑吏排龙虎，笙歌走凤凰。天高人不见，暗入白云乡。

· 全唐诗 ·

鸾鹤共裴回，仙官使者催。香花三洞启，风雨百神来。
凤篆文初定，龙泥印已开。何须生羽翼，始得上瑶台。

羽节忽排烟，苏君已得仙。命风驱日月，缩地走山川。
几处留丹灶，何时种玉田。一朝骑白虎，直上紫微天。

静发降灵香，思神意智长。虎存时促步，龙想更成章。
扣齿风雷响，挑灯日月光。仙云在何处，仿佛满空堂。

几度游三洞，何方召百神。风云皆守一，龙虎亦全真。
执节仙童小，烧香玉女春。应须绝岩内，委曲问皇人。

上法杳无营，玄修似有情。道宫琼作想，真帝玉为名。
召岳驰旌节，驱雷发吏兵。云车降何处，斋室有仙卿。

羽卫一何鲜，香云起暮烟。方朝太素帝，更向玉清天。
凤曲凝犹吹，龙骖俨欲前。真文几时降，知在永和年。

大道何年学，真符此日催。还持金作印，未要玉为台。
羽节分明授，霞衣整顿裁。应缘五云使，教上列仙来。

独自授金书，萧条咏紫虚。龙行还当马，云起自成车。
九转风烟合，千年井灶馀。参差从太一，寿等混元初。

道学已通神，香花会女真。霞床珠斗帐，金荐玉舆轮。
一室心偏静，三天夜正春。灵官竟谁降，仙相有夫人。

· 全唐诗 ·

上界有黄房，仙家道路长。神来知位次，乐变叶宫商。
竞把琉璃盏，都倾白玉浆。霞衣最芬馥，苏合是灵香。

珠佩紫霞缨，夫人会八灵。太霄犹有观，绝宅岂无形。
暮雨裴回降，仙歌宛转听。谁逢玉妃辇，应检九真经。

西海辞金母，东方拜木公。云行疑带雨，星步欲凌风。
羽袖挥丹凤，霞巾曳彩虹。飘飘九霄外，下视望仙宫。

玉树杂金花，天河织女家。月邀丹凤舄，风送紫鸾车。
雾縠笼绡带，云屏列锦霞。瑶台千万里，不觉往来赊。

舞凤凌天出，歌麟入夜听。云容衣眇眇，风韵曲泠泠。
扣齿端金简，焚香检玉经。仙宫知不远，只近太微星。

紫府与玄洲，谁来物外游。无烦骑白鹿，不用驾青牛。
金化颜应驻，云飞鬓不秋。仍闻碧海上，更用玉为楼。

鸾鹤复骖鸾，全家去不难。鸡声随羽化，犬影入云看。
酿玉当成酒，烧金且转丹。何妨五色绶，次第给仙官。

卷 314_3 【览外生卢纶诗，因以示此】

韦渠牟

卫玠清谈性最强，明时独拜正员郎。关心珠玉曾无价，

· 全唐诗 ·

满手琼瑶更有光。谋略久参花府盛，才名常带粉闱香。
终期内殿联诗句，共汝朝天会柏梁。

卷 314_4【赠窦五判官】

韦渠牟

故旧相逢三两家，爱君兄弟有声华。文辉锦彩珠垂露，
逸兴江天绮散霞。美玉自矜频献璞，真金难与细披沙。
终须撰取新诗品，更比芙蓉出水花。

卷 314_5【湖上闲居】

窦参

避影将息阴，自然知音稀。向来深林中，偶亦有所窥。
飞鸟口衔食，引雏上高枝。高枝但各有，安知宜不宜。
止止复何云，物情何自私。

卷 314_6【迁谪江表久未归】

窦参

一自经放逐，裴回无所从。便为寒山云，不得随飞龙。

· 全唐诗 ·

名岂不欲保，归岂不欲早。苟无三月资，难适千里道。
离心与羈思，终日常草草。人生年几齐，忧苦即先老。
谁能假羽翼，使我畅怀抱。

卷 314_7【登潜山观】

窦参

山势欲相抱，一条微径盘。攀萝歇复行，始得凌仙坛。
闻道葛夫子，此中炼还丹。丹成五色光，服之生羽翰。
灵草空自绿，馀霞谁共餐。至今步虚处，犹有孤飞鸾。
幽幽古殿门，下压浮云端。万丈水声落，四时松色寒。
既入无何乡，转嫌人事难。终当远尘俗，高卧从所安。

卷 314_8【淮西席上醉歌】

卢群

祥瑞不在凤凰麒麟，太平须得边将忠臣。卫霍真诚奉主，
貔虎十万一身。江河潜注息浪，蛮貊款塞无尘。
但得百寮师长肝胆，不用三军罗绮金银。

· 全唐诗 ·

卷 314_9【天池晚棹】

韦皋

雨霁天池生意足，花间谁咏采莲曲。舟浮十里芰荷香，
歌发一声山水绿。春暖鱼抛水面纶，晚晴鹭立波心玉。
扣舷归载月黄昏，直至更深不假烛。

卷 314_10【赠何遐】

韦皋

腰间宝剑七星文，掌上弯弓挂六钧。
箭发 云双雁落，始知秦地有将军。

卷 314_11【忆玉箫】

韦皋

黄雀衔来已数春，别时留解赠佳人。
长江不见鱼书至，为遣相思梦入秦。

· 全唐诗 ·

卷 314_12【观翟玉妓】

李愿

女郎闺阁春，抱瑟坐花茵。艳粉宜斜烛，羞蛾惨向人。

寄情摇玉柱，流眄整罗巾。幸以芳香袖，承君宛转尘。

卷 314_13【思妇】

李愿

良人久不至，惟恨锦屏孤。憔悴衣宽日，空房问女巫。

卷 314_14【徐州使院赋】

王智兴

三十年前老健儿，刚被郎中遣作诗。

江南花柳从君咏，塞北烟尘我独知。

· 全唐诗 ·

卷 314_15【茶山诗】

袁高

禹贡通远俗，所图在安人。后王失其本，职吏不敢陈。
亦有奸佞者，因兹欲求伸。动生千金费，日使万姓贫。

我来顾渚源，得与茶事亲。氓辍耕农耒，采采实苦辛。
一夫旦当役，尽室皆同臻。扪葛上欹壁，蓬头入荒榛。

终朝不盈掬，手足皆鳞皴。悲嗟遍空山，草木为不春。
阴岭芽未吐，使者牒已频。心争造化功，走挺糜鹿均。

选纳无昼夜，捣声昏继晨。众工何枯枵，俯视弥伤神。
皇帝尚巡狩，东郊路多堙。周回绕天涯，所献愈艰勤。

况减兵革困，重兹固疲民。未知供御馀，谁合分此珍。
顾省忝邦守，又惭复因循。茫茫沧海间，丹愤何由申。

卷 314_16【送惟详律师自越之义兴】

崔子向

阳羨诸峰顶，何曾异剡山。雨晴人到寺，木落夜开关。
缝衲纱灯亮，看心锡仗闲。西方知有社，未得与师还。

· 全唐诗 ·

卷 314_17【上鲍大夫】

崔子向

行尽江南塞北时，无人不诵鲍家诗。
东堂桂树何年折，直至如今少一枝。

卷 314_18【题越王台】

崔子向

越井岗头松柏老，越王台上生秋草。
古木多年无子孙，牛羊践踏成官道。

卷 314_19【赠韩退之】

张署

九疑峰畔二江前，恋阙思乡日抵年。白简趋朝曾并命，
苍梧左宦一联翩。鲛人远泛渔舟水，鵬鸟闲飞露里天。
涣汗几时流率土，扁舟西下共归田。

· 全唐诗 ·

卷 314_20 【享惠昭太子庙乐章】

归登

嘉荐既陈，祀事孔明。间歌在堂，万舞在庭。
外则尽物，内则尽诚。凤笙如闻，歆其洁精。

· 全唐诗 ·

卷三百一十五

卷 315_1【剡溪行却寄新别者】

朱放

潺湲寒溪上，自此成离别。回首望归人，移舟逢暮雪。
频行识草树，渐老伤年发。唯有白云心，为向东山月。

卷 315_2【九日陪刘中丞宴昌乐寺送梁廷评】

朱放

独坐三台妙，重阳百越间。水心观远俗，霜气入秋山。
不弃遗簪旧，宁辞落帽还。仍闻西上客，咫尺谒天颜。

卷 315_3【经故贺宾客镜湖道士观】

朱放

已得归乡里，逍遥一外臣。那随流水去，不待镜湖春。

· 全唐诗 ·

雪里登山屐，林间漉酒巾。空馀道士观，谁是学仙人。

卷 315_4【送著公归越】

朱放

谁能愁此别，到越会相逢。长忆云门寺，门前千万峰。
石床埋积雪，山路倒枯松。莫学白道士，无人知去踪。

卷 315_5【秣陵送客入京】

朱放

秣陵春已至，君去学归鸿。绿水琴声切，青袍草色同。
鸟喧金谷树，花满洛阳宫。日日相思处，江边杨柳风。

卷 315_6【灵门寺赠灵一上人】

朱放

所思劳旦夕，惆怅去湘东。禅客知何在，春山几处同。
独行残雪里，相见暮云中。请住东林寺，弥年事远公。

· 全唐诗 ·

卷 315_7【江上送别】

朱放

浦边新见柳摇时，北客相逢只自悲。惆怅空知思后会，
艰难不敢料前期。行看汉月愁征战，共折江花怨别离。
向夕孤城分首处，寂寥横笛为君吹。

卷 315_8【归桐庐旧居寄严长史】

朱放

昨辞天子棹归舟，家在桐庐忆旧丘。三月暖时花竞发，
两溪分处水争流。近闻江老传乡语，遥见家山减旅愁。
或在醉中逢夜雪，怀贤应向剡川游。

卷 315_9【竹】

朱放

青林何森然，沈沈独曙前。出墙同淅沥，开户满婵娟。
箨卷初呈粉，苔侵乱上钱。疏中思水过，深处若山连。
叠夜常栖露，清朝乍有蝉。砌阴迎缓策，檐翠对欹眠。
迸笋双分箭，繁梢一向偏。月过惊散雪，风动极闻泉。

· 全唐诗 ·

幽谷添诗谱，高人欲制篇。萧萧意何恨，不独往湘川。

卷 315_10【铜雀妓】

朱放

恨唱歌声咽，愁翻舞袖迟。西陵日欲暮，是妾断肠时。

卷 315_11【毗陵留别】

朱放

别离非一处，此处最伤情。白发将春草，相随日日生。

卷 315_12【题竹林寺】

朱放

岁月人间促，烟霞此地多。殷勤竹林寺，能得几回过。

· 全唐诗 ·

卷 315_13【答陆澧】

朱放

松叶堪为酒，春来酿几多。不辞山路远，踏雪也相过。

卷 315_14【杨子津送人】

朱放

今朝杨子津，忽见五溪人。老病无馀事，丹砂乞五斤。

卷 315_15【山中谒皇甫曾】

朱放

寻源路已尽，笑入白云间。不解乘轺客，那知有此山。

卷 315_16【剡山夜月】

朱放

月在沃洲山上，人归剡县溪边。
漠漠黄花覆水，时时白鹭惊船。

· 全唐诗 ·

卷 315_17【九日与杨凝、崔淑期登江上山会，有故不得往，因赠之】

朱放

欲从携手登高去，一到门前意已无。

那得更将头上发，学他年少插茱萸。

卷 315_18【山中听子规】

朱放

幽人自爱山中宿，又近葛洪丹井西。

窗中更有长松树，半夜子规来上啼。

卷 315_19【乱后经淮阴岸】

朱放

荒村古岸谁家在，野水浮云处处愁。

唯有河边衰柳树，蝉声相送到扬州。

· 全唐诗 ·

卷 315_20 【送张山人】

朱放

知君住处足风烟，古寺荒村在眼前。

便欲移家逐君去，唯愁未有买山钱。

卷 315_21 【别李季兰】

朱放

古岸新花开一枝，岸傍花下有分离。

莫将罗袖拂花落，便是行人肠断时。

卷 315_22 【游石涧寺】

朱放

闻道幽深石涧寺，不逢流水亦难知。

莫道山僧无伴侣，猕猴长在古松枝。

· 全唐诗 ·

卷 315_23【新安所居答相访人所居萧使君为制】

朱放

谢公见我多愁疾，为我开门对碧山。
君若欲来看猿鸟，不须争把桂枝攀。

卷 315_24【送魏校书】

朱放

长恨江南足别离，几回相送复相随。
杨花撩乱扑流水，愁杀人行知不知。

卷 315_25【送温台】

朱放

眇眇天涯君去时，浮云流水自相随。
人生一世长如客，何必今朝是别离。

卷 315_26【句】

朱放

爱彼云外人，求取涧底泉。风吹芭蕉拆，鸟啄梧桐落。

· 全唐诗 ·

卷三百一十六

卷 316_1【古意】

武元衡

蜀国春与秋，岷江朝夕流。长波东接海，万里至扬州。

开门面淮甸，楚俗饶欢宴。舞榭黄金梯，歌楼白云面。

荡子未言归，池塘月如练。

卷 316_2【塞下曲】

武元衡

草枯马蹄轻，角弓劲如石。骄虏初欲来，风尘暗南国。

走檄召都尉，星火剿羌狄。吾身许报主，何暇避锋镝。

白露湿铁衣，半夜待攻击。龙沙早立功，名向燕然勒。

· 全唐诗 ·

卷 316_3【独不见】

武元衡

荆门一柱观，楚国三休殿。环珮俨神仙，辉光生顾盼。
春风细腰舞，明月高堂宴。梦泽水连云，渚宫花似霰。
俄惊白日晚，始悟炎凉变。别岛异波潮，离鸿分海县。
南北断相闻，叹嗟独不见。

卷 316_4【旬假南亭寄熊郎中】

武元衡

旬休屏戎事，凉雨北窗眠。江城一夜雨，万里绕山川。
草木散幽气，池塘鸣早蝉。妍芳落春后，旅思生秋前。
红槿粲庭艳，绿蒲繁渚烟。行歌独谣酌，坐发朱丝弦。
哀玉不可扣，华烛徒湛然。闻君乐林卧，郡阁旷周旋。
酬对龙象侣，灌注清冷泉。如何无碍智，犹苦病缠牵。

卷 316_5【晨兴寄赠窦使君】

武元衡

江陵岁方晏，晨起眄庭柯。白露伤红叶，清风断绿萝。

· 全唐诗 ·

徇时真气索，念远怀忧多。夙昔乐山意，纵横南浦波。
有美婵娟子，百虑攒双蛾。缄情郁不舒，幽行骈复罗。
为予歌苦寒，酌酒朱颜酡。世事浮云变，功名将奈何。

卷 316_6【秋日对酒】

武元衡

行年过始衰，秋至独先悲。事往怜神魄，感深滋涕洟。
百忧纷在虑，一醉兀无思。宝瑟拂尘匣，徽音凝朱丝。
幽圃蕙兰气，烟窗松桂姿。我乏济时略，杖节抚藩维。
山川大兵后，牢落空城池。惊沙犹振野，绿草生荒陂。
物变风雨顺，人怀天地慈。春耕事秋战，戎马去封陲。
波澜暗超忽，坚白亦磷缁。客有自嵩颖，重征栖隐期。
丹诀学仙晚，白云归谷迟。君恩不可报，霜露绕南枝。

卷 316_7【安邑里中秋怀寄高员外】

武元衡

原宪素非贫，嵇康自寡欲。守道识通穷，达命齐荣辱。
庭梧变葱蒨，篱菊扬芳馥。坠叶翻夕霜，高堂瞬华烛。
况兹寒夜永，复叹流年促。感物思殷勤，怀贤心踟躅。
雄词封禅草，丽句阳春曲。高德十年兄，异才千里足。
咫尺邈雪霜，相望如琼玉。欲识岁寒心，松筠更秋绿。

· 全唐诗 ·

卷 316_8【送唐次】

武元衡

都门去马嘶，灞水春流浅。青槐驿路长，白日离尊晚。

望望烟景微，草色行人远。

卷 316_9【秋夜雨中怀友】

武元衡

庭空雨鸣骄，天寒雁啼苦。青灯淡吐光，白发悄无语。

几年不与联床吟，君方客吴我犹楚。

卷 316_10【望夫石】

武元衡

佳名望夫处，苔藓封孤石。万里水连天，巴江暮云碧。

湘妃泣下竹成斑，子规夜啼江树白。

· 全唐诗 ·

卷 316_11 【行路难】

武元衡

君不见道傍废井傍开花，原是昔年骄贵家。
几度美人来照影，濯纤笑引银瓶绦。风飘雨散今奈何，
绣闼雕甍绿苔多。笙歌鼎沸君莫矜，豪奢未必长多金。
休说编氓朴无耻，至竟终须合天理。非故败他却成此，
苏张终作多言鬼。行路难，路难不在九折湾。

卷 316_12 【长相思】

武元衡

长相思，陇云愁，单于台上望伊州。雁书绝，蝉鬓秋。
行人天一畔，暮雨海西头。殷勤大河水，东注不还流。

卷 316_13 【出塞作】

武元衡

夙驾逾人境，长驱出塞垣。边风引去骑，胡沙拂征辕。
奏笳山月白，结阵瘴云昏。虽云风景异华夏，
亦喜地理通楼烦。白羽矢飞先火炮，黄金甲耀夺朝暾。
要须洒扫龙沙净，归谒明光一报恩。

· 全唐诗 ·

卷 316_14【桃源行送友】

武元衡

武陵川径入幽遐，中有鸡犬秦人家，家傍流水多桃花。
桃花两边种来久，流水一通何时。垂条落蕊暗春风，
夹岸芳菲至山口。岁岁年年能寂寥，林下青苔日为厚。
时有仙鸟来衔花，曾无世人此携手。可怜不知若为名，
君往从之多所更。古驿荒桥平路尽，崩湍怪石小溪行。
相见维舟登览处，红堤绿岸宛然成。多君此去从仙隐，
令人晚节悔营营。

卷 316_15【长安叙怀寄崔十五】

武元衡

延首直城西，花飞绿草齐。迢迢隔山水，怅望思游子。
百啭黄鹂细雨中，千条翠柳衡门里。门对长安九衢路，
愁心不惜芳菲度。风尘冉冉秋复春，钟鼓喧喧朝复暮。
汉家宫阙在中天，紫陌朝臣车马连。萧萧霓旌合仙仗，
悠悠剑佩入炉烟。李广少时思报国，终军未遇敢论边。
无媒守儒行，荣悴纷相映。家甚长卿贫，身多公干病。
不知身病竟如何，懒向青山眠薜萝。鸡黍空多元伯惠，
琴书不见子猷过。超名累岁与君同，自叹还随鹤退风。
闻说唐生子孙在，何当一为问穷通。

· 全唐诗 ·

卷 316_16 【兵行褒斜谷作】

武元衡

古地接龟沙，边风送征雁。霜明草正腓，峰逼日易晏。
集旅布嵌谷，驱马历层涧。岷河源涉屡，蜀甸途行惯。

矢橐弧室岂领军，儋爵食禄由从宦。注意奏凯赴都畿，
速令提兵还石坂。三川顿使气象清，卖刀买犊消忧患。

卷 316_17 【西亭早秋送徐员外】

武元衡

鼎铉辞台座，麾幢领益州。曲池连月晓，横角满城秋。
有美皇华使，曾同白社游。今年重相见，偏觉艳歌愁。

卷 316_18 【送徐员外还京】

武元衡

九折朱轮动，三巴白露生。蕙兰秋意晚，关塞别魂惊。
宝瑟连宵怨，金罍尽醉倾。旄头星未落，分手辘轳鸣。

· 全唐诗 ·

卷 316_19 【送柳郎中裴起居】

武元衡

沱江水绿波，喧鸟去乔柯。南浦别离处，东风兰杜多。
长亭春婉婉，层汉路蹉跎。会有归朝日，班超奈老何。

卷 316_20 【八月十五酬从兄常望月有怀】

武元衡

坐爱圆景满，况兹秋夜长。寒光生露草，夕韵出风篁。
地远惊金奏，天高失雁行。如何北楼望，不得共池塘。

卷 316_21 【酬太常从兄留别】

武元衡

乡路日兹始，征轩行复留。张骞随汉节，王濬守刀州。
泽国烟花度，铜梁雾雨愁。别离无可奈，万恨锦江流。

· 全唐诗 ·

卷 316_22 【春日与诸公泛舟】

武元衡

千里雪山开，沱江春水来。驻帆云缥缈，吹管鹤裴回。
身外流年驶，尊前落景催。不应归棹远，明月在高台。

卷 316_23 【送兄归洛使谒严司空】

武元衡

六岁蜀城守，千茎蓬鬓丝。忧心不自遣，骨肉又伤离。
楚峡饶云雨，巴江足梦思。殷勤孔北海，时节易流移。

卷 316_24 【同洛阳诸公饯卢起居】

武元衡

萧条寒日晏，凄惨别魂惊。宝瑟无声怨，金囊故赠轻。
赤墀方载笔，油幕尚言兵。暮宿青泥驿，烦君泪满缨。

· 全唐诗 ·

卷 316_25【台中题壁】

武元衡

柏台年未老，蓬鬓忽苍苍。无事裨明主，何心弄宪章。
雀声愁霰雪，鸿思恨关梁。会脱簪缨去，故山瑶草芳。

卷 316_26【江上寄隐者】

武元衡

归舟不计程，江月屡亏盈。霭霭沧波路，悠悠离别情。
蒹葭连水国，鼙鼓近梁城。却忆沿江叟，汀洲春草生。

卷 316_27【送严绅游兰溪】

武元衡

剡岭穷边海，君游别岭西。暮云秋水阔，寒雨夜猿啼。
地僻秦人少，山多越路迷。萧萧驱匹马，何处是兰溪。

· 全唐诗 ·

卷 316_28【秋思】

武元衡

秋室浩烟雾，风柳怨寒蛩。机杼夜声切，蕙兰芳意消。

美人湘水曲，桂楫洞庭遥。常恐时光谢，蹉跎红艳凋。

卷 316_29【夏日别卢太卿】

武元衡

汉水清且广，江波渺复深。叶舟烟雨夜，之子别离心。

汀草结春怨，山云连暝阴。年年南北泪，今古共沾襟。

卷 316_30【西亭题壁寄中书李相公】

武元衡

昏旦倦兴寝，端忧力尚微。廉颇不觉老，蘧瑗始知非。

授钺虚三顾，持衡旷万机。空馀蝴蝶梦，迢递故山归。

· 全唐诗 ·

卷 316_31 【八月十五夜与诸公锦楼望月得中字】

武元衡

玉轮初满空，迥出锦城东。相向秦楼镜，分飞碣石鸿。

桂香随窈窕，珠缀隔玲珑。不及前秋月，圆辉凤沼中。

卷 316_32 【四川使宅有韦令公时孔雀存焉，暇日与诸公同玩座中兼故府宾妓兴嗟久之，因赋此诗用广其意】

武元衡

荀令昔居此，故巢留越禽。动摇金翠尾，飞舞碧梧阴。

上客彻瑶瑟，美人伤蕙心。会因南国使，得放海云深。

卷 316_33 【窦三中丞去岁有台中五言四韵未及酬报，今领黔南，途经蜀门，百里而近，愿言款觐封略间然，因追曩篇，持以赠之】

武元衡

在昔谬司宪，常僚惟有君。报恩如皎日，致位等青云。

削藁书难见，除苛事早吟。双旌不可驻，风雪路岐分。

· 全唐诗 ·

卷 316_34 【春分与诸公同宴呈陆三十四郎中】

武元衡

南国宴佳宾，交情老倍亲。月惭红烛泪，花笑白头人。
宾瑟常馀怨，琼枝不让春。更闻歌子夜，桃李艳妆新。

卷 316_35 【津梁寺采新茶与幕中诸公遍赏，芳香尤异，因题四韵兼呈陆郎中】

武元衡

灵州碧岩下，萸英初散芳。涂涂犹宿露，采采不盈筐。
阴窦藏烟湿，单衣染焙香。幸将调鼎味，一为奏明光。

卷 316_36 【元和癸巳，余领蜀之七年，奉诏征还，一月二十八日清明途经百牢关，因题石门洞】

武元衡

昔佩兵符去，今持相印还。天光临井络，春物度巴山。
鸟道青冥外，风泉洞壑间。何惭班定远，辛苦玉门关。

· 全唐诗 ·

卷 316_37【夕次潘山下】

武元衡

南国独行日，三巴春草齐。漾波归海疾，危栈入云迷。

锦谷岚烟里，刀州晚照西。旅情方浩荡，蜀魄满林啼。

卷 316_38【夏日对雨寄朱放拾遗】

武元衡

才非谷永传，无意谒王侯。小暑金将伏，微凉麦正秋。

远山依枕见，暮雨闭门愁。更忆东林寺，诗家第一流。

卷 316_39【早春送欧阳炼师归山】

武元衡

双鹤五云车，初辞汉帝家。人寰新甲子，天路旧烟霞。

羽节临风驻，霓裳逐雨斜。昆仑有琪树，相忆寄瑶华。

· 全唐诗 ·

卷 316_40 【长安春望】

武元衡

宿雨净烟霞，春风绽百花。绿杨中禁路，朱戟五侯家。
草色金堤晚，莺声御柳斜。无媒犹未达，应共惜年华。

卷 316_41 【经严秘校维故宅】

武元衡

掩泪山阳宅，生涯此路穷。香销芸阁闭，星落草堂空。
丽藻浮名里，哀声夕照中。不堪投钓处，邻笛怨春风。

卷 316_42 【秋夜寄江南旧游】

武元衡

寥落九秋晚，端忧时物残。隔林萤影度，出禁漏声寒。
愁雨洞房掩，孤烛遥夜阑。怀贤梦南国，兴尽水漫漫。

· 全唐诗 ·

卷 316_43 【送陆书还吴】

武元衡

君住包山下，何年入帝乡。成名归旧业，叹别见秋光。

橘柚吴洲远，芦花楚水长。我行经此路，京口向云阳。

卷 316_44 【山中月夜寄朱张二舍人】

武元衡

午夜更漏里，九重霄汉间。月华云阙迥，秋色凤池闲。

御锦通清禁，天书出暗关。嵇康不求达，终岁在空山。

卷 316_45 【送冯谏议赴河北宣慰】

武元衡

汉代衣冠盛，尧年雨露多。恩荣辞紫禁，冰雪渡黄河。

待诏孤城启，宣风万岁和。今宵燕分野，应见使星过。

· 全唐诗 ·

卷 316_46【夜坐闻雨寄严十少府】

武元衡

多负云霄志，生涯岁序侵。风翻凉叶乱，雨滴洞房深。
迢递三秋梦，殷勤独夜心。怀贤不觉寐，清磬发东林。

卷 316_47【资圣寺贲法师晚春茶会】

武元衡

虚室昼常掩，心源知悟空。禅庭一雨后，莲界万花中。
时节流芳暮，人天此会同。不知方便理，何路出樊笼。

卷 316_48【慈恩寺起上人院】

武元衡

禅堂支许同，清论道源穷。起灭秋云尽，虚无夕霭空。
池澄山倒影，林动叶翻风。他日焚香待，还来礼惠聪。

· 全唐诗 ·

卷 316_49【送魏正则擢第归江陵】

武元衡

客路商山外，离筵小暑前。高文常独步，折桂及韶年。

关国通秦限，波涛隔汉川。叨同会府选，分手倍依然。

卷 316_50【酬韩弇归崖见寄】

武元衡

惆怅人间事，东山遂独游。露凝瑶草晚，鱼戏石潭秋。

轩冕应相待，烟霞莫遽留。君看仲连意，功立始沧洲。

卷 316_51【河东赠别炼师】

武元衡

多累有行役，相逢秋节分。游人甘失路，野鹤亦离群。

戎马犯边垒，天兵屯塞云。孔璋才素健，羽檄定纷纷。

· 全唐诗 ·

卷 316_52【秋日将赴江上，杨弘微时任凤翔，寄诗别】

武元衡

寂寞两相阻，悠悠南北心。燕惊沧海远，鸿避朔云深。
夜梦江亭月，离忧陇树阴。兼秋无限思，惆怅属瑶琴。

卷 316_53【夏与熊王二秀才同宿僧院】

武元衡

共将纓上坐，来问雪山人。世纲从知累，禅心自证真。
境空宜入梦，藤古不留春。一听林公法，灵嘉愿寄身。

卷 316_54【宜阳所居白蜀葵答咏柬诸公】

武元衡

冉冉众芳歇，亭亭虚室前。敷荣时已背，幽赏地宜偏。
红艳世方重，素华徒可怜。何当君子愿，知不竞喧妍。

· 全唐诗 ·

卷 316_55【送寇侍御司马之明州】

武元衡

斗酒上河梁，惊魂去越乡。地穷沧海阔，云入剡山长。

莲唱蒲萄熟，人烟橘柚香。兰亭应驻楫，今古共风光。

卷 316_56【送严侍御】

武元衡

巴檄故人去，苍苍枫树林。云山千里合，雾雨四时阴。

峡路猿声断，桃源犬吠深。不须贪胜赏，汉节待南侵。

卷 316_57【酬元十二】

武元衡

偶寻乌府客，同醉习家池。积雪初迷径，孤云遂失期。

风前劳引领，月下重相思。何必因尊酒，幽心两自知。

· 全唐诗 ·

卷 316_58【秋晚途次坊州界寄崔玉员外】

武元衡

崎岖崖谷迷，寒雨暮成泥。征路出山顶，乱云生马蹄。
望乡程杳杳，怀远思凄凄。欲识分麾重，孤城万壑西。

卷 316_59【度东径岭】

武元衡

又过雁门北，不胜南客悲。三边上岩见，双泪望乡垂。
暮角云中戍，残阳天际旗。更看飞白羽，胡马在封陲。

卷 316_60【送李正字之蜀】

武元衡

已献甘泉赋，仍登片玉科。汉官新组绶，蜀国旧烟萝。
剑壁秋云断，巴江夜月多。无穷别离思，遥寄竹枝歌。

· 全唐诗 ·

卷 316_61【玉泉寺与润上人望秋山怀张少尹】

武元衡

山寒天降霜，烟月共苍苍。况此绿岩晚，尚馀丹桂芳。
禅心殊众乐，人世满秋光。莫怪频回首，孤云思帝乡。

卷 316_62【酬崔使君寄麈尾】

武元衡

贤人嘉尚同，今制古遗风。寄我襟怀里，辞君掌握中。
金声劳振远，玉柄借谈空。执玩驰心处，迢迢巴峡东。

卷 316_63【送邓州潘使君赴任】

武元衡

川陆一都会，旌旗千里舒。虎符中禁授，熊轼上流居。
橘柚金难并，池塘练不如。春风行部日，应驻士元车。

· 全唐诗 ·

卷 316_64【和李中丞题故将军林亭】

武元衡

帝里清和节，侯家邸第春。烟霏瑶草露，苔暗杏梁尘。
城郭悲歌旧，池塘丽句新。年年车马客，钟鼓乐他人。

卷 316_65【送韦侍御司议赴东都】

武元衡

洛京千里近，离绪亦纷纷。文宪芙蓉沼，元方羔雁群。
河关连巩树，嵩少接秦云。独有临风思，睽携不可闻。

卷 316_66【送吴侍御司马赴台州】

武元衡

卢耽佐郡遥，川陆共迢迢。风景轻吴会，文章变越谣。
烟林繁橘柚，云海浩波潮。余有灵山梦，前君到石桥。

· 全唐诗 ·

卷 316_67【送七兄赴歙州】

武元衡

车马去憧憧，都门闻晓钟。客程将日远，离绪与春浓。
流水逾千度，归云隔万重。玉杯倾酒尽，不换惨凄容。

卷 316_68【德宗皇帝挽歌词三首】

武元衡

道启轩皇圣，威扬夏禹功。讴歌亭育外，文武盛明中。
日月光连璧，烟尘屏大风。为人祈福处，台树与天通。
圣历勤政，瑶图庆运长。寿宫开此地，仙驾缈何乡。
风断清笳调，云愁绿旆扬。上升知不恨，弘济任城王。
尝闻阊阖前，星拱北辰簠。今来大明祖，辇驾桥山曲。
松柏韵幽音，鱼龙焰寒烛。岁岁秋风辞，兆人歌不足。

卷 316_69【顺宗至德大圣皇帝挽歌词三首】

武元衡

桥山同轨会，轩后葬衣冠。东海风波变，西陵松柏攒。
鼎湖仙已去，金掌露宁乾。万木泉扃月，空怜鳧雁寒。

· 全唐诗 ·

容卫晓徘徊，严城闾阖开。乌号龙驭远，遏密凤声哀。
昆浪黄河注，崦嵫白日颓。恭闻天子孝，不忍望铜台。
哀挽渭川曲，空歌汾水阳。夜泉愁更咽，秋日惨无光。
缵夏功传启，兴周业继昌。回瞻五陵上，烟雨为苍苍。

卷 316_70 【昭德皇后挽歌词】

武元衡

玉宸将迁坐，金鸡忽报晨。珮环仙驭远，星月夜台新。
剑没川空冷，菱寒镜不春。国门车马会，多是濯龙亲。

卷 316_71 【春晚奉陪相公西亭宴集】

武元衡

林花春向兰，高会重邀欢。感物惜芳景，放怀因彩翰。
玉颜秣处并，银烛焰中看。若折持相赠，风光益别难。

· 全唐诗 ·

卷三百一十七

卷 317_1【送崔判官使太原】

武元衡

劳君车马此逡巡，我与刘君本世亲。两地山河分节制，
十年京洛共风尘。笙歌几处胡天月，罗绮长留蜀国春。
报主由来须尽敌，相期万里宝刀新。

卷 317_2【幕中诸公有观猎之作因继之】

武元衡

刀州城北剑山东，甲士屯云骑散风。旌旆遍张林岭动，
豺狼驱尽塞垣空。衔芦远雁愁綦缴，绕树啼猿怯避弓。
为报府中诸从事，燕然未勒莫论功。

卷 317_3【同幕中诸公送李侍御归朝】

武元衡

昔年专席奉清朝，今日持书即旧僚。珠履会中箫管思，

· 全唐诗 ·

白云归处帝乡遥。巴江暮雨连三峡，剑壁危梁上九霄。
岁月不堪相送尽，颓颜更被别离凋。

卷 317_4【送张六谏议归朝】

武元衡

诏书前日下丹霄，头戴儒冠脱皂貂。笛怨柳营烟漠漠，
云愁江馆雨萧萧。鸳鸿得路争先翥，松柏凌寒独后凋。
归去朝端如有问，玉关门外老班超。

卷 317_5【酬严司空荆南见寄】

武元衡

金貂再领三公府，玉帐连封万户侯。帘卷青山巫峡晓，
烟开碧树渚宫秋。刘琨坐啸风清塞，谢朓题诗月满楼。
白雪调高歌不得，美人南国翠蛾愁。

卷 317_6【南徐别业早春有怀】

武元衡

生涯忧忧竟何成，自爱深居隐姓名。远雁临空翻夕照，

· 全唐诗 ·

残云带雨过春城。花枝入户犹含润，泉水侵阶乍有声。
虚度年华不相见，离肠怀土并关情。

卷 317_7【摩诃池宴】

武元衡

摩诃池上春光早，爱水看花日日来。秣李雪开歌扇掩，
绿杨风动舞腰回。芜台事往空留恨，金谷时危悟惜才。
昼短欲将清夜继，西园自有月裴回。

卷 317_8【至栢阳崇道寺闻严十少府趋侍】

武元衡

云连万木夕沈沈，草色泉声古院深。闻说羊车趋盛府，
何言琼树在东林。松筠自古多年契，风月怀贤此夜心。
惆怅送君身未达，不堪摇落听秋砧。

卷 317_9【春暮郊居寄朱舍人】

武元衡

幽深不让子真居，度日闲眠世事疏。春水满池新雨霁，

· 全唐诗 ·

香风入户落花馀。目随鸿雁穷苍翠，心寄溪云任卷舒。

回首知音青琐闼，何时一为荐相如。

卷 317_10【送温况游蜀】

武元衡

游人西去客三巴，身逐孤蓬不定家。山近峨眉飞暮雨，

江连濯锦起朝霞。云深九折刀州远，路绕千岩剑阁斜。

应到严君开卦处，将余一为问生涯。

卷 317_11【崔敷叹春物将谢，恨不同览，时余方为事牵束及往寻不遇，题之留赠】

武元衡

九陌迟迟丽景斜，禁街西访隐沦踪。门依高柳空飞絮，

身逐闲云不在家。轩冕强来趋世路，琴尊空负赏年华。

残阳寂寞东城去，惆怅春风落尽花。

· 全唐诗 ·

卷 317_12【秋灯对雨寄史近崔积】

武元衡

坐听宫城传晚漏，起看衰叶下寒枝。空庭绿草结离念，
细雨黄花赠所思。蟋蟀已惊良节度，茱萸偏忆故人期。
相逢莫厌尊前醉，春去秋来自不知。

卷 317_13【春题龙门香山寺】

武元衡

众香天上梵仙宫，钟磬寥寥半碧空。清景乍开松岭月，
乱流长响石楼风。山河杳映春云外，城阙参差茂树中。
欲尽出寻那可得，三千世界本无穷。

卷 317_14【酬陆三与邹十八侍御】

武元衡

城分流水郭连山，拂露开怀一解颜。令尹关中仙史会，
河阳县里玉人闲。共怜秋隼惊飞至，久想云鸿待侣还。
莫恨殷勤留此地，东崖桂树昔同攀。

· 全唐诗 ·

卷 317_15 【酬谈校书长安秋夜对月寄诸故旧】

武元衡

故园千里渺遐情，黄叶萧条白露生。惊鹊绕枝风满幌，
寒钟送晓月当楹。蓬山高价传新韵，槐市芳年挹盛名。
莫怪孔融悲岁序，五侯门馆重娄卿。

卷 317_16 【送田三端公还鄂州】

武元衡

孤云迢递恋沧洲，劝酒梨花对白头。南陌送归车骑合，
东城怨别管弦愁。青油幕里人如玉，黄鹤楼中月并钩。
君去庾公应借问，驰心千里大江流。

卷 317_17 【送李秀才赴滑州诣大夫舅】

武元衡

陌头车马去翩翩，白面怀书美少年。东武扬公姻娅重，
西州谢傅舅甥贤。长亭叫月新秋雁，官渡含风古树蝉。
知己满朝留不住，贵臣河上拥旌旃。

· 全唐诗 ·

卷 317_18 【秋日书怀】

武元衡

金貂玉铉奉君恩，夜漏晨钟老掖垣。参决万机空有愧，
静观群动亦无言。杯中壮志红颜歇，林下秋声绛叶翻。
倦鸟不知归去日，青芜白露满郊园。

卷 317_19 【南昌滩】

武元衡

渠江明净峡逶迤，船到名滩拽\$迟。橹竄动摇妨做梦，
巴童指点笑吟诗。畬馀宿麦黄山腹，日背残花白水湄。
物色可怜心莫限，此行都是独行时。

卷 317_27 【奉和圣制丰年多庆九日示怀】

武元衡

令节寰宇泰，神都佳气浓。赓歌禹功盛，击壤尧年丰。
九奏碧霄里，千官皇泽中。南山澄凝黛，曲水清涵空。
金玉美王度，欢康谣国风。睿文垂日月，永与天无穷。

· 全唐诗 ·

卷 317_28【夏日陪冯许二侍郎与严秘书游昊天观览旧题，寄同里杨华州中丞】

武元衡

三伏草木变，九城车马烦。碧霄回骑射，丹洞入桃源。
台殿云浮栋，綵纓鹤在轩。莫将真破妄，聊用静持喧。
石甃古苔冷，水筠凉簟翻。黄公垆下叹，旌旆国东门。

卷 317_29【奉和圣制重阳日即事】

武元衡

玉烛降寒露，我皇歌古风。重阳德泽展，万国欢娱同。
绮陌拥行骑，香尘凝晓空。神都自蔼蔼，佳气助葱葱。
律吕阴阳畅，景光天地通。徒然被鸿霈，无以报玄功。

卷 317_30【秋日台中寄怀简诸僚】

武元衡

宪府日多事，秋光照碧林。干云岩翠合，布石地苔深。
忧悔耿遐抱，尘埃缁素襟。物情牵局促，友道旷招寻。
颓节风霜变，流年芳景侵。池荷足幽气，烟竹又繁阴。
簪组赤墀恋，池鱼沧海心。涤烦滞幽赏，永度瑶华音。

· 全唐诗 ·

卷 317_31【奉酬淮南中书相公见寄】

武元衡

扬州隋故都，竹使汉名儒。翊圣恩华异，持衡节制殊。
朝廷连受脉，台座接訃谟。金玉裁王度，丹书奉帝俞。

九重辞象魏，千里握兵符。铁马秋临塞，虹旌夜渡泸。
江长梅笛怨，天远桂轮孤。浩叹烟霜晓，芳期兰蕙芜。

雅言书一札，宾海雁东隅。岁月奔波尽，音徽雾雨濡。
蜀江分井络，锦浪入淮湖。独抱相思恨，关山不可逾。

卷 317_32【甫构西亭偶题因呈监军及幕中诸公】

武元衡

瀛海无因泛，昆丘岂易寻。数峰聊在目，一境暂清心。

悦彼松柏性，爱兹桃李阴。列芳凭有土，丛干聚成林。

信矣子牟恋，归欤尼父吟。暗香兰露滴，空翠蕙楼深。

负鼎位尝忝，荷戈年屡侵。百城烦鞅掌，九仞喜岖嶔。

巴汉溯沿楫，岷峨千万岑。恩偏不敢去，范蠡畏熔金。

· 全唐诗 ·

卷 317_33【和杨弘微春日曲江南望】

武元衡

迟景霭悠悠，伤春南陌头。暄风一澹荡，遐思几殷忧。
龙去空仙沼，鸾飞掩妓楼。芳菲馀雨露，冠盖旧公侯。
朱戟千门闭，黄鹂百啭愁。烟濛宫树晚，花咽石泉流。
寒谷律潜应，中林兰自幽。商山将避汉，晋室正藩周。
黍稷闻兴叹，琼瑶畏见投。君心即吾事，微向在沧洲。

卷 317_34【长安秋夜怀陈京昆季】

武元衡

钟鼓九衢绝，出门千里同。远情高枕夜，秋思北窗空。
静见烟凝烛，闲听叶坠桐。玉壶思洞彻，琼树忆葱笼。
萤影疏帘外，鸿声暗雨中。羁愁难会面，懒慢责微躬。
甲乙科攀桂，图书阁践蓬。一瓢非可乐，六翮未因风。
寥落悲秋尽，蹉跎惜岁穷。明朝不相见，流泪菊花丛。

卷 317_35【冬日，汉江南行将赴夏口，途次江陵界，寄裴尚书】

武元衡

五部拥双旌，南依墨客卿。关山迴梁甸，波浪接湓城。

· 全唐诗 ·

烟景迷时候，云帆渺去程。蛤珠冯月吐，芦雁触罗惊。
浦树凝寒晦，江天湛镜清。赏心随处惬，壮志逐年轻。
舟楫不可驻，提封如任情。向方曾指路，射策许言兵。
兰渚歇芳意，菱歌非应声。元戎武昌守，羊祜幸连营。

卷 317_36 【奉酬中书李相公早朝于中书候传点，偶书所怀】

武元衡

寥落曙钟断，微明烟月沉。翠霞仙仗合，清漏掖垣深。
北极星遥拱，南山阙迢临。兰釭竟晓焰，琪树欲秋阴。
霄汉惭联步，貂蝉愧并簪。德容温比玉，王度式如金。
鱼水千年运，箫韶九奏音。代天惊度日，掷地喜开襟。
文武时方泰，唐虞道可寻。忝陪申及甫，清净奉尧心。

卷 317_37 【甲午岁相国李公有北园寄赠之作，吟玩历时，屡促酬答，机务不暇，未及报章，今古遽分，电寓波增感，留墓剑而心许，感邻笛而意伤，寓哀冥寞以广遗韵云】

武元衡

机事劳西掖，幽怀寄北园。鹤巢深更静，蝉噪断犹喧。
仙酝百花馥，艳歌双袖翻。碧云诗变雅，皇泽叶流根。
未报雕龙赠，俄伤泪剑痕。佳城关白日，哀挽向青门。
礼命公台重，烟霜陇树繁。天高不可问，空使辅星昏。

· 全唐诗 ·

卷 317_38【和杨三舍人晚秋与崔二舍人、张秘监、苗考功同游昊天观，纪题在壁，已有沦亡，书事感怀，辄以呈寄，兼呈东省三给事之作，杨君见征鄙词，因以继和】

武元衡

瑶圃高秋会，金闺奉诏辰。朱轮天上客，白石洞中人。
珮响泉声杂，朝衣羽服亲。九重青琐闭，三秀紫芝新。

化药秦方士，偷桃汉侍臣。玉笙王子驾，辽鹤令威身。
叹逝颓波速，缄词丽曲春。重将凄恨意，苔壁问遗尘。

卷 317_39【酬李十一尚书西亭暇日书怀见寄十二韵之作】

武元衡

鼎铉昔云忝，西南分主忧。烟尘开燹道，旌节护蛮陬。
任重功无立，力微恩未酬。据鞍惭齿发，责帅惧春秋。

高德闻郑履，俭居称晏裘。三刀君入梦，九折我回輶。
时景屡迁易，兹言期退休。方追故山事，岂谓台阶留。

遐抱清净理，眷言兰杜幽。一缄琼玖赠，万里别离愁。
巴岭云外没，蜀江天际流。怀贤耿遥思，相望凤池头。

· 全唐诗 ·

卷 317_40 【秋怀奉寄朱补阙】

武元衡

上苑繁霜降，骚人起恨初。白云深陋巷，衰草遍闲居。
暮色秋烟重，寒声牖叶虚。潘生秋思苦，陶令世情疏。
已制归田赋，犹陈谏猎书。不知青琐客，投分竟何如。

卷 317_41 【奉酬中书相公至日園丘行事合于中书省斋移止于集贤院叙情见寄之什】

武元衡

郊庙祗严祀，斋庄觐上玄。别开金虎观，不离紫微天。
树古长杨接，池清太液连。仲山方补衮，文举自伤年。
风溢铜壶漏，香凝绮阁烟。仍闻白雪唱，流咏满鹍弦。

卷 317_42 【途次】

武元衡

去国策羸马，劳歌行路难。地崇秦制险，人乐汉恩宽。
御沼澄泉碧，宫梨佛露丹。鼎成仙驭远，龙化宿云残。
不问三苗宠，谁陪万国欢。至今松桂色，长助玉楼寒。

· 全唐诗 ·

卷 317_43【题故蔡国公主九华观上池院】

武元衡

朱门临九衢，云木蔼仙居。曲沼天波接，层台风舞馀。
曙烟深碧筱，香露湿红蕖。瑶瑟含风韵，纱窗积翠虚。
秦楼今寂寞，真界竟何如。不与蓬瀛异，迢迢远玉除。

卷 317_44【酬严维秋夜见寄】

武元衡

遥夜思悠悠，闻钟远梦休。乱林萤烛暗，零露竹风秋。
启户云归栋，褰帘月上钩。昭明逢圣代，羁旅别沧洲。
骑省潘郎思，衡闱宋玉愁。神仙惭李郭，词赋谢曹刘。
松柏应无变，琼瑶不可酬。谁堪此时景，寂寞下高楼。

卷 317_45【途次近蜀驿，蒙恩赐宝刀及飞龙厩马使还，奉寄中书李、郑二公】

武元衡

草草事行役，迟迟违故关。碧帟遥隐雾，红旆渐依山。
感激酬恩泪，星霜去国颜。捧刀金锡字，归马玉连环。
威风翔双阙，征夫纵百蛮。应怜宣室召，温树不同攀。

· 全唐诗 ·

卷 317_46 【归燕】

武元衡

春色遍芳菲，闲檐双燕归。还同旧侣至，来绕故巢飞。
敢望烟霄达，多惭羽翮微。衔泥傍金砌，拾蕊到荆扉。
云海经时别，雕梁长日依。主人能一顾，转盼自光辉。

卷 317_47 【送许著作分司东都】

武元衡

瑶瑟激凄响，征鸿翻夕阳。署分刊竹简，书蠹护芸香。
马色关城晓，蝉声驿路长。石渠荣正礼，兰室重元方。
不作经年别，离魂亦暂伤。

卷 317_48 【闻相公三兄小园置宴，以元衡寓直，因寄上兼呈中书三兄】

武元衡

休沐限中禁，家山传胜游。露寒潘省夜，木落庾园秋。
兰菊回幽步，壶觞洽旧俦。位高天禄阁，词异畔牢愁。
孤思琴先觉，驰晖水竞流。明朝不相见，清祀在圜丘。

· 全唐诗 ·

卷 317_49 【酬陆员外歙州许员外郢州二使君】

武元衡

吴洲云海接，楚驿梦林长。符节分忧重，鹓鸿去路翔。
艳歌愁翠黛，宝瑟韵清商。洲草遥池合，春风晓旆张。
晋臣多乐广，汉主识冯唐。不作经年别，离魂亦未伤。

卷 317_50 【渐至涪州先寄王使君】

武元衡

治教通夷俗，均输问大田。江分巴字水，树入夜郎烟。
毒雾含秋气，阴岩蔽曙天。路难空计日，身老不由年。
将命宁知远，归心讵可传。星郎复何事，出守五溪边。

卷 317_51 【石州城】

武元衡

丈夫心爱横行，报国知嫌命轻。楼兰径百战，
更道戍龙城。锦字窦车骑，胡笳李少卿。生离两不见，
万古难为情。

· 全唐诗 ·

卷 317_52【寒食下第】

武元衡

柳挂九衢丝，花飘万家雪。如何憔悴人，对此芳菲节。

卷 317_53【途中即事】

武元衡

南征复北还，扰扰百年间。自笑红尘里，生涯不暂闲。

卷 317_54【春日偶作】

武元衡

纵横桃李枝，淡荡春风吹。美人歌白苧，万恨在蛾眉。

卷 317_55【夏夜作】

武元衡

夜久喧暂息，池台惟月明。无因驻清景，日出事还生。

· 全唐诗 ·

卷 317_56 【左掖梨花】

武元衡

巧笑解迎人，晴雪香堪惜。随风蝶影翻，误点朝衣赤。

卷 317_57 【同陈六侍御寒食游禅定藏山上人院】

武元衡

年少轻行乐，东城南陌头。与君寂寞意，共作草堂游。

卷 317_58 【赠佳人】

武元衡

步摇金翠玉搔头，倾国倾城胜莫愁。
若逞仙姿游洛浦，定知神女谢风流。

卷 317_59 【休暇日，中书相公致斋禁省，因以寄赠】

武元衡

尝闻圣主得贤臣，三接能令四海春。

· 全唐诗 ·

月满禁垣斋沐夜，清吟属和更何人。

卷 317_60【春兴】

武元衡

杨柳阴阴细雨晴，残花落尽见流莺。
春风一夜吹香梦，梦逐春风到洛城。

卷 317_61【酬裴起居西亭留题】

武元衡

艳歌能起关山恨，红烛偏凝寒塞情。
况是池塘风雨夜，不堪丝管尽离声。

卷 317_62【送张侍御赴京】

武元衡

江南烟雨塞鸿飞，西府文章谢掾归。
相送汀州兰棹晚，菱歌一曲泪沾衣。

· 全唐诗 ·

卷 317_63【鄂渚送友】

武元衡

云帆淼淼巴陵渡，烟树苍苍故郢城。

江上梅花无数落，送君南浦不胜情。

卷 317_64【送裴戡行军】

武元衡

珠履三千醉不欢，玉人犹苦夜冰寒。

送君偏有无言泪，天下关山行路难。

卷 317_65【宿青阳驿】

武元衡

空山摇落三秋暮，萤过疏帘月露团。

寂寞银灯愁不寐，萧萧风竹夜窗寒。

· 全唐诗 ·

卷 317_66【送崔舍人起居】

武元衡

赤墀同拜紫泥封，驷牡连征侍九重。

惟有白须张司马，不言名利尚相从。

卷 317_67【路岐重赋】

武元衡

芳郊欲别阑干泪，故国难期聚散云。

分手更逢江驿暮，马嘶猿叫不堪闻。

卷 317_68【重送卢三十一起居】

武元衡

相如拥传有光辉，何事阑干泪湿衣。

旧府东山馀妓在，重将歌舞送君归。

· 全唐诗 ·

卷 317_69 【送张谏议】

武元衡

汉庭从事五人来，回首疆场独未回。

今日送君魂断处，寒云寥落数株梅。

卷 317_70 【同诸公夜宴监军玩花之作】

武元衡

五侯门馆百花繁，红烛摇风白雪翻。

不似凤凰池畔见，飘扬今隔上林园。

卷 317_71 【郊居寓目偶题】

武元衡

晨趋禁掖暮郊园，松桂苍苍烟露繁。

明月上时群动息，雪峰高处正当轩。

· 全唐诗 ·

卷 317_72【题嘉陵驿】

武元衡

悠悠风旆绕山川，山驿空濛雨似烟。

路半嘉陵头已白，蜀门西上更青天。

卷 317_73【送柳郎中裴起居】

武元衡

望乡台上秦人在，学射山中杜魄哀。

落日河桥千骑别，春风寂寞旆旌回。

卷 317_74【秋日出游偶作】

武元衡

黄花丹叶满江城，暂爱江头风景清。

闲步欲舒山野性，貔貅不许独行人。

· 全唐诗 ·

卷 317_75【夏夜饯裴行军赴朝命】

武元衡

三年同看锦城花，银烛连宵照绮霞。

报国从来先意气，临岐不用重咨嗟。

卷 317_76【摩诃池送李侍御之凤翔】

武元衡

柳暗花明池上山，高楼歌酒换离颜。

他时欲寄相思字，何处黄云是陇间。

卷 317_77【送魏正则擢第归江陵】

武元衡

商山路接玉山深，古木苍然尽合阴。

会府登筵君最少，江城秋至肯惊心。

· 全唐诗 ·

卷 317_78【登闾閭古城】

武元衡

登高望远自伤情，柳发花开映古城。

全盛已随流水去，黄鹂空啭旧春声。

卷 317_79【寻三藏上人】

武元衡

北风吹雪暮萧萧，问法寻僧上界遥。

全盛手持筇竹杖，逢君不语指芭蕉。

卷 317_80【山居】

武元衡

身依泉壑将时背，路入烟萝得地深。

终岁不知城郭事，手栽林竹尽成阴。

· 全唐诗 ·

卷 317_81 【长安贼中寄题江南所居茱萸树】

武元衡

手种茱萸旧井傍，几回春露又秋霜。

今来独向秦中见，攀折无时不断肠。

卷 317_82 【春斋夜雨忆郭通微】

武元衡

桃源在在阻风尘，世事悠悠又遇春。

雨滴闲阶清夜久，焚香偏忆白云人。

卷 317_83 【送严秀才】

武元衡

灞浐别离肠已断，江山迢递信仍稀。

送君偏下临岐泪，家在南州身未归。

· 全唐诗 ·

卷 317_84 【春日酬熊执易南亭花发见赠】

武元衡

千株桃杏参差发，想见花时人却愁。

曾忝陆机琴酒会，春亭惟愿一淹留。

卷 317_85 【中春亭雪夜寄西邻韩李二舍人】

武元衡

广庭飞雪对愁人，寒谷由来不悟春。

却笑山阴乘兴夜，何如今日戴家邻。

卷 317_86 【立秋日与陆华原于县界南馆送邹十八】

武元衡

风入昭阳池馆秋，片云孤鹤两难留。

明朝独向青山郭，唯有蝉声催白头。

· 全唐诗 ·

卷 317_87 【酬韦胄曹登天长寺上方见寄】

武元衡

青门几度沾襟泪，并在东林雪外峰。

今日重烦相忆处，春光知绕凤池浓。

卷 317_88 【陌上暮春】

武元衡

青青南陌柳如丝，柳色莺声晚日迟。

何处最伤游客思，春风三月落花时。

卷 317_89 【春日偶作】

武元衡

飞花寂寂燕双双，南客衡门对楚江。

惆怅管弦何处发，春风吹到读书窗。

· 全唐诗 ·

卷 317_90【春暮寄杜嘉兴昆弟】

武元衡

柳色千家与万家，轻风细雨落残花。

数枝琼玉无由见，空掩柴扉度岁华。

卷 317_91【渡淮】

武元衡

暮涛凝雪长淮水，细雨飞梅五月天。

行子不须愁夜泊，绿杨多处有人烟。

卷 317_92【与崔十五同访裴校书不遇】

武元衡

梨花落尽柳花时，庭树流莺日过迟。

几度相思不相见，春风何处有佳期。

· 全唐诗 ·

卷 317_93 【夏日寄陆三达陆四逢并王念八仲周】

武元衡

士衡兄弟旧齐名，还似当年在洛城。

闻说重门方隐相，古槐高柳夏阴清。

卷 317_94 【秋原寓目】

武元衡

木落风高天宇开，秋原一望思悠哉。

边城今少射雕骑，连雁嗷嗷何处来。

卷 317_95 【赠歌人】

武元衡

林莺一啭四时春，蝉翼罗衣白玉人。

曾逐使君歌舞地，清声长啸翠眉颦。

· 全唐诗 ·

卷 317_96【同苗郎中送严侍御赴黔中因访仙源之事】

武元衡

武陵源在朗江东，流水飞花仙洞中。

莫问阮郎千古事，绿杨深处翠霞空。

卷 317_97【使次盘豆驿望永安县】

武元衡

山川不记何年别，城郭应非昔所经。

欲驻征车终日望，天河云雨晦冥冥。

卷 317_98【缙山道中口号】

武元衡

秋山寂寂秋水清，寒郊木叶飞无声。

王子白云仙去久，洛滨行路夜吹笙。

· 全唐诗 ·

卷 317_99【岁暮送舍人】

武元衡

边城岁暮望乡关，身逐戎旌未得还。

欲别临岐无限泪，故园花发寄君攀。

卷 317_100【寓兴呈崔员外诸公】

武元衡

三月杨花飞满空，飘飘十里雪如风。

不知何处香醪熟，愿醉佳园芳树中。

卷 317_101【单于晓角】

武元衡

胡儿吹角汉城头，月皎霜寒大漠秋。

三奏未终天便晓，何人不起望乡愁。

· 全唐诗 ·

卷 317_102【汴河闻笛】

武元衡

何处金笳月里悲，悠悠边客梦先知。

单于城下关山曲，今日中原总解吹。

卷 317_103【塞上春怀】

武元衡

东风河外五城喧，南客征袍满泪痕。

愁至独登高处望，蔼然云树重伤魂。

卷 317_104【塞外月夜寄荆南熊侍御】

武元衡

南依刘表北刘琨，征战年年箫鼓喧。

云雨一乖千万里，长城秋月洞庭猿。

· 全唐诗 ·

卷 317_105【单于罢战却归题善阳馆】

武元衡

单于南去善阳关，身逐归云到处闲。

曾是五年莲府客，每闻胡虏哭阴山。

卷 317_106【韦常侍以宾客致仕，同诸公题壁】

武元衡

孤云永日自徘徊，岩馆苍苍遍绿苔。

望苑忽惊新诏下，彩鸾归处玉笼开。

卷 317_107【学仙难】

武元衡

玉殿笙歌汉帝愁，鸾龙俨驾望瀛洲。

黄金化尽方士死，青天欲上无缘由。

· 全唐诗 ·

卷 317_108【康昌观玉蕊花】

武元衡

琪树芊芊玉蕊新，洞宫长闭彩霞春。

日暮落英铺地雪，献花应过九天人。

卷 317_109【春晓闻莺】

武元衡

寥寥兰台晓梦惊，绿林残月思孤莺。

犹疑蜀魄千年恨，化作冤禽万啭声。

卷 317_110【闻严秘书与正字及诸客夜会因寄】

武元衡

衡门寥落岁阴穷，露湿莓苔叶厌风。

闻道今宵阮家会，竹林明月七人同。

· 全唐诗 ·

卷 317_111【戏赠韩二秀才】

武元衡

名高折桂方年少，心苦为文命未通。

闻说东堂今有待，飞鸣何处及春风。

卷 317_112【闻王仲周所居牡丹花发，因戏赠】

武元衡

闻说庭花发暮春，长安才子看须频。

花开花落无人见，借问何人是主人。

卷 317_113【酬王十八见招】

武元衡

王昌家直在城东，落尽庭花昨夜风。

高兴不辞千日醉，随君走马向新丰。

· 全唐诗 ·

卷 317_114【赠道者】

武元衡

麻衣如雪一枝梅，笑掩微妆入梦来。

若到越溪逢越女，红莲池里白莲开。

卷 317_115【重送白将军】

武元衡

红烛芳筵惜夜分，歌楼管咽思难闻。

早知怨别人间世，不下青山老白云。

卷 317_116【和李丞题李将军林园】

武元衡

落英飘蕊雪纷纷，啼鸟如悲霍冠军。

逝水不回弦管绝，玉楼迢递锁浮云。

· 全唐诗 ·

卷 317_117【同张惟送霍总】

武元衡

春风箫管怨津楼，三奏行人醉不留。

别后相思江上岸，落花飞处杜鹃愁。

卷 317_118【赠别崔起居】

武元衡

三十年前会府同，红颜销尽两成翁。

别泪共将何处洒，锦江南渡足春风。

卷 317_119【春日偶题】

武元衡

山川百战古刀州，龙节来分圣主忧。

静守化条无一事，春风独上望京楼。

· 全唐诗 ·

卷 317_120【听歌】

武元衡

月上重楼丝管秋，佳人夜唱古梁州。

满堂谁是知音者，不惜千金与莫愁。

卷 317_121【酬韦胄曹】

武元衡

相逢异县蹉跎意，无复少年容易欢。

桃李美人攀折尽，何如松柏四时寒。

卷 317_122【同幕府夜宴惜花】

武元衡

芳草落花明月榭，朝云暮雨锦城春。

莫愁红艳风前散，自有青蛾镜里人。

· 全唐诗 ·

卷 317_123【代佳人赠张郎中】

武元衡

洛阳佳丽本神仙，冰雪颜容桃李年。

心爱阮郎留不住，独将珠泪湿红铅。

卷 317_124【饯裴行军赴朝命】

武元衡

来时圣主假光辉，心恃朝恩计日归。

谁料忽成云雨别，独将边泪洒戎衣。

卷 317_125【秋经潼关感寓】

武元衡

昔年曾逐汉征东，三授兵符百战中。

力保山河嗟下世，秋风牢落故营空。

· 全唐诗 ·

卷 317_126 【赠歌人】

武元衡

仙歌静转玉箫催，疑是流莺禁苑来。

他日相思梦巫峡，莫教云雨晦阳台。

卷 317_127 【见郭侍郎题壁】

武元衡

万里枫江偶问程，青苔壁上故人名。

悠悠身世限南北，一别十年空复情。

· 全唐诗 ·

卷三百一十八

卷 318_1【癸巳岁吉甫園丘摄事合于中书后阁宿斋，常负忝愧，移止于集贤院，会门下相公以七言垂寄，亦有所酬，奉寄相公，兼呈集贤院诸学士】

李吉甫

淮海同三入，枢衡过六年。庙斋兢永夕，书府会群仙。
粉壁连霜曙，冰池对月圆。岁时忧里换，钟漏静中传。
蓬发颜空老，松心契独全。赠言因传说，垂训在三篇。

卷 318_2【夏夜北园即事寄门下武相公】

李吉甫

结构非华宇，登临似古原。僻殊萧相宅，芜胜邵平园。
避暑依南庑，追凉在北轩。烟霞霄外静，草露月中繁。
鹊绕惊还止，虫吟思不喧。怀君欲有赠，宿昔贵忘言。

· 全唐诗 ·

卷 318_3【九日小园独谣赠门下武相公】

李吉甫

小园休沐暇，暂与故山期。树杪悬丹枣，苔阴落紫梨。
舞丛新菊遍，绕格古藤垂。受露红兰晚，迎霜白薤肥。
上公留凤沼，冠剑侍清祠。应念端居者，长惭补衮诗。

卷 318_4【怀伊川赋】

李吉甫

龙门南岳尽伊原，草树人烟目所存。
正是北州梨枣熟，梦魂秋日到郊园。

卷 318_5【奉和武相公省中宿斋，酬李相公见寄】

郑綯

高阁安仁省，名园广武庐。沐兰朝太一，种竹咏华胥。
禁静疏钟彻，庭开爽韵虚。洪钧齐万物，缥帙整群书。
寒露滋新菊，秋风落故蕖。同怀不同赏，幽意竟何如。

· 全唐诗 ·

卷 318_6【寒夜闻霜钟】

郑綮

霜钟初应律，寂寂出重林。拂水宜清听，凌空散迥音。
春容时未歇，摇曳夜方深。月下和虚籁，风前间远砧。
净兼寒漏彻，闲畏曙更侵。遥相千山外，泠泠何处寻。

卷 318_7【奉酬宣上人九月十五日东亭望月见赠，因怀紫阁旧游】

郑綮

中年偶逐鸳鸾侣，弱岁多从麋鹿群。紫阁道流今不见，
红楼禅客早曾闻。松斋月朗星初散，苔砌霜繁夜欲分。
一览彩笺佳句满，何人更咏惠休文。

卷 318_8【九日登高怀邵二】

郑綮

簪茱泛菊俯平阡，饮过三杯却惘然。
十岁此辰同醉友，登高各处已三年。

· 全唐诗 ·

卷 318_9【享太庙乐章】

郑絪

於穆时文，受天明命。允恭玄默，化成理定。

出震嗣德，应乾传圣。猗歆缉熙，千亿流庆。

卷 318_10【句】

郑絪

情人共惆怅，良友不同游。

卷 318_11【和黄门相公诏还题石门洞】

郑余庆

紫氛随马处，黄阁驻车情。嵌壑惊山势，周滩恋水声。

地分三蜀限，关志百牢名。琬琰攀酬郢，微言鼎饪情。

· 全唐诗 ·

卷 318_12【享太庙乐章】

郑余庆

开邸除暴，时迈勋尊。三元告命，四极骏奔。

金枝翠叶，辉烛瑶琨。象德亿载，贻庆汤孙。

卷 318_13【和黄门武相公诏还题石门洞】

赵宗儒

益部恩辉降，同荣汉相还。韶芳满归路，轩骑出重关。

望日朝天阙，披云过蜀山。更题风雅韵，永绝翠岩间。

卷 318_14【和武相锦楼玩月得浓字】

柳公绰

此夜年年月，偏宜此地逢。近看江水浅，遥辨雪山重。

万井金花肃，千林玉露浓。不唯楼上思，飞盖亦陪从。

· 全唐诗 ·

卷 318_15【题梓州牛头寺】

柳公绰

一出西城第二桥，两边山木晚萧萧。

井花净洗行人耳，留听溪声入夜潮。

卷 318_16【赠毛仙翁】

柳公绰

桃源千里远，花洞四时春。中有含真客，长为不死人。

松高枝叶茂，鹤老羽毛新。莫遣同篱槿，朝荣暮化尘。

卷 318_17【和武相公中秋锦楼玩月得苍字】

张正一

高秋今夜月，皓色正苍苍。远水澄如练，孤鸿迥带霜。

旅人方积思，繁宿稍沉光。朱槛叨陪赏，尤宜清漏长。

· 全唐诗 ·

卷 318_18【奉和武相公中秋锦楼玩月得来字】

徐放

玉露中秋夜，金波碧落开。鹊惊初泛滥，鸿思共裴回。
远月清光遍，高空爽气来。此时陪永望，更得上燕台。

卷 318_19【和武相公中秋锦楼玩月得前字、秋字二篇】

崔备

清景同千里，寒光尽一年。竟天多雁过，通夕少人眠。
照别江楼上，添愁野帐前。隋侯恩未报，犹有夜珠圆。

四时皆有月，一夜独当秋。照耀初含露，裴回正满楼。
遥连雪山净，迥入锦江流。愿以清光末，年年许从游。

卷 318_20【奉陪武相公西亭夜宴陆郎中】

崔备

宾阁玳筵开，通宵递玉杯。尘随歌扇起，雪逐舞衣回。
剪烛清光发，添香暖气来。令君敦宿好，更为一裴回。

· 全唐诗 ·

卷 318_21 【清溪路中寄诸公】

崔备

偏郡隔云岑，回溪路更深。少留攀桂树，长渴望梅林。
野笋资公膳，山花慰客心。别来无信息，可谓井瓶沉。

卷 318_22 【奉酬中书相公至日園丘行事合于中书宿直移止于集贤院叙情见寄之什】

崔备

典籍开书府，恩荣避鼎司。郊丘资有事，斋戒守无为。
宿雾蒙琼树，馀香覆玉墀。进经逢乙夜，展礼值明时。
勋共山河列，名同竹帛垂。年年佐尧舜，相与致雍熙。

卷 318_23 【使院忆山中道侣，兼怀李约】

崔备

松竹去名岳，衡茅思旧居。山君水上印，天女月中书。
旧秩芸香在，空窗药气余。褐衣宽易揽，白发少难梳。
病柳伤摧折，残花惜扫除。忆巢同倦鸟，避网甚跳鱼。
阮巷惭交绝，商岩愧迹疏。与君非宦侣，何日共樵渔。

· 全唐诗 ·

卷 318_24【奉陪武相公西亭夜宴陆郎中】

萧祜

弘阁陈芳宴，佳宾此会难。交逢贵日重，醉得少时欢。
舒黛凝歌思，求音足笔端。一闻清佩动，珠玉夜珊珊。

卷 318_25【游石堂观】

萧祜

西山高高何所如，上有古昔真人居。嵌崖巨石自成室，
其下磅礴含清虚。我来斯邑访遗迹，乃遇沈生耽载籍。
沈生为政哀茆嫠，又能索隐探灵奇。欣然向我话佳境，
与我崎岖到山顶。甘瓜剖绿出寒泉，碧瓿浮花酌春茗。
嚼瓜啜茗身清凉，汗消絺绤如迎霜。胡为空山百草花，
倏尔筵豆肆我旁。始惊知周无小大，力寡多方验斯在。
妙用腾声冠盖间，胜游恣意烟霞外。故碑石像凡几年，
云郁雨霏生绿烟。我知游此多灵仙，缥缈月中飞下天。
天风微微夕露委，松梢飕飕晓声起。凤去空遗箫管音，
星翻寥落银河水。劝君学道此时来，结茅独宿何辽哉。
斋心玄默感灵卫，必见鸾鹤相裴回。我爱崇山双剑北，
峰如人首拄天黑。群仙伛偻势奔走，状若归尊趋有德。
半岩有洞顶有池，出入灵怪潜蛟螭。我去不得昼夜思，
梦游曾信南风吹。南风吹我到林岭，故国不见秦天迢。

· 全唐诗 ·

山花名药扑地香，月色泉声洞心冷。荫松散发逢异人，
寂寞旷然口不言。道陵公远莫能识，发短耳长谁独存。
司农惊觉忽惆怅，可惜所游俱是妄。蕴怀耿耿谁与言，
直至今来意通形神开，拥传又恨斜阳催。
一丘人境尚堪恋，何况海上金银台。

卷 318_26 【奉陪武相公西亭夜宴陆郎中】

王良士

芳气袭猗兰，青云展旧欢。仙来红烛下，花发彩毫端。
海岳期方远，松筠岁正寒。仍闻言赠处，一字重琅玕。

卷 318_27 【南至日隔霜仗望含元殿炉烟】

王良士

抗殿疏龙首，高高接上玄。节当南至日，星是北辰天。
宝戟罗仙仗，金炉引御烟。霏微双阙丽，容曳九门连。
拂曙祥光满，分晴瑞色鲜。一阳今在历，生植仰陶甄。

· 全唐诗 ·

卷 318_28【奉陪武相公西亭夜宴陆郎中】

独孤实

仙郎膺上才，夜宴接三台。烛引银河转，花连锦帐开。
静看歌扇举，不觉舞腰回。寥落东方曙，无辞尽玉杯。

卷 318_29【奉陪武相公西亭夜宴陆郎中】

卢士政

华堂良宴开，星使自天来。舞转朱丝逐，歌余素扇回。
水光凌曲槛，夜色霭高台。不在宾阶末，何由接上台。

卷 318_30【闻莺】

于敖

玉绳河汉晓纵横，万籁潜收莺独鸣。
能将百啭清心骨，宁止闲窗梦不成。

· 全唐诗 ·

卷 318_31 【和武相公闻莺】

皇甫镈

华馆沈沈曙境清，伯劳初啜月微明。

不知台座宵吟久，犹向花窗惊梦声。

· 全唐诗 ·

卷三百一十九

卷 319_1 【白露为霜】

颜粲

悲秋将岁晚，繁露已成霜。遍渚芦先白，沾篱菊自黄。
应钟鸣远寺，拥雁度三湘。气逼襦衣薄，寒侵宵梦长。
满庭添月色，拂水敛荷香。独念蓬门下，穷年在一方。

卷 319_2 【吴宫教美人战】

颜粲

有客陈兵画，功成欲霸吴。玉颜承将略，金钿指军符。
转佩风云暗，鸣鞶锦绣趋。雪花频落粉，香汗尽流珠。
掩笑谁干令，严刑必用诛。至今孙子术，犹可静边隅。

卷 319_3 【月映清淮流】

徐敞

遥夜淮弥净，浮空月正明。虚无含气白，凝澹映波清。

· 全唐诗 ·

见底深还浅，居高缺复盈。处柔知坎德，持洁表阴精。
利物功难并，和光道已成。安流方利涉，应鉴此时情。

卷 319_4【圆灵水镜】

徐敞

浮光上东洛，杨彩满圆灵。明灭沦江水，盈虚逐砌蓂。
不分沙岸白，偏照海山清。练色临窗牖，蟾光霭户庭。
成轮疑璧影，初魄类弓形。远近凝清质，娟娟出众星。

卷 319_5【虹藏不见】

徐敞

迎冬小雪至，应节晚虹藏。玉气徒成象，星精不散光。
美人初比色，飞鸟罢呈祥。石涧收晴影，天津失彩梁。
霏霏空暮雨，杳杳映残阳。舒卷应时令，因知圣历长。

卷 319_6【白露为霜】

徐敞

早寒青女至，零露结为霜。入夜飞清景，凌晨积素光。

· 全唐诗 ·

驂星初晫晫，葭莢復蒼蒼。色冒沙灘白，威加木葉黃。
鮮輝袞紈扇，杀气掩干將。葛屨那堪履，徒令君子傷。

卷 319_7【賦得金莖露】

徐敞

武帝貴長生，延年餌玉英。銅盤貯珠露，仙掌抗金莖。
拂曙氛埃斂，凌空沆瀣清。崑崙捧瑞氣，龍從出宮城。
勢入浮雲聳，形標霧色明。大君當御宇，何必去蓬瀛。

卷 319_8【圓靈水鏡】

張聿

鳳池開月鏡，清瑩寫寥天。影散微波上，光含片玉懸。
菱花凝泛濫，桂樹映清鮮。樂廣披雲日，山濤卷霧年。
濯纓何處去，鑑物自堪妍。回首看雲液，蟾蜍勢正圓。

卷 319_9【景風扇物】

張聿

何處青蘋末，呈祥起遠空。曉來搖草樹，輕度淨塵蒙。
水上微波動，林前媚景通。寥天鳴萬籟，蘭徑長幽叢。

· 全唐诗 ·

渐颺抟扶势，应从橐籥功。开襟若有日，愿睹大王风。

卷 319_10【剑化为龙】

张聿

古剑诚难屈，精明有所从。沉埋方出狱，合会却成龙。
牛斗光初歇，蜿蜒气渐浓。云涛透百丈，水府跃千重。
拖尾迷莲锷，张鳞露锦容。至今沙岸下，谁得睹玄踪。

卷 319_11【余瑞麦】

张聿

瑞麦生尧日，芄芃雨露偏。两岐分更合，异亩颖仍连。
冀获明王庆，宁唯太守贤。仁风吹靡靡，甘雨长芊芊。
圣德应多稔，皇家配有年。已闻天下泰，谁为济西田。

卷 319_12【赋得夏首犹清和】

张聿

早夏宜春景，和光起禁城。祝融将御节，炎帝启朱明。
日送残花晚，风过御苑清。郊原浮麦气，池沼发荷英。
树影临山动，禽飞入汉轻。幸逢尧禹化，全胜谷中情。

· 全唐诗 ·

卷 319_13 【移居洞庭】

麴信陵

重林将叠嶂，此处可逃秦。水隔人间世，花开洞里春。

荷锄分地利，纵酒乐天真。万事更何有，吾今已外身。

卷 319_14 【吴门送客】

麴信陵

乱山吴苑外，临水让王祠。素是伤情处，春非送客时。

不须愁落日，且愿驻青丝。千里会应到，一尊谁共持。

卷 319_15 【长安道】

麴信陵

朱门映绿杨，双阙抵通庄。玉珮声逾远，红尘犹自香。

· 全唐诗 ·

卷 319_16 【出自贼中谒恒上人】

麴信陵

再拜吾师喜复悲，誓心从此永归依。

浮生恍忽若真梦，何事于中有是非。

卷 319_17 【过真律师旧院】

麴信陵

寂然秋院闭秋光，过客闲来礼影堂。

坚冰销尽还成水，本自无形何足伤。

卷 319_18 【酬谈上人咏海石榴】

麴信陵

真僧相劝外浮华，万法无常可叹嗟。

但试寻思阶下树，何人种此我看花。

· 全唐诗 ·

卷 319_19 【句】

麴信陵

台笠冒山雨，渚田耕荇花。

卷 319_20 【冬日可爱】

张正元

寒日临清昼，辽天一望时。未消埋径雪，先暖读书帷。
属思光难驻，抒情影若遗。晋臣曾比德，谢客昔言诗。
散彩宁偏煦，流阴信不追。余辉如可就，回烛幸无私。

卷 319_21 【临川羡鱼】

张正元

有客百愁侵，求鱼正在今。广川何渺漫，高岸几登临。
风水宁相阻，烟霞岂惮深。不应同逐鹿，讵肯比从禽。
结网非无力，忘筌自有心。永存芳饵在，伫立思沈沈。

· 全唐诗 ·

卷 319_22【青云干吕】

王履贞

异方占瑞气，干吕见青云。表圣兴中国，来王谒大君。
迎祥殊大乐，叶庆类横汾。自感明时起，非因触石分。
映霄难辨色，从吹乍成文。须使流千载，垂芳在典坟。

卷 319_23【青云干吕】

彭伉

祥辉上千吕，郁郁又纷纷。远示无为化，将明至道君。
势凝千里静，色向九霄分。已见从龙意，宁知触石文。
状烟殊散漫，捧日更氛氲。自使来宾国，西瞻仰瑞云。

圣布中区化，祥符异域云。含春初应吕，晕碧已成文。
东起随风暖，西流共日曛。升时嘉异月，为庆等凝汾。
轻与晴烟比，高将晓雾分。飘飘如可致，愿此翊明君。

· 全唐诗 ·

卷 319_24 【寄妻】

彭伉

莫讶相如献赋迟，锦书谁道泪沾衣。
不须化作山头石，待我堂前折桂枝。

卷 319_25 【青云干吕】

林藻

应节偏干吕，亭亭在紫氛。缀空初布影，捧日已成文。
结盖祥光迥，为楼翠色分。还同起封上，更似出横汾。
作瑞来藩国，呈形表圣君。裴回如有托，谁道比闲云。

卷 319_26 【吴宫教战】

林藻

强吴矜霸略，讲武在深宫。尽出娇娥辈，先观上将风。
挥戈罗袖卷，擐甲汗装红。轻笑分旗下，含羞入队中。
鼓停行未整，刑举令方崇。自可威邻国，何劳骋战功。

· 全唐诗 ·

卷 319_27【梨岭】

林藻

曾向岭头题姓字，不穿杨叶不言归。
弟兄各折一枝桂，还向岭头联影飞。

卷 319_28【赠冯宿】

李观

寒城上秦原，游子衣飘飘。黑云截万里，猎火从中烧。
阴空蒸长烟，杀气独不销。冰交石可裂，风疾山如摇。
时无青松心，顾我独不凋。

卷 319_29【宿裴友书斋】

李观

卧君山窗下，山鸟与我言。清风何飏飏，松柏中夜繁。
久游失归趣，宿此似故园。林烟横近郊，谿月落古原。
稚子不待晓，花间出柴门。

· 全唐诗 ·

卷 319_30 【御沟新柳】

李观

御沟回广陌，芳柳对行人。翠色枝枝满，年光树树新。
畏逢攀折客，愁见别离辰。近映章台骑，遥分禁苑春。
嫩阴初覆水，高影渐离尘。莫入胡儿笛，还令泪湿巾。

卷 319_31 【试中和节诏赐公卿尺诗】

李观

淑节韶光媚，皇明宠赐崇。具寮颁玉尺，成器幸良工。
岂止寻常用，将传度量同。人何不取利，物亦赖其功。
紫翰宣殊造，丹诚厉匪躬。奉之无失坠，恩泽自天中。

卷 319_32 【省试恩赐耆老布帛】

李绹

涣汗中天发，殊私海外存。衰颜逢圣代，华发受皇恩。
烛物明尧日，垂衣辟禹门。惜时悲落景，赐帛慰余魂。
厚泽沾翔泳，微生保子孙。盛明今尚齿，欢奉九衢樽。

· 全唐诗 ·

卷 319_33 【和裴相国答张秘书赠马诗】

李绹

高才名价欲凌云，上驷光华远赠君。念旧露垂丞相简，
感知星动客卿文。纵横逸气宁称力，驰骋长途定出群。
伏枥莫令空度岁，黄金结束取功勋。

卷 319_34 【赐耆老布帛】

崔枢

殊私及耆老，圣德赉黎元。布帛忻天赐，生涯作主恩。
情均皆挟纊，礼异贲丘园。庆洽时方泰，仁沾月告存。
宁知酬雨露，空识荷乾坤。击壤将何幸，裴回望九门。

卷 319_35 【齐优开笼飞去所献楚王鹄】

崔枢

受命笼齐鹄，交欢献楚王。惠心先巧辩，戢羽见回翔。
意适清风远，忧除白日长。度云摇旧影，过树阅新芳。
直取名翻重，宁唯好不伤。谁言滑稽理，千载戒禽荒。

· 全唐诗 ·

卷 319_36 【试中和节诏赐公卿尺诗】

陆复礼

春仲令初吉，欢娱乐大中。皇恩贞百度，宝尺赐群公。
欲使方隅法，还令规矩同。捧观珍质丽，拜受圣恩崇。
如荷丘山重，思酬方寸功。从兹度天地，与国庆无穷。

卷 319_37 【赋得白云起封中】

李正辞

千年泰山顶，云起汉皇封。不作奇峰状，宁分触石容。
为霖虽易得，表圣自难逢。冉冉排空上，依依叠影重。
素光非曳练，灵贶是从龙。岂学无心出，东西任所从。

卷 319_38 【赋得白云起封中】

张嗣初

英英白云起，呈瑞出封中。表圣宁因地，逢时岂待风。
浮光弥皎洁，流影更冲融。自叶尧年美，谁云汉日同。
金泥光乍掩，玉检气潜通。欲与非烟并，亭亭不散空。

· 全唐诗 ·

卷 319_39【春色满皇州】

张嗣初

何处年华好，皇州淑气匀。韶阳潜应律，草木暗迎春。
柳变金堤畔，兰抽曲水滨。轻黄垂辇道，微绿映天津。
丽景浮丹阙，晴光拥紫宸。不知幽远地，今日几枝新。

卷 319_40【日暮碧云合】

许康佐

日际愁阴生，天涯暮云碧。重重不辨盖，沈沈乍如积。
林色黯疑暝，隙光俄已夕。出岫且从龙，萦空宁触石。
馀辉澹瑶草，浮影凝绮席。时景讵能留，几思轻尺璧。

卷 319_41【白云起封中】

许康佐

英英白云起，呈瑞出封中。表圣宁依地，逢时岂待风。
浮辉弥皎洁，流影更冲融。自叶尧天美，谁言汉日同。
泥金光乍掩，检玉气俄通。犹愿非烟瑞，亭亭不散空。

· 全唐诗 ·

卷 319_42【石季伦金谷园】

许尧佐

石氏遗文在，凄凉见故园。轻风思奏乐，衰草忆行轩。
舞榭苍苔掩，歌台落叶繁。断云归旧壑，流水咽新源。
曲沼残烟敛，丛篁宿鸟喧。唯余池上月，犹似对金尊。

卷 319_43【石季伦金谷园】

李君房

梓泽风流地，凄凉迹尚存。残芳迷妓女，衰草忆王孙。
舞态随人谢，歌声寄鸟言。池平森灌木，月落吊空园。
流水悲难驻，浮云影自翻。宾阶余藓石，车马诟喧喧。

卷 319_44【享惠昭太子庙乐章登歌】

杜羔

因心克孝，位震遗芬。宾天道茂，轸怀气分。
发祇乃祀，咳叹如闻。二歌斯升，以咏德薰。

· 全唐诗 ·

卷 319_45【南至日隔仗望含元殿香炉】

车 纁

抗殿疏元首，高高接上元。节当南至日，星是北辰天。
宝戟罗仙仗，金炉引瑞烟。霏微双阙丽，溶曳九州连。
拂曙祥光满，分晴晓色鲜。一阳今在历，生植愿陶甄。

· 全唐诗 ·

卷三百二十

卷 320_1【奉和圣制九月十八日赐百僚追赏因书所怀】

权德舆

锡宴朝野洽，追欢尧舜情。秋堂丝管动，水榭烟霞生。

黄花媚新霁，碧树含馀清。同和六律应，交泰万宇平。

春藻下中天，湛恩阐文明。小臣谅何以，亦此摽华缨。

卷 320_2【奉和圣制九日言怀赐中书门下及百僚】

权德舆

令节在丰岁，皇情喜义安。丝竹调六律，簪裾列千官。

烟霜暮景清，水木秋光寒。筵开曲池上，望尽终南端。

天文丽庆霄，墨妙惊飞鸾。愿言黄花酒，永奉今日欢。

· 全唐诗 ·

卷 320_3【奉和圣制重阳日中外同欢以诗言志因示百僚】

权德舆

玉醴宴嘉节，拜恩欢有馀。煌煌菊花秀，馥馥萸房舒。
白露秋稼熟，清风天籁虚。和声度箫韶，瑞气深储胥。
百辟皆醉止，万方今宴如。宸衷在化成，藻思焕琼琚。
微臣徒窃抃，岂足歌唐虞。

卷 320_4【奉和圣制中春麟德殿会百僚观新乐】

权德舆

仲春蔼芳景，内庭宴群臣。森森列干戚，济济趋钩陈。
大乐本天地，中和序人伦。正声迈咸濩，易象含羲文。
玉俎映朝服，金钿明舞茵。韶光雪初霁，圣藻风自薰。
时泰恩泽溥，功成行缀新。赓歌仰昭回，窃比华封人。

卷 320_5【奉和圣制中和节赐百官宴集因示所怀】

权德舆

万方庆嘉节，宴喜皇泽均。晓开萸叶初，景丽星鸟春。
藻思贞百度，著明并三辰。物情舒在阳，时令弘至仁。
衢酒笔乐被，薰弦声曲新。赓歌武弁侧，永荷玄化醇。

· 全唐诗 ·

卷 320_6【奉和圣制重阳日即事六韵】

权德舆

嘉节在阳数，至欢朝野同。恩随千钟洽，庆属五稼丰。
时菊洗露华，秋池涵霁空。金丝响仙乐，剑舄罗宗公。
天道光下济，睿词敷大中。多惭击壤曲，何以答尧聪。

卷 320_7【奉和圣制丰年多庆九日示怀】

权德舆

寒露应秋杪，清光澄曙空。泽均行苇厚，年庆华黍丰。
声明畅八表，宴喜陶九功。文丽日月合，乐和天地同。
圣言在推诚，臣职惟匪躬。琐细何以报，翺飞淳化中。

卷 320_8【赠文敬太子庙时享退文舞迎武舞乐章】

权德舆

干旄羽籥相亏蔽，一进一退殊行缀。
昔献三雍盛礼容，今陈六佾崇仪制。

· 全唐诗 ·

卷 320_9【读穀梁传二首】

权德舆

荀寅士吉射，诚乃蔽聪明。奈何赵志父，专举晋阳兵。
下令汉七国，借此以为名。吾嘉徙薪智，祸乱何由生。

忆昔溴梁会，岂伊无诸侯。群臣自盟歃，君政如赘旒。
有力则宗楚，何人复尊周。空文徒尔贬，见此眦血流。

卷 320_10【刘绍相访夜话，因书即事】

权德舆

故人怆久别，兹夕款郊扉。山僮漉野酝，稚子褰书帷。
清露泫珠莹，金波流玉徽。忘言我造适，瞪视君无违。
但令静胜躁，自使癯者肥。不待蓬生年，从此知昔非。

卷 320_11【卧病喜惠上人、李炼师、茅处士见访，因以赠】

权德舆

沈疴结繁虑，卧见书窗曙。方外三贤人，惠然来相亲。
整巾起曳策，喜非车马客。支郎有佳文，新句凌碧云。

· 全唐诗 ·

霓裳何飘飘，浩志凌紫氛。复有沈冥士，远系三茅君。

各言麋鹿性，不与簪组群。清言出象系，旷迹逃玄纁。

心源暂澄寂，世故方纠纷。终当逐师辈，岩桂香氤芬。

卷 320_12【多病戏书，因示长孺】

权德舆

行年未四十，已觉百病生。眼眩飞蝇影，耳厌远蝉声。

甘辛败六藏，冰炭交七情。唯思曲肱枕，搔首掷华缨。

卷 320_13【古兴】

权德舆

月中有桂树，无翼难上天。海底有龙珠，下隔万丈渊。

人生大限虽百岁，就中三十称一世。晦明乌兔相推迁，

雪霜渐到双鬓边。沉忧戚戚多浩叹，不得如意居太半。

一气暂聚常恐散，黄河清兮白石烂。

· 全唐诗 ·

卷 320_14 【感寓】

权德舆

残雨倦欹枕，病中时序分。秋虫与秋叶，一夜隔窗闻。
虚室对摇落，晤言无与群。冥心试观化，世故如丝棼。

但看鸢戾天，岂见山出云。下里徒击节，朱弦秘南薰。
梧桐秀朝阳，上有威凤文。终待九成奏，来仪瑞吾君。

卷 320_15 【跌伤伏枕，有劝醺酒者暂忘所苦，因有一绝】

权德舆

一杯宜病士，四体委胡床。暂得遗形处，陶然在醉乡。

卷 320_16 【病中苦热】

权德舆

三伏鼓洪炉，支离一病夫。倦眠身似火，渴歔汗如珠。
悸乏心难定，沉烦气欲无。何时洒微雨，因与好风俱。

· 全唐诗 ·

卷 320_17 【览镜见白发数茎光鲜特异】

权德舆

秋来皎洁白须光，试脱朝簪学酒狂。
一曲酣歌还自乐，儿孙嬉笑挽衣裳。

卷 320_18 【南亭晓坐因以示璩】

权德舆

隐几日无事，风交松桂枝。园庐含晓霁，草木发华姿。
迹似南山隐，官从小宰移。万殊同野马，方寸即灵龟。
弱质常多病，流年近始衰。图书传授处，家有一男儿。

卷 320_19 【竹径偶然作】

权德舆

退朝此休沐，闭户无尘氛。杖策入幽径，清风随此君。
琴觴恣偃傲，兰蕙相氛氲。幽赏方自适，林西烟景曛。

· 全唐诗 ·

卷 320_20 【拜昭陵过咸阳墅】

权德舆

季子乏二顷，扬雄才一廛。伊予此南亩，数已逾前贤。
顷岁辱明命，铭勋镂贞坚。遂兹操书致，内顾增缺然。
乃葺场圃事，迨今三四年。适因昭陵拜，得抵咸阳田。
田夫竞致辞，乡耆争来前。村盘既罗列，鸡黍皆珍鲜。
古称禄代耕，人以食为天。自惭廩给厚，谅使井税先。
涂涂沟塍雾，漠漠桑柘烟。荒蹊没古木，精舍临秋泉。
池笼岂所安，樵牧乃所便。终当解缨络，田里谐因缘。

卷 320_21 【早春南亭即事】

权德舆

虚斋坐清昼，梅坼柳条鲜。节候开新历，筋骸减故年。
振衣惭艾绶，窥镜叹华颠。独有开怀处，孙孩戏目前。

卷 320_22 【璩授京兆府参军戏书以示兼呈独孤郎】

权德舆

见尔府中趋，初官足慰吾。老牛还舐犊，凡鸟亦将雏。

· 全唐诗 ·

喜至翻成感，痴来或欲殊。因惭玉润客，应笑此非夫。

卷 320_23【书绅诗】

权德舆

和静有真质，斯人称最灵。感物惑天性，触里纷多名。
祸机生隐微，智者鉴未形。败礼因近习，哲人自居贞。
当令念虑端，鄙慢不能萌。苟非不逾矩，焉得遂性情。
谨之在事初，动用各有程。千里起步武，彗云自纤茎。
心源一流放，骇浪奔长鲸。渊木苟端深，枝流则贞清。
和理通性术，悠久方昭明。先师留中庸，可以导此生。

卷 320_24【侍从游后湖宴坐】

权德舆

绝境殊不远，湖塘直吾庐。烟霞旦夕生，泛览诚可娱。
慈颜俯见喻，辍尔诗与书。清旭理轻舟，嬉游散烦劬。
宿雨荡残燠，惠风与之俱。心灵一开旷，机巧眇已疏。
中流有荷花，花实相芬敷。田田绿叶映，艳艳红姿舒。
繁香好风结，净质清露濡。丹霞无容辉，嫫色亦踟蹰。
秣芳射水木，欹叶游龟鱼。化工若有情，生植皆不如。
轻舟任沿溯，毕景乃踟蹰。家人亦恬旷，稚齿皆忻愉。
素弦激凄清，旨酒盈樽壶。寿觞既频献，乐极随歌呼。

· 全唐诗 ·

圆月初出海，澄辉来满湖。清光照酒酣，俯倾百虑无。
以兹心目畅，敌彼名利途。轻肥何为者，浆藿自有馀。
愿销区中累，保此湖上居。无用诚自适，年年玩芙蕖。

卷 320_25【晨坐寓兴】

权德舆

清晨坐虚斋，群动寂未喧。泊然一室内，因见万化源。
得丧心既齐，清净教益敦。境来每自惬，理胜或不言。
亭柯见荣枯，止水知清浑。悠悠世上人，此理法难论。

卷 320_26【郊居岁暮因书所怀】

权德舆

养拙方去喧，深居绝人事。返耕忘帝力，乐道疏代累。
翛然衡茅下，便有江海意。宁知肉食尊，自觉儒衣贵。
烟霜当暮节，水石多幽致。三径日闲安，千峰对深邃。
策藜出村渡，岸帻寻古寺。月魄清夜琴，猿声警朝寐。
地偏芝桂长，境胜烟霞异。独鸟带晴光，疏篁净寒翠。
窗前风叶下，枕上溪云至。散发对农书，斋心看道记。
清言核名理，开卷穷精义。求誉观朵颐，危身陷芳饵。
纷吾守孤直，世业常恐坠。就学缉韦编，铭心对欹器。
元和畅万物，动植咸使遂。素履期不渝，永怀丘中志。

· 全唐诗 ·

卷 320_27【暮春闲居示同志】

权德舆

避喧非傲世，幽兴乐郊园。好古每开卷，居贫常闭门。
曙钟来古寺，旭日上西轩。稍与清境会，暂无尘事烦。
静看云起灭，闲望鸟飞翻。乍问山僧偈，时听渔父言。
体羸谙药性，事简见心源。冠带惊年长，诗书喜道存。
小池泉脉凑，危栋燕雏喧。风入松阴静，花添竹影繁。
灌园输井税，学稼奉晨昏。此外知何有，怡然向一樽。

卷 320_28【田家即事】

权德舆

闲卧藜床对落晖，邛然便觉世情非。漠漠稻花资旅食，
青青荷叶制儒衣。山僧相访期中饭，渔父同游或夜归。
待学尚平婚嫁毕，渚烟溪月共忘机。

卷 320_29【寓兴】

权德舆

弱冠无所就，百忧钟一身。世德既颠坠，素怀亦堙沦。

· 全唐诗 ·

风烟隔嵩丘，羸疾滞漳滨。昭代未通籍，丰年犹食贫。
敢求庖有鱼，但虑甑生尘。俯首愧僮仆，蹇步羞亲宾。
岂伊当途者，一一由中人。已矣勿复言，吾将问秋旻。

卷 320_30【浩歌】

权德舆

杖策出蓬荜，浩歌秋兴长。北风吹荷衣，萧飒景气凉。
通逵抵山郭，里巷连湖光。孤云净远峰，绿水溢芳塘。
鱼鸟乐天性，杂英互芬芳。我心独何为，万虑萦中肠。
履道身未泰，主家谋不臧。心为世教牵，迹寄翰墨场。
出处两未定，羈羸空自伤。沈忧不可裁，伫立河之梁。
晚归茅檐下，左右陈壶觞。独酌复长谣，放心游八荒。
得丧同一域，是非亦何常。胡为苦此生，矻矻徒自强。
乃知杯中物，可使忧患忘。因兹谢时辈，栖息无何乡。

卷 320_31【与道者同守庚申】

权德舆

洞真善救世，守夜看仙经。俾我外持内，当兹申配庚。
斋心已恬愉，澡身自澄明。沉沉帘帟下，霭霭灯烛清。
四支动有息，一室虚白生。收视忘趋舍，叩齿集神灵。
伊予嗜欲寡，居常痾恙轻。三尸既伏辜，九藏乃和平。

· 全唐诗 ·

无令耳目胜，则使性命倾。窅然深夜中，若与元气并。
释宗称定慧，儒师著诚明。派分示三教，理诣无二名。
吉祥能止止，委顺则生生。视履苟无咎，天祐期永贞。
应物智不劳，虚中理自冥。岂资金丹术，即此驻颓龄。

卷 320_32【丙寅岁苦贫戏题】

权德舆

清朝起藜床，雪霜对枯籬。家人来告予，今日无晨炊。
醯醢一已整，新炭固难期。厚生彼何人，工拙各异宜。
间岁从使檄，亲宾苦川驰。虽非悖而入，与出常相随。
吴门与南亩，颇亦持磁基。有时遇丰年，岁计犹不支。
颜渊谅贤人，陋巷能自怡。中忆裴子野，泰然倾薄糜。
愧非古人心，戚戚愁朝饥。近古犹不及，太上那可希。
奈何时风扇，使我正性衰。巧智竞忧劳，展转生浇漓。
吾观黄金印，未胜青松枝。粗令有鱼菽，岂复求轻肥。
顾惭主家拙，甘使群下嗤。如何致一杯，醉后无所知。

卷 320_33【独酌】

权德舆

独酌复独酌，满盏流霞色。身外皆虚名，酒中有全德。
风清与月朗，对此情何极。

· 全唐诗 ·

卷 320_34【知非】

权德舆

名教自可乐，搢绅贵行道。何必学狂歌，深山对丰草。

卷 320_35【诫言】

权德舆

言之或未行，前哲所不取。方寸虽浩然，因之三缄口。

卷 320_36【醉后】

权德舆

美禄与贤人，相逢自可亲。愿将花柳月，尽赏醉乡春。

· 全唐诗 ·

第三百二十一卷

卷 321_1 【奉和李相公早朝于中书候传点偶书所怀，奉呈门下相公中书相公】

权德舆

五更钟漏歇，千门扃钥开。紫宸残月下，黄道晓光来。
辨色趋中禁，分班列上台。祥烟初缭绕，威凤正裴回。
斧藻归全德，轮辕适众材。化成风偃草，道合鼎调梅。
渥命随三接，皇恩畅九垓。嘉言造膝去，喜气沃心回。
东阁延多士，南山赋有台。阳春那敢和，空此咏康哉。

卷 321_2 【奉和于司空二十五丈新卜城南郊居接司徒公别墅即事书情奉献兼呈李裴相公】

权德舆

一德承昌运，三公翊至尊。云龙谐理代，鱼水见深恩。
别墅池塘晓，晴郊草木蕃。沟塍连杜曲，茅土盛于门。
卜筑因登览，经邦每讨论。退朝鸣玉会，入室断金言。

· 全唐诗 ·

材俊依东阁，壶觞接后园。径深云自起，风静叶初翻。
宰物归心匠，虚中即化源。巴人宁敢和，空此愧游藩。

卷 321_3【奉和新卜城南郊居得与卫右丞邻舍，因赋诗寄赠】

权德舆

上宰坐论道，郊居仍里仁。七符既昭晰，万象随陶钧。
旭日下玉墀，鸣驺拂车茵。轩窗退残暑，风物迎萧辰。
山泽蜃雨出，林塘鱼鸟驯。岂同求羊径，共是羲皇人。
石君五曹重，左户三壤均。居止烟火接，逢迎鸡黍频。
大方本无隅，盛德必有邻。千年郢曲后，复此闻阳春。

卷 321_4【奉和韦曲庄言怀，贻东曲外族诸弟】

权德舆

韦曲冠盖里，鲜原郁青葱。公台睦中外，墅舍邻西东。
驺驭出国门，晨曦正曈曈。燕居平外土，野服参华虫。
疆畝分古渠，烟霞连灌丛。长幼序以齿，欢言无不同。
忆昔全盛时，勋劬播休功。代业扩宇内，光尘蔼墟中。
慨息多永叹，歌诗厚时风。小生忝瓜葛，慕义斯无穷。

· 全唐诗 ·

卷 321_5【和王侍郎病中领度支，烦迫之余，过西园书堂闲望】

权德舆

凭槛辍繁务，晴光烟树分。中邦均禹贡，上药验桐君。
满径风转蕙，卷帘山出云。锵然玉音发，余兴在斯文。

卷 321_6【奉和度支李侍郎早朝】

权德舆

夙驾趋北阙，晓星启东方。鸣驺分骑吏，列烛散康庄。
照灼华簪并，逶迤绮陌长。腰金初辨色，喷玉自生光。
献替均三壤，贞明集百祥。下才叨接武，空此愧文昌。

卷 321_7【奉和刘侍郎司徒奉诏伐叛书情呈宰相】

权德舆

玉帐元侯重，黄枢上宰雄。缘情词律外，宣力庙谋中。
震耀恭天讨，严凝助岁功。行看画麟阁，凛凛有英风。

· 全唐诗 ·

卷 321_8【奉和鄜州刘大夫麦秋出师遮虏有怀朝亲故】

权德舆

天子爱全才，故人雄外台。绿油登上将，青绶亚中台。
亭障鸣笳入，风云转旆来。兰坊分杳杳，麦垄望莓莓。
月向雕弓满，莲依宝剑开。行师齐鹤列，锡马尽龙媒。
壮志征染甫，嘉招萃楚材。千寻推直干，百炼去纤埃。
间阔劳相望，欢言幸早陪。每联花下骑，几泛竹间杯。
芳讯双鱼远，流年两鬓催。何时介圭觐，携手咏康哉。

卷 321_9【太原郑尚书远寄新诗，走笔酬赠，因代书贺】

权德舆

晓开阊阖出丝言，共喜全才镇北门。职重油幢推上略，
荣兼革履见深恩。昔岁经过同二仲，登朝并命惭无用。
曲台分季奉斋祠，直笔系年陪侍从。芬芳鸡舌向南宫，
伏奏丹墀迹又同。公望数承黄纸诏，虚怀自号白云翁。
戎装躐躐纷出祖，金印煌煌宠司武。时看介士阅犀渠，
每狎儒生冠章甫。晋祠汾水古并州，千骑双旌居上头。
新握兵符应感激，远缄诗句更风流。缁衣诸侯谅称美，
白衣尚书何可比。只今麟阁待丹青，努力加餐报天子。

· 全唐诗 ·

卷 321_10【奉和许阁老酬淮南崔十七端公见寄】

权德舆

文行蕴良图，声华挹大巫。抡才超粉署，驳议在黄枢。
自得环中辨，偏推席上儒。八音谐雅乐，七轡骋康衢。
密侍全锵珮，雄才本弃繻。炉烟霏琐闼，宫漏滴铜壶。
旧友双鱼至，新文七义敷。断金挥丽藻，比玉咏生刍。
交辟尝推重，单辞忽受诬。风波疲贾谊，岐路泣杨朱。
溟涨前程险，炎荒旅梦孤。空悲鸢跼水，翻羡雁衔芦。
故国方迢递，羁愁自郁纆。远猷来象魏，霈泽过番禺。
尽室扁舟客，还家万里途。索居因仕宦，著论拟潜夫。
帆席来应驶，郊园半已芜。夕阳寻古径，凉吹动纤枯。
忆昔同驱传，忘怀或据梧。幕庭依古刹，缙税给中都。
瓜步经过惯，龙沙眺听殊。春山岚漠漠，秋渚露涂涂。
孰谓原思病，非关宁武愚。方看簪獬豸，俄叹絷騊駼。
芳讯风情在，佳期岁序徂。二贤欢最久，三益义非无。
柏悦心应尔，松寒志不渝。子将陪禁掖，亭伯限江湖。
交分终推毂，离忧莫向隅。分曹日相见，延首忆田苏。

卷 321_11【奉和李给事省中书情，寄刘、苗、崔三曹长，
因呈许、陈二阁老】

权德舆

常寮几处伏明光，新诏联翩夕拜郎。五夜漏清天欲曙，

· 全唐诗 ·

万年枝暖日初长。分曹列侍登文石，促膝闲谣接羽觞。
共说汉朝荣上赏，岂令三友滞冯唐。

卷 321_12【过张监阁老宅对酒奉酬见赠】

权德舆

里仁无外事，徐步一开颜。荆玉收难尽，齐竽喜暂闲。
秋风倾菊酒，霁景下蓬山。不用投车辖，甘从倒载还。

卷 321_13【奉和张舍人阁老阁中直夜，思闻雅琴，因以书事，通简僚友】

权德舆

紫垣宿清夜，蔼蔼复沈沈。圆月衡汉净，好风松栝深。
轩窗韵虚籁，兰雪怀幽音。珠露销暑气，玉徽结遐心。
盛才本殊伦，雅诤方在今。伫见舒彩翮，翻飞归凤林。

卷 321_14【和兵部李尚书东亭诗】

权德舆

三接履声退，东亭斯旷然。风流披鹤氅，操割佩龙泉。
云卷岩巘叠，雨馀松桂鲜。岂烦禽尚游，所贵天理全。

· 全唐诗 ·

卷 321_15 【和司门殷员外早秋省中书直夜，寄荆南卫象端公】

权德舆

共嗟王粲滞荆州，才子为郎忆旧游。凉夜偏宜粉署直，
清言远待玉人酬。风生北渚烟波阔，露下南宫星汉秋。
早晚得为同舍侣，知君两地结离忧。

卷 321_16 【酬陆三十二参浙东见寄】

权德舆

骢马别已久，鲤鱼来自烹。殷勤故人意，怊怅中林情。
茫茫重江外，杳杳一枝琼。搔首望良觐，为君华发生。

卷 321_17 【奉酬张监阁老雪后过中书见赠加两韵简南省僚旧】

权德舆

寓直久叨荣，新恩倍若惊。风清五夜永，节换一阳生。
潘鬓年空长，齐竽艺本轻。常时望连茹，今日剧悬旌。
枉步欢方接，含毫思又萦。烦君白雪句，岁晏若为情。

· 全唐诗 ·

卷 321_18 【酬主客仲员外见贺正除】

权德舆

五年承乏奉如纶，才薄那堪侍从臣。禁署独闻清漏晓，
命书惭对紫泥新。周班每喜簪裾接，郢曲偏宜讽咏频。
忆昔曲台尝议礼，见君论著最相亲。

卷 321_19 【奉和太府韦卿阁老左藏库中假山之作】

权德舆

春山仙掌百花开，九棘腰金有上才。忽向庭中摹峻极，
如从洞里见昭回。小松已负干霄状，片石皆疑缩地来。
都内今朝似方外，仍传丽曲寄云台。

卷 321_20 【奉和崔评事寄外甥刘同州并呈杜宾客、许给事、
王侍郎昆弟、杨少尹、李侍御并见寄之作】

权德舆

芳讯来江湖，开缄粲瑶碧。诗因乘黄赠，才擅雕龙格。
深陈名教本，谅以仁义积。藻思成采章，雅音闻皦绎。
清时左冯翊，贵士二千石。前日应星文，今兹敞华戟。

· 全唐诗 ·

谢公尝乞墅，宁氏终相宅。往岁疲草玄，忘年齐举白。
酒酣吟更苦，夜艾谈方剧。枣巷风雨秋，石头烟水夕。
多逢长者辙，不屑诸公辟。酷似仰牢之，雄词挹亭伯。
老骥念千里，饥鹰舒七翮。叵能舍郊扉，来偶朝中客。

卷 321_21 【和职方殷郎中留滞江汉初至南宫，呈诸公并见寄】

权德舆

十载别文昌，藩符寄武当。师贞上介辟，恩擢正员郎。
藻思烟霞丽，归轩印绶光。还希驻辇问，莫自叹冯唐。

卷 321_22 【奉酬从兄南仲见示十九韵】

权德舆

晋季天下乱，安丘佐关中。德辉霁家牒，侯籍推时功。
簪纓盛西州，清白传素风。逢时有舒卷，缮性无穷通。
吾兄挺奇资，向晦道自充。耕凿汝山下，退然安困蒙。
诗成三百篇，儒有一亩宫。琴书满座右，芝朮生墙东。
丽藻粲相鲜，晨辉艳芳丛。清光杳无际，皓魄流霜空。
邦有贤诸侯，主盟词律雄。荐贤比文举，理郡迈文翁。
楼中赏不独，池畔醉每同。圣朝辟四门，发迹贵名公。
小生何为者，往岁学雕虫。华簪映武弁，一年被微躬。

· 全唐诗 ·

开缄捧新诗，琼玉寒青葱。谬进空内讼，结怀远忡忡。
时来无自疑，刷翮摩苍穹。

卷 321_23【酬崔千牛四郎早秋见寄】

权德舆

浩歌坐虚室，庭树生凉风。碧云灭奇彩，白露萎芳丛。
感此时物变，悠然遐想通。偶来被簪组，自觉如池龙。
少年才藻新，金鼎世业崇。凤文已彪炳，琼树何青葱。

联镳长安道，接武承明宫。君登玉墀上，我侍彤庭中。
疲病多内愧，切磋常见同。起予览新诗，逸韵凌秋空。
相爱每不足，因兹寓深衷。

卷 321_24【酬灵彻上人以诗代书见寄】

权德舆

莲花出水地无尘，中有南宗了义人。已取贝多翻半字，
还将阳焰谕三身。碧云飞处诗偏丽，白月圆时信本真。
更喜开缄销热恼，西方社里旧相亲。

· 全唐诗 ·

卷 321_25 【酬蔡十二博士见寄四韵】

权德舆

芜城十年别，蓬转居不定。终岁白屋贫，独谣清酒圣。

风尘韦带减，霜雪松心劲。何以浣相思，启元能尽性。

卷 321_26 【戏和三韵】

权德舆

墨翟突不黔，范丹甑生尘。君今复劳歌，鹤发吹湿薪。

前诏许真秩，何如巾软轮。

卷 321_27 【李十韶州寄途中绝句，使者取报修书之际，口号酬赠】

权德舆

诏下忽临山水郡，不妨从事恣攀登。

莫言向北千行雁，别有图南七月鹏。

· 全唐诗 ·

卷 321_28 【崔四郎协律以诗见寄，兼惠蜀琴，因以酬赠】

权德舆

临风结烦想，客至传好音。白雪絃郢曲，朱弦亘蜀琴。
泠泠响幽韵，款款寄遐心。岁晚何以报，与君期断金。

卷 321_29 【酬冯绛州早秋绛台感怀见寄】

权德舆

良牧闲无事，层台思眇然。七条萦印绶，三晋辨山川。
洗嬾讴谣合，开襟眺听偏。秋光连大卤，霁景下新田。
叶落径庭树，人归曲沃烟。武符颁美化，亥字访疑年。
经术推多识，卿曹亦累迁。斋祠常并冕，官品每差肩。
接部青丝骑，裁诗白露天。知音愧相访，商洛正闲眠。

卷 321_30 【酬赵尚书杏园花下醉后见寄】

权德舆

春光深处曲江西，八座风流信马蹄。
鹤发杏花相映好，羡君终日醉如泥。

· 全唐诗 ·

卷 321_31 【酬赵尚书城南看花日晚先归见寄】

权德舆

杜城韦曲遍寻春，处处繁花满目新。
日暮归鞍不相待，与君同是醉乡人。

卷三百二十二

卷 322_1 【伏蒙十七叔寄示喜庆感怀三十韵因献之】

权德舆

受氏自有殷，树功緬前秦。圭田接土宇，侯籍相纷纶。
道义集天爵，菁华极人文。握兰中台并，折桂东堂春。
祖德蹈前哲，家风播清芬。先公秉明义，大节逢艰屯。
独立挺忠孝，至诚感神人。命书备追锡，迹远道不伸。
小生谅无似，积庆遭昌辰。九年西掖忝，五转南宫频。
司理因旷职，曲台仍礼神。愧非夔龙姿，忽佐尧舜君。
内惟负且乘，徒以弱似仁。岂足议大政，所忧玷彝伦。
叔父贞素履，含章穷典坟。百氏若珠贯，九流皆翬分。
黄钟蕴声调，白玉那缁磷。清论坐虚室，长谣宜幅巾。
开关接人祠，支策无俗宾。种杏当暑热，烹茶含露新。
井径交碧藓，轩窗栖白云。飞沉禽鱼乐，芬馥兰桂薰。
经术弘义训，息男茂嘉闻。筮仕就色养，宴居忘食贫。
四方有翘车，上国有蒲轮。行当反招隐，岂得常退身。
秦吴路杳杳，朔海望沄沄。侍坐驰梦寐，结怀积昏昕。
发函捧新诗，慈诲情殷勤。省躬日三复，拜首书诸绅。

· 全唐诗 ·

卷 322_2 【酬李二十二兄主簿马迹山见寄】

权德舆

杳杳尘外想，悠悠区中缘。如何战未胜，曾是教所牵。
远郊有灵峰，夙昔栖真仙。鸾声去已久，马迹空依然。
丹崖转初旭，碧落凝秋烟。松风共萧飒，萝月想婵娟。
内兄蕴遐心，嘉遁性所便。不能栖枳棘，且复探云泉。
中有冥寂人，闲读逍遥篇。联袂共支策，抠衣尝绝编。
徐行石上苔，静韵风中弦。烟霞湿儒服，日月生寥天。
新诗来起予，璀璨七义全。能尽含写意，转令山水鲜。
若闻笙鹤声，宛在耳目前。登攀阻心赏，愁绝空怀贤。
出处岂异途，心冥即真筌。暂从西府檄，终卧东菑田。
不嫌予步蹇，但恐君行膻。如能固旷怀，谷口期穷年。

卷 322_3 【酬陆四十楚源春夜宿虎丘山对月寄梁四敬之兼见贻之作】

权德舆

东风变蘅薄，时景日妍和。更想千峰夜，浩然幽意多。
蕙香袭闲趾，松露沾乔柯。潭影漾霞月，石床封薜萝。
夫君非岁时，已负青冥姿。龙虎一门盛，渊云四海推。
駸駸步騫褭，婉婉翥长离。悬圃尽琼树，家林轻桂枝。
声荣徒外奖，恬淡方自适。逸气凌颢清，仁祠访金碧。

· 全唐诗 ·

芊眠瑶草秀，断续云窦滴。芳讯发幽缄，新诗比良觌。
故人石渠署，美价满中朝。落落杉松直，芬芬兰杜飘。
雄词鼓溟海，旷达豁烟霄。营道幸同术，论心皆后凋。
循环伐木咏，缅邈招隐情。惭兹拥肿才，爱彼潺湲清。
拘牵尚多故，梦想何由并。终结方外期，不待华发生。

卷 322_4 【酬穆七侍郎早登使院西楼感怀】

权德舆

耿耿宵欲半，振衣庭户前。浩歌抚长剑，临风泛清弦。
晴霜丽寒芜，微月露碧鲜。杉梧韵幽籁，河汉明秋天。

良夜虽可玩，沉忧逾浩然。楼中迟启明，林际挥宿烟。
晨风响钟鼓，曙色映山川。滔滔天外驶，杲杲朝日悬。

因穷西南永，得见天地全。动植相纠纷，车从竞喧阗。
鱣鲟跃洪流，麋麇倚荒阡。啾啾白云雁，嚙嚙清露蝉。

一气鼓万殊，晦明相推迁。羲和无停鞅，不得常少年。
当令志气神，及此鬓发玄。岂唯十七族，今古称其贤。

夫君才气雄，振藻何翩翩。诗轻沈隐侯，赋拟王仲宣。
小鸟抢榆枋，大鹏激三千。与君期晚岁，方结林栖缘。

· 全唐诗 ·

卷 322_5【奉和李大夫题郑评事江楼】

权德舆

达士无外累，隐几依南郭。茅栋上江开，布帆当砌落。
支颐散华发，欹枕曝灵药。入鸟不乱行，观鱼还自乐。
何时金马诏，早岁建安作。往事尽筌蹄，虚怀寄杯杓。
邦君驻千骑，清论时间酌。凭槛出烟埃，振衣向寥廓。
心源齐彼是，人境胜岩壑。何必栖冥冥，然为避矰缴。

卷 322_6【春游茅山酬杜评事见寄】

权德舆

喜得赏心处，春山岂计程。连溪芳草合，半岭白云晴。
绝涧漱冰碧，仙坛挹颢清。怀君在人境，不共此时情。

卷 322_7【和韩侍御白发】

权德舆

白发今朝见，虚斋晓镜清。乍分霜简色，微映铁冠生。
幕下多能事，周行挹令名。流年未可叹，正遇太阶平。

· 全唐诗 ·

卷 322_8【和邵端公醉后寄于谏议之作】

权德舆

莫羨檐前柳，春风独早归。阳和次第发，桃李更芳菲。

卷 322_9【和李大夫西山祈雨，因感张曲江故事十韵】

权德舆

亚相冠貂蝉，分忧统十联。火星当永日，云汉倬炎天。
斋祷期灵贶，精诚契昔贤。中宵出驺驭，清夜旅牲牷。
触日看初起，随车应物先。雷音生绝巘，雨足晦平阡。
潇洒四冥合，空濛万顷连。歌谣喧泽国，稼穡遍原田。
故事三台盛，新文七义全。作霖应自此，天下待丰年。

卷 322_10【同陆太祝鸿渐崔法曹载华见萧侍御留后，说得
卫州报，推事使张侍御却回前刺史戴员外无事，喜而有作三首】

权德舆

专城书素至留台，忽报张纲揽辔回。
共看昨日蝇飞处，并是今朝鹊喜来。

· 全唐诗 ·

鹤发州民拥使车，人人自说受恩初。
如今天下无冤气，乞为邦君雪谤书。

众人哺啜喜君醒，渭水由来不杂泾。
遮莫雪霜撩乱下，松枝竹叶自青青。

卷 322_11【答韦秀才寄一首】

权德舆

中峰云暗雨霏霏，水涨花塘未得归。
心忆琼枝望不见，几回虚湿薜萝衣。

卷 322_12【户部王曹长杨考功崔刑部二院长并同钟陵使府之旧，因以寄赠，又陪郎署喜甚常僚，因书所怀且叙所知】

权德舆

忽惊西江侣，共作南宫郎。宿昔芝兰室，今兹鸳鹭行。
子猷美风味，左户推公器。含毫白雪飞，出匣青萍利。
子云尝燕居，作赋似相如。闲成考课奏，别贡贤良书。
子玉谅贞实，持刑慎丹笔。秋天鸿鹄姿，晚岁松筠质。
伊予诚薄才，何幸复趋陪。偶来尘右掖，空此忆中台。
时节东流驶，悲欢追往事。待月登庾楼，排云上萧寺。
盍簪莲府宴，落帽龙沙醉。极浦送风帆，灵山眺烟翠。

· 全唐诗 ·

解颐通善谑，喻指穷精义。搦管或飞章，分曹时按吏。
雨散与蓬飘，秦吴两寂寥。方期全拥肿，岂望蹶扶摇。

夜直分三署，晨趋共九霄。外庭时接武，广陌更连镳。
北极星辰拱，南薰气序调。欣随众君子，并立圣明朝。

卷 322_13【贡院对雪，以绝句代八行，奉寄崔阁老】

权德舆

寓宿春闱岁欲除，严风密雪绝双鱼。
思君独步西垣里，日日含香草诏书。

卷 322_14【初秋月夜中书宿直，因呈杨阁老】

权德舆

欹枕直庐暇，风蝉迎早秋。沈沈玉堂夕，皎皎金波流。
对掌喜新命，分曹谐旧游。相思玩华彩，因感庾公楼。

· 全唐诗 ·

卷 322_15【唐开州文编远寄新赋，累惠良药，咏叹仰佩，
不觉裴然走笔代书，聊书还答】

权德舆

风雨竦庭柯，端忧坐空堂。多病时节换，所思道里长。
故人朱两轡，出自尚书郎。下车今几时，理行远芬芳。
琼瑶览良讯，芣苢满素囊。结根在贵州，蠲疾传古方。
探撷当五月，殷勤逾八行。深情婉如此，善祝何可忘。
复有金玉音，焕如龙凤章。一闻灵洞说，若睹群仙翔。

三清飞庆霄，百汰成雄铎。体物信无对，洒心愿相将。
昔年同旅食，终日窥文房。春风眺芜城，秋水渡柳杨。
君为太史氏，弱质羁楚乡。今来忝司谏，千骑遥相望。
归云夕鳞鳞，圆魄夜苍苍。远思结铃阁，何人交羽觴。
伫见征颍川，无为薄淮阳。政成看再入，列侍炉烟傍。

卷 322_16【待漏假寐梦归江东旧居】

权德舆

十年江浦卧郊园，闲夜分明结梦魂。舍下烟萝通古寺，
湖中云雨到前轩。南宗长老知心法，东郭先生识化源。
觉后忽闻清漏晓，又随簪珥入君门。

· 全唐诗 ·

卷 322_17【祗命赴京，途次淮口，因书所怀】

权德舆

弱植素寡偶，趋时非所任。感恩再登龙，求友皆断金。
彪炳睹奇采，凄锵闻雅音。适欣佳期接，遽叹离思侵。
靡靡遵远道，忉忉劳寸心。难成独酌谣，空奏伐木吟。
沅寥清冬时，萧索白昼阴。交欢谅如昨，滞念纷在今。
因风试矫翼，倦飞会归林。向晚清淮驶，回首楚云深。

卷 322_18【省中春晚忽忆江南旧居戏书所怀因寄两浙亲故
杂言】

权德舆

前年冠獬豸，戎府随宾介。去年簪进贤，赞导法宫前。
今兹戴武弁，谬列金门彦。问我何所能，头冠忽三变。
野性惯疏闲，晨趋兴暮还。花时限清禁，霁后爱南山。
晚景支颐对尊酒，旧游忆在江湖久。庾楼柳寺共开襟，
枫岸烟塘几携手。结庐常占练湖春，犹寄藜床与幅巾。
疲羸只欲思三径，黠直那堪备七人。更想东南多竹箭，
悬圃琅玕共葱蒨。裁书且附双鲤鱼，偏恨相思未相见。

· 全唐诗 ·

卷 322_19【寄李衡州】

权德舆

片石丛花画不如，庇身三径岂吾庐。
主人千骑东方远，唯望衡阳雁足书。

卷 322_20【寄临海郡崔稚璋】

权德舆

美酒步兵厨，古人尝宦游。赤城临海峤，君子今督邮。
吏隐丰暇日，琴壶共冥搜。新诗寒玉韵，旷思孤云秋。
志士诚勇退，鄙夫自包羞。终当就知己，莫恋潺湲流。

卷 322_21【李韶州著书，常论释氏之理，贵州有能公遗迹，
诗以问之】

权德舆

常日区中暇，时闻象外言。曹溪有宗旨，一为勘心源。

· 全唐诗 ·

卷 322_22 【马上赠虚公】

权德舆

马足早尘深，飘缨又满襟。吾师有甘露，为洗此时心。

卷 322_23 【郴州换印緘遣之际，率成三韵，因寄李二兄员外使君】

权德舆

緘题桂阳印，持寄朗陵兄。刺举官犹屈，风谣政已成。
行看换龟纽，奏最谒承明。

卷 322_24 【早发杭州泛富春江寄陆三十一公佐】

权德舆

候晓起徒驭，春江多好风。白波连青云，荡漾晨光中。
四望浩无际，沉忧将此同。未离奔走途，但恐成悲翁。
俯见触饵鳞，仰目凌霄鸿。缨尘日已厚，心累何时空。
区区此人世，所向皆樊笼。唯应杯中物，醒醉为穷通。
故人悬圃姿，琼树纷青葱。终当此山去，共结兰桂丛。

· 全唐诗 ·

卷 322_25【寄侍御从舅】

权德舆

靡靡南轩蕙，迎风转芳滋。落落幽涧松，百尺无附枝。
世物自多故，达人心不羁。偶陈幕中画，未负林间期。

感恩从慰荐，循性难縈维。野鹤无俗质，孤云多异姿。
清冷松露滋，照灼岩花迟。终当税尘驾，来就东山嬉。

卷 322_26【湖上晚眺呈惠上人】

权德舆

湖上烟景好，鸟飞云自还。幸因居止近，日觉性情闲。
独酌乍临水，清机常见山。此时何所忆，净侣话玄关。

卷 322_27【新秋月夜寄故人】

权德舆

客心宜静夜，月色澹新秋。影落三湘水，诗传八咏楼。
何穷对酒望，几处卷帘愁。若问相思意，随君万里游。

· 全唐诗 ·

卷 322_28 【自杨子归丹阳初遂闲居聊呈惠公】

权德舆

移疾喜无事，卷帘松竹寒。稍知名是累，日与静相欢。

蹇浅逢机少，迂疏应物难。只思闲夜月，共向沃州看。

卷 322_29 【月夜过灵彻上人房因赠】

权德舆

此身会逐白云去，未洗尘缨还自伤。

今夜幸逢清净境，满庭秋月对支郎。

卷 322_30 【戏赠张炼师】

权德舆

月帔飘飘摘杏花，相邀洞口劝流霞。

半酣乍奏云和曲，疑是龟山阿母家。

· 全唐诗 ·

卷 322_31【戏赠天竺灵隐二寺寺主】

权德舆

石路泉流两寺分，寻常钟磬隔山闻。

山僧半在中峰住，共占青峦与白云。

卷 322_32【赠广通上人】

权德舆

身随猿鸟在深山，早有诗名到世间。

客至上方留盥漱，龙泓涧水昼潺潺。

卷 322_33【赠老将】

权德舆

白草黄云塞上秋，曾随骠骑出并州。

辘轳剑折虬须白，转战功多独不侯。

· 全唐诗 ·

卷 322_34【戏赠表兄崔秀才】

权德舆

何事年年恋隐沦，成名须遣及青春。

明时早献甘泉去，若待公车却误人。

卷 322_35【醉后戏赠苏九翯】

权德舆

白首书窗成巨儒，不知簪组遍屠沽。

劝君莫问长安路，且读鲁山于菟于。

· 全唐诗 ·

卷三百二十三

卷 323_1 【奉送韦起居老舅百口假满归嵩阳旧居】

权德舆

威凤翔紫气，孤云出寥天。奇采与幽姿，缥缈皆自然。
尝闻陶唐氏，亦有巢由全。以此耸风俗，岂必效羁牵。
大君遂群方，左史蹈前贤。振衣去朝市，赐告归林泉。
滑和固难久，循性得所便。有名皆畏途，无事乃真筌。
旧壑穷杳窅，新潭漾沦涟。岩花落又开，山月缺复圆。
轻策逗萝径，幅巾凌翠烟。机闲鱼鸟狎，体和芝朮鲜。
四皓本违难，二疏犹待年。况今寰海清，复此鬓发玄。
顾惭纓上尘，未绝区中缘。齐竽终自退，心寄嵩峰巅。

卷 323_2 【奉送孔十兄宾客承恩致政归东都旧居】

权德舆

达人旷迹通出处，每忆安居旧山去。乞身已见抗疏频，
优礼新闻诏书许。家法遥传阙里训，心源早逐嵩丘侣。
南史编年著盛名，东朝侍讲常虚伫。角巾华发忽自遂，

· 全唐诗 ·

命服金龟君更与。白云出岫暂逶迤，鸿鹄入冥无处所。
归路依依童稚乐，都门蔼蔼壶觞举。能将此道助皇风，
自可殊途并伊吕。

卷 323_3【送密秀才吏部驳放后归蜀，应崔大理序】

权德舆

蜀国本多士，雄文似相如。之子西南秀，名在贤能书。
薄禄且未及，故山念归欤。迢迢三千里，返驾一羸车。
玉垒长路尽，锦江春物余。此行无愠色，知尔恋林庐。

卷 323_4【送袁中丞持节册南诏五韵】

权德舆

西南使星去，远彻通朝聘。烟雨夔道深，麾幢汉仪盛。
途轻五尺险，水爱双流净。上国洽恩波，外臣遵礼命。
离堂驻驺驭，且尽樽中圣。

· 全唐诗 ·

卷 323_5【人日送房二十七侍御归越】

权德舆

驿骑归时驄马蹄，莲花府映若邪溪。
帝城人日风光早，不惜离堂醉似泥。

卷 323_6【送张阁老中丞持节册吊回鹘】

权德舆

旌旆翩翩拥汉官，君行常得远人欢。分职南台知礼重，
辍书东观见才难。金章玉节鸣驺远，白草黄云出塞寒。
欲散别离唯有醉，暂烦宾从驻征鞍。

卷 323_7【送二十叔赴任余杭尉】

权德舆

拜首直城阴，樽开意不任。梅仙归剧县，阮巷奏离琴。
春草吴门绿，秋涛浙水深。十年曾旅寓，应惬宦游心。

· 全唐诗 ·

卷 323_8【春送十四叔赴任渝州录事绝句】

权德舆

随牒忽离南北巷，解巾都吏有清风。

巴城锁印七联静，尽日闲谣廨署中。

卷 323_9【送韦十二丈赴襄城令三韵】

权德舆

留连出关骑，斟酌临岐酒。旧业传一经，新官栽五柳。

去去望行尘，青门重回首。

卷 323_10【送薛十九丈授将作主簿，分司东都，赋得春草】

权德舆

芊芊远郊外，杳杳春岩曲。愁处映微波，望中连净绿。

日暮藉离觞，折芳心断续。

· 全唐诗 ·

卷 323_11【送正字十九兄归江东醉后绝句】

权德舆

命驾相思不为名，春风归骑出关程。
离堂莫起临岐叹，文举终当荐祢衡。

卷 323_12【送张詹事致政归嵩山旧隐】

权德舆

解龟辞汉庭，却忆少微星。直指常持宪，平反更恤刑。
闲思紫芝侣，归卧白云扃。明诏优筋力，安车适性灵。
群公来蔼蔼，独鹤去冥冥。想到挥金处，嵩吟枕上青。

卷 323_13【送许著作分司东都】

权德舆

月旦继平舆，风流仕石渠。分曹向瀍洛，守职正图书。
棣萼荣相映，琼枝色不如。宾朋争漉酒，徒御侍巾车。
异日始离抱，维思烹鲤鱼。

· 全唐诗 ·

卷 323_14 【送少清赴润州参军，因思练旧居】

权德舆

二纪乐箴瓢，烟霞暮与朝。因君宦游去，记得春江潮。

远别更搔首，初官方折腰。青门望离袂，魂为阿连销。

卷 323_15 【送濬上人归扬州禅智寺】

权德舆

蠹露宗通法已传，麻衣筇杖去悠然。

扬州后学应相待，遥想幡花古寺前。

卷 323_16 【献岁送李十兄赴黔中酒后绝句】

权德舆

一樽岁酒且留欢，三峡黔江去路难。

志士感恩无远近，异时应戴惠文冠。

· 全唐诗 ·

卷 323_17【送张仆射朝见毕归镇】

权德舆

青光照目青门曙，玉勒雕戈拥驺驭。东方连帅南阳公，
文武吉甫如古风。独奉新恩来谒帝，感深更见新诗丽。
共看三接欲为霖，却念百城同望岁。双旌去去恋储胥，
归路莺花伴隼旟。今日汉庭求上略，留侯自有一编书。

卷 323_18【送韦行军员外赴河阳】

权德舆

五代武弁侍明光，辍佐中权拜外郎。记事还同楚倚相，
传经远自汉扶阳。离堂处处罗簪组，东望河桥壮鞞鼓。
三城晓角启轩门，一县繁花照莲府。上略儒风并者稀，
翩翩驺骑有光辉。只今右职多虚位，应待他时伏奏归。

卷 323_19【送韦中丞奉使新罗】

权德舆

淳化洽声明，殊方均惠养。计书重译至，锡命双旌往。
星辞北极远，水泛东溟广。斗柄辨宵程，天琛宜昼赏。

· 全唐诗 ·

孤光洲岛迥，净绿烟霞敞。展礼盛宾徒，交欢觐君长。
经途劳视听，怆别萦梦想。延颈旬岁期，新恩在归鞅。

卷 323_20【送从翁赴任长子县令】

权德舆

家风本钜儒，吏职化双凫。启事才方惬，临人政自殊。
地雄韩上党，秩比鲁中都。拜首春郊夕，离杯莫向隅。

卷 323_21【送从弟广东归绝句】

权德舆

夏云如火铄晨辉，款段羸车整素衣。
知尔业成还出谷，今朝莫怆断行飞。

卷 323_22【送王炼师赴王屋洞】

权德舆

稔岁在芝田，归程入洞天。白云辞上国，青鸟会群仙。
自以棋销日，宁资药驻年。相看话离合，风驭忽泠然。

· 全唐诗 ·

卷 323_23 【送薛温州】

权德舆

昨日馈连营，今来刺列城。方期建礼直，忽访永嘉程。
郡内裁诗暇，楼中迟客情。凭君减千骑，莫遣海鸥惊。

卷 323_24 【送黔中裴中丞阁老赴任】

权德舆

五谏留中禁，双旌辍上才。内臣持凤诏，天厩锡龙媒。
宴语睽兰室，辉荣亚柏台。怀黄宜命服，举白叹离杯。
景霁山川迥，风清雾露开。辰溪分浩淼，楚道接萦回。
胜理环中得，殊琛徼外来。行看旬岁诏，传庆在公台。

卷 323_25 【送崔谕德致政东归】

权德舆

天子坐法宫，诏书下江东。懿此嘉遁士，蒲车赴丘中。
褐衣入承明，朴略多古风。直道侍太子，昌言沃宸聪。
岩居四十年，心与鸥鸟同。一朝受恩泽，自说如池龙。
乞骸归故山，累疏明深衷。大君不夺志，命锡忽以崇。

· 全唐诗 ·

旭旦出国门，轻装若秋蓬。家依白云峤，手植丹桂丛。
竹斋引寒泉，霞月相玲珑。旷然解赤绶，去逐冥冥鸿。

卷 323_26【送三十叔赴任晋陵】

权德舆

春云结暮阴，侍坐捧离襟。黄绶轻装去，青门芳草深。
十年坐右职，三径寄遐心。便道停桡处，应过旧竹林。

卷 323_27【送安南裴都护】

权德舆

忽佩交州印，初辞列宿文。莫言方任远，且贵主忧分。
迴转朱鸢路，连飞翠羽群。戈船航涨海，旌旆卷炎云。
绝徼褰帷识，名香夹毂焚。怀来通北户，长养洽南薰。
暂叹同心阻，行看异绩闻。归时无所欲，薏苡或烦君。

卷 323_28【送别沅汎】

权德舆

念尔强学殖，非贯早从师。温温稟义方，慥慥习书诗。

· 全唐诗 ·

计偕来上国，宴喜方怡怡。经术既修明，艺文亦葳蕤。
伊予谅无取，琐质荷洪慈。偶来贰仪曹，量力何可支。
废业固相受，避嫌诚自私。徇吾刺促心，婉尔康庄姿。
古人贵直道，内讼乖坦夷。用兹处大官，无乃玷清时。
羸车出门去，怅望交涕洟。琢磨贵分阴，岁月若飙驰。
千里起足下，丰年系铉璣。苟令志气坚，伫见纓珮随。
斑斓五彩服，前路春物熙。旧游忆江南，环堵留蓬茨。
湖水白于练，莼羹细若丝。别来十三年，梦寐时见之。
宠荣忽逾量，荏苒不自知。晨兴愧华簪，止足为灵龟。
遐路各自爱，大来行可期。青冥在目前，努力调羽仪。

卷 323_29【送张曹长工部大夫奉使西番】

权德舆

殊邻覆露同，奉使小司空。西候车徒出，南台节印雄。
吊祠将渥命，导驿畅皇风。故地山河在，新恩玉帛通。
塞云凝废垒，关月照惊蓬。青史书归日，翻轻五利功。

卷 323_30【九华观宴钱崔十七叔判官赴义武幕兼呈书记萧校书】

权德舆

炎光三伏昼，洞府宜幽步。宿雨润芝田，鲜风摇桂树。

· 全唐诗 ·

阴阴台殿敞，靡靡轩车驻。晚酌临水清，晨装出关路。
偏荣本郡辟，倍感元臣遇。记室有门人，因君达书素。

卷 323_31【送文畅上人东游】

权德舆

桑门许辩才，外学接宗雷。护法麻衣净，翻经贝叶开。
宗通知不染，妄想自堪哀。或结西方社，师游早晚回。

卷 323_32【送灵武范司空】

权德舆

上略在安边，吴钩结束鲜。三公临右地，七萃拥中坚。
旧垒销烽火，新营辨井泉。伐谋师以律，贾勇士争先。
塞迥晴看月，沙平远际天。荣薰知屈指，应在盛秋前。

卷 323_33【送商州杜中丞赴任】

权德舆

安康地里接商於，帝命专城总赋舆。夕拜忽辞青琐闥，
晨装独捧紫泥书。深山古驿分驺骑，芳草闲云逐隼旟。

· 全唐诗 ·

绮皓清风千古在，因君一为谢岩居。

卷 323_34 【送殷卿罢举归淮南旧居】

权德舆

计偕十上竟无成，忽忆岩居便独行。志业尝探绝编义，
风尘虚作弃繻生。岁储应叹山田薄，里社时逢野酝清。
惆怅中年群从少，相看欲别倍关情。

· 全唐诗 ·

卷三百二十四

卷 324_1【送杜尹赴东都】

权德舆

商於留异绩，河洛贺新迁。朝选吴公守，时推杜尹贤。

如纶披凤诏，出匣淬龙泉。风雨交中土，簪裾敞别筵。

清明人比玉，照灼府如莲。伫报司州政，征黄似颍川。

卷 324_2【送孔江州】

权德舆

九派寻阳郡，分明似画图。秋光连瀑布，晴翠辨香炉。

才子厌兰省，邦君荣竹符。江城多暇日，能寄八行无。

· 全唐诗 ·

卷 324_3【送浑邓州】

权德舆

年少守南阳，新恩印绶光。轻轩出绕雷，利刃发干将。
风劲初下叶，云寒方护霜。想君行县处，露冕菊潭香。

卷 324_4【埤桥达奚四、于十九、陈大三侍御夜宴叙，各赋二韵】

权德舆

满树铁冠琼树枝，樽前烛下心相知。
明朝又与白云远，自古河梁多别离。

卷 324_5【酬别蔡十二见赠】

权德舆

伊人茂天爵，恬澹卧郊园。傲世方隐几，说经久颀门。
浩歌曳柴车，讵羨丹毂尊。严霜被鹑衣，不知狐白温。
游心羲文际，爱我相讨论。潢污忽朝宗，传骑令载奔。
峥嵘岁阴晚，愀怆离念繁。别馆丝桐清，寒郊烟雨昏。
中饮见逸气，纵谈穷化元。伫见公车起，圣代待乞言。

· 全唐诗 ·

卷 324_6【扬州与丁山人别】

权德舆

将军易道令威仙，华发清谈得此贤。
惆怅今朝广陵别，辽东后会复何年。

卷 324_7【送台州崔录事】

权德舆

不嫌临海远，微禄代躬耕。古郡纪纲职，扁舟山水程。
诗因琪树丽，心与瀑泉清。盛府知音在，何时荐政成。

卷 324_8【送信安刘少府】

权德舆

相看结离念，尽此林中渌。夷代轻远游，上才随薄禄。
参卿滞孙楚，隐市同梅福。吏散时泛弦，宾来闲覆局。
襟情无俗虑，谈笑成逸躅。此路足滩声，羡君多水宿。

· 全唐诗 ·

卷 324_9【送李城门罢官归嵩阳】

权德舆

与君相识处，吏隐在墙东。启闭千门静，逢迎两掖通。

罢官多暇日，肄业有儒风。归去尘寰外，春山桂树丛。

卷 324_10【送上虞丞】

权德舆

越郡佳山水，菁江接上虞。计程航一苇，试吏佐双凫。

云壑窥仙籍，风谣验地图。因寻黄绢字，为我吊曹盱。

卷 324_11【送卢评事婺州省觐】

权德舆

知向东阳去，晨装见彩衣。客愁青眼别，家喜玉人归。

漠漠水烟晚，萧萧枫叶飞。双溪泊船处，候吏拜胡威。

· 全唐诗 ·

卷 324_12【送崔端公郎君入京覲省】

权德舆

已见风姿美，仍闻艺业勤。清秋上国路，白皙少年人。

带月轻帆疾，迎霜彩服新。过庭若有问，一为说漳滨。

卷 324_13【送张周二秀才谒宣州薛侍郎】

权德舆

儒衣两少年，春棹毂溪船。湖月供诗兴，岚风费酒钱。

上帆涵浦岸，欹枕傲晴天。不用愁羁旅，宣城太守贤。

卷 324_14【送张将军归东都旧业】

权德舆

功名不复求，旧业向东周。白草辞边骑，青门别故侯。

摧残宝剑折，羸病绿珠愁。日暮寒风起，犹疑大漠秋。

· 全唐诗 ·

卷 324_15 【送句容王少府簿领赴上都】

权德舆

上国路绵绵，行人候晓天。离亭绿绮奏，乡树白云连。

江露湿征袂，山莺宜泊船。春风若为别，相顾起尊前。

卷 324_16 【送从弟谒员外叔父回归义兴】

权德舆

异乡兄弟少，见尔自依然。来酌林中酒，去耕湖上田。

何朝逢暑雨，几夜泊鱼烟。余力当勤学，成名贵少年。

卷 324_17 【送梁道士谒寿州崔大夫】

权德舆

年少一仙官，清羸驾彩鸾。洞宫云渺渺，花路水漫漫。

岁计芝田熟，晨装月帔寒。遥知小山桂，五马待邀欢。

· 全唐诗 ·

卷 324_18 【送郑秀才贡举】

权德舆

西笑意如何，知随贡举科。吟诗向月露，驱马出烟萝。

晚色平芜远，秋声候雁多。自怜归未得，相送一劳歌。

卷 324_19 【送谢孝廉移家越州】

权德舆

家承晋太傅，身慕鲁诸生。又见一帆去，共愁千里程。

沙平古树迥，潮满晓江晴。从此幽深去，无妨隐姓名。

卷 324_20 【送韩孝廉侍从赴举】

权德舆

贡士去翩翩，如君最少年。彩衣行不废，儒服代相传。

晓月经淮路，繁阴过楚天。清谈遇知己，应访孝廉船。

· 全唐诗 ·

卷 324_21 【送陆拾遗祗召赴行在】

权德舆

鹓鹭承新命，翻飞入汉庭。歌诗能合雅，献纳每论经。

月晓蜀江迥，猿啼楚树青。幸因焚草暇，书札访沈冥。

卷 324_22 【送映师归本寺】

权德舆

还归柳市去，远远出人群。苔磴桐花落，山窗桂树薰。

引泉通绝涧，放鹤入孤云。幸许宗雷到，清谈不易闻。

卷 324_23 【送宇文文府赴行在】

权德舆

送君当岁暮，斗酒破离颜。车骑拥寒水，雪云凝远山。

且安黄绶屈，莫羡白鸥闲。从此图南路，青云步武间。

· 全唐诗 ·

卷 324_24【送岳州温录事赴任】

权德舆

解巾州主簿，捧檄不辞遥。独鹤九霄翼，寒松百尺条。
晨装沾雨雪，旅宿候风潮。为政闲无事，清谈肃郡僚。

卷 324_25【送山人归旧隐】

权德舆

工为楚辞赋，更著鲁衣冠。岁俭山田薄，秋深晨服寒。
武人荣燕颔，志士恋渔竿。会被公车荐，知君久晦难。

卷 324_26【惠上人房宴别】

权德舆

方袍相引到龙华，支策开襟路不赊。法味已同香积会，
礼容疑在少施家。逸民羽客期皆至，疏竹青苔景半斜。
究竟相依何处好，匡山古社足烟霞。

· 全唐诗 ·

卷 324_27【送裴秀才贡举】

权德舆

儒衣风貌清，去抵汉公卿。宾贡年犹少，篇章艺已成。

临流惜暮景，话别起乡情。离酌不辞醉，西江春草生。

卷 324_28【送袁太祝衡婺巡覆】

权德舆

校缙税亩不妨闲，清兴自随鱼鸟间。

知君此去足佳句，路出桐溪千万山。

卷 324_29【送湖南李侍御赴本使赋采菱亭诗】

权德舆

旧俗采菱处，津亭风景和。沅江收暮霭，楚女发清歌。

曲岸萦湘叶，荒阶上白波。兰桡向莲府，一为枉帆过。

· 全唐诗 ·

卷 324_30 【送穆侍御归东都】

权德舆

知君儒服贵，彩绣两相辉。婉婉成名后，翩翩拥传归。

江深烟屿没，山暗雨云飞。共待酬恩罢，相将去息机。

卷 324_31 【送崔端公赴度支江陵院三韵】

权德舆

津亭风雪霁，斗酒留征棹。星传指湘江，瑶琴多楚调。

偏愁欲别处，黯黯颓阳照。

卷 324_32 【送陆太祝赴湖南幕同用送字】

权德舆

不惮征路遥，定缘宾礼重。新知折柳赠，旧侣乘篮送。

此去佳句多，枫江接云梦。

· 全唐诗 ·

卷 324_33 【送李处士归弋阳山居】

权德舆

暂来城市意何如，却忆葛阳溪上居。不惮薄田输井税，
自将嘉句著州闾。波翻极浦樵竿出，霜落秋郊树影疏。
想到家山无俗侣，逢迎只是坐篮舆。

卷 324_34 【送清江上人谒信州陆员外】

权德舆

暂辞长老去随缘，候晓轻装寄客船。佳句已齐康宝月，
清谈远指谢临川。滩经水濑逢新雪，路过渔潭宿暝烟。
暇日若随千骑出，南岩只在郡楼前。

卷 324_35 【送别同用阔字】

权德舆

耿耿离念繁，萧萧凉叶脱。缁尘素衣敝，风露秋江阔。
想得读书窗，岩花对巾褐。

· 全唐诗 ·

卷 324_36【送人使之江陵】

权德舆

嘉招不辞远，捧檄利攸往。行役念前程，宴游睎旧赏。
征轺星乍动，江信潮应上。烟水飞一帆，霜风摇五两。
纷纷别袂举，切切离鸿响。后会杳何时，悠然劳梦想。

卷 324_37【余干赠别张二十二侍御】

权德舆

芜城陌上春风别，干越亭边岁暮逢。
驱车又怆南北路，返照寒江千万峰。

卷 324_38【杂言赋得风送崔秀才归白田限三五七七言】

权德舆

响深涧，思啼猿。暗入蘋洲暖，轻随柳陌暄。
澹荡乍飘云影，芳菲遍满花源。寂寞春江别君处，
和烟带雨送征轩。

· 全唐诗 ·

卷 324_39【杂言同用离骚体送张评事襄阳覲省】

权德舆

黯离堂兮日晚，俨壶觞兮送远。远水霁兮微明，
杜蘅秀兮白芷生。波泫泫兮烟幂幂，凝暮色于空碧。

纷离念兮随君，溯九江兮经七泽。君之去兮不可留，
五彩裳兮木兰舟。

卷 324_40【岭上逢久别者又别】

权德舆

十年曾一别，征路此相逢。马首向何处，夕阳千万峰。

卷 324_41【赠别表兄韦卿】

权德舆

新读兵书事护羌，腰间宝剑映金章。
少年百战应轻别，莫笑儒生泪数行。

· 全唐诗 ·

卷 324_42【古离别】

权德舆

人生天地间，譬若七轡驰。夭寿既常数，奈何生别离。
迹当中人域，正性日已衰。是非千万境，杳霭情尘滋。
出门事何常，暂别亦难期。冉冉叹流景，悠悠限山陂。
尽此一夕欢，华樽会前墀。鸡鸣东方曙，夙驾临通逵。
欲出强移步，欲留难致辞。两情不得已，念此留何为。
天明去已远，寂默居人归。入门复上堂，恍恍生惊疑。
经履同游处，犹言常相随。览物或临盘，翻怪来何迟。
乃知前日欢，本为今日悲。特此别后心，宁及未见时。
则知交疏分，久久翻易持。报君未别后，别后当自知。

· 全唐诗 ·

卷三百二十五

卷 325_1【早夏青龙寺致斋，凭眺感物，因书十四韵】

权德舆

晓出文昌宫，憩兹青莲宇。洁斋奉明祀，凭览伤亘古。
秦为三月火，汉乃一抔土。诈力自湮沦，霸仪终莽卤。
中南横峻极，积翠泄云雨。首夏谅清和，芳阴接场圃。
仁祠閟严净，稽首洗灵府。虚室僧正禅，危梁燕初乳。
通庄走声利，结驷乃旁午。观化复何如，剖心信为愈。
盛时忽过量，弱质本无取。静永环中枢，益愧腰下组。
尘劳期抖擞，陟降聊俯俚。遗韵留壁间，凄然感东武。

卷 325_2【仲秋朝拜昭陵】

权德舆

清秋寿原上，诏拜承吉卜。尝读贞观书，及兹幸斋沐。
文皇昔潜耀，随季自颠覆。抚运斯顺人，救焚非逐鹿。
神祇戴元圣，君父纳大麓。良将授兵符，直臣调鼎餗。
无疆传庆祚，有截荷亭育。仙驭凌紫氛，神游弃黄屋。
方祇护山迹，先正陪岩腹。杳杳九峻深，沈沈万灵肃。
鸟飞田已辟，龙去云犹簇。金气爽林峦，乾冈走崖谷。
吾皇弘孝理，率土蒙景福。拥佑乃清夷，威灵谅回复。
礼承三公重，心愧二卿禄。展敬何所伸，曾以斧山木。

· 全唐诗 ·

卷 325_3【拜昭陵出城，与张秘监阁老同里，临行别承在史馆未归寻辱清辞辄酬之】

权德舆

仲月当南吕，晨装拜古林。逢君在东观，不得话离襟。
策马缘云路，开缄扣玉音。还期才浹日，里社酒同斟。

卷 325_4【酬冯监拜昭陵回途中遇雨见示】

权德舆

之子共乘轺，清秋拜上霄。曙霞迎凤驾，零雨湿回镳。
甘谷行初尽，轩台去渐遥。望中犹可辨，耘鸟下山椒。

卷 325_5【朔旦冬至摄职南郊，因书即事】

权德舆

大明南至庆天正，朔旦圆丘乐七成。文轨尽同尧历象，
斋祠忝备汉公卿。星辰列位祥光满，金石交音晓奏清。
更有观台称贺处，黄云捧日瑞升平。

· 全唐诗 ·

卷 325_6【奉和张监阁老过八陵院题赠杜卿崔员外】

权德舆

崇饰山园孝理深，万方同感圣人心。已闻东阁招从事，
每向西垣奉德音。公府从容谈婉婉，宾阶清切景沈沈。
与君跼步如同舍，终日相期此盍簪。

卷 325_7【奉和郑宾客相公摄官丰陵扈从之作】

权德舆

五辂导灵輶，千夫象纛垣。行宫移晓漏，彩仗下秋原。
莫究希夷理，空怀涣汗恩。颐神方蹈道，传圣乃尊尊。
共祝如山寿，俄惊凭几言。遐荒七会，肸蚨百灵奔。
豹尾从风直，鸾旗映日翻。涂刍联法从，营骑肃旌门。
杳霭虞泉夕，凄清楚挽喧。不堪程尽处，呜咽望文园。

卷 325_8【詹事府宿斋绝句】

权德舆

清斋四体泰，白昼一室空。摧颓有古树，骚屑多悲风。

· 全唐诗 ·

卷 325_9【和王祭酒太社宿斋，不得赴李尚书宅会，戏书见寄】

权德舆

元礼门前劳引望，句龙坛下阻欢娱。
此时对局空相忆，博进何人更乐输。

卷 325_10【酬裴端公八月十五日夜对月见怀】

权德舆

凉夜清秋半，空庭皓月圆。动摇随积水，皎洁满晴天。
多病嘉期阻，深情丽曲传。偏怀赏心处，同望庾楼前。

卷 325_11【奉和崔阁老，清明日候许阁老交直之际，辱裴阁老书招，云与考功苗曹长先城南游览，独行口号因以简赠】

权德舆

紫禁宿初回，清明花乱开。相招直城外，远远上春台。
谏曹将列宿，几处期子玉。深竹与清泉，家家桃李鲜。
折芳行载酒，胜赏随君有。愁疾自无惊，临风一搔首。

· 全唐诗 ·

卷 325_12【和张秘监阁老献岁过蒋大拾遗，因呈两省诸公并见示】

权德舆

二贤同载笔，久次入新年。焚草淹轻秩，藏书厌旧编。
竹风晴翠动，松雪瑞光鲜。庆赐行春令，从兹伫九迁。

卷 325_13【酬崔舍人阁老，冬至日宿直省中，奉简两掖阁老并见示】

权德舆

令节一阳新，西垣宿近臣。晓光连凤沼，残漏近鸡人。
白雪飞成曲，黄钟律应均。层霄翔迅羽，广陌驻归轮。
清切晨趋贵，恩华夜直频。辍才时所重，分命秩皆真。
左掖期连茹，南宫愧积薪。九年叨此地，回首倍相亲。

卷 325_14【八月十五日夜瑶台寺对月绝句】

权德舆

嬴女乘鸾已上天，仁祠空在鼎湖边。
凉风遥夜清秋半，一望金波照粉田。

· 全唐诗 ·

卷 325_15【夏至日作】

权德舆

璿枢无停运，四序相错行。寄言赫曦景，今日一阴生。

卷 325_16【二月二十七日社兼春分端居有怀简所思者】

权德舆

清昼开帘坐，风光处处生。看花诗思发，对酒客愁轻。

社日双飞燕，春分百啭莺。所思终不见，还是一含情。

卷 325_17【甲子岁元旦呈郑侍御明府】

权德舆

万里烟尘合，秦吴遂渺然。无人来上国，洒泪向新年。

世故看风叶，生涯寄海田。屠苏聊一醉，犹赖主人贤。

· 全唐诗 ·

卷 325_18【七夕】

权德舆

佳期人不见，天上喜新秋。玉珮沾清露，香车渡浅流。
东西一水隔，迢递两年愁。别有穿针处，微明月映楼。

卷 325_19【嘉兴九日寄丹阳亲故】

权德舆

穷年路岐客，西望思茫茫。积水曾南渡，浮云失旧乡。
海边寻别墅，愁里见重阳。草露荷衣冷，山风菊酒香。
独谣看坠叶，远目遍秋光。更羨登攀处，烟花满练塘。

卷 325_20【九日北楼宴集】

权德舆

萧飒秋声楼上闻，霜风漠漠起阴云。不见携觞王太守，
空思落帽孟参军。风吟蟋蟀寒偏急，酒泛茱萸晚易醺。
心忆旧山何日见，并将愁泪共纷纷。

· 全唐诗 ·

卷 325_21【奉陪李大夫九日龙沙宴会】

权德舆

龙沙重九会，千骑驻旌旗。水木秋光净，丝桐雅奏迟。
烟芜敛暝色，霜菊发寒姿。今日从公醉，全胜落帽时。

卷 325_22【腊日龙沙会绝句】

权德舆

帘外寒江千里色，林中樽酒七人期。
宁知腊日龙沙会，却胜重阳落帽时。

卷 325_23【严陵钓台下作】

权德舆

绝顶耸苍翠，清湍石磷磷。先生晦其中，天子不得臣。
心灵栖颢气，纓冕犹缁尘。不乐禁中卧，却归江上春。
潜驱东汉风，日使薄者醇。焉用佐天子，特此报故人。
人知大贤心，不独私其身。弛张有深致，耕钓陶天真。
奈何清风后，扰扰论屈伸。交情同市道，利欲相纷纶。
我行访遗台，仰古怀逸民。矍铄鸿鹄远，雪霜松桂新。
江流去不穷，山色凌秋旻。人世自今古，清辉照无垠。

· 全唐诗 ·

卷 325_24【晓发武阳馆即事书情】

权德舆

清晨策羸车，嘲哢闻村鸡。行将骑吏亲，日与情爱睽。
东风变林樾，南亩事耕犁。青菰冒白水，方塘接广畦。
杂英被长坂，野草蔓幽蹊。泻卤成沃壤，枯株发柔荑。
芳树莺命雏，深林麋引麕。杳杳途未极，团团日已西。
哲士务纓弁，鄙夫恋蓬藜。终当税尘驾，盥濯依春溪。

卷 325_25【丰城剑池驿感题】

权德舆

龙剑昔未发，泥沙相晦藏。向非张茂先，孰辨斗牛光。
神物不自达，圣贤亦彷徨。我行丰城野，慷慨心内伤。

卷 325_26【奉使宜春夜渡新淦江陆路至黄檗馆路上遇风雨作】

权德舆

草草理夜装，涉江又登陆。望路殊未穷，指期今已促。
传呼戒徒御，振辔转林麓。阴云拥岩端，霏雨当山腹。

· 全唐诗 ·

震雷如在耳，飞电来照目。兽迹不敢窥，马蹄唯务速。
虔心若斋礼，濡体如沐浴。万窍相怒号，百泉暗奔瀑。
危梁虑足跌，峻坂忧车覆。问我何以然，前日受微禄。
转知人代事，纓组乃徽束。向若家居时，安枕春梦熟。
遵途稍已近，候吏来相续。晓霁心始安，林端见初旭。

卷 325_27【细柳驿】

权德舆

细柳肃军令，条侯信殊伦。棘门乃儿戏，从古多其人。
神武今不杀，介夫如搢绅。息驾幸兹地，怀哉悚精神。

卷 325_28【渭水】

权德舆

吕叟年八十，皤然持钓钩。意在静天下，岂唯食营丘。
师臣有家法，小白犹尊周。日暮驻征策，爰兹清渭流。

· 全唐诗 ·

卷 325_29 【宫人斜绝句】

权德舆

一路斜分古驿前，阴风切切晦秋烟。

铅华新旧共冥寞，日暮愁鸱飞野田。

卷 325_30 【敷水驿】

权德舆

空见水名敷，秦楼昔事无。临风驻征骑，聊复捋髭须。

卷 325_31 【朝元阁】

权德舆

缭垣复道上层霄，十月离宫万国朝。

胡马忽来清跸去，空馀台殿照山椒。

· 全唐诗 ·

卷 325_32【石瓮寺】

权德舆

石瓮灵泉胜宝井，汲人回挂青丝绠。
厨烟半逐白云飞，当昼老僧来灌顶。

卷 325_33【盘豆驿】

权德舆

盘豆绿云上古驿，望思台下使人愁。
江充得计太子死，日暮戾园风雨秋。

卷 325_34【晚渡扬子江却寄江南亲故】

权德舆

返照满寒流，轻舟任摇漾。支颐见千里，烟景非一状。
远岫有无中，片帆风水上。天清去鸟灭，浦迥寒沙涨。
树晚叠秋岚，江空翻宿浪。胸中千万虑，对此一清旷。
回首碧云深，佳人不可望。

· 全唐诗 ·

卷 325_35【新安江路】

权德舆

深潭与浅滩，万转出新安。人远禽鱼净，山深水木寒。

啸起青蘋末，吟瞩白云端。即事遂幽赏，何心挂儒冠。

卷 325_36【月夜江行】

权德舆

扣船不得寐，浩露清衣襟。弥伤孤舟夜，远结万里心。

幽兴惜瑶草，素怀寄鸣琴。三奏月初上，寂寞寒江深。

卷 325_37【江城夜泊寄所思】

客程殊未极，舫棹泊回塘。水宿知寒早，愁眠觉夜长。

远钟和暗杵，曙月照晴霜。此夕相思意，摇摇不暂忘。

· 全唐诗 ·

卷 325_38 【陪包谏议湖墅路中举帆】

权德舆

萧萧凉雨歇，境物望中闲。风际片帆去，烟中独鸟还。

断桥通远浦，野墅接秋山。更喜陪清兴，尊前一解颜。

卷 325_39 【富阳陆路】

权德舆

又入乱峰去，远程殊未归。烟萝迷客路，山果落征衣。

欹石临清浅，晴云出翠微。渔潭明夜泊，心忆谢玄晖。

卷 325_40 【晓】

权德舆

晓风摇五两，残月映石壁。稍稍曙光开，片帆在空碧。

· 全唐诗 ·

卷 325_41 【昼】

权德舆

孤舟漾暖景，独鹤下秋空。安流日正昼，净绿天无风。

卷 325_42 【晚】

权德舆

古树夕阳尽，空江暮霭收。寂寞扣船坐，独生千里愁。

卷 325_43 【夜】

权德舆

猿声到枕上，愁梦纷难理。寂寞深夜寒，青霜落秋水。

· 全唐诗 ·

卷三百二十六

卷 326_1【奉和韦谏议奉送水部家兄上后书情，寄诸兄弟，仍通简南宫亲旧，并呈两省阁老院长】

权德舆

驷牡龙旂庆至今，一门儒服耀华簪。人望皆同照乘宝，
家风不重满籛金。护衣直夜南宫静，焚草清时左掖深。
何幸末班陪两地，阳春欲和意难任。

卷 326_2【奉和史馆张阁老，以许、陈二阁长爱弟俱为尚书郎，伯仲同时列在南北省，会于左掖，因而有咏】

权德舆

伯仲尽时贤，平舆与颍川。桂枝尝遍折，棣萼更相鲜。
丹地晨趋并，黄扉夕拜联。岂如分侍从，来就凤池边。

卷 326_3 【韦宾客宅与诸博士宴集】

权德舆

累抗气身章，湛恩比上庠。宾筵征稷嗣，家法自扶阳。
簪组欢言久，琴壶雅兴长。阴岚冒苔石，轻籁韵风篁。
佩玉三朝贵，挥金百虑忘。因知卧商洛，岂胜白云乡。

卷 326_4 【酬张秘监阁老喜太常中书二阁老与德舆同日迁官相代之作】

权德舆

珠树共飞栖，分封受紫泥。正名推五字，贵仕仰三珪。
继组心知忝，腰章事颇齐。蓬山有佳句，喜气在新题。

卷 326_5 【国子柳博士兼领太常博士，辄申贺赠】

权德舆

博士本秦官，求才帖职难。临风曲台净，对月璧池寒。
讲学分阴重，斋祠晓漏残。朝衣辨色处，双绶更宜看。

· 全唐诗 ·

卷 326_6 【过隐者湖上所居】

权德舆

蜗舍映平湖，皤然一鲁儒。唯将酒作圣，不厌谷名愚。
兵法窥黄石，天官辨白榆。行看软轮起，未可号潜夫。

卷 326_7 【从叔将军宅蔷薇花开，太府韦卿有题壁长句，因以和作】

权德舆

环列从容蹀躞归，光风骀荡发红薇。莺藏密叶宜新霁，
蹀绕低枝爱晚晖。艳色当轩迷舞袖，繁香满径拂朝衣。
名卿洞壑仍相近，佳句新成和者稀。

卷 326_8 【奉和许阁老霁后慈恩寺杏园看花，同用花字口号】

权德舆

杏林微雨霁，灼灼满瑶华。左掖期先至，中园景未斜。
含毫歌白雪，藉草醉流霞。独限金闺籍，支颐啜茗花。

· 全唐诗 ·

卷 326_9【奉和陈阁老寒食初假当直，从东省往集贤，因过史馆看木瓜花，寄张、蒋二阁老】

权德舆

繁花满树似留客，应为主人休浣归。

卷 326_10【晚秋陪崔阁老、张秘监阁老、苗考功同游昊天观，时杨阁老新直未满，以诗见寄，斐然酬和，有愧芜音】

权德舆

方驾游何许，仙源去似归。萦回留胜赏，萧洒出尘机。
泛菊贤人至，烧丹姹女飞。步虚清晓籁，隐几吸晨晖。
竹径琅玕合，芝田沆瀣晞。银钩三洞字，瑶笥七铢衣。
丽句翻红药，佳期限紫微。徒然一相望，郢曲和应稀。

卷 326_11【春日同诸公过兵部王尚书林园】

权德舆

休沐君相近，时容曳履过。花间留客久，台上见春多。
松色明金艾，莺声杂玉珂。更逢新酒熟，相与藉庭莎。

· 全唐诗 ·

卷 326_12 【与沈十九拾遗同游栖霞寺上方于亮上人院会宿
二首】

权德舆

摄山标胜绝，暇日谐想瞩。萦纡松路深，缭绕云岩曲。
重楼回树杪，古像凿山腹。人远水木清，地深兰桂馥。
层台耸金碧，绝顶摩净绿。下界诚可悲，南朝纷在目。

焚香入古殿，待月出深竹。稍觉天籁清，自伤人世促。
宗雷此相遇，偃放从所欲。清论松枝低，闲吟茗花熟。
一生如土梗，万虑相桎梏。永愿事潜师，穷年此栖宿。

偶来人境外，心赏幸随君。古殿烟霞夕，深山松桂薰。
岩花点寒溜，石磴扫春云。清净诸天近，喧尘下界分。
名僧康宝月，上客沈休文。共宿东林夜，清猿彻曙闻。

卷 326_13 【题崔山人草堂】

权德舆

竹径茆堂接洞天，闲时麈尾漱春泉。
世人车马不知处，时有归云到枕边。

· 全唐诗 ·

卷 326_14【徐孺亭马上口号】

权德舆

湖上荒亭临水开，龟文篆字积莓苔。
曲江北海今何处，尽逐东流去不回。

卷 326_15【哭刘四尚书】

权德舆

士友惜贤人，天朝丧守臣。才华推独步，声气幸相亲。
理析寰中妙，儒为席上珍。笑言成月旦，风韵挹天真。
丹地膺推择，青油寄抚循。岂言朝象魏，翻是卧漳滨。
命赐龙泉重，追荣密印陈。撤弦惊物故，庀具见家贫。
牢落风悲笛，洄澜涕泣巾。只嗟蒿里月，非复柳营春。
黄绢碑文在，青松隧路新。音容无处所，归作北邙尘。

卷 326_16【张工部至薄寒山下有书无由驰报輶车之至倍切悲怀】

权德舆

书来远自薄寒山，缭绕洮河出古关。
今日难裁秣陵报，薤歌寥落柳车边。

· 全唐诗 ·

卷 326_17【工部发引日属伤足卧疾不遂执紼】

权德舆

子春伤足日，况有寝门哀。元伯归全去，无由白马来。
笳箫里巷咽，龟筮墓田开。片石潺湲泪，含悲叙史才。

卷 326_18【从事淮南府过亡友杨校书旧厅感念愀然】

权德舆

故人随化往，倏忽今七霜。及我就拘限，清风留此堂。
松竹逾映蔚，芝兰自销亡。绝弦罢流水，闻笛同山阳。
炯如冰玉姿，粲若鸾凤章。欲翥摧劲翮，先秋落贞芳。
正平赋鸚鵡，文考颂灵光。二子古不吊，夫君今何伤。
黄墟既杳杳，玄化亦茫茫。岂必限宿草，含凄洒衣裳。

卷 326_19【哭李晦群崔季文二处士】

权德舆

华封西祝尧，贵寿多男子。二贤无主后，贫贱大壮齿。
未成鸿鹄姿，遽顿骅骝趾。子渊将叔度，自古不得已。

· 全唐诗 ·

卷 326_20 【观葬者】

权德舆

涂刍随昼哭，数里至松门。贵尽人间礼，宁知逝者魂。

笳箫出古陌，烟雨闭寒原。万古皆如此，伤心反不言。

卷 326_21 【成南阳墓】

权德舆

枯茭没古基，驳藓蔽丰碑。向晚微风起，如闻坐啸时。

卷 326_22 【周平西墓】

权德舆

英威今寂寞，陈迹对崇丘。壮志清风在，荒坟白日愁。

穷泉那复晓，乔木不知秋。岁岁寒塘侧，无人水自流。

· 全唐诗 ·

卷 326_23 【苏小小墓】

权德舆

万古荒坟在，悠然我独寻。寂寥红粉尽，冥寞黄泉深。
蔓草映寒水，空郊暖夕阴。风流有佳句，吟眺一伤心。

卷 326_24 【题柳郎中茅山故居】

权德舆

下马荒阶日欲曛，潺潺石溜静中闻。
鸟啼花落人声绝，寂寞山窗掩白云。

卷 326_25 【哭张十八校书】

权德舆

芸阁为郎一命初，桐州寄傲十年馀。魂随逝水归何处，
名在新诗众不如。蹉跎江浦生华发，牢落寒原会素车。
更忆八行前日到，含凄为报秣陵书。

· 全唐诗 ·

卷 326_26 【题亡友江畔旧居】

权德舆

寥落留三径，柴扉对楚江。蟭蛸集暗壁，蜥蜴走寒窗。
松盖欹书幌，苔衣上酒缸。平生断金契，到此泪成双。

· 全唐诗 ·

卷三百二十七

卷 327_1【德宗神武孝文皇帝挽歌词三首】

权德舆

覆露雍熙运，澄清教化源。賡歌凝庶绩，羽舞被深恩。
纂业光文祖，贻谋属孝孙。恭闻留未命，犹是爱元元。

梯航来万国，玉帛庆三朝。湛露恩方浹，薰风曲正调。
晏车悲卤簿，广乐遏箫韶。最怆号弓处，龙髯上紫霄。

常时柏梁宴，今日谷林归。玉辇恩波遍，灵輶烟雨霏。
乔山森羽骑，渭水拥旌旂。仙驭何由见，耘田鸟自飞。

卷 327_2【顺宗至德大安孝皇帝挽歌三首】

权德舆

十叶开昌运，三辰丽德音。荐功期瘞玉，昭俭每捐金。
解泽皇风遍，虞泉白日沈。仍闻起居注，焚奏感人心。

· 全唐诗 ·

孝理本忧勤，玄功在啬神。睿图传上嗣，寿酒比家人。
仙驭三清远，行宫万象新。小臣司吉从，还扈属车尘。

候晓传清跸，迎风引彩旒。共瞻宫辂出，遥想望陵愁。
弓剑随云气，衣冠奉月游。空余驾龙处，摇落鼎湖秋。

卷 327_3 【昭德皇后挽歌词】

权德舆

淮水源流远，涂山礼命升。往年求故剑，今夕祔初陵。
鸾镜金波涩，翠衣玉彩凝。千年子孙庆，孝理在蒸蒸。

卷 327_4 【大行皇太后挽歌词三首】

权德舆

筮水灵源濬，因山祔礼崇。从龙开隧路，合璧向方中。
殿帐金根出，宸衣玉座空。唯余文母化，阴德满公宫。

配礼归清庙，灵仪出直城。九虞宁厚载，一惠易尊名。
晓漏铜壶涩，秋风羽翼轻。容车攀望处，孺慕切皇情。

哀笳出长信，宝剑入延津。呜咽宫车进，凄凉祠殿新。
青乌灵兆久，白燕瑞书频。从此山园夕，金波照玉尘。

· 全唐诗 ·

卷 327_5【惠昭皇太子挽歌词二首】

权德舆

前星落庆霄，薤露逐晨飙。宫仗黄麾出，仙游紫府遥。
空嗟凤吹去，无复鸡鸣朝。今夜西园月，重轮更寂寥。
东朝闻楚挽，羽翮依稀转。天归京兆新，日与长安远。
兰芳落故殿，桂影销空苑。骑吹咽不前，风悲九旗卷。

卷 327_6【赠文敬太子挽歌词二首】

权德舆

盘石公封重，瑶山赠礼尊。归全荣备物，乐善积深恩。
雁沼寒波咽，鸾旌夕吹翻。唯馀西靡树，千古霸陵原。
铜壶晓漏初，羽翼拥涂车。方外留鸿宝，人间得善书。
清笳悲画绶，朱邸散长裾。还似缙山驾，飘飘向碧虚。

卷 327_7【赠郑国庄穆公主挽歌二首】

权德舆

追饰崇汤沐，遗芳蔼禁闱。秋原森羽卫，夜壑掩容辉。
睿藻悲难尽，公宫望不归。笳箫向烟雾，疑是彩鸾飞。

· 全唐诗 ·

旧馆闭平阳，容车启寿堂。霜凝薜英落，风度薜歌长。
淑德图书在，皇慈礼命彰。凄凉霸川曲，垄树已成行。

卷 327_8【赠魏国宪穆公主挽歌词二首】

权德舆

汉制荣车服，周诗美肃雍。礼尊同姓主，恩锡大名封。
外馆留图史，阴堂闭德容。睿词悲薜露，千古仰芳踪。

秦楼晓月残，卤簿列材官。红绶兰桂歇，粉田风露寒。
凝笳悲驷马，清镜掩孤鸾。愍册徽音在，都人雪涕看。

卷 327_9【赠梁国惠康公主挽歌词二首】

权德舆

外馆嫔仪贵，中参睿渥深。初笄横白玉，盛服镂黄金。
风度箫声远，河低婺彩沈。夜台留册谥，凄怆即徽音。

杳霭异湘川，飘飘驾紫烟。凤楼人已去，鸾镜月空悬。
雾湿汤沐地，霜凝脂粉田。音容无处所，应在玉皇前。

· 全唐诗 ·

卷 327_10 【故太尉兼中书令赠太师西平王挽词】

权德舆

翊戴推元老，谋猷合大君。河山封故地，金石表新坟。
剑履归长夜，笳箫咽暮云。还经誓师处，薤露不堪闻。

卷 327_11 【故司徒兼侍中赠太傅北平王挽词】

权德舆

授律勋庸盛，居中鼎鼐和。佐时调四气，尽力净三河。
忽访天京兆，空传汉伏波。今朝麟阁上，偏軫圣情多。

卷 327_12 【奉和礼部尚书酬杨著作竹亭歌】

权德舆

直城朱户相逶迤，九逵丹毂声阗阗。春官自有花源赏，
终日南山当目前。晨摇玉佩趋温室，莫入竹溪疑洞天。

烟销雨过看不足，晴翠鲜飙逗深谷。独谣一曲泛流霞，
闲对千竿连净绿。萦回疏凿随胜地，石磴岩扉光景异。

· 全唐诗 ·

虚斋寂寂清籁吟，幽涧纷纷杂英坠。家承麟趾贵，
剑有龙泉赐，上奉明时事无事。人间方外兴偏多，

能以簪缨狎薜萝。常通内学青莲偈，更奏新声白雪歌。
风入松，云归栋，鸿飞灭处犹目送。蝶舞闲时梦忽成，

兰台有客叙交情，返照中林曳履声。直为君恩催造膝，
东方辨色谒承明。

卷 327_13【奉和张仆射朝天行】

权德舆

元侯重寄贞师律，三郡四封今静谧。丹毂常思阙下来，
紫泥忽自天中出。军装喜气倍趋程，千骑鸣珂入凤城。

周王致理称申甫，今日贤臣见明主。拜恩稽首纷无已，
凝旒前席皇情喜。逢时自是山出云，献可还同石投水。

昔岁褰衣梁甫吟，当时已有致君心。专城一鼓妖氛静，
拥旆十年天泽深。日日披诚奉昌运，王人织路传清问。

仙酝尝分玉斝浓，御闲更辍金羈骏。元正前殿朝君臣，
一人负宸百福新。宫悬彩仗俨然合，瑞气炉烟相与春。

· 全唐诗 ·

万年枝上东风早，珮玉晨趋光景好。涂山已见首诸侯，
麟阁终当画元老。温室沈沈漏刻移，退朝宾侣每相随。

雄词乐职波涛阔，旷度交欢云雾披。自古全才贵文武，
懦夫只解冠章甫。见公抽匣百炼光，试欲磨铅谅无助。

卷 327_14【和李中丞慈恩寺清上人院牡丹花歌】

权德舆

澹荡韶光三月中，牡丹偏自占春风。时过宝地寻香径，
已见新花出故丛。曲水亭西杏园北，浓芳深院红霞色。

擢秀全胜珠树林，结根幸在青莲域。艳蕊鲜房次第开，
含烟洗露照苍苔。庞眉倚杖禅僧起，轻翅萦枝舞蝶来。

独坐南台时共美，闲行古刹情何已。花间一曲奏阳春，
应为芬芳比君子。

卷 327_15【锡杖歌送明楚上人归佛川】

权德舆

上人远自西天竺，头陀行遍国朝寺。口翻贝叶古字经，
手持金策声泠泠。护法护身唯振锡，石濑云溪深寂寂。

· 全唐诗 ·

乍来松径风更寒，遥映霜天月成魄。后夜空山禅诵时，
寥寥挂在枯树枝。真法常传心不住，东西南北随缘路。
佛川此去何时回，应真莫便游天台。

卷 327_16【马秀才草书歌】

权德舆

伯英草圣称绝伦，后来学者无其人。白眉年少未弱冠，
落纸纷纷运纤腕。初闻之子十岁馀，当时时辈皆不如。
犹轻昔日墨池学，未许前贤团扇书。艳彩芳姿相点缀，
水映荷花风转蕙。三春并向指下生，万象争分笔端势。
有时当暑如清秋，满堂风雨寒飕飕。乍疑崩崖瀑水落，
又见古木饥鼯愁。变化纵横出新意，眼看一字千金贵。
忆昔谢安问献之，时人虽见那得知。

卷 327_17【离合诗赠张监阁老】

权德舆

黄叶从风散，暗嗟时节换。忽见鬓边霜，勿辞林下觞。
躬行君子道，身负芳名早。帐殿汉官仪，巾车塞垣草。
交情剧断金，文律每招寻。始知蓬山下，如见古人心。

· 全唐诗 ·

卷 327_18【春日雪酬潘孟阳回文】

权德舆

酒杯春醉好，飞雪晚庭闲。久忆同前赏，中林对远山。

卷 327_19【五杂组】

权德舆

五杂组，旗亭客。往复还，城南陌。不得已，天涯谪。

卷 327_20【数名诗】

权德舆

一区扬雄宅，恬然无所欲。二顷季子田，岁晏常自足。
三端固为累，事物反徽束。四体苟不勤，安得丰菽粟。
五侯诚暋晔，荣甚或为辱。七翩未鸾翔，虞罗乃相触。
七人称作者，杳杳有遐躅。八桂挺奇姿，森森照初旭。
九歌伤泽畔，怨思徒刺促。十翼有格言，幽贞谢浮俗。

· 全唐诗 ·

卷 327_21 【星名诗】

权德舆

虚怀何所欲，岁晏聊懒逸。云翼谢翩翩，松心保贞实。
风秋景气爽，叶落井径出。陶然美酒酣，所谓幽人吉。
自当轻尺璧，岂复扫一室。安用簪进贤，少微斯可必。

卷 327_22 【卦名诗】

权德舆

节变忽惊春，临风骋望频。支颐倦书幌，步履整山巾。
时鸟渐成曲，杂芳随意新。曙霞连观阙，绮陌丽咸秦。
天地今交泰，云雷背遯屯。中孚谅可乐，书此示家人。

卷 327_23 【药名诗】

权德舆

七泽兰芳千里春，潇湘花落石磷磷。
有时浪白微风起，坐钓藤阴不见人。

· 全唐诗 ·

卷 327_24 【古人名诗】

权德舆

藩宣秉戎寄，衡石崇势位。年纪信不留，弛张良自愧。
樵苏则为愜，瓜李斯可畏。不顾荣官尊，每陈丰亩利。
家林类岩巘，负郭躬敛积。忌满宠生嫌，养蒙恬胜智。
疏钟皓月晓，晚景丹霞异。涧谷永不谖，山梁冀无累。
颇符生肇学，得展禽尚志。从此直不疑，支离疏世事。

卷 327_25 【州名诗寄道士】

权德舆

金兰同道义，琼简复芝田。平楚白云合，幽崖丹桂连。
松峰明爱景，石窦纳新泉。冀永南山寿，欢随万福延。

卷 327_26 【八音诗】

权德舆

金谷盛繁华，凉台列簪组。石崇留客醉，绿珠当座舞。
丝泪可销骨，冶容竟何补。竹林谅贤人，满酌无所苦。
匏居容宴豆，儒室贵环堵。土鼓与污尊，颐神则为愈。

· 全唐诗 ·

革道当在早，谦光斯可取。木雁才不才，吾知养生主。

卷 327_27【建除诗】

权德舆

建节出王都，雄雄大丈夫。除书加右职，骑吏拥前驱。
满月张繁弱，含霜耀鹿卢。平明跃骠卫，清夜击珊瑚。

定远功那比，平津策乃迂。执心思报国，效节在忘躯。
破胆销丹浦，颦蛾舞绿珠。危冠徒自爱，长轂事应殊。

成绩封千室，畴劳使五符。收功轻骠卫，致埋迈黄虞。
开济今如此，英威古不侔。闭关草玄者，无乃误为儒。

卷 327_28【七府诗】

权德舆

金罍映玉俎，宾友纷宴喜。木兰泛方塘，桂酒启皓齿。
水榭临空迥，酣歌当座起。火云散奇峰，瑶瑟韵清徵。
土梗乃虚论，康庄有逸轨。欲成一编书，谈笑佐天子。

· 全唐诗 ·

卷 327_29 【三妇诗】

权德舆

大妇刺绣文，中妇缝罗裙。小妇无所作，娇歌遏行云。

丈人且安坐，金炉香正薰。

卷 327_30 【安语】

权德舆

岩岩五岳镇方舆，八极廓清氛祲除。

挥金得谢归里闾，象床角枕支体舒。

卷 327_31 【危语】

权德舆

被病独行逢乳虎，狂风骇浪失棹橹。

举人看榜闻晓鼓，孱夫孽子遇妒母。

· 全唐诗 ·

卷 327_32【大言】

权德舆

华嵩为佩河为带，南交北朔跬步内。
搏鹏作腊巨鳌鲙，伸舒轶出元气外。

卷 327_33【小言】

权德舆

醯鸡伺晨驾蚊翼，毫端棘刺分畛域。
蛛丝结构聊荫息，蚁垤崔嵬不可陟。

· 全唐诗 ·

卷三百二十八

卷 328_1【杂诗五首】

权德舆

婉彼嬴氏女，吹箫偶萧史。彩鸾驾非烟，绰约两仙子。
神期谅交感，相顾乃如此。岂比成都人，琴心中夜起。

阳台巫山上，风雨忽清旷。朝云与游龙，变化千万状。
魂交复目断，缥缈难比况。兰泽不可亲，凝情坐惆怅。

淇水春正绿，上宫兰叶齐。光风两摇荡，鸣珮出中闺。
一顾授横波，千金呈瓠犀。徒然路傍子，怳怳复凄凄。

碧树泛鲜飏，玉琴含妙曲。佳人掩鸾镜，婉婉凝相瞩。
文桂映束素，香黛宜A绿。寂寞远怀春，何时来比目。

含颦倚瑶瑟，丹慊结繁虑。失身不自还，万恨随玉箸。
靡芜山下路，团扇秋风去。君看心断时，犹在目成处。

· 全唐诗 ·

卷 328_2【广陵诗】

权德舆

广陵实佳丽，隋季此为京。八方称辐凑，五达如砥平。
大旆映空色，笳箫发连营。层台出重霄，金碧摩颢清。
交驰流水毂，迥接浮云甍。青楼旭日映，绿野春风晴。
喷玉光照地，颺蛾价倾城。灯前互巧笑，陌上相逢迎。
飘飘翠羽薄，掩映红襦明。兰麝远不散，管弦闲自清。
曲士守文墨，达人随性情。茫茫竟同尽，冉冉将何营。
且申今日欢，莫务身后名。肯学诸儒辈，书窗误一生。

卷 328_3【古意】

权德舆

家人强进酒，酒后能忘情。持杯未饮时，众感纷已盈。
明月照我房，庭柯振秋声。空庭白露下，枕席凉风生。
所思万里馀，水阔山纵横。佳期凭梦想，未晓愁鸡鸣。
愿将一心人，当年欢乐平。长筵映玉俎，素手弹秦筝。
睇呈巧笑，惠音激凄清。此愿良未果，永怀空如醒。

· 全唐诗 ·

卷 328_4【杂言和常州李员外副使春日戏题十首】

权德舆

随风柳絮轻，映日杏花明。无奈花深处，流莺三数声。
兰桡画舸转花塘，水映风摇路渐香。
任兴不知行近远，更怜微月照鸣榔。
檐前晓色惊双燕，户外春风舞百花。
粉署可怜闲对此，唯令碧玉泛流霞。
枕上觉，窗外晓。怯朝光，惊曙鸟。花坠露，满芳沼。
柳如丝，风袅袅。佳期远，相见少。试一望，魂杳渺。
闲庭无事，独步春辉。韶光满目，落蕊盈衣。芳树交柯，
文禽并飞。婉彼君子，怅然有违。对酒不饮，横琴不挥。
不挥者何，知音诚稀。
江春好游衍，处处芳菲积。彩舫入花津，香车依柳陌。
绿杨烟袅袅，红蕊莺寂寂。如何愁思人，独与风光隔。
曙月渐到窗前，移尊更就芳筵。轻吹乍摇兰烛，
春光暗入花钿。丝竹偏宜静夜，绮罗共占韶年。
不遣通宵尽醉，定知辜负风烟。
露洗百花新，帘开月照人。绿窗销暗烛，兰径扫清尘。
双燕频惊梦，三桃竞报春。相思寂不语，珠泪洒红巾。
雨歇风轻一院香，红芳绿草接东墙。
春衣试出当轩立，定被邻家暗断肠。
春风半，春光遍。柳如丝，花似霰。归心劳梦寐，
远目伤游眊。可惜长安无限春，年年空向江南见。

· 全唐诗 ·

卷 328_5【相思曲】

权德舆

少小别潘郎，娇羞倚画堂。有时裁尺素，无事约残黄。
鹊语临妆镜，花飞落绣床。相思不解说，明月照空房。

卷 328_6【古乐府】

权德舆

风光澹荡百花吐，楼上朝朝学歌舞。身年二八婿侍中，
幼妹承恩兄尚主。绿窗珠箔绣鸳鸯，侍婢先焚百和香。
莺啼日出不知曙，寂寂罗帏春梦长。

卷 328_7【渡江秋怨二首】

权德舆

秋江平，秋月明，孤舟独夜万里情。万里情，相思远，
人不见兮泪满眼。

渡秋江兮渺然，望秋月兮婵娟。色如练，万里遍，
我有所思兮不得见。不得见兮露寒水深，耿遥夜兮伤心。

· 全唐诗 ·

卷 328_8【秋闺月】

权德舆

三五二八月如练，海上天涯应共见。不知何处玉楼前，
乍入深闺玳瑁筵。露浓香径和愁坐，风动罗帏照独眠。

初卷珠帘看不足。斜抱箜篌未成曲。稍映妆台临绮窗，
遥知不语泪双双。此时愁望知何极，万里秋天同一色。

霏霏遥分陌上光，迢迢对此闺中忆。早晚归来欢宴同，
可怜歌吹月明中。此夜不堪肠断绝，愿随流影到辽东。

卷 328_9【薄命篇】

权德舆

昔住邯郸年尚少，只是娇羞弄花鸟。青楼碧纱大道边，
绿杨日暮风袅袅。婬娟玉貌二八余，自怜颜色花不如。

丽质全胜秦氏女，藁砧宁用专城居。岁去年来年渐长，
青春红粉全堪赏。玉楼珠箔但闲居，南陌东城讵来往。

韶光日日看渐迟。漂梅既落行有时。宁知燕赵娉婷子，
翻嫁幽并游侠儿。年年结束青丝骑，出门一去何时至。

· 全唐诗 ·

秋月空悬翡翠帘，春帏懒卧鸳鸯被。沙塞经时不寄书，
深闺愁独意何如。花前拭泪情无限，月下调琴恨有余。

离别苦多相见少，洞房愁梦何由晓。闲看双燕泪霏霏，
静对空床魂悄悄。镜里红颜不自禁，陌头香骑动春心。
为问佳期早晚是，人人总解有黄金。

卷 328_10【放歌行】

权德舆

夕阳不驻东流急，荣名贵在当年立。青春虚度无所成，
白首衔悲亦何及。拂衣西笑出东山，君臣道合俄顷间。
一言一笑玉墀上，变化生涯如等闲。朱门杳杳列华戟，
座中皆是王侯客。鸣环动珮暗珊珊，骏马花骢白玉鞍。
十千斗酒不知贵，半醉留宾邀尽欢。银烛煌煌夜将久，
侍婢金罍泻春酒。春酒盛来琥珀光，暗闻兰麝几般香。
乍看皓腕映罗袖，微听清歌发杏梁。双鬟美人君不见，
一一皆胜赵飞燕。迎杯乍举石榴裙，匀粉时交合欢扇。
未央钟漏醉中闻，联骑朝天曙色分。双阙烟云遥霭霭，
五衢车马乱纷纷。罢朝鸣珮骤归鞍，今日还同昨日欢。
岁岁年年恣游宴，出门满路光辉遍。一身自乐何足言，
九族为荣真可羨。男儿称意须及时，闭门下帷人不知。
年光看逐转蓬尽，徒咏东山招隐诗。

· 全唐诗 ·

卷 328_11【旅馆雪晴，又睹新月，众兴所感，因成杂言】

权德舆

寥寥深夜雪初晴，楼上云开月渐明。池中片影依稀见，
帘外清光远近生。皎皎晴空疑破镜，广庭积素偏相映。
珠帘卷却光更深，玉指持来色逾净。梦觉青楼最可怜，
婵娟素魄满寒天。天地寥寥同一色，秦淮楚江无限极。
归鸿断猿何处声，深闺旅馆遥相忆。长安五侯华阁开，
嘉宾列坐倾金罍。赏明月，玩流雪，纤手蛾眉座中设，
清歌一声无断绝。夜已央，乐未阑。狐裘兽炭不知寒，
珠环翠珮声珊珊。履舄纷纭桂袖攒，朱颜倚醉尽君欢。
人生少年全不久，相看且劝杯中酒。丈夫富贵自有期，
映雪读书徒白首。

卷 328_12【玉台体十二首】

权德舆

鸾啼兰已红，见出凤城东。粉汗宜斜日，衣香逐上风。
情来不自觉，暗驻五花骢。

婵娟二八正娇羞，日暮相逢南陌头。
试问佳期不肯道，落花深处指青楼。

· 全唐诗 ·

隐映罗衫薄，轻盈玉腕圆。相逢不肯语，微笑画屏前。
知向辽东去，由来几许愁。破颜君莫怪，娇小不禁羞。

楼上吹箫罢，闺中刺绣阑。佳期不可见，尽日泪潺潺。
泪尽珊瑚枕，魂销玳瑁床。罗衣不忍著，羞见绣鸳鸯。

君去期花时，花时君不至。檐前双燕飞，落妾相思泪。
空闺灭烛后，罗幌独眠时。泪尽肠欲断，心知人不知。

秋风一夜至，吹尽后庭花。莫作经时别，西邻是宋家。
独自披衣坐，更深月露寒。隔帘肠欲断，争敢下阶看。

昨夜裙带解，今朝蟠子飞。铅华不可弃，莫是藁砧归。
万里行人至，深闺夜未眠。双眉灯下扫，不待镜台前。

卷 328_13【赠友人】

权德舆

知向巫山逢日暮，轻袿玉佩暂淹留。
晓随云雨归何处，还是襄王梦觉愁。

· 全唐诗 ·

卷 328_14【舟行见月】

权德舆

月入孤舟夜半晴，寥寥霜雁两三声。
洞房烛影在何处，欲寄相思梦不成。

卷 328_15【杂兴五首】

权德舆

丛鬓愁眉时势新，初笄绝代北方人。
一颦一笑千金重，肯似成都夜失身。

乍听丝声似竹声，又疑丹穴九雏惊。
金波露洗净于昼，寂寞不堪深夜情。

琥珀尊开月映帘，调弦理曲指纤纤。
含羞敛态劝君住，更奏新声刮骨盐。

乳燕双飞莺乱啼，百花如绣照深闺。
新妆对镜知无比，微笑时时出瓠犀。

巫山云雨洛川神，珠襦香腰稳称身。
惆怅妆成君不见，含情起立问傍人。

· 全唐诗 ·

卷三百二十九

卷 329_1【祗役江西路上以诗代书寄内】

权德舆

辛苦事行役，风波倦晨暮。摇摇结遐心，靡靡即长路。
别来如昨日，每见缺蟾兔。潮信催客帆，春光变江树。
宦游岂云惬，归梦无复数。愧非超旷姿，循此踟促步。
笑言思暇日，规劝多远度。鹑服我久安，荆钗君所慕。
伊予多昧理，初不涉世务。适因拥肿材，成此懒慢趣。
一身常抱病，不复理章句。胸中无町畦，与物且多忤。
既非大川楫，则守南山雾。胡为出处间，徒使名利污。
羁孤望予禄，孩稚待我哺。未能即忘怀，恨恨以此故。
终当税鞶鞶，岂待毕婚娶。如何久人寰，俯仰学举措。
衡茅去迢递，水陆两驰鹜。晰晰窥晓星，涂涂践朝露。
静闻田鹤起，远见沙鸢聚。怪石不易跻，急湍那可溯。
渔商闻远岸，烟火明古渡。下碇夜已深，上碇波不驻。
畏途信非一，离念纷难具。枕席有馀清，壶觞无与晤。
南方出兰桂，归日自分付。北窗留琴书，无乃委童孺。
春江足鱼雁，彼此勤尺素。早晚到中闺，怡然两相顾。

· 全唐诗 ·

卷 329_2【夜泊有怀】

权德舆

栖鸟向前林，暝色生寒芜。孤舟去不息，众感非一途。
川程方浩淼，离思方郁纡。转枕眼未熟，拥衾泪已濡。
寤然风水上，寝食疲朝晡。心想洞房夜，知君还向隅。

卷 329_3【自桐庐如兰溪有寄】

权德舆

东南江路旧知名，惆怅春深又独行。新妇山头云半敛，
女儿滩上月初明。风前荡飏双飞蝶，花里间关百啭莺。
满目归心何处说，欹眠搔首不胜情。

卷 329_4【相思树】

权德舆

家寄江东远，身对江西春。空见相思树，不见相思人。

· 全唐诗 ·

卷 329_5【石楠树】

权德舆

石楠红叶透帘春，忆得妆成下锦茵。

试折一枝含万恨，分明说向梦中人。

卷 329_6【斗子滩】

权德舆

斗子滩头夜已深，月华偏照此时心。

春江风水连天阔，归梦悠扬何处寻。

卷 329_7【黄 馆】

权德舆

驱车振楫越山川，候晓通宵冒烟雨。

青枫浦上魂已销，黄檗馆前心自苦。

· 全唐诗 ·

卷 329_8【清明日次弋阳】

权德舆

自叹清明在远乡，桐花覆水葛溪长。

家人定是持新火，点作孤灯照洞房。

卷 329_9【中书夜直寄赠】

权德舆

通籍在金闺，怀君百虑迷。迢迢五夜永，脉脉两心齐。

步履疲青琐，开缄倦紫泥。不堪风雨夜，转枕忆鸿妻。

卷 329_10【病中寓直代书题寄】

权德舆

愚夫何所任，多病感君深。自谓青春壮，宁知白发侵。

寝兴劳善祝，疏懒愧良箴。寂寞闻宫漏，那堪直夜心。

· 全唐诗 ·

卷 329_11【端午日礼部宿斋有衣服彩结之贶以诗还答】

权德舆

良辰当五日，偕老祝千年。彩缕同心丽，轻裾映体鲜。

寂寥斋画省，款曲擘香笺。更想传觞处，孙孩遍目前。

卷 329_12【酬九日】

权德舆

重九共游娱，秋光景气殊。他日头似雪，还对插茱萸。

卷 329_13【和九日从杨氏姊游】

权德舆

秋光风露天，令节庆初筵。易象家人吉，闺门女士贤。

招邀菊酒会，属和柳花篇。今日同心赏，全胜落帽年。

· 全唐诗 ·

卷 329_14 【上巳日贡院考杂文不遂赴九华观袂褰之会，以二绝句申赠】

权德舆

三日韶光处处新，九华仙洞七香轮。
老夫留滞何由往，珉玉相和正绕身。
褰饮寻春兴有余，深情婉婉见双鱼。
同心齐体如身到，临水烦君便袂除。

卷 329_15 【和九华观见怀贡院八韵】

权德舆

上巳好风景，仙家足芳菲。地殊兰亭会，人似山阴归。
丹灶缀珠掩，白云岩径微。真宫集女士，虚室涵春辉。
拘限心杳杳，欢言望依依。滞兹文墨职，坐与琴觞违。
丽曲涤烦虚，幽缄发清机。支颐一吟想，恨不双翻飞。

卷 329_16 【桃源篇】

权德舆

小年尝读桃源记，忽睹良工施绘事。岩径初欣缭绕通，

· 全唐诗 ·

溪风转觉芬芳异。一路鲜云杂彩霞，渔舟远远逐桃花。
渐入空濛迷鸟道，宁知掩映有人家。庞眉秀骨争迎客，
凿井耕田人世隔。不知汉代有衣冠，犹说秦家变阡陌。
石髓云英甘且香，仙翁留饭出青囊。相逢自是松乔侣，
良会应殊刘阮郎。内子闲吟倚瑶瑟，玩此沈沈销永日。
忽闻丽曲金玉声，便使老夫思阁笔。

卷 329_17【新月与儿女夜坐听琴举酒】

权德舆

泥泥露凝叶，骚骚风入林。以兹皓月圆，不厌良夜深。
列坐屏轻箴，放怀弦素琴。儿女各冠笄，孙孩绕衣襟。

乃知大隐趣，宛若沧洲心。方结偕老期，岂惮华发侵。
笑语向兰室，风流传玉音。愧君袖中字，价重双南金。

卷 329_18【七夕】

权德舆

今日云輶渡鹊桥，应非脉脉与迢迢。
家人竞喜开妆镜，月下穿针拜九霄。

· 全唐诗 ·

卷 329_19【县君赴兴庆宫朝贺载之奉行册礼，因书即事】

权德舆

合卺交欢二十年，今朝比翼共朝天。风传漏刻香车度，
日照旌旗彩仗鲜。顾我华簪鸣玉珮，看君盛服耀金钿。
相期偕老宜家处，鹤发鱼轩更可怜。

卷 329_20【元和元年，蒙恩封成纪县伯，时室中封安喜县君，感庆兼怀，聊申贺赠】

权德舆

启土封成纪，宜家县安喜。同欣井赋开，共受闺门祉。
珎璜联采组，琴瑟谐宫徵。更待悬车时，与君欢暮齿。

卷 329_21【河南崔尹即安喜从兄宜于室家四十余岁，一昨寓书病传永写告身，既往善祝，因成绝句】

权德舆

五色金光鸾凤飞，三川墨妙巧相辉。
尊崇善祝今如此，共待曾玄捧翟衣。

· 全唐诗 ·

卷 329_22【奉使丰陵职司卤簿，通宵涉路，因寄内】

权德舆

彩仗列森森，行宫夜漏深。受钲方启路，钲鼓正交音。
曙月思兰室，前山辨谷林。家人念行役，应见此时心。

卷 329_23【酬南园新亭宴会璩新第慰庆之作，时任宾客】

权德舆

南宫烟景浓，平视中南峰。官闲似休沐，尽室来相从。
日抱汉阴瓮，或成蝴蝶梦。树老欲连云，竹深疑入洞。
欢言交羽觞，列坐俨成行。歌吟不能去，待此明月光。
好逑蕴明识，内顾多惭色。不厌梁鸿贫，常讥伯宗直。
予媚信时英，谏垣金玉声。男儿才弱冠，射策幸成名。
偃放斯自足，翛然去营欲。散木固无堪，虚舟常任触。
大隐本吾心，喜君流好音。相期悬车岁，此地即中林。

卷 329_24【七夕见与诸孙题乞巧文】

权德舆

外孙争乞巧，内子共题文。隐映花奁对，参差绮席分。
鹊桥临片月，河鼓掩轻云。羨此婴儿辈，吹呼彻曙闻。

· 全唐诗 ·

卷 329_25 【太常寺宿斋有寄】

权德舆

转枕挑灯候晓鸡，相君应叹太常妻。

长年多病偏相忆，不遣归时醉似泥。

卷 329_26 【朝回阅乐寄绝句】

权德舆

子城风暖百花初，楼上龟兹引导车。

曲罢卿卿理驺驭，细君相望意何如。

卷 329_27 【中书宿斋有寄】

权德舆

铜壶漏滴斗阑干，泛滟金波照露盘。

遥想洞房眠正熟，不堪深夜凤池寒。

· 全唐诗 ·

卷 329_28 【中书送敕赐斋饌戏酬】

权德舆

常日每齐眉，今朝共解颐。遥知大官膳，应与众维嬉。

卷 329_29 【敕赐长寿酒因口号以赠】

权德舆

恩沾长寿酒，归遗同心人。满酌共君醉，一杯千万春。

卷 329_30 【湖南观察使故相国袁公挽歌二首】

权德舆

五驱龙虎节，一入凤凰池。令尹自无喜，羊公人不疑。
天归京兆日，叶下洞庭时。湘水秋风至，凄凉吹素旗。

丹旌发江皋，人悲雁亦号。湘南罢亥市，汉上改词曹。
表墓双碑立，尊名一字褒。常闻平楚狱，为报里门高。

· 全唐诗 ·

卷 329_31 【玉山岭上作】

权德舆

悠悠驱匹马，征路上连冈。晚翠深云窦，寒苔净石梁。
荻花偏似雪，枫叶不禁霜。愁见前程远，空郊下夕阳。

卷 329_32 【题邵端公林亭】

权德舆

春光何处好，柱史有林塘。莺啭风初暖，花开日欲长。
凿池通野水，扫径阅新芳。更置盈尊酒，时时醉楚狂。

卷 329_33 【酬裴杰秀才新樱桃】

权德舆

新果真琼液，来应宴紫兰。圆疑窃龙颌，色已夺鸡冠。
远火微微辨，残星隐隐看。茂先知味易，曼倩恨偷难。
忍用烹騂骆，从将玩玉盘。流年如可驻，何必九华丹。

· 全唐诗 ·

卷 329_34【次滕老庄】

权德舆

征途无旅馆，当昼喜逢君。羸病仍留客，朝朝扫白云。

卷 329_35【宿严陵】

权德舆

身羁从事驱征传，江入新安泛暮涛。

今夜子陵滩下泊，自惭相去九牛毛。

卷 329_36【题云师山房】

权德舆

云公兰若深山里，月明松殿微风起。

试问空门清净心，莲花不著秋潭水。

· 全唐诗 ·

卷 329_37【栖霞寺云居室】

权德舆

一径萦纡至此穷，山僧盥漱白云中。

闲吟定后更何事，石上松枝常有风。

卷 329_38【舟行夜泊】

权德舆

萧萧落叶送残秋，寂寞寒波急暝流。

今夜不知何处泊，断猿晴月引孤舟。

卷 329_39【发硖石路上却寄内】

权德舆

莎栅东行五谷深，千峰万壑雨沈沈。

细君几日路经此，应见悲翁相望心。

· 全唐诗 ·

卷 329_40 【冬至宿斋时郡君南内朝谒因寄】

权德舆

清斋独向丘园拜，盛服想君兴庆朝。
明日一阳生百福，不辞相望阻寒宵。

卷 329_41 【和河南罗主簿送校书兄归江南】

权德舆

兄弟泣殊方，天涯指故乡。断云无定处，归雁不成行。
草莽人烟少，风波水驿长。上虞亲渤解，东楚隔潇湘。

古戍阴传火，寒芜晓带霜。海门潮滟滟，沙岸荻苍苍。
京辇辞芸阁，衡方忆草堂。知君始宁隐，还缉旧荷裳。

卷 329_42 【与故人夜坐道旧】

权德舆

笑语欢今夕，烟霞忆昔游。清羸还对月，迟暮更逢秋。
胜理方自得，浮名不在求。终当制初服，相与卧林丘。

· 全唐诗 ·

卷 329_43【句】

权德舆

耒水波纹细，湘江竹叶轻。
古时楼上清明夜，月照楼前撩乱花。今日成阴复成子，
可怜春尽未归家。
新妇矶头云半敛，女儿滩畔月初明。
回合千峰里，晴光似画图。
征车随反照，候吏映白云。

· 全唐诗 ·

卷三百三十

卷 330_1 【奉酬礼部阁老转韵离合见赠】

张荐

移居既同里，多幸陪君子。弘雅重当朝，弓旌早见招。
植根琼林圃，直夜金闺步。劝深子玉铭，力竞相如赋。
间阔向春闱，日复想光仪。格言信难继，木石强为词。

卷 330_2 【和潘孟阳春日雪回文绝句】

张荐

迟迟日气暖，漫漫雪天春。知君欲醉饮，思见此交亲。

卷 330_3 【享文恭太子庙乐章】

张荐

三献具举，九旗将旋。追劳表德，罢享宾天。

· 全唐诗 ·

风引仙管，堂虚画筵。芳馨常在，瞻望悠然。

卷 330_4【礼部权侍郎阁老史馆张秘监阁老有离合酬赠之什，宿直吟玩，聊继此章】

崔邠

脉脉羨佳期，月夜吟丽词。谏垣则随步，东观方承顾。
林雪消艳阳，简册漏华光。坐更芝兰室，千载各芬芳。
节苦文俱盛，即时人并命。翩翻紫霄中，羽翮相辉映。

卷 330_5【享文恭太子庙乐章】

崔邠

醴齐泛樽彝，轩县动干戚。入室僊如在，升阶虔所历。
奋疾合威容，定利舒曠泽。方崇庙貌礼，永被君恩锡。

卷 330_6【和权载之离合诗】

杨於陵

校德尽珪璋，才臣时所扬。放情寄文律，方茂经邦术。
王猷符发挥，十载契心期。昼游有嘉话，书法无隐辞。

· 全唐诗 ·

信兹酬和美，言与芝兰比。昨来恣吟绎，日觉祛蒙鄙。

卷 330_7【郡斋有紫薇双本，自朱明接于徂暑，其花芳馥，数旬犹茂，庭宇之内迥无其伦，予嘉其美而能久，因诗纪述】

杨於陵

晏朝受明命，继夏走天衢。逮兹三伏候，息驾万里途。
省躬既踟蹰，结思多烦纡。簿领幸无事，宴休谁与娱。
内斋有嘉树，双植分庭隅。绿叶下成幄，紫花纷若铺。
摘霞晚舒艳，凝露朝垂珠。炎沴昼方铄，幽姿闲且都。
夭桃固难匹，芍药宁为徒。懿此时节久，讵同光景驱。
陶甄试一致，品汇乃散殊。濯质非受彩，无心那夺朱。
粤予负羁縻，留赏益踟蹰。通夕靡云倦，西南山月孤。

卷 330_8【赠毛仙翁】

杨於陵

先生赤松侣，混俗游人间。昆阆无穷路，何时下故山。
千年犹孺质，秘术救尘寰。莫便冲天去，云雷不可攀。

· 全唐诗 ·

卷 330_9【答权载之离合诗】

许孟容

史才司秘府，文哲今超古。亦有擅风骚，七联文墨曹。
圣贤三代意，工艺千金字。化识从臣谣，人推仙阁吏。
如登昆阆时，口诵灵真词。孙简下威凤，系霜琼玉枝。

卷 330_10【奉和武相公春晓闻莺】

许孟容

碧树当窗啼晓莺，间关入梦听难成。
千回万啭尽愁思，疑是血魂哀困声。

卷 330_11【享文恭太子庙乐章】

许孟容

觴牢具品，管弦有节。祝道寅恭，神仪昭晰。
桐珪早贵，象辂追设。磬达乐成，降歆丰洁。

· 全唐诗 ·

卷 330_12【和权载之离合诗】

冯伉

车马退朝后，聿怀在文友。动词宗伯雄，重美良史功。
亦曾吟鲍谢，二妙尤增价。雨霜鸿唳天，匝树鸟鸣夜。
覃思各纵横，早擅希代名。息心欲焚砚，自覩陪群英。

卷 330_13【享文恭太子庙乐章二首】

冯伉

撰日瞻景，诚陈乐张。礼容秩秩，羽舞煌煌。
肃将涤濯，祇荐芬芳。永锡繁祉，思深享尝。
干旄羽籥相亏蔽，一进一退殊行缀。
昔献三雍盛礼容，今陈七佾崇仪制。

卷 330_14【和权载之离合诗】

潘孟阳

咏歌有离合，永夜观酬答。笥中操彩笺，竹简何足编。
意深俱妙绝，心契交情结。计彼官接联，言初并清切。
翔集本相随，羽仪良在斯。烟云竞文藻，因喜玩新诗。

· 全唐诗 ·

卷 330_15【春日雪以回文绝句呈张荐权德舆】

潘孟阳

春梅杂落雪，发树几花开。真须尽兴饮，仁里愿同来。

卷 330_16【元日和布泽】

潘孟阳

至德生成泰，咸欢照育恩。流辉沾万物，布泽在三元。
北阙祥云迥，东方嘉气繁。青阳初应律，苍玉正临轩。
恩洽因时令，风和比化原。自惭同草木，无以答乾坤。

卷 330_17【和权载之离合诗】

武少仪

少年慕时彦，小悟文多变。木铎比群英，八方流德声。
雷陈美交契，雨雪音尘继。恩顾各飞翔，因诗睹瑰丽。
傅野绝遗贤，人希有盛迁。早钦风与雅，日咏赠酬篇。

· 全唐诗 ·

卷 330_18 【诸葛丞相庙】

武少仪

执简焚香入庙门，武侯神象俨如存。
因机定蜀延衰汉，以计连吴振弱孙。
欲尽智能倾僭盗，善持忠节转庸昏。
宣王请战贻巾帼，始见才吞亦气吞。

· 全唐诗 ·

卷三百三十一

卷 331_1【享太庙乐章】

段文昌

肃肃清庙，登显至德。泽周八荒，兵定四极。
生物咸遂，群盗灭息。明圣钦承，子孙千亿。

卷 331_2【题武担寺西台】

段文昌

秋天如镜空，楼阁尽玲珑。水暗馀霞外，山明落照中。
鸟行看渐远，松韵听难穷。今日登临意，多欢语笑同。

卷 331_3【晚夏登张仪楼呈院中诸公】

段文昌

重楼窗户开，四望敛烟埃。远岫林端出，清波城下回。

· 全唐诗 ·

乍疑蝉韵促，稍觉雪风来。并起乡关思，销忧在酒杯。

卷 331_4【还别业寻龙华山寺广宣上人】

段文昌

十里惟闻松桂风，江山忽转见龙宫。
正与休师方话旧，风烟几度入楼中。

卷 331_5【奉陪段相公晚夏登张仪楼】

姚向

秦相驾群材，登临契上台。查从银汉落，江自雪山来。
俚曲亲流火，凌风洽小杯。帝乡如在目，欲下尽裴回。

卷 331_6【和段相公登武担寺西台】

姚向

开阁锦城中，馀闲访梵宫。九层连昼景，万象写秋空。
天半将身到，江长与海通。提携出尘土，曾是穆清风。

· 全唐诗 ·

卷 331_7【和段相公登武担寺西台】

温会

桑台烟树中，台榭造云空。眺听逢秋兴，篇辞变国风。
坐愁高鸟起，笑指远人同。始愧才情薄，跻攀继韵穷。

卷 331_8【奉陪段相公晚夏登张仪楼】

温会

危轩重叠开，访古上裴回。有舌嗟秦策，飞梁驾楚材。
云霄随凤到，物象为诗来。欲和关山意，巴歌调更哀。

卷 331_9【和段相公登武担寺西台】

李敬伯

台上起凉风，乘闲览岁功。自随台席贵，尽许羽觞同。
楼殿斜晖照，江山极望通。赋诗思共乐，俱得咏诗丰。

· 全唐诗 ·

卷 331_10 【奉陪段相公晚夏登张仪楼】

李敬伯

层屋架城隈，宾筵此日开。文锋摧八阵，星分应三台。

望雪烦襟释，当欢远思来。披云霄汉近，暂觉出尘埃。

卷 331_11 【奉陪段相公晚夏登张仪楼】

姚康

登览值晴开，诗从野思来。蜀川新草木，秦日旧楼台。

池景摇中座，山光接上台。近秋宜晚景，极目断浮埃。

卷 331_12 【和段相公登武担寺西台】

姚康

松径引清风，登台古寺中。江平沙岸白，日下锦川红。

疏树山根净，深云鸟迹穷。自惭陪末席，便与九霄通。

· 全唐诗 ·

卷 331_13 【礼部试早春残雪】

姚康

微暖春潜至，轻明雪尚残。银铺光渐湿，珪破色仍寒。
无柳花常在，非秋露正团。素光浮转薄，皓质驻应难。
幸得依阴处，偏宜带月看。玉尘销欲尽，穷巷起袁安。

卷 331_14 【赋得巨鱼纵大壑】

姚康

水府乘闲望，圆波息跃鱼。从来暴泥久，今日脱泉初。
得志宁相忌，无心任宛如。龙门应可度，鲛室岂常居。
掉尾方穷乐，游鳞每自舒。乘流千里去，风力藉吹嘘。

· 全唐诗 ·

卷三百三十二

卷 332_1【早春对雨】

羊士谔

南馆垂杨早，东风细雨频。轻寒消玉笋，幽赏滞朱轮。
千里巴江守，三年故国春。含情非迟客，悬榻但生尘。

卷 332_2【永宁小园即事】

羊士谔

萧条梧竹下，秋物映园庐。宿雨方然桂，朝饥更摘蔬。
阴苔生白石，时菊覆清渠。陈力当何事，忘言愧道书。

卷 332_3【台中遇直，晨览萧侍御壁画山水】

羊士谔

虫思庭莎白露天，微风吹竹晓凄然。

· 全唐诗 ·

今来始悟朝回客，暗写归心向石泉。

卷 332_4【过三乡望女几山，早岁有卜筑之志】

羊士谔

女几山头春雪消，路傍仙杏发柔条。
心期欲去知何日，惆怅回车上野桥。

卷 332_5【和李都官郎中经宫人斜】

羊士谔

翡翠无穷掩夜泉，犹疑一半作神仙。
秋来还照长门月，珠露寒花是野田。

卷 332_6【山阁闻笛】

羊士谔

临风玉管吹参差，山坞春深日又迟。
李白桃红满城郭，马融闲卧望京师。

· 全唐诗 ·

卷 332_7【登楼】

羊士谔

槐柳萧疏绕郡城，夜添山雨作江声。
秋风南陌无车马，独上高楼故国情。

卷 332_8【忆江南旧游二首】

羊士谔

山阴道上桂花初，王谢风流满晋书。
曾作江南步从事，秋来还复忆鲈鱼。

曲水三春弄彩毫，樟亭八月又观涛。
金罍几醉乌程酒，鹤舫闲吟把蟹螯。

卷 332_9【郡中即事三首】

羊士谔

晓风山郭雁飞初，霜拂回塘水榭虚。鼓角清明如战垒，
梧桐摇落似贫居。青门远忆中人产，白首闲看太史书。
城下秋江寒见底，宾筵莫讶食无鱼。

· 全唐诗 ·

卷 332_10【郡中即事三首】

羊士谔

红衣落尽暗香残，叶上秋光白露寒。
越女含情已无限，莫教长袖倚阑干。

卷 332_11【郡中即事三首】

羊士谔

登临何事见琼枝，白露黄花自绕篱。
惟有楼中好山色，稻畦残水入秋池。

卷 332_12【野望二首】

羊士谔

萋萋麦陇杏花风，好是行春野望中。
日暮不辞停五马，鸳鸯飞去绿江空。

望怀不使海鸥疑，水映桃花酒满卮。
亭上一声歌白苧，野人归棹亦行迟。

· 全唐诗 ·

卷 332_13【游西山兰若】

羊士谔

路傍垂柳古今情，春草春泉咽又生。
借问山僧好风景，看花携酒几人行。

卷 332_14【泛舟入后溪】

羊士谔

东风朝日破轻岚，仙棹初移酒未酣。
玉笛闲吹折杨柳，春风无事傍鱼潭。

雨余芳草净沙尘，水绿滩平一带春。
唯有啼鹃似留客，桃花深处更无人。

卷 332_15【看花】

羊士谔

一到花间一忘归，玉杯瑶瑟减光辉。
歌筵更覆青油幕，忽似朝云瑞雪飞。

· 全唐诗 ·

卷 332_16 【春望】

羊士谔

莫问华簪发已斑，归心满目是青山。

独上层城倚危槛，柳营春尽马嘶闲。

卷 332_17 【寄江陵韩少尹】

羊士谔

别来玄鬓共成霜，云起无心出帝乡。

蜀国鱼笺数行字，忆君秋梦过南塘。

卷 332_18 【贺州宴行营回将】

羊士谔

九剑盈庭酒满卮，戍人归日及瓜时。

元戎静镇无边事，遣向营中偃画旗。

· 全唐诗 ·

卷 332_19 【游郭驸马大安山池】

羊士谔

马嘶芳草自淹留，别馆何人属细侯。仙杏破颜逢醉客，
彩鸳飞去避行舟。洞箫日暖移宾榻，垂柳风多掩妓楼。
坐阅清晖不知暮，烟横北渚水悠悠。

卷 332_20 【故萧尚书瘿柏斋前玉蕊树，与王起居吏部孟员外同赏】

羊士谔

柏寝闭何时，瑶华自满枝。天清凝积素，风暖动芬丝。
留步苍苔暗，停觞白日迟。因吟茂陵草，幽赏待妍词。

卷 332_21 【和武相早朝中书候传点书怀奉呈】

羊士谔

殿省秘清晓，夔龙升紫微。星辰拱帝座，剑履翊天机。
耿耿金波缺，沉沉玉漏稀。彩笺蹲鸖兽，画扇列名辈。
志业丹青重，恩华雨露霏。三台昭建极，一德庆垂衣。
昌运瞻文教，雄图本武威。殊勋如带远，佳气似烟非。
抗节衷无隐，同心尚弼违。良哉致君日，维岳有光辉。

· 全唐诗 ·

卷 332_22【和萧侍御监祭白帝城西村寺，斋沐览镜，有怀吏部孟员外并见赠】

羊士谔

晚沐金仙宇，迎秋白帝祠。轩裳烦吏职，风物动心期。

清镜开尘匣，华簪指发丝。南宫有高步，岁晏岂磷缁。

卷 332_23【送张郎中副使自南省赴凤翔府幕】

羊士谔

仙郎佐氏谋，廷议宠元侯。城郭须来贡，河隍亦顺流。

亚夫高垒静，充国大田秋。当奋燕然笔，铭功向陇头。

卷 332_24【和窦吏部雪中寓直】

羊士谔

瑞花飘朔雪，灏气满南宫。迢递层城掩，徘徊午夜中。

金闺通籍恨，银烛直庐空。谁问乌台客，家山忆桂丛。

· 全唐诗 ·

卷 332_25 【小园春至偶呈吏部窦郎中】

羊士谔

松筱虽苦节，冰霜惨其间。欣然发佳色，如喜东风还。
幽抱想前躅，冥鸿度南山。春台一以眺，达士亦解颜。
偃息非老圃，沉吟闕玄关。驰晖忽复失，壮气不得闲。
君子当济物，丹梯谁共攀。心期自有约，去扫苍苔斑。

卷 332_26 【酬吏部窦郎中直夜见寄】

羊士谔

解巾侍云陛，三命早为郎。复以雕龙彩，旋归振鹭行。
玉书期养素，金印已怀黄。兹夕南宫咏，遐情愧不忘。

卷 332_27 【永宁里园亭休沐怅然成咏】

羊士谔

云景含初夏，休归曲陌深。幽帘宜永日，珍树始清阴。
迟客唯长簟，忘言有匣琴。画披灵物态，书见古人心。
芳草多留步，鲜飙自满襟。芳形非立事，潇洒愧头簪。

· 全唐诗 ·

卷 332_28 【登乐游原寄司封孟郎中卢补阙】

羊士谔

爽节时清眺，秋怀怅独过。神皋值宿雨，曲水已增波。
白鸟凌风迥，红蕖濯露多。伊川有归思，君子复如何。

卷 332_29 【乾元初，严黄门自京兆少尹贬牧巴郡，以长才英气，固多暇日，每游郡之东山，山侧精舍，有盘石细泉，疏为浮杯之胜，苔深树老，苍然遗躅，士谔因出守，得继兹赏，乃赋诗十四韵，刻于石壁】

羊士谔

石座双峰古，云泉九曲深。寂寥疏凿意，芜没岁时侵。
绕席流还壅，浮杯咽复沉。追怀王谢侣，更似会稽岑。
谁谓天池翼，相期宅畔吟。光辉轻尺璧，然诺重黄金。
几醉东山妓，长悬北阙心。蕙兰留杂佩，桃李想华簪。
闭阁余何事，鸣驺亦屡寻。轩裳遵往辙，风景憩中林。
横吹多凄调，安歌送好音。初筵方侧弁，故老忽沾襟。
盛世当弘济，平生谅所钦。无能愧陈力，惆怅拂瑶琴。

· 全唐诗 ·

卷 332_30【闲斋示一二道者】

羊士谔

幽兰谁复奏，闲匣以端忧。知止惭先觉，归欤想故侯。
山蝉铃阁晚，江雨麦田秋。唯有空门学，相期老一丘。

卷 332_31【南池荷花】

羊士谔

蝉噪城沟水，芙蓉忽已繁。红花迷越艳，芳意过湘沅。
湛露宜清暑，披香正满轩。朝朝只自赏，秣李亦何言。

卷 332_32【郡中玩月，寄江南李少尹虞部孟员外三首】

羊士谔

月满自高丘，江通无狭流。轩窗开到晓，风物坐含秋。
鹊警银河断，蛩悲翠幕幽。清光望不极，耿耿下西楼。

桂华临洛浦，如挹李膺仙。兹夕披云望，还吟掷地篇。
凤池分直夜，牛渚泛舟年。会是风流赏，惟君内史贤。

· 全唐诗 ·

圆景旷佳宾，徘徊夜漏频。金波徒泛酒，瑶瑟已生尘。
露白移长簟，风清挂幅巾。西园旧才子，想见洛阳人。

卷 332_33【城隍庙赛雨二首】

羊士谔

零雨慰斯人，斋心荐绿蘋。山风箫鼓响，如祭敬亭神。
积润通千里，推诚尊一卮。回飙经画壁，忽似偃云旗。

卷 332_34【郡楼晴望二首】

羊士谔

霁色朝云尽，亭皋露亦晞。褰开临曲槛，萧瑟换轻衣。
地远秦人望，天晴社燕飞。无功惭岁晚，唯念故山归。
一雨晴山郭，惊秋碧树风。兰卮谁与荐，玉旆自无惊。
云景嘶宾雁，岚阴露彩虹。闲吟懒闭阁，旦夕郡楼中。

卷 332_35【初移琪树】

羊士谔

爱此丘中物，烟霜尽日看。无穷碧云意，更助绿窗寒。

· 全唐诗 ·

卷 332_36【燕居】

羊士谔

秋斋膏沐暇，旭日照轩墀。露重芭蕉叶，香凝橘柚枝。

简书随吏散，宝骑与僧期。报国得何力，流年已觉衰。

卷 332_37【寄黔府窦中丞】

羊士谔

汉臣旌节贵，万里护牂牁。夏月天无暑，秋风水不波。

朝衣蟠艾绶，戎幕偃雕戈。满岁归龙阙，良哉伫作歌。

卷 332_38【书楼怀古】

羊士谔

何独文翁化，风流与代深。泉云无旧辙，骚雅有遗音。

远目穷巴汉，闲情阅古今。忘言意不极，日暮但横琴。

· 全唐诗 ·

卷 332_39【九月十日郡楼独酌】

羊士谔

掾史当授衣，郡中稀物役。嘉辰怅已失，残菊谁为惜。
棂轩一尊泛，天景洞虚碧。暮节独赏心，寒江鸣湍石。
归期北州里，旧友东山客。飘荡云海深，相思桂花白。

卷 332_40【暮秋言怀】

羊士谔

城隅凝彩画，红树带青山。迟客金尊晚，谈空玉柄闲。
驰晖三峡水，旅梦百劳关。非是淮阳薄，丘中只望还。

卷 332_41【题枇杷树】

羊士谔

珍树寒始花，氛氲九秋月。佳期若有待，芳意常无绝。
袅袅碧海风，濛濛绿枝雪。急景自馀妍，春禽幸流悦。

· 全唐诗 ·

卷 332_42 【上元日紫极宫门观州民然灯张乐】

羊士谔

山郭通衢隘，瑶坛紫府深。灯花助春意，舞绶织欢心。
闲似淮阳卧，恭闻乐职吟。唯将圣明化，聊以达飞沉。

卷 332_43 【西郊兰若】

羊士谔

云天宜北户，塔庙似西方。林下僧无事，江清日复长。
石泉盈掬冷，山实满枝香。寂寞传心印，玄言亦已忘。

卷 332_44 【在郡三年，今秋见白发，聊以书事】

羊士谔

二毛非骑省，朝镜忽秋风。丝缕寒衣上，霜华旧简中。
承明那足厌，车服愧无功。日日山城守，淹留岩桂丛。

· 全唐诗 ·

卷 332_45【郡中端居，有怀袁州王员外使君】

羊士谔

忆作同门友，承明奉直庐。禁闱人自异，休浣迹非疏。
珥笔金华殿，三朝玉玺书。恩光荣侍从，文彩应符徐。
青眼真知我，玄谈愧起予。兰卮招促膝，松砌引长裾。
丽日流莺早，凉天坠露初。前山临紫阁，曲水眺红蕖。
谁为音尘旷，俄惊岁月除。风波移故辙，符守忽离居。
济物阴功在，分忧盛业余。弱翁方大用，延首迟双鱼。

卷 332_46【山寺题壁】

羊士谔

物外真何事，幽廊步不穷。一灯心法在，三世影堂空。
山果青苔上，寒蝉落叶中。归来还闭阁，棠树几秋风。

卷 332_47【暇日适值澄霁江亭游宴】

羊士谔

碧落风如洗，清光镜不分。弦歌方对酒，山谷尽无云。
振卧淮阳病，悲秋宋玉文。今来强携妓，醉舞石榴裙。

· 全唐诗 ·

卷 332_48 【玩槿花】

羊士谔

何乃诗人兴，妍词属舜华。风流感异代，窈窕比同车。
凝艳垂清露，惊秋隔绛纱。蝉鸣复虫思，惆怅竹阴斜。

卷 332_49 【郡斋读经】

羊士谔

壮龄非济物，柔翰误为儒。及此斋心暇，翛然与道俱。
散材诚独善，正觉岂无徒。半偈莲生水，幽香桂满炉。
息阴惭蔽芾，讲义得醍醐。迹似桃源客，身纓竹使符。
华夷参吏事，巴汉混州图。偃草怀君子，移风念嗇夫。
翳桑俄有绩，宿麦复盈租。圆寂期超诣，凋残幸已苏。
解空囊不智，灭景谷何愚。几日遵归辙，东菑殆欲芜。

卷 332_50 【州民自言巴土冬湿，且多阴晦，今兹晴朗，苦寒霜颇甚，故老咸异之，因示僚吏】

羊士谔

雨霜以成岁，看旧感前闻。爱景随朝日，凝阴积暮云。

· 全唐诗 ·

，忘言酒暂醺。 ， 。

卷 332_51 【斋中有兽皮茵偶成咏】

羊士谔

逸才岂凡兽，服猛愚人得。山泽生异姿，蒙戎蔚佳色。
青毡持与藉，重锦裁为饰。卧阁幸相宜，温然承宴息。

卷 332_52 【野夫采鞭于东山偶得元者】

羊士谔

追风岂无策，持斧有遐想。凤去留孤根，岩悬非朽壤。
苔斑自天生，玉节垂云长。勿谓山之幽，丹梯亦可上。

卷 332_53 【守郡累年俄及知命聊以言志】

羊士谔

南国疑逋客，东山作老夫。登朝非大隐，出谷是真愚。
气直惭龙剑，心清爱玉壶。聊持循吏传，早晚 为徒。

· 全唐诗 ·

卷 332_54【东渡早梅一树，岁华如雪，酣赏成咏】

羊士谔

暇日留 事，期云亦 开。乡心持岁酒，津下赏山梅。
晚实和商鼎，浓香拂寿杯。唯应招北客，日日踏青来。

卷 332_55【题郡南山光福寺，寺即严黄门所置，时自给事中京兆少尹出守，年三十性乐山水，故老云每旬数至，后分阃川，州门有去思碑，即郗拾遗之词也】

羊士谔

传闻黄阁守，兹地赋长沙。少壮称时杰，功名惜岁华。
岩廊初建刹，宾从亟鸣笳。玉帐空严道，甘棠见野花。
碑残犹堕泪，城古自归鸦。籍籍清风在，怀人谅不遐。

卷 332_56【雨中寒食】

羊士谔

令节逢烟雨，园亭但掩关。佳人宿妆薄，芳树彩绳闲。
归思偏消酒，春寒为近山。花枝不可见，别恨灞陵间。

· 全唐诗 ·

卷 332_57【晚夏郡中卧疾】

羊士谔

事外心如寄，虚斋卧更幽。微风生白羽，畏日隔青油。
用拙怀归去，沉痾畏借留。东山自有计，蓬鬓莫先秋。

卷 332_58【酬卢司门晚夏过永宁里弊居林亭见寄】

羊士谔

自叹淮阳卧，谁知去国心。幽亭来北户，高韵得南金。
苔甃窥泉少，篮舆爱竹深。风蝉一清暑，应喜脱朝簪。

卷 332_59【山郭风雨朝霁怅然秋思】

羊士谔

桐竹离披晓，凉风似故园。惊秋对旭日，感物坐前轩。
江燕飞还尽，山榴落尚繁。平生信有意，衰久已忘言。

· 全唐诗 ·

卷 332_60【南馆林塘】

羊士谔

郡阁山斜对，风烟隔短墙。清池如写月，珍树尽凌霜。
行乐知无闷，加餐颇自强。心期空岁晚，鱼意久相忘。

卷 332_61【腊夜对酒】

羊士谔

琥珀杯中物，琼枝席上人。乐声方助醉，烛影已含春。
自顾行将老，何辞坐达晨。传觞称厚德，不问吐车茵。

卷 332_62【池上构小山咏怀】

羊士谔

玉立出岩石，风清曲。偶成聊近意，静对想凝神。
牛渚中流月，兰亭上道春。古来心可见，寂寞为斯人。

· 全唐诗 ·

卷 332_63 【林塘腊候】

羊士谔

南国冰霜晚，年华已暗归。闲招别馆客，远念故山薇。
野艇虚还触，笼禽倦更飞。忘言亦何事，酣赏步清辉。

卷 332_64 【酬礼部崔员外备独永宁里弊居见寄来诗云图书
锁尘阁，符节守山城】

羊士谔

守土亲巴俗，腰章 汉仪。春行乐职咏，秋感伴牢词。
旧里藏旧阁，闲门闭槿篱。遥惭退朝客，下马独相思。

卷 332_65 【梁国惠康公主挽歌词二首】

羊士谔

汤沐成陈迹，山林遂寂寥。鹄飞应织素，凤起独吹箫。
玉殿中参罢，云輶上汉遥。皇情非不极，空辍未央朝。

授册荣天使，陈诗感圣恩。山河启梁国，缟素及于门。
泉向金卮咽，霜来玉树繁。都人听哀挽，泪尽望寒原。

· 全唐诗 ·

卷 332_66【南池晨望】

羊士谔

起来林上月，潇洒故人情。铃阁人何事，莲塘晓独行。
衣沾竹露爽，茶对石泉清。鼓吹前贤薄，群蛙试一鸣。

卷 332_67【林馆避暑】

羊士谔

池岛清阴里，无人泛酒船。山蛭金奏响，荷露水精圆。
静胜朝还暮，幽观白已玄。家林正如此，何事赋归田。

卷 332_68【巴南郡斋雨中，偶看长历，是日小雪，有怀昔年朝谒，因成八韵】

羊士谔

夷落朝云候，王正小雪辰。缅怀朝紫陌，曾是洒朱轮。
气耿簪裾肃，风严刻漏频。暗飞金马仗，寒舞玉京尘。

豸角随中宪，龙池列近臣。蕊珠凝瑞彩，悬圃净华茵。
帝泽千箱庆，天颜万物春。明廷犹咫尺，高咏愧巴人。

· 全唐诗 ·

卷 332_69【褒城驿池塘玩月】

羊士谔

夜长秋始半，圆景丽银河。北渚清光溢，西山爽气多。

鹤飞闻坠露，鱼戏见增波。千里家林望，凉飙换绿萝。

卷 332_70【资阳郡中咏怀】

羊士谔

腰章非达士，闭阁是潜夫。匣剑宁求试，笼禽但自拘。

江清牛渚镇，酒熟步兵厨。唯此前贤意，风流似不孤。

卷 332_71【寒食宴城北山池，即故郡守荣阳郑钢目为折柳亭】

羊士谔

别馆青山郭，游人折柳行。落花经上巳，细雨带清明。

鶗鴂流芳暗，鸳鸯曲水平。归心何处醉，宝瑟有余声。

· 全唐诗 ·

卷 332_72【酬彭州萧使君秋中言怀】

羊士谔

右职移青绶，雄藩拜紫泥。江回玉垒下，气爽锦城西。

皋鹤惊秋律，琴乌怨夜啼。离居同舍念，宿昔奉金闺。

卷 332_73【资中早春】

羊士谔

一雨东风晚，山莺独报春。淹留巫峡梦，惆怅洛阳人。

柳意笼丹槛，梅香覆锦茵。年华行可惜，瑶瑟莫生尘。

卷 332_74【郡楼怀长安亲友】

羊士谔

残暑三巴地，沉阴八月天。气昏高阁雨，梦倦下帘眠。

愁鬓华簪小，归心社燕前。相思杜陵野，沟水独潺湲。

· 全唐诗 ·

卷 332_75【王起居独游青龙寺玩红叶因寄】

羊士谔

十亩苍苔绕画廊，几株红树过清霜。
高情还似看花去，闲对南山步夕阳。

卷 332_76【夜听琵琶三首】

羊士谔

掩抑危弦咽又通，朔云边月想朦胧。
当时谁佩将军印，长使蛾眉怨不穷。
一曲徘徊星汉稀，夜兰幽怨重依依。
忽似摐金来上马，南枝栖鸟尽惊飞。
破拨声繁恨已长，低鬟敛黛更摧藏。
潺湲陇水听难尽，并觉风沙绕杏梁。

卷 332_77【彭州萧使君出妓夜宴见送】

羊士谔

玉颜红烛忽惊春，微步凌波暗拂尘。
自是当歌敛眉黛，不因惆怅为行人。

· 全唐诗 ·

卷 332_78【题松江馆】

羊士谔

津柳江风白浪平，棹移高馆古今情。

扁舟一去鸥夷子，应笑分符计日程。

卷 332_79【偶题寄独孤使君】

羊士谔

病起淮阳自有时，秋来未觉长年悲。

坐逢在日唯相望，袅袅凉风满桂枝。

卷 332_80【永宁里小园与沈校书接近，怅然题寄】

羊士谔

故里心期奈别何，手移芳树忆庭柯。

东皋黍熟君应醉，梨叶初红白露多。

· 全唐诗 ·

卷 332_81 【斋中咏怀】

羊士谔

无心唯有白云知，闲卧高斋梦蝶时。

不觉东风过寒食，雨来萱草出巴篱。

卷 332_82 【登郡前山】

羊士谔

洛阳归客滞巴东，处处山樱雪满丛。

岷首当时为风景，岂将官舍作池笼。

卷 332_83 【客有自渠州来说常谏议使君故事，怅然成咏】

羊士谔

才子长沙暂左迁，能将意气慰当年。

至今犹有东山妓，长使歌诗被管弦。

· 全唐诗 ·

卷 332_84【春日朝罢呈台中僚友】

羊士谔

退食鹓行振羽仪，九霄双阙迥参差。云披彩仗春风度，
日暖香阶昼刻移。玉树笼烟鹄鹊观，石渠流水凤凰池。
时清执法惭无事，未有长杨汉主知。

卷 332_85【州民有献杏者，瑰丽溢目，因感花未几，聊以成咏】

羊士谔

南郭东风赏杏坛，几株芳树昨留欢。却忆落花飘绮席，
忽惊如实满雕盘。蛾眉半敛千金薄，鸂鶒初鸣百草阑。
志士古来悲节换，美人啼鸟亦长叹。

卷 332_86【西川独孤侍御见寄七言四韵一首，为郡翰墨都捐逮此酬答诚乖拙速】

羊士谔

百雉层城上将坛，列营西照雪峰寒。文章立事须铭鼎，
谈笑论功耻据鞍。草檄清油推健笔，曳裾黄阁耸危冠。

· 全唐诗 ·

双金未比三千字，负弩空惭知者难。

卷 332_87 【都城从事萧员外寄海梨花诗，尽绮丽至惠然远及】

羊士谔

珠履行台拥附蝉，外郎高步似神仙。陈词今见唐风盛，
从事遥瞻卫国贤。掷地好词凌彩笔，浣花春水腻鱼笺。
东山芳意须同赏，子看囊盛几日传。

卷 332_88 【赴资阳经蟠冢山】

羊士谔

宁辞旧路驾朱轡，重使疲人感汉恩。
今日鸣驺到蟠峡，还胜博望至河源。

卷 332_89 【郡中言怀寄西川萧员外】

羊士谔

功名无力愧勤王，已近终南得草堂。身外尽归天竺偈，
腰间唯有会稽章。何时腊酒逢山客，可惜梅枝亚石床。

· 全唐诗 ·

岁晚我知仙客意，悬心应在白云乡。

卷 332_90【郡斋感物寄长安亲友】

羊士谔

晴天春意并无穷，过腊江楼日日风。琼树花香故人别，
兰卮酒色去年同。闲吟铃阁巴歌里，回首神皋瑞气中。
自愧朝衣犹在箧，归来应是白头翁。

卷 332_91【息舟荆溪，入阳羨南山，游善权寺，呈李功曹巨】

羊士谔

结缆兰香渚，柴车上连冈。晏温值初霁，去绕山河长。
献岁冰雪尽，细泉生路傍。行披烟杉入，激涧横石梁。
层阁表精庐，飞甍切云翔。冲襟得高步，清眺极远方。
潭嶂积佳气，萑英多早芳。具观泽国秀，重使春心伤。
念遵烦促途，荣利骛隙光。勉君脱冠意，共匿无何乡。

· 全唐诗 ·

卷 332_92【乱后曲江】

羊士谔

忆昔曾游曲水滨，春来长有探春人。

游春人静空地在，直至春深不似春。

卷 332_93【寻山家】

羊士谔

独访山家歇还涉，茅屋斜连隔松叶。

主人闻语未开门，绕篱野菜飞黄蝶。

卷 332_94【寄裴校书】

羊士谔

登高何处见琼枝，白露黄花自绕篱。

惟有楼中好山色，稻畦残水入秋池。

· 全唐诗 ·

卷 332_95 【句】

羊士谔

风泉留古韵，笙磬想遗音。
桂朽有遗馥，莺飞安可待。

尘沙蔼如雾，长波惊飙度。雁起汀洲寒，马嘶高城暮。
银缸倦秋馆，绮瑟瞻永路。重有携手期，清光倚玉树。

· 全唐诗 ·

卷三百三十三

卷 333_1 【秋夜闲居即事寄庐山郑员外、蜀郡符处士】

杨巨源

忧思繁未整，良辰会无由。引领迟佳音，星纪屡以周。
蓬阁绝华耀，况乃处穷愁。坠叶寒拥砌，灯火夜悠悠。

开琴弄清弦，窥月俯澄流。冉冉鸿雁度，萧萧帷箔秋。
怅怀石门咏，缅慕碧鸡游。仿佛蒙颜色，崇兰隐芳洲。

卷 333_2 【独不见】

杨巨源

东风艳阳色，柳绿花如霰。竞理同心鬟，争持合欢扇。
香传贾娘手，粉离何郎面。最恨卷帘时，含情独不见。

· 全唐诗 ·

卷 333_3 【题赵孟庄】

杨巨源

管鲍化为尘，交友存如线。升堂俱自媚，得路难相见。
懿君敦三益，颓俗期一变。心同袭芝兰，气合回霜霰。
石门云卧久，玉洞花寻遍。王濬爱旌旗，梁竦劳州县。
烟鸿秋更远，天马寒愈健。愿事郭先生，青囊书几卷。

卷 333_4 【辞魏博田尚书出境后，感恩恋德，因登丛台】

杨巨源

荐书及龙钟，此事镂心骨。亲知殊怆怆，徒御方咄咄。
丛台邯郸郭，台上见新月。离恨始分明，归思更超忽。
怀仁泪空尽，感事情又发。他时躡履声，晓日照丹阙。

卷 333_5 【夏日苦热，同长孙主簿过仁寿寺纳凉】

杨巨源

火入天地炉，南方正何剧。四郊长云红，七合太阳赤。
赫赫沸泉壑，焰焰焦砂石。思减祝融权，期匡诸子宅。
因投竹林寺，一问青莲客。心空得清凉，理证等喧寂。

· 全唐诗 ·

开襟天籁回，步履雨花积。微风动珠帘，惠气入瑶席。
境闲性方谧，尘远趣皆适。淹驾殊未还，朱栏敞虚碧。

卷 333_6【送李虞仲秀才归东都，因寄元李二友】

杨巨源

高翼闲未倦，孤云旷无期。晴霞海西畔，秋草燕南时。
邺中多上才，耿耿丹霞姿。顾我于逆旅，与君发光仪。
同将儒者方，获忝携人知。幽兰与芳佩，寒玉锵美词。
旧友在伊洛，鸣蝉思山陂。到来再春风，梦尽双琼枝。
素业且无负，青冥殊未迟。南桥天气好，脉脉一相思。

卷 333_7【和卢谏议朝回书情即事寄两省阁老，兼呈二起居
谏院诸院长】

杨巨源

宠位资寂用，回头怜二疏。超遥比鹤性，皎洁同僧居。
华组澹无累，单床欢有余。题诗天风洒，属思红霞舒。
蔼蔼延阁东，晨光映林初。炉香深内殿，山色明前除。
对客默焚稿，何人知谏书。全仁气逾劲，大辨言甚徐。
逸步寄青琐，闲吟亲绮疏。清辉被鸾渚，瑞蔼含龙渠。
谢监营野墅，陶公爱吾庐。悠然远者怀，圣代飘长裾。
端弼缉元化，至音生太虚。一戎殄櫜枪，重译充储胥。

· 全唐诗 ·

借地种寒竹，看云忆春蔬。灵机栖杳冥，谈笑登轩车。
晚迹识麒麟，秋英见芙蕖。危言直且庄，旷抱郁以摅。
志业耿冰雪，光容粲璠玕。时贤俨仙掖，气谢心何如。

卷 333_8【奉酬窦郎中早入省苦寒见寄】

杨巨源

玄冥怒含风，群物戒严节。空山顽石破，幽涧层冰裂。
题诗金华彦，接武丹霄烈。旷怀玉京云，孤唱粉垣雪。
穷阴总凝沍，正气直肃杀。天狼看坠地，霜兔敢拒穴。
悠然蓬蒿士，亦得奉朝谒。羸骖苦迟迟，单仆怨切切。
端闱仙阶邃，广陌冻桥滑。旭日鸳鹭行，瑞烟芙蓉阙。
司寒申郑重，成岁在凜冽。谢监逢酒时，袁生闭门月。
渐思霜霰减，欲报阳和发。谁家挟纆心，何地当炉热。
惨舒能一改，恭听远者说。

卷 333_9【野园献果呈员外】

杨巨源

西园果初熟，上客心逾惬。凝粉乍辞枝，飘红仍带叶。
幽姿写琼实，殷彩呈妆颊。持此赠佳期，清芬罗袖裊。

· 全唐诗 ·

卷 333_10【大堤曲】

杨巨源

二八婵娟大堤女，开垆相对依江渚。待客登楼向水看，
邀郎卷幔临花语。细雨濛濛湿芰荷，巴东商侣挂帆多。

自传芳酒浣红袖，谁调妍妆回翠娥。珍簪华灯夕阳后，
当垆理瑟矜纤手。月落星微五鼓声，春风摇荡窗前柳。

岁岁逢迎沙岸间，北人多识绿云鬟。无端嫁与五陵少，
离别烟波伤玉颜。

卷 333_11【杨花落】

杨巨源

北斗南回春物老，红英落尽绿尚早。韶风澹荡无所依，
偏惜垂杨作春好。此时可怜杨柳花，荏苒艳曳满人家。
人家女儿出罗幕，静扫玉庭待花落。宝环纤手捧更飞，
翠羽轻裾承不著。历历瑶琴舞金陈，菲红拂黛怜玉人。
东园桃李芳已歇，独有杨花娇暮春。

· 全唐诗 ·

卷 333_12【月宫词】

杨巨源

宫中月明何所似，如积如流满田地。迥过前殿曾学眉，
回照长门惯催泪。昭阳昨夜秋风来。绮阁金铺情影开。

藻井浮花共陵乱，玉阶零露相裴回。稍映明河泛仙驭，
满窗犹在更衣处。管弦回烛无限情。环珮凭栏不能去。

皎皎苍苍千里同，穿烟飘叶九门通。珠帘欲卷畏成水，
瑶席初陈惊似空。复值君王事欢宴，宫女三千一时见。

飞盖愁看素晕低，称觞愿踏清辉遍。江上无云夜可怜，
冒沙披浪自婵娟。若共心赏风流夜，那比高高太液前。

卷 333_13【赠从弟茂卿】

杨巨源

吾从骥足杨茂卿，性灵且奇才甚清。海内方微风雅道，
邺中更有文章盟。扣寂由来在渊思，搜奇本自通禅智。

王维证时符水月，杜甫狂处遗天地。流水东西岐路分，
幽州迢递旧来闻。若为向北驱疲马，山似寒空塞似云。

· 全唐诗 ·

卷 333_14 【乌啼曲赠张评事】

杨巨源

可怜杨叶复杨花，雪净烟深碧玉家。乌栖不定枝条弱，
城头夜半声哑哑。浮萍流荡门前水，任冒芙蓉莫堕沙。

卷 333_15 【端午日伏蒙内侍赐晨服】

杨巨源

彩缕纤仍丽，凌风卷复开。方应五日至，应自九天来。
在笥清光发，当轩暑气回。遥知及时节，刀尺火云催。

卷 333_16 【胡姬词】

杨巨源

妍艳照江头，春风好客留。当垆知妾惯，送酒为郎羞。
香渡传蕉扇，妆成上竹楼。数钱怜皓腕，非是不能留。

· 全唐诗 ·

卷 333_17【春日有赠】

杨巨源

堤暖柳丝斜，风光属谢家。晚心应恋水，春恨定因花。
步远怜芳草，归迟见绮霞。由来感情思，独自惜年华。

卷 333_18【襄阳乐】

杨巨源

闲随少年去，试上大堤游。画角栖乌起，清弦过客愁。
碑沉楚山石，珠彻汉江秋。处处风情好，卢家更上楼。

卷 333_19【关山月】

杨巨源

苍茫临故关，迢递照秋山。万里平芜静，孤城落叶闲。
露浓栖雁起，天远戍兵还。复映征西府，光深组练间。

· 全唐诗 ·

卷 333_20 【长城闻笛】

杨巨源

孤城笛满林，断续共霜砧。夜月降羌泪，秋风老将心。
静过寒垒遍，暗入故关深。惆怅梅花落，山川不可寻。

卷 333_21 【春晚东归留赠李功曹】

杨巨源

芳田岐路斜，脉脉惜年华。云路青丝骑，香含翠幃车。
歌声仍隔水，醉色未侵花。唯有怀乡客，东飞羡曙鸦。

卷 333_22 【送殷员外使北蕃】

杨巨源

二轩将雨露，万里入烟沙。和气生中国，薰风属外家。
塞芦随雁影，关柳拂驼花。努力黄云北，仙曹有雉车。

· 全唐诗 ·

卷 333_23 【送许侍御充云南哀册使判官】

杨巨源

万里永昌城，威仪奉圣明。冰心瘴江冷，霜宪漏天晴。

荒外开亭候，云南降旆旌。他时功自许，绝域转哀荣。

卷 333_24 【秋日题陈宗儒圃亭，凄然感旧】

杨巨源

曾随何水部，待月东亭宿。今日重凭栏，清风空在竹。

前山依旧碧，闲草经秋绿。时物方宛然，蛛丝一何速。

卷 333_25 【和郑少师相公题慈恩寺禅院】

杨巨源

旧寺长桐孙，朝天是圣恩。谢公诗更老，萧傅道方尊。

白法知深得，苍生要重论。若为将此望，心地向空门。

· 全唐诗 ·

卷 333_26 【同赵校书题普救寺】

杨巨源

东门高处天，一望几悠然。白浪过城下，青山满寺前。
尘光分驿道，岚色到人烟。气象须文字，逢君大雅篇。

卷 333_27 【春日与刘评事过故证上人院】

杨巨源

曾共刘咨议，同时事道林。与君方掩泪，来客是知心。
阶雪凌春积，钟烟向夕深。依然旧童子，相送出花阴。

卷 333_28 【春雪题兴善寺广宣上人竹院】

杨巨源

皎洁青莲客，焚香对雪朝。竹内催淅沥，花雨让飘飘。
触石和云积，萦池拂水消。只应将日月，颜色不相饶。

· 全唐诗 ·

卷 333_29【清明日后土祠送田彻】

杨巨源

清明千万家，处处是年华。榆柳芳辰火，梧桐今日花。

祭祠结云绮，游陌拥香车。惆怅田郎去，原回烟树斜。

卷 333_30【酬令狐员外直夜书怀见寄】

杨巨源

花枝暖欲舒，粉署夜方初。世职推传盛，春刑是减余。

芸香能护字，铅槧善呈书。此地从头白，经年望雉车。

卷 333_31【题表丈三大夫书斋】

杨巨源

盛府自莲花，群公是岁华。兰姿丈人圃，松色大夫家。

素卷堆瑶席，朱弦映绛纱。诗题三百首，高韵照春霞。

· 全唐诗 ·

卷 333_32 【春日送沈赞府归浔阳觐叔父】

杨巨源

浔阳阮咸宅，九派竹林前。花屿高如浪，云峰远似天。

江声在南巷，海气入东田。才子今朝去，风涛思渺然。

卷 333_33 【与李文仲秀才同赋泛酒花诗】

杨巨源

若道春无赖，飞花合逐风。巧知人意里，解入酒杯中。

香湿胜含露，光摇似泛空。请君回首看，几片舞芳丛。

卷 333_34 【登宁州城楼】

杨巨源

宋玉本悲秋，今朝更上楼。清波城下去，此意重悠悠。

晚菊临杯思，寒山满郡愁。故关非内地，一为汉家羞。

· 全唐诗 ·

卷 333_35 【同薛侍御登黎阳县楼眺黄河】

杨巨源

倚槛恣流目，高城临大川。九回纡白浪，一半在青天。

气肃晴空外，光翻晓日边。开襟值佳景，怀抱更悠然。

卷 333_36 【和权相公南园闲涉寄广宣上人】

杨巨源

浩气抱天和，闲园载酒过。步因秋景旷，心向晚云多。

翠玉思回凤，玄珠肯在鹅。问师登几地，空性奈诗何。

卷 333_37 【供奉定法师归安南】

杨巨源

故乡南越外，万里白云峰。经论辞天去，香花入海逢。

鹭涛清梵彻，蜃阁化城重。心到长安陌，交州后夜钟。

· 全唐诗 ·

卷 333_38 【池上竹】

杨巨源

一丛婵娟色，四面清冷波。气润晚烟重，光闲秋露多。
翠筠入疏柳，清影拂圆荷。岁晏琅玕实，心期有凤过。

卷 333_39 【长安春游】

杨巨源

凤城春报曲江头，上客年年是胜游。日暖云山当广陌，
天清丝管在高楼。茏葱树色分仙阁，缥缈花香泛御沟。
桂壁朱门新邸第，汉家恩泽问酂侯。

卷 333_40 【送定法师归蜀，法师即红楼院供奉广宣上人兄弟】

杨巨源

凤城初日照红楼，禁寺公卿识惠休。诗引棣华沾一雨，
经分贝叶向双流。孤猿学定前山夕，远雁伤离几地秋。
空性碧云无处所，约公曾许剡溪游。

· 全唐诗 ·

卷 333_41 【早朝】

杨巨源

钟声清禁才应彻，漏报仙闾俨已开。双阙薄烟笼菡萏，
九成初日照蓬莱。朝时但向丹墀拜，仗下方从碧殿回。
圣道逍遥更何事，愿将巴曲赞康哉。

卷 333_42 【赠张将军】

杨巨源

关西诸将揖容光，独立营门剑有霜。知爱鲁连归海上，
肯令王翦在频阳。天晴红帜当山满，日暮清笳入塞长。
年少功高人最羨，汉家坛树月苍苍。

卷 333_43 【和侯大夫秋原山观征人回】

杨巨源

两河战罢万方清，原上军回识旧营。立马望云秋塞静，
射雕临水晚天晴。戍闲部伍分岐路，地远家乡寄旆旌。
圣代止戈资庙略，诸侯不复更长征。

· 全唐诗 ·

卷 333_44 【送人过卫州】

杨巨源

忆昔征南府内游，君家东閤最淹留。纵横联句长侵晓，
次第看花直到秋。论旧举杯先下泪，伤离临水更登楼。
相思前路几回首，满眼青山过卫州。

卷 333_45 【寄中书同年舍人】

杨巨源

晴明紫阁最高峰，仙掖开帘范彦龙。五色天书词灿烂，
九华春殿语从容。彩毫应染炉烟细，清珮仍含玉漏重。
二十年前同日喜，碧霄何路得相逢。

卷 333_46 【酬于驸马二首】

杨巨源

绮陌尘香曙色分，碧山如画又逢君。蛟藏秋月一片水，
骥锁晴空千尺云。戚里旧知何驸马，诗家今得鲍参军。
阳和本是烟霄曲，须向花间次第闻。

· 全唐诗 ·

芳时碧落心应断，今日清词事不同。瑶草秋残仙圃在，
彩云天远凤楼空。晴花暖送金鞵影，凉叶寒生玉簟风。
长得闻诗欢自足，会看春露湿兰丛。

卷 333_47【将归东都寄令狐舍人】

杨巨源

绿杨红杏满城春，一骑悠悠万井尘。岐路未关今日事，
风光欲醉长年人。闲过绮陌寻高寺，强对朱门谒近臣。
多病晚来还有策，雒阳山色旧相亲。

卷 333_48【寄江州白司马】

杨巨源

江州司马平安否，惠远东林住得无。湓浦曾闻似衣带，
庐峰见说胜香炉。题诗岁晏离鸿断，望阙天遥病鹤孤。
莫谩拘牵雨花社，青云依旧是前途。

· 全唐诗 ·

? 333_49? ? ? ? ? ? ? ?

杨巨源

天眷君陈久在东，归朝人看大司空。黄河岸畔长无事，
沧海东边独有功。已变畏途成雅俗，仍过旧里揖秋风。
一门累叶凌烟阁，次第仪形汉上公。

卷 333_50【送章孝标校书归杭州因寄白舍人】

杨巨源

曾过灵隐江边寺，独宿东楼看海门。潮色银河铺碧落，
日光金柱出红盆。不妨公事资高卧，无限诗情要细论。
若访郡人徐孺子，应须骑马到沙村。

卷 333_51【述旧纪勋寄太原李光颜侍中二首】

杨巨源

玉塞含凄见雁行，北垣新诏拜龙骧。弟兄间世真飞将，
貔虎归时似故乡。鼓角因风飘朔气，旌旗映水发秋光。
河源收地心犹壮，笑向天西万里霜。

· 全唐诗 ·

倚天长剑截云孤，报国纵横见丈夫。五载登坛真宰相，
七重分阍正司徒。曾闻转战平坚寇，共说题诗压腐儒。
料敌知机在方寸，不劳心力讲阴符。

卷 333_52【酬卢员外】

杨巨源

谢傅旌旗控上游，卢郎樽俎借前筹。舜城风土临清庙，
魏国山川在白楼。云寺当时接高步，水亭今日又同游。
满筵旧府笙歌在，独有羊昙最泪流。

卷 333_53【古意赠王常侍】

杨巨源

绣户纱窗北里深，香风暗动凤凰簪。组紃常在佳人手。
刀尺空摇寒女心。欲学齐讴逐云管，还思楚练拂霜砧。
东家少妇当机织，应念无衣雪满林。

· 全唐诗 ·

卷 333_54 【送裴中丞出使】

杨巨源

一清淮甸假朝纲，金印初迎细柳黄。辞阙天威和雨露，
出关春色避风霜。龙韬何必陈三略，虎旅由来肃万方。
宣谕生灵真重任，回轩应问石渠郎。

卷 333_55 【送绛州卢使君】

杨巨源

应将清净结心期，又共阳和到郡时。绛老问年须算字，
庾公逢月要题诗。朱栏迢递因高胜，粉堞清明欲下迟。
他日征还作霖雨，不须求赛敬亭祠。

卷 333_56 【赠李傅】

杨巨源

知因公望掩能文，誓激明诚在致君。曾罢双旌瞻白日，
犹将一剑许黄云。摇窗竹色留僧语，入院松声共鹤闻，
莫被此心生晚计，镇南人忆杜将军。

· 全唐诗 ·

卷 333_57【上裴中丞】

杨巨源

七年西掖弘汤诰，三捷东堂总汉科。政引风霜成物色，
语回天地到阳和。清威更助朝端重，圣泽曾随笔下多。
应笑白须扬执戟，可怜春日老如何。

卷 333_58【和人与人分惠赐冰】

杨巨源

天水藏来玉堕空，先颁密署几人同。映盘皎洁非资月，
披扇清凉不在风。莹质方从纶阁内，凝辉更向画堂中。
丽词珍贶难双有，迢递金舆殿角东。

卷 333_59【观打球有作】

杨巨源

亲扫球场如砥平，龙骧骤马晓光晴。入门百拜瞻雄势，
动地三军唱好声。玉勒回时沾赤汗，花骢分处拂红缨。
欲令四海氛烟静，杖底纤尘不敢生。

· 全唐诗 ·

卷 333_60【早春即事呈刘员外】

杨巨源

明朝晴暖即相随，肯信春光被雨欺。且任文书堆案上，
免令杯酒负花时。马蹄经历须应遍，莺语叮咛已怪迟。
更待杂芳成艳锦，邺中争唱仲宣诗。

卷 333_61【送司徒童子】

杨巨源

卫多君子鲁多儒，七岁闻天笑舞雩。光彩春风初转蕙，
性灵秋水不藏珠。两经在口知名小，百拜垂髫稟气殊。
况复元侯旌尔善，桂林枝上得鹓雏。

卷 333_62【寄昭应王丞】

杨巨源

武皇金辂辗香尘，每岁朝元及此辰。光动泉心初浴日，
气蒸山腹总成春。讴歌已入云韶曲，词赋方归侍从臣。
瑞靄朝朝犹望幸，天教赤县有诗人。

· 全唐诗 ·

卷 333_63 【酬崔博士】

杨巨源

自知顽叟更何能，唯学雕虫谬见称。长被有情邀唱和，
近来无力更祇承。青松树杪三千鹤，白玉壶中一片冰。
今日为君书壁右，孤城莫怕世人憎。

卷 333_64 【酬裴舍人见寄】

杨巨源

谁道重迁是旧班，自将霄汉比乡关。二妃楼下宜临水，
五老祠西好看山。再葺吾庐心已足，每来公府路常闲。
诗陪亚相逾三纪，石笥烟霞不共攀。

卷 333_65 【和刘员外陪韩仆射野亭公宴】

杨巨源

好客风流玳瑁簪，重檐高幕晓沈沈。绮筵霜重旌旗满，
玉帐天清丝管声。繁戏徒过鲁儒目，众欢方集汉郎心。
寒筇一曲严城暮，云骑连嘶香外林。

· 全唐诗 ·

卷 333_66 【酬崔驸马惠笺百张兼贻四韵】

杨巨源

百张云样乱花开，七字文头艳锦回。浮碧空从天上得，
殷红应自日边来。捧持价重凌云叶，封裹香深笑海苔。
满筐清光应照眼，欲题凡韵辄裴回。

卷 333_67 【赠史开封】

杨巨源

天低荒草誓师坛，邓艾心知战地宽。鼓角迴临霜野曙，
旌旗高对雪峰寒。五营向水红尘起，一剑当风白日看。
曾从伏波征绝域，碛西蕃部怯金鞍。

卷 333_68 【奉寄通州元九侍御】

杨巨源

大明宫殿郁苍苍，紫禁龙楼直署香。九陌华轩争道路，
一枝寒玉任烟霜。须听瑞雪传心语，莫被啼猿续泪行。
共说圣朝容直气，期君新岁奉恩光。

· 全唐诗 ·

卷 333_69 【赠浑钜中允】

杨巨源

公子髫年四海闻，城南侍猎雪雰雰。马盘旷野弦开月，
雁落寒原箭在云。曾向天西穿虏阵，惯游花下领儒群。
一枝琼萼朝光好，彩服飘飘从冠军。

卷 333_70 【重送胡大夫赴振武】

杨巨源

向年擢桂儒生业，今日分茅圣主恩。旌旆仍将过乡路，
轩车争看出都门。人间文武能双捷，天下安危待一论。
布惠宣威大夫事，不妨诗思许琴尊。

卷 333_71 【送陈判官罢举赴江外】

杨巨源

练思多时冰雪清，拂衣无语别书生。莫将甲乙为前累，
不废烟霄是此行。定爱红云燃楚色，应看白雨打江声。
心期玉帐亲台位，魏勃因君说姓名。

· 全唐诗 ·

卷 333_72【奉和裴相公】

杨巨源

竹寺题名一半空，衰荣三十七人中。在生本要求知己，
垂老应怜值相公。敢望夔和回旧律，任应时节到春风。
若为问得苍苍意，造化无言自是功。

卷 333_73【和大夫边春呈长安亲故】

杨巨源

严城吹笛思寒梅，二月冰河一半开。紫陌诗情依旧在，
黑山弓力畏春来。游人曲岸看花发，走马平沙猎雪回。
旌旆朝天不知晚，将星高处近三台。

卷 333_74【张郎中段员外初直翰林报寄长句】

杨巨源

秋空如练瑞云明，天上人间莫问程。丹凤词头供二妙，
金銮殿角直三清。方瞻北极临星月，犹向南班滞姓名。
启沃朝朝深禁里，香炉烟外是公卿。

· 全唐诗 ·

卷 333_75【奉酬端公春雪见寄】

杨巨源

造化多情状物亲，剪花铺玉万重新。闲飘上路呈丰岁，
狂舞中庭学醉春。兴逸何妨寻剡客，唱高还肯寄巴人。
遥知独立芝兰阁，满眼清光压俗尘。

卷 333_76【卢郎中拜陵遇雪蒙见召因寄】

杨巨源

南宫使者有光辉，欲拜诸陵瑞雪飞。蘋叶已修青玉荐，
柳花仍拂赤车衣。应同谷口寻春去，定似山阴带月归。
寒冷出郊犹未得，羡公将事看芳菲。

卷 333_77【冬夜陪丘侍御先辈听崔校书弹琴】

杨巨源

雪满中庭月映林，谢家幽赏在瑶琴。楚妃波浪天南远，
蔡女烟沙漠北深。顾盼何曾因误曲，殷勤终是感知音。
若将雅调开诗兴，未抵丘迟一片心。

· 全唐诗 ·

卷 333_78【元日含元殿下立仗丹凤楼门下宣赦相公称贺二首】

杨巨源

天垂台耀扫欃枪，寿献香山祝圣明。丹凤楼前歌九奏，
金鸡竿下鼓千声。衣冠南面薰风动，文字东方喜气生。
从此登封资庙略，两河连海一时清。

临轩启扇似云收，率土朝天剧水流。瑞色含春当正殿，
香烟捧日在高楼。三朝气蚤迎恩泽，万岁声长绕冕旒。
请问汉家功第一，麒麟阁上识酈侯。

卷 333_79【元日观朝】

杨巨源

北极长尊报圣期，周家何用问元龟。天颜入曙千官拜，
元日迎春万物知。闾阖回临黄道正，衣裳高对碧山垂。
微臣愿献尧人祝，寿酒年年太液池。

· 全唐诗 ·

卷 333_80 【题贾巡官林亭】

杨巨源

白鸟闲栖亭树枝，绿樽仍对菊花篱。许询本爱交禅侣，
陈寔由来是好儿。明月出云秋馆思，远泉经雨夜窗知。
门前长者无虚辙，一片寒光动水池。

卷 333_81 【和元员外题升平里新斋】

杨巨源

自知休沐诸幽胜，遂肯高斋枕广衢。旧地已开新玉圃，
春山仍展绿云图。心源邀得闲诗证，肺气宜将慢酒扶。
此外唯应任真宰，同尘敢是道门枢。

卷 333_82 【送澹公归嵩山龙潭寺葬本师】

杨巨源

野烟秋水苍茫远，禅境真机去住闲。双树为家思旧壑，
千花成塔礼寒山。洞宫曾向龙边宿，云径应从鸟外还。
莫恋本师金骨地，空门无处复无关。

· 全唐诗 ·

卷 333_83 【邵州陪王郎中宴】

杨巨源

西塞无尘多玉筵，貔貅鸳鹭俨相连。红茵照水开樽俎，
翠幕当云发管弦。歌态晓临团扇静，舞容春映薄衫妍。
鲁儒纵使他时有，不似欢娱及少年。

卷 333_84 【和令狐舍人酬峰上人题山栏孤竹】

杨巨源

满院冰姿粉箨残，一茎青翠近帘端。离丛自欲亲香火，
抱节何妨共岁寒。能让繁声任真籁，解将孤影对芳兰。
范云许访西林寺，枝叶须和彩凤看。

卷 333_85 【寄赠田仓曹湾】

杨巨源

芳兰媚庭除，灼灼红英舒。身为陋巷客，门有绋辕车。
朝览夷吾传，暮习颖阳书。晒云高羽翼，待贾蕴璠玕。
纓弁虽云阻，音尘岂复疏。若因风雨晦，应念寂寥居。

卷 333_86【上刘侍中】

杨巨源

命代生申甫，承家翊禹汤。庙谟膺间气，师律动清霜。
钟鼎勋庸大，山河诚誓长。英姿凌虎视，逸步压龙骧。
道协陶钧力，恩回日月光。一言弘社稷，九命备珪璋。
政治军逾肃，仁敷物已康。朱门重棨戟，丹诏半缣缃。
位总云龙野，师临涿鹿乡。射雕天更碧，吹角塞仍黄。
深入平夷落，横行辟汉疆。功垂贞石远，名映色丝香。
断磧瞻貔武，临池识凤凰。舞腰凝绮榭，歌响拂雕梁。
杯净传鹦鹉，裘鲜照鹔鹕。吟诗白羽扇，校猎绿沈枪。
风景佳人地，烟沙壮士场。幕中邀谢鉴，麾下得周郎。
珠影含空彻，琼枝映座芳。王浑知武子，陈寔奖元方。
富贵春无限，欢娱夜未央。管弦随玉帐，尊俎奉金章。
俗理宁因劝，边城讵假防。军容雄朔漠，公望冠岩廊。
分野邻孤岛，京坻溢万厢。曙华分碣石，秋色入衡阳。
城远迷玄兔，川明辩白狼。忠贤多感激，今古共苍茫。
堤拥红蕖艳，桥分翠柳行。轩车纷自至，亭馆郁相当。
珍簟回烦暑，层轩引早凉。听琴知思静，说剑觉神扬。
佳景燕台上，清辉郑驿傍。鼓鼙喧北里，珪玉映东床。
敢衙由之瑟，甘循赐也墙。官微思假路，战胜忝升堂。
欲奋三年翼，频回一夕肠。消忧期酒圣，乘兴任诗狂。
海内栽桃李，天涯荷稻粱。升沈门下意，谁道在苍苍。

· 全唐诗 ·

卷 333_87【赠侯侍御】

杨巨源

步逸辞群迹，机真结远心。敦诗扬大雅，映古酌高音。
逃祸栖蜗舍，因醒解豸簪。紫兰秋露湿，黄鹤晚天阴。
旧业馀荒草，寒山出远林。月明多宿寺，世乱重悲琴。
霄汉时应在，诗书道未沈。坐期闾阖霁，云暖一开襟。

卷 333_88【怀德抒情寄上信州座主】

杨巨源

五马江天郡，诸生泪共垂。宴馀明主德，恩在侍臣知。
怅望緘双鲤，龙钟假一枝。玉峰遥寄梦，云海暗伤离。
幢盖全家去，琴书首路随。沧州值康乐，明月向元规。
鹓凤终凌汉，蛟龙会出池。蕙香因曙发，松色肯寒移。
举世瞻风藻，当朝揖羽仪。加餐门下意，溪水绿逶迤。

卷 333_89【送杜郎中使君赴虔州】

杨巨源

迢递南康路，清辉得使君。虎符秋领俗，鹓署早辞群。

· 全唐诗 ·

地远仍连戍，城严本带军。傍江低槛月，当岭满窗云。
境胜閭阎间，天清水陆分。和诗将惠政，颂述九衢闻。

卷 333_90【别鹤词送令狐校书之桂府】

杨巨源

海鹤一为别，高程方窅然。影摇江汉路，思结潇湘天。
皎然仰白日，真姿栖紫烟。含情九霄际，顾侣五云前。

遐心属清都，凄响激朱弦。超遥闻风雨，迢递各山川。
东南信多水，会合当有年。雌飞唳冥冥，此意何由传。

卷 333_91【夏日裴尹员外西斋看花】

杨巨源

笑向东来客，看花枉在前。始知清夏月，更胜艳阳天。
露湿呈妆污，风吹畏火燃。葱茏和叶盛，烂熳压枝鲜。

红彩当铃阁，清香到玉筵。蝶栖惊曙色，莺语滞晴烟。
得地殊堪赏，过时倍觉妍。芳菲迟最好，唯是谢家怜。

· 全唐诗 ·

卷 333_92【赠邻家老将】

杨巨源

白首羽林郎，丁年戍朔方。阴天瞻碛落，秋日渡辽阳。
大漠寒山黑，孤城夜月黄。十年依蓐食，万里带金疮。
拂雪陈师祭，冲风立教场。箭飞琼羽合，旗动火云张。
虎翼分营势，鱼鳞拥阵行。誓心清塞色，斗血杂沙光。
战地晴辉薄，军门晓气长。寇深争暗袭，关迥勒春防。
身贱竟何诉，天高徒自伤。功成封宠将，力尽到贫乡。
雀老方悲海，鹰衰却念霜。空馀孤剑在，开匣一沾裳。

卷 333_93【和吕舍人喜张员外自北番回至境上，先寄二十韵】

杨巨源

割爱天文动，敦和国步安。仙姿归旧好，戎意结新欢。
并命瞻鹓鹭，同心揖蕙兰。玉箫临祖帐，金榜引征鞍。
广陌双旌去，平沙万里看。海云侵鬓起，边月向眉残。
突兀阴山迥，苍茫朔野宽。毳庐同甲帐，韦囊比雕盘。
义著亲胡俗，仪全识汉官。地邻冰鼠净，天映烛龙寒。
节异苏卿执，弦殊蔡女弹。碛分黄渺渺，塞极黑漫漫。
欢味膻腥列，徵声(僣) 攒。归期先雁候，登路剧鹏抃。
上客离心远，西宫草诏殚。丽词传锦绮，珍价掩琅玕。

· 全唐诗 ·

百两开戎垒，千蹄入御栏。瑞光麟阁上，喜气凤城端。
尚德曾辞剑，柔凶本舞干。茫茫斗星北，威服古来难。

卷 333_94【春日奉献圣寿无疆词十首】

杨巨源

文物京华盛，讴歌国步康。瑶池供寿酒，银汉丽宸章。
灵雨含双阙，雷霆肃万方。代推仙祚远，春共圣恩长。
凤宸临花暖，龙垆旁日香。遥知千万岁，天意奉君王。

鸳鹭彤庭际，轩车绮陌前。九城多好色，万井半祥烟。
人醉逢尧酒，莺歌答舜弦。花明御沟水，香暖禁城天。
赐宴文逾盛，徵歌物更妍。无穷艳阳月，长照太平年。

云陛临黄道，天门在碧虚。大明含睿藻，元气抱宸居。
戈偃征苗后，诗传宴镐初。年华富仙苑，时哲满公车。
化入綈纁大，恩垂浹汗馀。悠然万方静，风俗揖华胥。

玉漏飘青琐，金铺丽紫宸。云山九门曙，天地一家春。
瑞霭方呈赏，暄风本配仁。岩廊开凤翼，水殿压鳌身。
文雅逢明代，欢娱及贱臣。年年未央阙，恩共物华新。

垂拱乾坤正，欢心品类同。紫烟含北极，玄泽付东风。
珠缀留晴景，金茎直晓空。发生资盛德，交泰让全功。
间气登三事，祥光启四聪。遐荒似川水，天外亦朝宗。

· 全唐诗 ·

代是文明昼，春当宴喜时。垆烟添柳重，宫漏出花迟。
汉典方宽律，周官正采诗。碧宵传凤吹，红旭在龙旗。
造化膺神契，阳和沃圣思。无因随百兽，率舞奉丹墀。

睿德符玄化，芳情翊太和。日轮皇鉴远，天仗圣朝多。
曙色含金榜，晴光转玉珂。中宫陈广乐，元老进赓歌。
莲叶看龟上，桐花识凤过。小臣空击壤，沧海是恩波。

物象朝高殿，簪裾溢上京。春当九衢好，天向万方明。
乐报箫韶发，杯看沆瀣生。芙蓉丹阙暖，杨柳玉楼晴。
阊阖开中禁，衣裳俨太清。南山同圣寿，长对凤凰城。

日上苍龙阙，香含紫禁林。晴光五云叠，春色九重深。
赏叶元和德，文垂雅颂音。景云随御辇，颢气在宸襟。
永保无疆寿，长怀不战心。圣朝多庆赐，琼树粉墙阴。

化洽生成遂，功宣动植知。瑞凝三秀草，春入万年枝。
凤掖嘉言进，鸳行喜气随。仗临丹地近，衣对碧山垂。
渥泽方柔远，聪明本听卑。愿同东观士，长对汉威仪。

卷 333_95【衔鱼翠鸟】

杨巨源

有意莲叶间，瞥然下高树。擘破得全鱼，一点翠光去。

· 全唐诗 ·

卷 333_96【和郑相公寻宣上人不遇】

杨巨源

方寻莲境去，又值竹房空。几韵飘寒玉，馀清不在风。

卷 333_97【题范阳金台驿】

杨巨源

七国唯求客，千金遂筑台。若令逢圣代，憔悴郭生回。

卷 333_98【寄薛侍御】

杨巨源

世上无穷事，生涯莫废诗。何曾好风月，不是忆君时。

卷 333_99【赋得灞岸柳留辞郑员外】

杨巨源

杨柳含烟灞岸春，年年攀折为行人。

· 全唐诗 ·

好风倘借低枝便，莫遣青丝扫路尘。

卷 333_100【折杨柳】

杨巨源

水边杨柳鞠尘丝，立马烦君折一枝。
惟有春风最相惜，殷勤更向手中吹。

卷 333_101【雪中听箏】

杨巨源

玉柱泠泠对寒雪，清商怨徵声何切。
谁怜楚客向隅时，一片愁心与弦绝。

卷 333_102【卢龙塞行送韦掌记二首】

杨巨源

雨雪纷纷黑水外，行人共指卢龙塞。
万里飞沙压鼓鼙，三军杀气凝旌旆。
陈琳书记本翩翩，料敌能兵夺酒泉。
圣主好文兼好武，封侯莫比汉皇年。

· 全唐诗 ·

卷 333_103【题五老峰下费君书院】

杨巨源

解向花间栽碧松，门前不负老人峰。
已将心事随身隐，认得溪云第几重。

卷 333_104【僧院听琴】

杨巨源

禅思何妨在玉琴，真僧不见听时心。
离声怨调秋堂夕，云向苍梧湘水深。

卷 333_105【和武相公春晓闻莺】

杨巨源

语恨飞迟天欲明，殷勤似诉有馀情。
仁风已及芳菲节，犹向花溪鸣几声。

· 全唐诗 ·

卷 333_106 【唐昌观玉蕊花】

杨巨源

晴空素艳照霞新，香洒天风不到尘。
持赠昔闻将白雪，蕊珠宫上玉花春。

卷 333_107 【山中主人】

杨巨源

十里青山有一家，翠屏深处更添霞。
若为说得溪中事，锦石和烟四面花。

卷 333_108 【太原赠李属侍御】

杨巨源

路入桑干塞雁飞，枣郎年少有光辉。
春风走马三千里，不废看花君绣衣。

· 全唐诗 ·

卷 333_109【崔娘诗】

杨巨源

清润潘郎玉不如，中庭蕙草雪消初。
风流才子多春思，肠断萧娘一纸书。

卷 333_110【题云师山房】

杨巨源

云公兰若深山里，月明松殿微风起。
试问空门清净心，莲花不著秋潭水。

卷 333_111【城东早春】

杨巨源

诗家清景在新春，绿柳才黄半未匀。
若待上林花似锦，出门俱是看花人。

· 全唐诗 ·

卷 333_112 【秋日登亭赠薛侍御】

杨巨源

潦倒从军何取益，东西走马暂同游。
梁王旧客皆能赋，今日因何独怨秋。

卷 333_113 【石水词二首】

杨巨源

银罍深锁贮清光，无限来人不得尝。
知共金丹争气力，一杯全胜五云浆。

山叟和云鬣翠屏，煎时分日检仙经。
天人持此扶衰病，胜得瑶池水一瓶。

卷 333_114 【答振武李逢吉判官】

杨巨源

近来时辈都无兴，把酒皆言肺病同。
唯有单于李评事，不将华发负春风。

· 全唐诗 ·

卷 333_115 【宫燕词】

杨巨源

毛衣似锦语如弦，日暖争高绮陌天。
几处野花留不得，双双飞向御炉前。

卷 333_116 【赠崔驸马】

杨巨源

百尺梧桐画阁齐，箫声落处翠云低。
平阳不惜黄金埒，细雨花骢踏作泥。

卷 333_117 【听李凭弹箜篌二首】

杨巨源

听奏繁弦玉殿清，风传曲度禁林明。
君王听乐梨园暖，翻到云门第几声。

花咽娇莺玉漱泉，名高半在御筵前。
汉王欲助人间乐，从遣新声坠九天。

· 全唐诗 ·

卷 333_118 【临水看花】

杨巨源

一树红花映绿波，晴明骑马好经过。
今朝几许风吹落，闻道萧郎最惜多。

卷 333_119 【观妓人入道二首】

杨巨源

荀令歌钟北里亭，翠娥红粉敞云屏。
舞衣施尽馀香在，今日花前学诵经。

碧玉芳年事冠军，清歌空得隔花闻。
春来削发芙蓉寺，蝉鬓临风堕绿云。

卷 333_120 【方城驿逢孟侍御】

杨巨源

走马温汤直隼飞，相逢鬢铄理征衣。
军中得力儿男事，入驿从容见落晖。

· 全唐诗 ·

卷 333_121【题清凉寺】

杨巨源

凭槛霏微松树烟，陶潜曾用道林钱。
一声寒磬空心晓，花雨知从第几天。

卷 333_122【酬令狐舍人】

杨巨源

晓禁苍苍换直还，暂低鸾翼向人间。
亦知受业公门事，数仞丘墙不见山。

卷 333_123【和令狐郎中】

杨巨源

题诗一代占清机，秉笔三年直紫微。
自禀道情韶黜异，不同蓬玉学知非。

· 全唐诗 ·

卷 333_124 【美人春怨】

杨巨源

妾家巫峡阳，罗幌寝兰堂。晓日临窗久，春风引梦长。
落钗仍挂鬓，微汗欲销黄。纵使朦胧觉，魂犹逐楚王。

卷 333_125 【艳女词】

杨巨源

露井桃花发，双双燕并飞。美人姿态里，春色上罗衣。
自爱频开镜，时羞欲掩扉。心知行路客，遥惹五香归。

卷 333_126 【名姝咏】

杨巨源

阿娇年未多，体弱性能和。怕重愁拈镜，怜轻喜曳罗。
临津双洛浦，对月两嫦娥。独有荆王殿，时时暮雨过。

· 全唐诗 ·

卷 333_127【送太和公主和蕃】

杨巨源

北路古来难，年光独认寒。朔云侵鬓起，边月向眉残。
芦井寻沙到，花门度碛看。薰风一万里，来处是长安。

卷 333_128【秋日韦少府厅池上咏石】

杨巨源

主人得幽石，日觉公堂清。一片池上色，孤峰云外情。
旧溪红藓在，秋水绿痕生。何必澄湖彻，移来有令名。

卷 333_129【失题】

杨巨源

何事慰朝夕，不逾诗酒情。山河空道路，蕃汉共刀兵。
礼乐新朝市，园林旧弟兄。向风一点泪，塞晚暮江平。

· 全唐诗 ·

卷 333_130 【春日题龙门香山寺】

杨巨源

众香天上梵王宫，钟磬寥寥半碧空。清景乍开松岭月，
乱流长响石楼风。山河杳映春云外，城阙参差晓树中。
欲尽出寻那可得，三千世界本无穷。

卷 333_131 【寄申州卢拱使君】

杨巨源

领郡仍闻总虎貔，致身还是见男儿。小船隔水催桃叶。
大鼓当风舞柘枝。酒坐微酣诸客倒，球场慢拨几人随。
从来乐事憎诗苦，莫放窗中远岫知。

卷 333_132 【郊居秋日酬奚赞府见寄】

杨巨源

繁菊照深居，芳香春不如。闻寻周处士，知伴庾尚书。
日晚汀洲旷，天晴草木疏。闲言挥麈柄，清步掩蜗庐。
野老能亲牧，高人念远渔。幽丛临古岸，轻叶度寒渠。
暮色无狂蝶，秋华有嫩蔬。若为酬郢曲，从此愧璠玙。

· 全唐诗 ·

卷 333_133 【圣恩洗雪镇州寄献裴相公】

杨巨源

天借春光洗绿林，战尘收尽见花阴。好生本是君王德，
忍死何妨壮士心。曾贺截云翻栅远，仍闻鬪冻下营深。
井陉昨日双旗入，萧相无言泪湿襟。

卷 333_134 【贺田仆射子弟荣拜金吾】

杨巨源

五侯恩泽不同年，叔侄朱门L K 连。凤沼九重相喜气，
雁行一半入祥烟。街衢烛影侵寒月，文武珂声叠晓天。
为数麒麟高阁上，谁家父子勒燕然。

卷 333_135 【和裴舍人观田尚书出猎】

杨巨源

圣代司空比玉清，雄藩观猎见皇情。云禽已觉高无益，
霜兔应知狡不成。飞鞚拥尘寒草尽，弯弓开月朔风生。
今朝始贺将军贵，紫禁诗人看旆旌。

· 全唐诗 ·

卷 333_136 【送李舍人归兰陵里】

杨巨源

清词举世皆藏篋，美酒当山为满樽。三亩嫩蔬临绮陌，
四行高树拥朱门。家贫境胜心无累，名重官闲口不论。
惟有道情常自足，启期天地易知恩。

卷 333_137 【同太常尉迟博士阙下待漏】

杨巨源

沈沈延阁抱丹墀，松色苔花颢露滋。爽气晓来青玉斝，
薰风宿在翠花旗。方瞻御陌三条广，犹觉仙门一刻迟。
此地含香从白首，冯唐何事怨明时。

卷 333_138 【见薛侍御戴不损裹帽子因赠】

杨巨源

潘郎对青镜，乌帽似新裁。晓露鸦初洗，春荷叶半开。
堪将护巾帟，不独隔尘埃。已见笼蝉翼，无因映鹿胎。
何人呈巧思，好手自西来。有意怜衰丑，烦君致一枚。

· 全唐诗 ·

卷 333_139 【胡二十拜户部兼判度支】

杨巨源

清机果被公材挠，雄拜知承圣主恩。庙略已调天府实，
国征方觉地官尊。徒言玉节将分阃，定是沙堤欲到门。
为爱山前新卜第，不妨风月事琴樽。

卷 333_140 【元日呈李逢吉舍人】

杨巨源

华夷文物贺新年，霜仗遥排凤阙前。一片彩霞迎曙日，
万条红烛动春天。称觞山色和元气，端冕炉香叠瑞烟。
共说正初当圣泽，试过西掖问群贤。

卷 333_141 【和杜中丞西禅院看花】

杨巨源

一林堆锦映千灯，照眼牵情欲不胜。知倚晴明娇自足，
解将颜色醉相仍。好风轻引香烟入，甘露才和粉艳凝。
深处最怜莺蹂践，懒时先被蝶侵袭。对持真境应无取，
分付空门又未能。迎日似翻红烧断，临流疑映绮霞层。

· 全唐诗 ·

幽含晚态怜丹桂，盛续春光识紫藤。每到花枝独惆怅，
山东惟有杜中丞。

卷 333_142【句】

杨巨源

三刀梦益州，一箭取辽城。
伊陟无闻祖，韦贤不到孙。

· 全唐诗 ·

卷三百三十四

卷 334_1【夏至日衡阳郡斋书怀】

令狐楚

一来江城守，七见江月圆。齿发将七十，乡关越三千。
褰帷罕游观，闭閤多沉眠。新节还复至，故交尽相捐。
何时狎闾阖，上诉高高天。

卷 334_2【八月十七日夜书怀】

令狐楚

三五既不留，二八又还过。金蟾著未出，玉树悲稍破。
谁向西园游，空归北堂卧。佳期信难得，永夕无可奈。
抚枕独高歌，烦君为予和。

· 全唐诗 ·

卷 334_3【九日言怀】

令狐楚

二九即重阳，天清野菊黄。近来逢此日，多是在他乡。
晚色霞千片，秋声雁一行。不能高处望，恐断老人肠。

卷 334_4【和寄谿七中丞】

令狐楚

仙吏秦峨别，新诗鄂渚来。才推今北斗，职赋旧三台。
雕镂心偏许，緘封手自开。何年相赠答，却得到中台。

卷 334_5【立秋日悲怀】

令狐楚

清晓上高台，秋风今日来。又添新节恨，犹抱故年哀。
泪岂挥能尽，泉终闭不开。更伤春月过，私服示无缞。

· 全唐诗 ·

卷 334_6【秋怀寄钱侍郎】

令狐楚

晚岁俱为郡，新秋各异乡。燕鸿一声叫，郢树尽青苍。
山露侵衣润，江风卷簟凉。相思如汉水，日夜向浔阳。

卷 334_7【立秋日】

令狐楚

平日本多恨，新秋偏易悲。燕词如惜别，柳意已呈衰。
事国终无补，还家未有期。心中旧气味，苦校去年时。

卷 334_8【赠毛仙翁】

令狐楚

宣州浑是上清宫，客有真人貌似童。绀发垂缨光髣髴，
细髯缘颌绿茸茸。壶中药物梯霞诀，肘后方书缩地功。
既许焚香为弟子，愿教年纪共椿同。

· 全唐诗 ·

卷 334_9【游义兴寺寄上李逢吉相公】

令狐楚

柳营无事诣莲宫，步步犹疑是梦中。劳役徒为万夫长，
闲游曾与二人同。凤鸾飞去仙巢在，龙象潜来讲席空。
松下花飞频伫立，一心千里忆梁公。

卷 334_10【游晋祠上李逢吉相公】

令狐楚

不立晋祠三十年，白头重到一凄然。泉声自昔锵寒玉，
草色虽秋耀翠钿。少壮同游宁有数，尊荣再会便无缘。
相思临水下双泪，寄入并汾向洛川。

卷 334_11【节度宣武酬乐天梦得】

令狐楚

蓬莱仙监客曹郎，曾枉高车客大梁。见拥旌旄治军旅，
知亲笔砚事文章。愁看柳色悬离恨，忆递花枝助酒狂。
洛下相逢肯相寄，南金璀璨玉凄凉。

· 全唐诗 ·

卷 334_12【奉和严司空重阳日同崔常侍、崔郎及诸公登龙山落帽台佳宴】

令狐楚

谢公秋思渺天涯，蜡屐登高为菊花。贵重近臣光绮席，
笑怜从事落乌纱。萸房暗绽红珠朵，茗碗寒供白露芽。
咏碎龙山归出号，马奔流电妓奔车。

卷 334_13【立春后言怀招汴州李匡衡推】

令狐楚

闲斋夜击唾壶歌，试望夷门奈远何。每听塞笳离梦断，
时窥清鉴旅愁多。初惊宵漏丁丁促，已觉春风习习和。
海内故人君最老，花开鞭马更相过。

卷 334_14【奉和仆射相公酬忠武李相公见寄之作】

令狐楚

丽藻飞来自相庭，五文相错八音清。初瞻绮色连霞色，
又听金声继玉声。才出山西文与武，欢从塞北弟兼兄。
白头老尹三川上，双和阳春喜复惊。

· 全唐诗 ·

卷 334_15【郡斋左偏栽竹百余竿，炎凉已周，青翠不改，
而为墙垣所蔽，有乖爱赏，假日命去斋居之东墙，由是俯临轩
阶，低映帟户，日夕相对，颇有R然之趣】

令狐楚

斋居栽竹北窗边，素壁新开映碧鲜。青藜近当行药处，
绿阴深到卧帷前。风惊晓叶如闻雨，月过春枝似带烟。
老子忆山心暂缓，退公闲坐对婵娟。

卷 334_16【省中直夜对雪寄李师素侍郎】

令狐楚

密雪纷初降，重城杳未开。杂花飞烂漫，连蝶舞徘徊。
洒散千株叶，销凝九陌埃。素华凝粉署，清气绕霜台。
明觉侵窗积，寒知度塞来。谢家争拟絮，越岭误惊梅。
暗魄微茫照，严飙次第催。稍封黄竹亚，先集紫兰摧。
孙室临书幌，梁园泛酒杯。静怀琼树倚，醉忆玉山颓。
翠陌饥乌噪，苍云远雁哀。此时方夜直，想望意悠哉。

· 全唐诗 ·

卷 334_17【南宫夜直宿，见李给事封题，其所下制敕知奏直在东省，因以诗寄】

令狐楚

番直同遥夜，严局限几重。青编书白雀，黄纸降苍龙。
北极丝纶句，东垣翰墨踪。尚垂玄露点，犹湿紫泥封。

炫眼凝仙烛，驰心袅禁钟。定应形梦寐，暂似接音容。
玉树春枝动，金樽腊酿醲。在朝君最旧，休浣许过从。

卷 334_18【将赴洛下，旅次汉南，献上相公二十兄言怀八韵】

令狐楚

台室名曾继，旌门节暂过。欢情老去少，苦事别离多。
便为开樽俎，应怜出网罗。百忧今已失，一醉孰知他。

帝德千年日，君恩万里波。许随黄绮辈，闲唱紫芝歌。
龙袞期重补，梅羹伫再和。嵩丘来携手，君子意如何。

· 全唐诗 ·

卷 334_19【青云干吕】

令狐楚

郁郁复纷纷，青霄干吕云。色令天下见，候向管中分。

远覆无人境，遥彰有德君。瑞容惊不散，冥感信稀闻。

湛露羞依草，南风耻带薰。恭惟汉武帝，余烈尚氛氲。

卷 334_20【圣明乐】

令狐楚

海浪恬月徼，边尘静异山。从今万里外，不复锁萧关。

卷 334_21【春闺思】

令狐楚

戴胜飞晴野，凌澌下浊河。春风楼上望，谁见泪痕多。

· 全唐诗 ·

卷 334_22【宫中乐五首】

令狐楚

楚塞金陵靖，巴山玉垒空。万方无一事，端拱大明宫。
雪霁长杨苑，冰开太液池。宫中行乐日，天下盛明时。
柳色烟相似，梨花雪不如。春风真有意，一一丽皇居。
月上宫花静，烟含苑树深。银台门已闭，仙漏夜沉沉。
九重青琐闼，百尺碧云楼。明月秋风起，珠帘上玉钩。

卷 334_23【春游曲三首】

令狐楚

晓游临碧殿，日上望春亭。芳树罗仙仗，晴山展翠屏。
一夜好风吹，新花一万枝。风前调玉管，花下簇金羁。
阊阖春风起，蓬莱雪水消。相将折杨柳，争取最长条。

· 全唐诗 ·

卷 334_24 【远别离二首】

令狐楚

杨柳黄金穗，梧桐碧玉枝。春来消息断，早晚是归期。

玳织鸳鸯履，金装翡翠簪。畏人相问著，不拟到城南。

卷 334_25 【闺人赠远二首】

令狐楚

君行登陇上，妾梦在闺中。玉箸千行落，银床一半空。

绮席春眠觉，纱窗晓望迷。朦胧残梦里，犹自在辽西。

卷 334_26 【从军词五首】

令狐楚

荒鸡隔水啼，汗马逐风嘶。终日随征旆，何时罢鼓鼙。

孤心眠夜雪，满眼是秋沙。万里犹防塞，三年不见家。

· 全唐诗 ·

却望冰河阔，前登雪岭高。征人几多在，又拟战临洮。

胡风千里惊，汉月五更明。纵有还家梦，犹闻出塞声。

暮雪连青海，阴霞覆白山。可怜班定远，生入玉门关。

卷 334_27【思君恩】

令狐楚

小苑莺歌歇，长门蝶舞多。眼看春又去，翠辇不经过。

卷 334_28【王昭君】

令狐楚

锦车天外去，毳幕雪中开。魏阙苍龙远，萧关赤雁哀。

卷 334_29【发潭州寄李宁常侍】

令狐楚

君今侍紫垣，我已堕青天。委废从兹日，旋归在几年。
心为西靡树，眼是北流泉。更过长沙去，江风满驿船。

· 全唐诗 ·

卷 334_30【李相薨后题断金集】

令狐楚

一览断金集，载悲埋玉人。牙弦千古绝，珠泪万行新。

卷 334_31【年少行四首】

令狐楚

少小边州惯放狂，骅骝蕃马射黄羊。
如今年老无筋力，犹倚营门数雁行。

家本清河住五城，须凭弓箭得功名。
等闲飞鞚秋原上，独向寒云试射声。

弓背霞明剑照霜，秋风走马出咸阳。
未收天子河湟地，不拟回头望故乡。

霜满中庭月满楼，金樽玉柱对清秋。
当年称意须行乐，不到天明不肯休。

· 全唐诗 ·

卷 334_32【塞下曲二首】

令狐楚

雪满衣裳冰满须，晓随飞将伐单于。
平生意气今何在，把得家书泪似珠。

边草萧条塞雁飞，征人南望泪沾衣。
黄尘满面长须战，白发生头未得归。

卷 334_33【游春词】

令狐楚

高楼晓见一花开，便觉春光四面来。
暖日晴云知次第，东风不用更相催。

卷 334_34【汉苑行】

令狐楚

云霞五采浮天阙，梅柳千般夹御沟。
不上黄花南北望，岂知春色满神州。

· 全唐诗 ·

卷 334_35 【中元日赠张尊师】

令狐楚

偶来人世值中元，不献玄都永日闲。

寂寂焚香在仙观，知师遥礼玉京山。

卷 334_36 【赴东都别牡丹】

令狐楚

十年不见小庭花，紫萼临开又别家。

上马出门回首望，何时更得到京华。

卷 334_37 【寄礼部刘郎中】

令狐楚

一别三年在上京，仙垣终日选群英。

除书每下皆先看，唯有刘郎无姓名。

· 全唐诗 ·

卷 334_38 【坐中闻思帝乡有感】

令狐楚

年年不见帝乡春，白日寻思夜梦频。

上酒忽闻吹此曲，坐中惆怅更何人。

卷 334_39 【春思寄梦得乐天】

令狐楚

花满中庭酒满樽，平明独坐到黄昏。

春来诗思偏何处，飞过函关入鼎门。

卷 334_40 【皇城中花园讥刘白赏春不及】

令狐楚

五凤楼西花一园，低枝小树尽芳繁。

洛阳才子何曾爱，下马贪趋广运门。

· 全唐诗 ·

卷 334_41 【相思河】

令狐楚

谁把相思号此河，塞垣车马往来多。

只应自古征人泪，洒向空洲作碧波。

卷 334_42 【三月晦日会李员外，座中频以老大不醉见讥，因有此赠】

令狐楚

三月唯残一日春，玉山倾倒白鸥驯。

不辞便学山公醉，花下无人作主人。

卷 334_43 【赋山】

令狐楚

山。耸峻，回环。沧海上，白云间。商老深寻，
谢公远攀。古岩泉滴滴，幽谷鸟关关。树岛西连陇塞，
猿声南彻荆蛮。世人只向簪裾老，芳草空余麋鹿闲。

· 全唐诗 ·

卷 334_44 【句】

令狐楚

何日居三署，终年尾百僚。
移石几回敲废印，开箱何处送新图。
唯应四仲祭，使者暂悲嗟。
偶逢蒲家郎，乃是葛仙客。行常乘青竹，饥即煮白石。
腰间嫌大组，心内保尺宅。我愿从之游，深卜炼上液。

· 全唐诗 ·

卷三百三十五

卷 335_1【享惠昭太子庙乐章】

裴度

重轮始发祥，齿胄方兴学。冥然升紫府，铿尔荐清乐。
奠斝致馨香，在庭纷羽籥。礼成神既醉，仿佛缙山鹤。

卷 335_2【夏日对雨】

裴度

登楼逃盛夏，万象正埃尘。对面雷唳树，当街雨趁人。
檐疏蛛网重，地湿燕泥新。吟罢清风起，荷香满四邻。

卷 335_3【白二十二侍郎有双鹤留在洛下，予西园多野水长松，可以栖息，遂以诗请之】

裴度

闻君有双鹤，羁旅洛城东。未放归仙去，何如乞老翁。

· 全唐诗 ·

且将临野水，莫闭在樊笼。好是长鸣处，西园白露中。

卷 335_4【窦七中丞见示初至夏口献元戎诗，辄戏和之】

裴度

出佐青油幕，来吟白雪篇。须为九皋鹤，莫上五湖船。
故态君应在，新诗我亦便。元侯看再入，好被暂流连。

卷 335_5【酬张秘书因寄马赠诗】

裴度

满城驰逐皆求马，古寺闲行独与君。代步本惭非逸足，
缘情何幸枉高文。若逢佳丽从将换，莫共骛驰角出群。
飞控著鞭能顾我，当时王粲亦从军。

卷 335_6【真慧寺】

裴度

遍寻真迹蹑莓苔，世事全抛不忍回。上界不知何处去，
西天移向此间来。岩前芍药师亲种，岭上青松佛手栽。
更有一般人不见，白莲花向半天开。

· 全唐诗 ·

卷 335_7【中书即事】

裴度

有意效承平，无功答圣明。灰心缘忍事，霜鬓为论兵。
道直身还在，恩深命转轻。盐梅非拟议，葵藿是平生。
白日长悬照，苍蝇谩发声。高阳旧田里，终使谢归耕。

卷 335_8【中和节诏赐公卿尺】

裴度

阳和行庆赐，尺度及群公。荷宠承佳节，倾心立大中。
短长思合制，远近贵攸同。共仰财成德，将酬分寸功。
作程施有政，垂范播无穷。愿续南山寿，千春奉圣躬。

卷 335_9【至日登乐游园】

裴度

阴律随寒改，阳和应节生。祥云观魏阙，瑞气映秦城。
验炭论时政，书云受岁盈。晷移长日至，雾敛远霄清。
景暖仙梅动，风柔御柳倾。那堪封得意，空对物华情。

· 全唐诗 ·

卷 335_10【奉酬中书相公至日圆丘摄事合于中书后阁宿斋
移止于集贤院叙怀见寄之作】

裴度

翼亮登三命，谟猷本一心。致斋移秘府，祇事见冲襟。

皓月当延阁，祥风自禁林。相庭方积玉，王度已如金。

运偶唐虞盛，情同丙魏深。幽兰与白雪，何处寄庸音。

卷 335_11【太原题厅壁】

裴度

危事经非一，浮荣得是空。白头官舍里，今日又春风。

卷 335_12【溪居】

裴度

门径俯清溪，茅檐古木齐。红尘飘不到，时有水禽啼。

· 全唐诗 ·

卷 335_13 【喜遇刘二十八】

裴度

病来佳兴少，老去旧游稀。笑语纵横作，杯觞络绎飞。

卷 335_14 【送刘】

裴度

不归丹掖去，铜竹漫云云。惟喜因过我，须知未贺君。

卷 335_15 【再送】

裴度

顷来多谑浪，此夕任喧纷。故态犹应在，行期未要闻。

卷 335_16 【凉风亭睡觉】

裴度

饱食缓行新睡觉，一瓯新茗侍儿煎。

· 全唐诗 ·

脱巾斜倚绳床坐，风送水声来耳边。

卷 335_17【雪中讶诸公不相访】

裴度

忆昨雨多泥又深，犹能携妓远过寻。
满空乱雪花相似，何事居然无赏心。

卷 335_18【傍水闲行】

裴度

闲馀何处觉身轻，暂脱朝衣傍水行。
鸥鸟亦知人意静，故来相近不相惊。

卷 335_19【句】

裴度

两人同日事征西，今日君先奉紫泥。
待平贼垒报天子，莫指仙山示武夫。
野人不识中书令，唤作陶家与谢家。
君若有心求逸足，我还留意在名姝。

卷三百三十六

卷 336_1【元和圣德诗】

韩愈

皇帝即阼，物无违拒。曰暘而暘，曰雨而雨。维是元年，
有盗在夏。欲覆其州，以踵近武。皇帝曰嘻，岂不在我。
负鄙为艰，纵则不可。出师征之，其众十旅。军其城下，
告以福祸。腹败枝披，不敢保聚。擢首陴外，降幡夜竖。
疆外之险，莫过蜀土。韦皋去镇，刘辟守后。血人于牙，
不肯吐口。开库啖士，曰随所取。汝张汝弓，汝鼓汝鼓。
汝为表书，求我帅汝。事始上闻，在列咸怒。皇帝曰然，
嗟远士女。苟附而安，则且付与。读命于庭，出节少府。
朝发京师，夕至其部。辟喜谓党，汝振而伍。蜀可全有，
此不当受。万牛脔炙，万瓮行酒。以锦缠股，以红帕首。
有愜其凶，有饵其诱。其出穰穰，队以万数。遂劫东川，
遂据城阻。皇帝曰嗟，其又可许。爰命崇文，分卒禁御。
有安其驱，无暴我野。日行三十，徐壁其右。辟党聚谋，
鹿头是守。崇文奉诏，进退规矩。战不贪杀，擒不滥数。
四方节度，整兵顿马。上章请讨，俟命起坐。皇帝曰嘻，
无汝烦苦。荆并洎梁，在国门户。出师三千，各选尔丑。
四军齐作，殷其如阜。或拔其角，或脱其距。长驱洋洋，

· 全唐诗 ·

无有龃龉。八月壬午，辟弃城走。载妻与妾，包裹稚乳。
是日崇文，入处其宇。分散逐捕，搜原剔藪。辟穷见窘，
无地自处。俯视大江，不见洲渚。遂自颠倒，若杵投臼。
取之江中，枷脰械手。妇女累累，啼哭拜叩。来献阙下，
以告庙社。周示城市，咸使观睹。解脱牵索，夹以砧斧。
婉婉弱子，赤立伛偻。牵头曳足，先断腰膂。次及其徒，
体骸撑拄。未乃取辟，骇汗如写。挥刀纷纭，争刳脰脯。
优赏将吏，扶珪缀组。帛堆其家，粟塞其庾。哀怜阵没，
廩给孤寡。赠官封墓，周匝宏溥。经战伐地，宽免租簿。
施令酬功，急疾如火。天地中间，莫不顺序。幽恒青魏，
东尽海浦。南至徐蔡，区外杂虏。怛威赧德，踟蹰蹈舞。
掉弃兵革，私习簞簠。来请来覲，十百其耦。皇帝曰吁，
伯父叔舅。各安尔位，训厥氓亩。正月元日，初见宗祖。
躬执百礼，登降拜俯。荐于新宫，视瞻梁梠。戚见容色，
泪落入俎。侍祠之臣，助我惻楚。乃以上辛，于郊用牡。
除于国南，鳞笋毛簠。庐幕周施，开揭磊砢。兽盾腾拏，
圆坛帖妥。天兵四罗，旂常婀娜。驾龙十二，鱼鱼雅雅。
宵升于丘，奠璧献瓛。众乐惊作，轰豳融冶。紫焰嘘呵，
高灵下堕。群星从坐，错落侈哆。日君月妃，焕赫嫫S。
渎鬼濛鸿，岳祗巢峨。饫沃膾芎，产祥降嘏。凤凰应奏，
舒翼自拊。赤麟黄龙，逶陀结纠。卿士庶人，黄童白叟。
踊跃欢呀，失喜噎欧。乾清坤夷，境落褰举。帝车回来，
日正当午。幸丹凤门，大赦天下。涤濯划秽，磨灭瑕垢。
续功臣嗣，拔贤任耆。孩养无告，仁滂施厚。皇帝神圣，
通达今古。听聪视明，一似尧禹。生知法式，动得理所。
天锡皇帝，为天下主。并包畜养，无异细钜。亿载万年，
敢有违者？皇帝俭勤，盥濯陶瓦。斥遣浮华，好此绋纆。

· 全唐诗 ·

敕戒四方，侈则有咎。天锡皇帝，多麦与黍。无召水旱，
耗于雀鼠。亿载万年，有富无窳。皇帝正直，别白善否。
擅命而狂，既翦既去。尽逐群奸，靡有遗侣。天锡皇帝，
厯臣硕辅。博问遐观，以置左右。亿载万年，无敢余侮。
皇帝大孝，慈祥悌友。怡怡愉愉，奉太皇后。浹于族亲，
濡及九有。天锡皇帝，与天齐寿。登兹太平，无怠永久。
亿载万年，为父为母。博士臣愈，职是训诂。作为歌诗，
以配吉甫。

卷 336_2【琴操十首·将归操】

韩愈

秋之水兮，其色幽幽；我将济兮，不得其由。涉其浅兮，
石啮我足；乘其深兮，龙入我舟。我济而悔兮，
将安归尤。归兮归兮，无与石斗兮，无应龙求。

卷 336_3【琴操十首·猗兰操】

韩愈

兰之猗猗，扬扬其香。不采而佩，于兰何伤。
今天之旋，其曷为然。我行四方，以日以年。
雪霜贸贸，荠麦之茂。子如不伤，我不尔觐。
荠麦之茂，荠麦之有。君子之伤，君子之守。

· 全唐诗 ·

卷 336_4【琴操十首·龟山操】

韩愈

龟之氛兮，不能云雨。龟之枿兮，不中梁柱。龟之大兮，
祇以奄鲁。知将隳兮，哀莫余伍。周公有鬼兮，嗟余归辅。

卷 336_5【琴操十首·越裳操】

韩愈

雨之施物以孳，我何意于彼为。自周之先，其艰其勤。
以有疆宇，私我后人。我祖在上，四方在下。厥临孔威，
敢戏以侮。孰荒于门，孰治于田。四海既均，越裳是臣。

卷 336_6【琴操十首·拘幽操】

韩愈

目窈窈兮，其凝其盲；耳肃肃兮，听不闻声。朝不日出兮，
夜不见月与星。有知无知兮，为死为生。呜呼，
臣罪当诛兮，天王圣明。

· 全唐诗 ·

卷 336_7【琴操十首·岐山操】

韩愈

我家于豳，自我先公。伊我承序，敢有不同。
今狄之人，将土我疆。民为我战，谁使死伤。
彼岐有岵，我往独处。尔莫余追，无思我悲。

卷 336_8【琴操十首·履霜操】

韩愈

父兮儿寒，母兮儿饥。儿罪当笞，逐儿何为。
儿在中野，以宿以处。四无人声，谁与儿语。
儿寒何衣，儿饥何食。儿行于野，履霜以足。
母生众儿，有母怜之。独无母怜，儿宁不悲。

卷 336_9【琴操十首·雉朝飞操】

韩愈

雉之飞，于朝日。群雌孤雄，意气横出。当东而西，
当啄而飞。随飞随啄，群雌粥粥。嗟我虽人，
曾不如彼雉鸡。生身七十年，无一妾与妃。

· 全唐诗 ·

卷 336_10【琴操十首·别鹄操】

韩愈

雄鹄衔枝来，雌鹄啄泥归。巢成不生子，大义当乖离。
江汉水之大，鹄身鸟之微。更无相逢日，且可绕树相随飞。

卷 336_11【琴操十首·残形操】

韩愈

有兽维狸兮，我梦得之。其身孔明兮，而头不知。
吉凶何为兮，觉坐而思。巫咸上天兮，识者其谁。

卷 336_12【南山诗】

韩愈

吾闻京城南，兹惟群山囿。东西两际海，巨细难悉究。
山经及地志，茫昧非受授。团辞试提挈，挂一念万漏。
欲休谅不能，粗叙所经觐。尝升崇丘望，戢戢见相凑。
晴明出棱角，缕脉碎分绣。蒸岚相湮洞，表里忽通透。
无风自飘簸，融液煦柔茂。横云时平凝，点点露数岫。
天空浮修眉，浓绿画新就。孤撑有巉绝，海浴褰鹏噉。

· 全唐诗 ·

春阳潜沮洳，濯濯吐深秀。岩峦虽嶒峵，软弱类含酎。
夏炎百木盛，荫郁增埋覆。神灵日歔歔，云气争结构。
秋霜喜刻轹，磔卓立癯瘦。参差相叠重，刚耿陵宇宙。
冬行虽幽墨，冰雪工琢镂。新曦照危峨，亿丈恒高袤。
明昏无停态，顷刻异状候。西南雄太白，突起莫间簟。
藩都配德运，分宅占丁戊。逍遥越坤位，诋讦陷乾窦。
空虚寒兢兢，风气较搜漱。朱维方烧日，阴霰纵腾糅。
昆明大池北，去觐偶晴昼。绵联穷俯视，倒侧困清沍。
微澜动水面，踊跃躁猱玃。惊呼惜破碎，仰喜呀不仆。
前寻径杜墅，岔蔽毕原陋。崎岖上轩昂，始得观览富。
行行将遂穷，岭陆烦互走。勃然思坼裂，拥掩难恕宥。
巨灵与夸蛾，远贾期必售。还疑造物意，固护蓄精祐。
力虽能排斡，雷电怯呵诟。攀缘脱手足，蹭蹬抵积愆。
茫如试矫首，堦塞生恟愁。威容丧萧爽，近新迷远旧。
拘官计日月，欲进不可又。因缘窥其湫，凝湛閟阴兽。
鱼虾可俯掇，神物安敢寇。林柯有脱叶，欲堕鸟惊救。
争衔弯环飞，投弃急哺鷁。旋归道回睨，达枿壮复奏。
吁嗟信奇怪，峙质能化贸。前年遭谴谪，探历得邂逅。
初从蓝田入，顾盼劳颈脰。时天晦大雪，泪目苦矐眴。
峻涂拖长冰，直上若悬溜。褰衣步推马，颠蹶退且复。
苍黄忘遐睎，所瞩才左右。杉篁咤蒲苏，杲耀攒介冑。
专心忆平道，脱险逾避臭。昨来逢清霁，宿愿忻始副。
峥嵘跻冢顶，倏闪杂鼯鼪。前低划开阔，烂漫堆众皱。
或连若相从，或蹙若相斗。或妥若弭伏，或竦若惊雉。
或散若瓦解，或赴若辐凑。或翩若船游，或决若马骤。
或背若相恶，或向若相佑。或乱若抽笋，或嶮若注灸。
或错若绘画，或缭若篆籀。或罗若星离，或蓊若云逗。

· 全唐诗 ·

或浮若波涛，或碎若锄耨。或如贲育伦，赌胜勇前购。
先强势已出，后钝嗔G 譟。或如帝王尊，丛集朝贱幼。
虽亲不褻狎，虽远不悖谬。或如临食案，肴核纷钉馐。
又如游九原，坟墓包椁柩。或累若盆罌，或揭若è豆。
或覆若曝鼈，或颓若寝兽。或蜿若藏龙，或翼若搏鹫。
或齐若友朋，或随若先后。或进若流落，或顾若宿留。
或戾若仇讎，或密若婚媾。或俨若峨冠，或翻若舞袖。
或屹若战阵，或围若蒐狩。或靡然东注，或偃然北首。
或如火熏焰，或若气饴飫。或行而不辍，或遗而不收。
或斜而不倚，或弛而不彀。或赤若秃鬣，或熏若柴樵。
或如龟拆兆，或若卦分繇。或前横若剥，或后断若姤。
延延离又属，夬夬叛还遘。喁喁鱼闯萍，落落月经宿。
閭閻树墙垣，巖巖驾库廐。参参削剑戟，焕焕衔莹琇。
敷敷花披萼，JJ屋摧霤。悠悠舒而安，兀兀狂以狃。
超超出犹奔，蠢蠢骇不懋。大哉立天地，经纪肖营腠。
厥初孰开张，黾勉谁劝侑。创兹朴而巧，戮力忍劳疚。
得非施斧斤，无乃假诅咒。鸿荒竟无传，功大莫酬侔。
尝闻于祠官，芬苾降歆嗅。斐然作歌诗，惟用赞报酎。

卷 336_19【谢自然诗】

韩愈

果州南充县，寒女谢自然。童騃无所识，但闻有神仙。
轻生学其术，乃在金泉山。繁华荣慕绝，父母慈爱捐。
凝心感魑魅，恍惚难具言。一朝坐空室，云雾生其间。

· 全唐诗 ·

如聆笙竽韵，来自冥冥天。白日变幽晦，萧萧风景寒。
檐楹暂明灭，五色光属联。观者徒倾骇，踟躅讵敢前。
须臾自轻举，飘若风中烟。茫茫八紘大，影响无由缘。
里胥上其事，郡守惊且叹。驱车领官吏，氓俗争相先。
入门无所见，冠履同蛻蝉。皆云神仙事，灼灼信可传。
余闻古夏后，象物知神奸。山林民可入，魍魉莫逢旃。
逶迤不复振，后世恣欺谩。幽明纷杂乱，人鬼更相残。
秦皇虽笃好，汉武帝洪其源。自从二主来，此祸竟连连。
木石生怪变，狐狸骋妖患。莫能尽性命，安得更长延。
人生处万类，知识最为贤。奈何不自信，反欲从物迁。
往者不可悔，孤魂抱深冤。来者犹可诫，余言岂空文。
人生有常理，男女各有伦。寒衣及饥食，在纺绩耕耘。
下以保子孙，上以奉君亲。苟异于此道，皆为弃其身。
噫乎彼寒女，永托异物群。感伤遂成诗，昧者宜书绅。

卷 336_20【秋怀诗十一首】

韩愈

窗前两好树，众叶光薿薿。秋风一拂披，策策鸣不已。
微灯照空床，夜半偏入耳。愁忧无端来，感叹成坐起。
天明视颜色，与故不相似。羲和驱日月，疾急不可恃。
浮生虽多涂，趋死惟一轨。胡为浪自苦，得酒且欢喜。

白露下百草，萧兰共雕悴。青青四墙下，已复生满地。
寒蝉暂寂寞，蟋蟀鸣自恣。运行无穷期，稟受气苦异。

· 全唐诗 ·

适时各得所，松柏不必贵。

彼时何卒卒，我志何曼曼。犀首空好饮，廉颇尚能饭。
学堂日无事，驱马适所愿。茫茫出门路，欲去聊自劝。
归还阅书史，文字浩千万。陈迹竟谁寻，贱嗜非贵献。
丈夫意有在，女子乃多怨。

秋气日恻恻，秋空日凌凌。上无枝上蜩，下无盘中蝇。
岂不感时节，耳目去所憎。清晓卷书坐，南山见高棱。
其下澄湫水，有蛟寒可罾。惜哉不得往，岂谓吾无能。

离离挂空悲，戚戚抱虚警。露泫秋树高，虫吊寒夜永。
敛退就新懦，趋营悼前猛。归愚识夷涂，汲古得修绠。
名浮犹有耻，味薄真自幸。庶几遗悔尤，即此是幽屏。

今晨不成起，端坐尽日景。虫鸣室幽幽，月吐窗罔罔。
丧怀若迷方，浮念剧含梗。尘埃慵伺候，文字浪驰骋。
尚须勉其顽，王事有朝请。

秋夜不可晨，秋日苦易暗。我无汲汲志，何以有此憾。
寒鸡空在栖，缺月烦屡瞰。有琴具徽弦，再鼓听愈淡。
古声久埋灭，无由见真滥。低心逐时趋，苦勉祇能暂。
有如乘风船，一纵不可缆。不如覩文字，丹铅事点勘。
岂必求赢馀，所要石与甌。

卷卷落地叶，随风走前轩。鸣声若有意，颠倒相追奔。

· 全唐诗 ·

空堂黄昏暮，我坐默不言。童子自外至，吹灯当我前。
问我我不应，馈我我不餐。退坐西壁下，读诗尽数编。
作者非今士，相去时已千。其言有感触，使我复凄酸。
顾谓汝童子，置书且安眠。丈夫属有念，事业无穷年。

霜风侵梧桐，众叶著树乾。空阶一片下，琤若摧琅玕。
谓是夜气灭，望舒霁其团。青冥无依倚，飞辙危难安。
惊起出户视，倚楹久洊澜。忧愁费晷景，日月如跳丸。
迷复不计远，为君驻尘鞍。

暮暗来客去，群器各收声。悠悠偃宵寂，亹亹抱秋明。
世累忽进虑，外忧遂侵诚。强怀张不满，弱念缺已盈。
诘屈避语阱，冥茫触心兵。败虞千金弃，得比寸草荣。
知耻足为勇，晏然谁汝令。

鲜鲜霜中菊，既晚何用好。扬扬弄芳蝶，尔生还不早。
运穷两值遇，婉变死相保。西风蛰龙蛇，众木日凋槁。
由来命分尔，泯灭岂足道。

卷 336_21【赴江陵途中，寄赠王二十补阙、李十一拾遗、
李二十七员外翰林三学士】

韩愈

孤臣昔放逐，血泣追愆尤。汗漫不省识，恍如乘桴浮。
或自疑上疏，上疏岂其由。是年京师旱，田亩少所收。

· 全唐诗 ·

上怜民无食，征赋半已休。有司恤经费，未免烦征求。
富者既云急，贫者固已流。传闻闾里间，赤子弃渠沟。
持男易斗粟，掉臂莫肯酬。我时出衢路，饿者何其稠。
亲逢道边死，伫立久咿嚅。归舍不能食，有如鱼中钩。
适会除御史，诚当得言秋。拜疏移閤门，为忠宁自谋。
上陈人疾苦，无令绝其喉。下陈畿甸内，根本理宜优。
积雪验丰熟，幸宽待蚕繅。天子恻然感，司空叹绸缪。
谓言即施設，乃反迁炎州。同官尽才俊，偏善柳与刘。
或虑语言泄，传之落冤讎。二子不宜尔，将疑断还不。
中使临门遣，顷刻不得留。病妹卧床褥，分知隔明幽。
悲啼乞就别，百请不露头。弱妻抱稚子，出拜忘惭羞。
龟勉不回顾，行行诣连州。朝为青云士，暮作白头囚。
商山季冬月，冰冻绝行輶。春风洞庭浪，出没惊孤舟。
逾岭到所任，低颜奉君侯。酸寒何足道，随事生疮疣。
远地触途异，吏民似猿猴。生狞多忿很，辞舌纷嘲啁。
白日屋檐下，双鸣斗鸺鹠。有蛇类两首，有蛊群飞游。
穷冬或摇扇，盛夏或重裘。颺起最可畏，訇哮簸陵丘。
雷霆助光怪，气象难比侔。疠疫忽潜遘，十家无一瘳。
猜嫌动置毒，对案辄怀愁。前日遇恩赦，私心喜还忧。
果然又羈縻，不得归锄耰。此府雄且大，腾凌尽戈矛。
栖栖法曹掾，何处事卑陬。生平企仁义，所学皆孔周。
早知大理官，不列三后俦。何况亲犴狱，敲榜发奸偷。
悬知失事势，恐自罹置罟。湘水清且急，凉风日修修。
胡为首归路，旅泊尚夷犹。昨者京使至，嗣皇传冕旒。
赫然下明诏，首罪诛共毖。复闻颠夭辈，峨冠进鸿畴。
班行再肃穆，璜珮鸣琅璆。伫继贞观烈，边封脱兜鍪。
三贤推侍从，卓荦倾枚邹。高议参造化，清文焕皇猷。

· 全唐诗 ·

协心辅齐圣，致理同毛輶。小雅咏鹿鸣，食苹贵呦呦。
遗风邈不嗣，岂忆尝同褐。矢志早衰换，前期拟蜉蝣。

自从齿牙缺，始慕舌为柔。因疾鼻又塞，渐能等薰莸。
深思罢官去，毕命依松楸。空怀焉能果，但见岁已遒。

殷汤闵禽兽，解网祝蛛蝥。雷焕掘宝剑，冤氛消斗牛。
兹道诚可尚，谁能借前筹。殷勤答吾友，明月非暗投。

卷 336_22【暮行河堤上】

韩愈

暮行河堤上，四顾不见人。衰草际黄云，感叹愁我神。
夜归孤舟卧，展转空及晨。谋计竟何就，嗟嗟世与身。

卷 336_23【夜歌】

韩愈

静夜有清光，闲堂仍独息。念身幸无恨，志气方自得。
乐哉何所忧，所忧非我力。

· 全唐诗 ·

卷 336_24【重云李观疾赠之】

韩愈

天行失其度，阴气来干阳。重云闭白日，炎燠成寒凉。
小人但咨怨，君子惟忧伤。饮食为减少，身体岂宁康。
此志诚足贵，惧非职所当。藜羹尚如此，肉食安可尝。
穷冬百草死，幽桂乃芬芳。且况天地间，大运自有常。
劝君善饮食，鸾凤本高翔。

卷 336_25【江汉答孟郊】

韩愈

江汉虽云广，乘舟渡无艰。流沙信难行，马足常往还。
凄风结冲波，狐裘能御寒。终宵处幽室，华烛光烂烂。
苟能行忠信，可以居夷蛮。嗟余与夫子，此义每所敦。
何为复见赠，缱绻在不谖。

卷 336_26【长安交游者赠孟郊】

韩愈

长安交游者，贫富各有徒。亲朋相过时，亦各有以娱。

· 全唐诗 ·

陋室有文史，高门有笙竽。何能辨荣悴，且欲分贤愚。

卷 336_27【岐山下二首】

韩愈

谁谓我有耳，不闻凤凰鸣。揭来岐山下，日暮边鸿惊。
丹穴五色羽，其名为凤凰。昔周有盛德，此鸟鸣高冈。
和声随祥风，窅窕相飘扬。闻者亦何事，但知时俗康。
自从公旦死，千载閟其光。吾君亦勤理，迟尔一来翔。

· 全唐诗 ·

卷三百三十七

卷 337_1 【北极赠李观】

韩愈

北极有羈羽，南溟有沈鳞。川源浩浩隔，影响两无因。
风云一朝会，变化成一身。谁言道里远，感激疾如神。
我年二十五，求友昧其人。哀歌西京市，乃与夫子亲。
所尚苟同趋，贤愚岂异伦。方为金石姿，万世无缁磷。
无为儿女态，憔悴悲贱贫。

卷 337_2 【此日足可惜，赠张籍】

韩愈

此日足可惜，此酒不足尝。舍酒去相语，共分一日光。
念昔未知子，孟君自南方。自矜有所得，言子有文章。
我名属相府，欲往不得行。思之不可见，百端在中肠。
维时月魄死，冬日朝在房。驱驰公事退，闻子适及城。
命车载之至，引坐于中堂。开怀听其说，往往副所望。

· 全唐诗 ·

孔丘殁已远，仁义路久荒。纷纷百家起，诡怪相披猖。
长老守所闻，后生习为常。少知诚难得，纯粹古已亡。
譬彼植园木，有根易为长。留之不遣去，馆置城西旁。
岁时未云几，浩浩观湖江。众夫指之笑，谓我知不明。
儿童畏雷电，鱼鳖惊夜光。州家举进士，选试繆所当。
驰辞对我策，章句何炜煌。相公朝服立，工席歌鹿鸣。
礼终乐亦阕，相拜送于庭。之子去须臾，赫赫流盛名。
窃喜复窃叹，谅知有所成。人事安可恒，奄忽令我伤。
闻子高第日，正从相公丧。哀情逢吉语，惝恍难为双。
暮宿偃师西，徒展转在床。夜闻汴州乱，绕壁行彷徨。
我时留妻子，仓卒不及将。相见不复期，零落甘所丁。
骄儿未绝乳，念之不能忘。忽如在我所，耳若闻啼声。
中途安得返，一日不可更。俄有东来说，我家免罹殃。
乘船下汴水，东去趋彭城。从丧朝至洛，还走不及停。
假道经盟津，出入行涧冈。日西入军门，羸马颠且僵。
主人愿少留，延入陈壶觞。卑贱不敢辞，忽忽心如狂。
饮食岂知味，丝竹徒轰轰。平明脱身去，决若惊凫翔。
黄昏次汜水，欲过无舟航。号呼久乃至，夜济十里黄。
中流上滩渚，沙水不可详。惊波暗合沓，星宿争翻芒。
辕马踟蹰鸣，左右泣仆童。甲午憩时门，临泉窥斗龙。
东南出陈许，陂泽平茫茫。道边草木花，红紫相低昂。
百里不逢人，角角雄雉鸣。行行二月暮，乃及徐南疆。
下马步堤岸，上船拜吾兄。谁云经艰难，百口无夭殇。
仆射南阳公，宅我睢水阳。筐中有余衣，盎中有馀粮。
闭门读书史，窗户忽已凉。日念子来游，子岂知我情。
别离未为久，辛苦多所经。对食每不饱，共言无倦听。
连延三十日，晨坐达五更。我友二三子，宦游在西京。

· 全唐诗 ·

东野窥禹穴，李翱观涛江。萧条千万里，会合安可逢。
淮之水舒舒，楚山直丛丛。子又舍我去，我怀焉所穷。
男儿不再壮，百岁如风狂。高爵尚可求，无为守一乡。

卷 337_3【幽怀】

韩愈

幽怀不能写，行此春江浚。适与佳节会，士女竞光阴。
凝妆耀洲渚，繁吹荡人心。间关林中鸟，亦知和为音。

岂无一尊酒，自酌还自吟。但悲时易失，四序迭相侵。
我歌君子行，视古犹视今。

卷 337_4【君子法天运】

韩愈

君子法天运，四时可前知。小人惟所遇，寒暑不可期。
利害有常势，取舍无定姿。焉能使我心，皎皎远忧疑。

· 全唐诗 ·

卷 337_5【落叶送陈羽】

韩愈

落叶不更息，断蓬无复归。飘飘终自异，邂逅暂相依。
悄悄深夜语，悠悠寒月辉。谁云少年别，流泪各沾衣。

卷 337_6【归彭城】

韩愈

天下兵又动，太平竟何时。訏谟者谁子，无乃失所宜。
前年关中旱，閤井多死饥。去岁东郡水，生民为流尸。
上天不虚应，祸福各有随。我欲进短策，无由至彤墀。
刳肝以为纸，沥血以书辞。上言陈尧舜，下言引龙夔。
言词多感激，文字少葳蕤。一读已自怪，再寻良自疑。
食芹虽云美，献御固已痴。缄封在骨髓，耿耿空自奇。
昨者到京城，屡陪高车驰。周行多俊异，议论无瑕疵。
见待颇异礼，未能去毛皮。到口不敢吐，徐徐俟其巇。
归来戎马间，惊顾似羁雌。连日或不语，终朝见相欺。
乘闲辄骑马，茫茫诣空陂。遇酒即酩酊，君知我为谁。

· 全唐诗 ·

卷 337_7 【醉后】

韩愈

煌煌东方星，奈此众客醉。初喧或忿争，中静杂嘲戏。
淋漓身上衣，颠倒笔下字。人生如此少，酒贱且勤置。

卷 337_8 【醉赠张秘书】

韩愈

人皆劝我酒，我若耳不闻。今日到君家，呼酒持劝君。
为此座上客，及余各能文。君诗多态度，蔼蔼春空云。
东野动惊俗，天葩吐奇芬。张籍学古淡，轩鹤避鸡群。
阿买不识字，颇知书八分。诗成使之写，亦足张吾军。
所以欲得酒，为文俟其醺。酒味既冷冽，酒气又氛氲。
性情渐浩浩，谐笑方云云。此诚得酒意，余外徒缤纷。
长安众富儿，盘馔罗膾荤。不解文字饮，惟能醉红裙。
虽得一饷乐，有如聚飞蚊。今我及数子，固无莠与薰。
险语破鬼胆，高词媲皇坟。至宝不雕琢，神功谢锄耘。
方今向太平，元凯承华勋。吾徒幸无事，庶以穷朝曛。

· 全唐诗 ·

卷 337_9【同冠峡】

韩愈

南方二月半，春物亦已少。维舟山水间，晨坐听百鸟。
宿云尚含姿，朝日忽升晓。羁旅感和鸣，囚拘念轻矫。
潺湲泪久进，诘曲思增绕。行矣且无然，盖棺事乃了。

卷 337_10【送惠师】

韩愈

惠师浮屠者，乃是不羁人。十五爱山水，超然谢朋亲。
脱冠剪头发，飞步遗踪尘。发迹入四明，梯空上秋旻。
遂登天台望，众壑皆嶙峋。夜宿最高顶，举头看星辰。
光芒相照烛，南北争罗陈。兹地绝翔走，自然严且神。
微风吹木石，澎湃闻韶钧。夜半起下视，溟波衔日轮。
鱼龙惊踊跃，叫啸成悲辛。怪气或紫赤，敲磨共轮囷。
金鸦既腾翥，七合俄清新。常闻禹穴奇，东去窥瓯闽。
越俗不好古，流传失其真。幽踪邈难得，圣路嗟长堙。
回临浙江涛，屹起高峨岷。壮志死不息，千年如隔晨。
是非竟何有，弃去非吾伦。凌江诣庐岳，浩荡极游巡。
崔嵬没云表，陂陀浸湖沦。是时雨初霁，悬瀑垂天绅。
前年往罗浮，步屐南海濶。大哉阳德盛，荣茂恒留春。
鹏鸞堕长翮，鲸戏侧修鳞。自来连州寺，曾未造城闉。

· 全唐诗 ·

日携青云客，探胜穷崖滨。太守邀不去，群官请徒频。
囊无一金资，翻谓富者贫。昨日忽不见，我令访其邻。
奔波自追及，把手问所因。顾我却兴叹，君宁异于民。
离合自古然，辞别安足珍。吾闻九疑好，夙志今欲伸。
斑竹啼舜妇，潇湘沈楚臣。衡山与洞庭，此固道所循。
寻崧方抵洛，历华遂之秦。浮游靡定处，偶往即通津。
吾言子当去，子道非吾遵。江鱼不池活，野鸟难笼驯。
吾非西方教，怜子狂且醇。吾嫉惰游者，怜子愚且谆。
去矣各异趣，何为浪沾巾。

卷 337_11【送灵师】

韩愈

佛法入中国，尔来七百年。齐民逃赋役，高士著幽禅。
官吏不之制，纷纷听其然。耕桑日失隶，朝署时遗贤。
灵师皇甫姓，胤胄本蝉联。少小涉书史，早能缀文篇。
中间不得意，失迹成延迁。逸志不拘教，轩腾断牵挛。
围棋斗白黑，生死随机权。七博在一掷，枭卢叱回旋。
战诗谁与敌，浩汗横戈鋌。饮酒尽百盏，嘲谐思逾鲜。
有时醉花月，高唱清且绵。四座咸寂默，杳如奏湘弦。
寻胜不惮险，黔江屡洄沿。瞿塘五七月，惊电让归船。
怒水忽中裂，千寻堕幽泉。环回势益急，仰见团团天。
投身岂得计，性命甘徒捐。浪沫蹙翻涌，漂浮再生全。
同行二十人，魂骨俱坑填。灵师不挂怀，冒涉道转延。
开忠二州牧，诗赋时多传。失职不把笔，珠玑为君编。

· 全唐诗 ·

强留费日月，密席罗婵娟。昨者至林邑，使君数开筵。
逐客三四公，盈怀赠兰荃。湖游泛潏沔，溪宴驻潺湲。
别语不许出，行裾动遭牵。邻州竞招请，书札何翩翩。
十月下桂岭，乘寒恣窥缘。落落王员外，争迎获其先。
自从入宾馆，占吝久能专。吾徒颇携被，接宿穷欢妍。
听说两京事，分明皆眼前。纵横杂谣俗，琐屑咸罗穿。
材调真可惜，朱丹在磨研。方将敛之道，且欲冠其颠。
韶阳李太守，高步凌云烟。得客辄忘食，开囊乞缁钱。
手持南曹叙，字重青瑶镌。古气参彖系，高标摧太玄。
维舟事干谒，披读头风痊。还如旧相识，倾壶畅幽悁。
以此复留滞，归骖几时鞭。

卷 337_12【县斋有怀】

韩愈

少小尚奇伟，平生足悲吒。犹嫌子夏儒，肯学樊迟稼。
事业窥皋稷，文章蔑曹谢。濯缨起江湖，缀佩杂兰麝。
悠悠指长道，去去策高驾。谁为倾国谋，自许连城价。
初随计吏贡，屡入泽宫射。虽免十上劳，何能一战霸。
人情忌殊异，世路多权诈。蹉跎颜遂低，摧折气愈下。
冶长信非罪，侯生或遭骂。怀书出皇都，衔泪渡清灞。
身将老寂寞，志欲死闲暇。朝食不盈肠，冬衣才掩骼。
军书既频召，戎马乃连跨。大梁从相公，彭城赴仆射。
弓箭围狐兔，丝竹罗酒炙。两府变荒凉，三年就休歇。
求官去东洛，犯雪过西华。尘埃紫陌春，风雨灵台夜。

· 全唐诗 ·

名声荷朋友，援引乏姻娅。虽陪彤庭臣，讵纵青冥鞅。
寒空耸危阙，晓色曜修架。捐躯辰在丁，铄翮时方蜡。
投荒诚职分，领邑幸宽赦。湖波翻日车，岭石坼天罅。
毒雾恒熏昼，炎风每烧夏。雷威固已加，飓势仍相借。
气象杳难测，声音吁可怕。夷言听未惯，越俗循犹乍。
指摘两憎嫌，睚眦互猜訝。只缘恩未报，岂谓生足藉。
嗣皇新继明，率土日流化。惟思涤瑕垢，长去事桑柘。
劓蒿开云扇，压颖抗风榭。禾麦种满地，梨枣栽绕舍。
儿童稍长成，雀鼠得驱吓。官租日输纳，村酒时邀迓。
闲爱老农愚，归弄小女姪。如今便可尔，何用毕婚嫁。

卷 337_13【合江亭】

韩愈

红亭枕湘江，蒸水会其左。瞰临眇空阔，绿净不可唾。
维昔经营初，邦君实王佐。翦林迁神祠，买地费家货。
梁栋宏可爱，结构丽匪过。伊人去轩腾，兹宇遂颓挫。
老郎来何暮，高唱久乃和。树兰盈九畹，栽竹逾万个。
长绠汲沧浪，幽蹊下坎坷。波涛夜俯听，云树朝对卧。
初如遗宦情，终乃最郡课。人生诚无几，事往悲岂奈。
萧条绵岁时，契阔继庸懦。胜事谁复论，丑声日已播。
中丞黜凶邪，天子闵穷饿。君侯至之初，闾里自相贺。
淹滞乐闲旷，勤苦劝慵惰。为余扫尘阶，命乐醉众座。
穷秋感平分，新月怜半破。愿书岩上石，勿使泥尘沓。

· 全唐诗 ·

卷 337_14【陪杜侍御游湘西两寺独宿有题一首，因献杨常侍】

韩愈

长沙千里平，胜地犹在险。况当江阔处，斗起势匪渐。
深林高玲珑，青山上琬琰。路穷台殿辟，佛事焕且俨。
剖竹走泉源，开廊架崖广。是时秋之残，暑气尚未敛。
群行忘后先，朋息弃拘检。客堂喜空凉，华榻有清簟。
涧蔬煮蒿芹，水果剥菱芡。伊余夙所慕，陪赏亦云忝。
幸逢车马归，独宿门不掩。山楼黑无月，渔火灿星点。
夜风一何喧，杉桧屡磨砭。犹疑在波涛，怵惕梦成魇。
静思屈原沈，远忆贾谊贬。椒兰争妒忌，絳灌共谗谄。
谁令悲生肠，坐使泪盈脸。翻飞乏羽翼，指摘困瑕玷。
珥貂藩维重，政化类分陕。礼贤道何优，奉己事苦俭。
大厦栋方隆，巨川楫行剡。经营诚少暇，游宴固已歉。
旅程愧淹留，徂岁嗟荏苒。平生每多感，柔翰遇频染。
展转岭猿鸣，曙灯青黯黯。

卷 337_15【岳阳楼别窦司直】

韩愈

洞庭九州间，厥大谁与让。南汇群崖水，北注何奔放。

· 全唐诗 ·

渚为七百里，吞纳各殊状。自古澄不清，环混无归向。
炎风日搜搅，幽怪多冗长。轩然大波起，宇宙隘而妨。
巍峨拔蒿华，腾踔较健壮。声音一何宏，轰轲车万两。
犹疑帝轩辕，张乐就空旷。蛟螭露笋簴，缟练吹组帐。
鬼神非人世，节奏颇跌踢。阳施见夸丽，阴闭感凄怆。
朝过宜春口，极北缺堤障。夜缆巴陵洲，丛芮才可傍。
星河尽涵泳，俯仰迷下上。余澜怒不已，喧聒鸣瓮盎。
明登岳阳楼，辉焕朝日亮。飞廉戢其威，清晏息纤纆。
泓澄湛凝绿，物影巧相况。江豚时出戏，惊波忽荡漾。
时当冬之孟，隙窍缩寒涨。前临指近岸，侧坐眇难望。
涤濯神魂醒，幽怀舒以畅。主人孩童旧，握手乍忻怅。
怜我窜逐归，相见得无恙。开筵交履舄，烂漫倒家酿。
杯行无留停，高柱送清唱。中盘进橙栗，投掷倾脯酱。
欢穷悲心生，婉变不能忘。念昔始读书，志欲干霸王。
屠龙破千金，为艺亦云亢。爱才不择行，触事得谗谤。
前年出官由，此祸最无妄。公卿采虚名，擢拜识天仗。
奸猜畏弹射，斥逐恣欺诳。新恩移府庭，逼侧厕诸将。
于嗟苦弩缓，但惧失宜当。追思南渡时，鱼腹甘所葬。
严程迫风帆，劈箭入高浪。颠沈在须臾，忠鲷谁复谅。
生还真可喜，克己自惩创。庶从今日后，粗识得与丧。
事多改前好，趣有获新尚。誓耕十亩田，不取万乘相。
细君知蚕织，稚子已能饷。行当挂其冠，生死君一访。

卷 337_16【送文畅师北游】

韩愈

昔在四门馆，晨有僧来谒。自言本吴人，少小学城阙。
已穷佛根源，粗识事輶輶。挛拘屈吾真，戒辖思远发。
荐绅秉笔徒，声誉耀前阙。从求送行诗，屡造忍颠蹶。
今成十馀卷，浩汗罗斧钺。先生闕穷巷，未得窥剏剏。
又闻识大道，何路补黥剔。出其囊中文，满听实清越。
谓僧当少安，草序颇排讷。上论古之初，所以施赏罚。
下开迷惑胸，窅豁劖株橛。僧时不听话，若饮水救渴。
风尘一出门，时日多如发。三年窜荒岭，守县坐深樾。
征租聚异物，诡制怛巾袜。幽穷谁共语，思想甚含咄。
昨来得京官，照壁喜见蝎。况逢旧亲识，无不比鹈鷃。
长安多门户，吊庆少休歇。而能勤来过，重惠安可揭。
当今圣政初，恩泽完獫狁。胡为不自暇，飘戾逐鸇鷃。
仆射领北门，威德压胡羯。相公镇幽都，竹帛烂勋伐。
酒场舞闺姝，猎骑围边月。开张篋中宝，自可得津筏。
从兹富裘马，宁复茹藜藿。余期报恩后，谢病老耕垆。
庇身指蓬茅，逞志纵獫狁。僧还相访来，山药煮可掘。

卷 337_17【答张彻】

韩愈

辱赠不知报，我歌尔其聆。首叙始识面，次言后分形。
道途绵万里，日月垂十龄。浚郊避兵乱，睢岸连门停。
肝胆一古剑，波涛两浮萍。渍墨窜旧史，磨丹注前经。
义苑手秘宝，文堂耳惊霆。暄晨躡露舄，暑夕眠风棂。
结友子让抗，请师我惭丁。初味犹啖蔗，遂通斯建瓴。
搜奇日有富，嗜善心无宁。石梁平迤迤，沙水光泠泠。
乘枯摘野艳，沈细抽潜腥。游寺去陟巘，寻径返穿汀。
缘云竹竦竦，失路麻冥冥。淫潦忽翻野，平芜眇开溟。
防泄堑夜塞，惧冲城昼扃。及去事戎辔，相逢宴军伶。
觥秋纵兀兀，猎旦驰駉駉。从赋始分手，朝京忽同龄。
急时促暗棹，恋月留虚亭。毕事驱传马，安居守窗萤。
梅花灞水别，宫烛骊山醒。省选逮投足，乡宾尚摧翎。
尘祛又一掺，泪眦还双荧。洛邑得休告，华山穷绝陉。
倚岩睨海浪，引袖拂天星。日驾此回辖，金神所司刑。
泉绅拖修白，石剑攒高青。磴藓澁拳跼，梯飈颭伶俜。
悔狂已咋指，垂诚仍镌铭。峨豸忝备列，伏蒲愧分泾。
微诚慕横草，琐力摧撞筵。叠雪走商岭，飞波航洞庭。
下险疑堕井，守官类拘圉。荒餐茹獠蛊，幽梦感湘灵。
刺史肃蕃蔡，吏人沸蝗螟。点缀簿上字，趋跄閤前铃。
赖其饱山水，得以娱瞻听。紫树雕斐亶，碧流滴珑玲。
映波铺远锦，插地列长屏。愁狎酸骨死，怪花醉魂馨。
潜苞绛实坼，幽乳翠毛零。赦行五百里，月变三十冥。

· 全唐诗 ·

渐阶群振鹭，入学诲螟蛉。苹甘谢鸣鹿，壘满惭罄瓶。
罔罔抱瑚琏，飞飞联鹳鷖。鱼鬣欲脱背，虬光先照硎。
岂独出丑类，方当动朝廷。勤来得晤语，勿惮宿寒厅。

卷 337_18【荐士】

韩愈

周诗三百篇，雅丽理训诂。曾经圣人手，议论安敢到。
五言出汉时，苏李首更号。东都渐瀰漫，派别百川导。
建安能者七，卓犖变风操。逶迤抵晋宋，气象日凋耗。
中间数鲍谢，比近最清奥。齐梁及陈隋，众作等蝉噪。
搜春摘花卉，沿袭伤剽盗。国朝盛文章，子昂始高蹈。
勃兴得李杜，万类困陵暴。后来相继生，亦各臻阃奥。
有穷者孟郊，受材实雄骜。冥观洞古今，象外逐幽好。
横空盘硬语，妥帖力排奂。敷柔肆纤馀，奋猛卷海潦。
荣华肖天秀，捷疾逾响报。行身践规矩，甘辱耻媚灶。
孟轲分邪正，眸子看了眊。杳然粹而清，可以镇浮躁，
酸寒溧阳尉，五十几何耄。孜孜营甘旨，辛苦久所冒。
俗流知者谁，指注竞嘲傲。圣皇索遗逸，髦士日登造。
庙堂有贤相，爱遇均覆焘。况承归与张，二公迭嗟悼。
青冥送吹嘘，强箭射鲁缟。胡为久无成，使以归期告。
霜风破佳菊，嘉节迫吹帽。念将决焉去，感物增恋嫪。
彼微水中荇，尚烦左右芼。鲁侯国至小，庙鼎犹纳郛。
幸当择珉玉，宁有弃珪瑁。悠悠我之思，扰扰风中纛。
上言愧无路，日夜惟心祷。鹤翎不天生，变化在啄菹。

· 全唐诗 ·

通波非难图，尺地易可漕。善善不汲汲，后时徒悔懊。
救死具八珍，不如一箪藁。微诗公勿诮，恺悌神所劳。

卷 337_19【喜侯喜至赠张籍张彻】

韩愈

昔我在南时，数君常在念。摇摇不可止，讽咏日喁噉。
如以膏濯衣，每渍垢逾染。又如心中疾，针石非所砭。
常思得游处，至死无倦厌。地遐物奇怪，水镜涵石剑。
荒花穷漫乱，幽兽工腾闪。碍目不忍窥，忽忽坐昏垫。
逢神多所祝，岂忘灵即验。依依梦归路，历历想行店。
今者诚自幸，所怀无一欠。孟生去虽索，侯氏来还歉。
欹眠听新诗，屋角月艳艳。杂作承间骋，交惊舌互 。
缤纷指瑕疵，拒捍阻城堞。以余经摧挫，固请发铅槩。
居然妄推让，见谓熬天焰。比疏语徒妍，悚息不敢占。
呼奴具盘餐，钉饷鱼菜贍。人生但如此，朱紫安足僭。

卷 337_20【古风】

韩愈

今日曷不乐，幸时不用兵。无曰既蹙矣，乃尚可以生。
彼州之赋，去汝不顾。此州之役，去我奚适。一邑之水，
可走而违。天下汤汤，曷其而归。好我衣服，甘我饮食。

· 全唐诗 ·

无念百年，聊乐一日。

卷 337_21 【驽骥】

韩愈

驽骥诚齷齪，市者何其稠。力小若易制，价微良易酬。
渴饮一斗水，饥食一束刍。嘶鸣当大路，志气若有馀。
骥骥生绝域，自矜无匹俦。牵驱入市门，行者不为留。
借问价几何，黄金比嵩丘。借问行几何，咫尺视九州。
饥食玉山禾，渴饮醴泉流。问谁能为御，旷世不可求。
惟昔穆天子，乘之极遐游。王良执其辔，造父挟其辔。
因言天外事，茫惚使人愁。驽骥谓骥骥，饿死余尔羞。
有能必见用，有德必见收。孰云时与命，通塞皆自由。
骥骥不敢言，低徊但垂头。人皆劣骥骥，共以驽骥优。
喟余独兴叹，才命不同谋。寄诗同心子，为我商声讴。

卷 337_22 【马厌谷】

韩愈

马厌谷兮，士不厌糠粃；土被文绣兮，士无短褐。
彼其得志兮，不我虞；一朝失志兮，其何如。已焉哉，
嗟嗟乎鄙夫。

· 全唐诗 ·

卷 337_23 【出门】

韩愈

长安百万家，出门无所之。岂敢尚幽独，与世实参差。
古人虽已死，书上有其辞。开卷读且想，千载若相期。
出门各有道，我道方未夷。且于此中息，天命不吾欺。

卷 337_24 【嗟哉董生行】

韩愈

淮水出桐柏，山东驰遥遥千里不能休；淝水出其侧，
不能千里百里入淮流。寿州属县有安丰，
唐贞元时县人董生召南隐居行义于其中。刺史不能荐，
天子不闻名声。爵禄不及门，门外惟有吏，
日来征租更索钱。嗟哉董生朝出耕夜归读古人书，
尽日不得息。或山而樵，或水而渔。入厨具甘旨，
上堂问起居。父母不戚戚，妻子不咨咨。嗟哉董生孝且慈，
人不识，惟有天翁知，生祥下瑞无时期。家有狗乳出求食，
鸡来哺其儿。啄啄庭中拾虫蚁，哺之不食鸣声悲。
彷徨踟躅久不去，以翼来覆待狗归。嗟哉董生，谁将与俦？
时之人，夫妻相虐，兄弟为讎。食君之禄，而令父母愁。
亦独何心，嗟哉董生无与俦。

· 全唐诗 ·

卷 337_25 【烽火】

韩愈

登高望烽火，谁谓塞尘飞。王城富且乐，曷不事光辉。
勿言日已暮，相见恐行稀。愿君熟念此，秉烛夜中归。
我歌宁自感，乃独泪沾衣。

卷 337_26 【汴州乱二首】

韩愈

汴州城门朝不开，天狗堕地声如雷。健儿争夸杀留后，
连屋累栋烧成灰。诸侯咫尺不能救，孤士何者自兴哀。
母从子走者为谁，大夫夫人留后儿。昨日乘车骑大马，
坐者起趋乘者下。庙堂不肯用干戈，呜呼奈汝母子何。

卷 337_27 【利剑】

韩愈

利剑光耿耿，佩之使我无邪心。故人念我寡徒侣，
持用赠我比知音。我心如冰剑如雪，不能刺谗夫，
使我心腐剑锋折。决云中断开青天，噫！

· 全唐诗 ·

剑与我俱变化归黄泉。

卷 337_28【龔龔】

韩愈

龔龔当世士，所忧在饥寒。但见贱者悲，不闻贵者叹。
大贤事业异，远抱非俗观。报国心皎洁，念时涕洟澜。

妖姬坐左右，柔指发哀弹。酒肴虽日陈，感激宁为欢。
秋阴欺白日，泥潦不少干。河堤决东郡，老弱随惊湍。

天意固有属，谁能诘其端。愿辱太守荐，得充谏诤官。
排云叫阊阖，披腹呈琅玕。致君岂无术，自进诚独难。

· 全唐诗 ·

卷三百三十八

卷 338_1【河之水二首寄子侄老成】

韩愈

河之水，去悠悠。我不如，水东流。我有孤侄在海隅，
三年不见兮使我生忧。日复日，夜复夜。三年不见汝，
使我鬓发未老而先化。

河之水，悠悠去。我不如，水东注。我有孤侄在海浦，
三年不见兮使我心苦。采蕨于山，缗鱼于渊。我徂京师，
不远其还。

卷 338_2【山石】

韩愈

山石荦确行径微，黄昏到寺蝙蝠飞。升堂坐阶新雨足，
芭蕉叶大支子肥。僧言古壁佛画好，以火来照所见稀。
铺床拂席置羹饭，疏粝亦足饱我饥。夜深静卧百虫绝，
清月出岭光入扉。天明独去无道路，出入高下穷烟霏。

· 全唐诗 ·

山红涧碧纷烂漫，时见松栢皆十围。当流赤足蹋涧石，
水声激激风吹衣。人生如此自可乐，岂必局束为人鞿。
嗟哉吾党二三子，安得至老不更归。

卷 338_3【天星送杨凝郎中贺正】

韩愈

天星牢落鸡喔咿，仆夫起餐车载脂。正当穷冬寒未已，
借问君子行安之。会朝元正无不至，受命上宰须及期。
侍从近臣有虚位，公今此去归何时。

卷 338_4【汴泗交流赠张仆射】

韩愈

汴泗交流郡城角，筑场十步平如削。短垣三面缭逶迤，
击鼓腾腾树赤旗。新秋朝凉未见日，公早结束来何为。
分曹决胜约前定，百马攒蹄近相映。球惊杖奋合且离，
红牛缨绂黄金羁。侧身转臂著马腹，霹雳应手神珠驰。
超遥散漫两闲暇，挥霍纷纭争变化。发难得巧意气粗，
欢声四合壮士呼。此诚习战非为剧，岂若安坐行良图。
当今忠臣不可得，公马莫走须杀贼。

· 全唐诗 ·

卷 338_5【忽忽】

韩愈

忽忽乎余未知生之为乐也，愿脱去而无因。
安得长翮大翼如云生我身，乘风振奋出七合。
绝浮尘，死生哀乐两相弃，是非得失付闲人。

卷 338_6【鸣雁】

韩愈

嗷嗷鸣雁鸣且飞，穷秋南去春北归。去寒就暖识所依，
天长地阔栖息稀。风霜酸苦稻粱微，毛羽摧落身不肥。
裴回反顾群侣违。哀鸣欲下洲渚非。江南水阔朝云多，
草长沙软无网罗。闲飞静集鸣相和，违忧怀惠性匪他。
凌风一举君谓何。

卷 338_7【龙移】

韩愈

天昏地黑蛟龙移，雷惊电激雄雌随。
清泉百丈化为土，鱼鳖枯死吁可悲。

· 全唐诗 ·

卷 338_8【雉带箭】

韩愈

原头火烧静兀兀，野雉畏鹰出复没。将军欲以巧伏人，
盘马弯弓惜不发。地形渐窄观者多，雉惊弓满劲箭加。
冲人决起百余尺，红翎白镞相倾斜。将军仰笑军吏贺，
五色离披马前堕。

卷 338_9【条山苍】

韩愈

条山苍，河水黄。浪波沄沄去，松柏在山冈。

卷 338_10【赠郑兵曹】

韩愈

尊酒相逢十载前，君为壮夫我少年。尊酒相逢十载后，
我为壮夫君白首。我材与世不相当，戢鳞委翅无复望。
当今贤俊皆周行，君何为乎亦遑遑。杯行到君莫停手，
破除万事无过酒。

· 全唐诗 ·

卷 338_11 【桃源图】

韩愈

神仙有无何渺茫，桃源之说诚荒唐。流水盘回山百转，
生绡数幅垂中堂。武陵太守好事者，题封远寄南宫下。
南宫先生忻得之，波涛入笔驱文辞。文工画妙各臻极，
异境恍惚移于斯。架岩凿谷开宫室，接屋连墙千万日。
嬴颠刘蹶了不闻，地坼天分非所恤。种桃处处惟开花，
川原近远蒸红霞。初来犹自念乡邑，岁久此地还成家。
渔舟之子来何所，物色相猜更问语。大蛇中断丧前王，
群马南渡开新主。听终辞绝共凄然，自说经今七百年。
当时万事皆眼见，不知几许犹流传。争持酒食来相馈，
礼数不同樽俎异。月明伴宿玉堂空，骨冷魂清无梦寐。
夜半金鸡啁晰鸣，火轮飞出客心惊。人间有累不可住，
依然离别难为情。船开棹进一回顾，万里苍苍烟水暮。
世俗宁知伪与真，至今传者武陵人。

卷 338_12 【东方半明】

韩愈

东方半明大星没，独有太白配残月。嗟尔残月勿相疑，
同光共影须臾期。残月晖晖，太白睽睽。
鸡三号，更五点。

· 全唐诗 ·

卷 338_13【赠唐衢】

韩愈

虎有爪兮牛有角，虎可搏兮牛可触。奈何君独抱奇材，
手把锄犁饿空谷。当今天子急贤良，匭函朝出开明光。
胡不上书自荐达，坐令四海如虞唐。

卷 338_14【贞女峡】

韩愈

江盘峡束春湍豪，风雷战斗鱼龙逃。悬流轰轰射水府，
一泻百里翻云涛。漂船摆石万瓦裂，咫尺性命轻鸿毛。

卷 338_15【赠侯喜】

韩愈

吾党侯生字叔í，呼我持竿钓温水。平明鞭马出都门，
尽日行行荆棘里。温水微茫绝又流，深如车辙阔容輶。
虾蟆跳过雀儿浴，此纵有鱼何足求。我为侯生不能已，
盘针擘粒投泥滓。晡时坚坐到黄昏，手倦目劳方一起。
暂动还休未可期，虾行蛭渡似皆疑。举竿引线忽有得，

· 全唐诗 ·

一寸才分鳞与鬣。是日侯生与韩子，良久叹息相看悲。
我今行事尽如此，此事正好为吾规。半世遑遑就举选，
一名始得红颜衰。人间事势岂不见，徒自辛苦终何为。
便当提携妻与子，南入箕颍无还时。叔！君今气方锐，
我言至切君勿嗤。君欲钓鱼须远去，大鱼岂肯居沮洳。

卷 338_16【古意】

韩愈

太华峰头玉井莲，开花十丈藕如船。冷比雪霜甘比蜜，
一片入口沈痼痊。我欲求之不惮远，青壁无路难夤缘。
安得长梯上摘实，下种七泽根株连。

卷 338_17【八月十五夜赠张功曹】

韩愈

纤云四卷天无河，清风吹空月舒波。沙平水息声影绝，
一杯相属君当歌。君歌声酸辞且苦，不能听终泪如雨。
洞庭连天九疑高，蛟龙出没猩鼯号。十生九死到官所，
幽居默默如藏逃。下床畏蛇食畏药，海气湿蛰熏腥臊。
昨者州前捶大鼓，嗣皇继圣登夔皋。赦书一日行万里，
罪从大辟皆除死。迁者追回流者还，涤瑕荡垢清朝班。
州家申名使家抑，坎轲只得移荆蛮。判司卑官不堪说，

· 全唐诗 ·

未免捶楚尘埃间。同时辈流多上道，天路幽险难追攀。
君歌且休听我歌，我歌今与君殊科。一年明月今宵多，
人生由命非由他。有酒不饮奈明何。

卷 338_18【谒衡岳庙遂宿岳寺题门楼】

韩愈

五岳祭秩皆三公，四方环镇嵩当中。火维地荒足妖怪，
天假神柄专其雄。喷云泄雾藏半腹，虽有绝顶谁能穷。
我来正逢秋雨节，阴气晦昧无清风。潜心默祷若有应，
岂非正直能感通。须臾静扫众峰出，仰见突兀撑青空。
紫盖连延接天柱，石廪腾掷堆祝融。森然魄动下马拜，
松柏一径趋灵宫。粉墙丹柱动光彩，鬼物图画填青红。
升阶伛偻荐脯酒，欲以菲薄明其衷。庙令老人识神意，
睢盱侦伺能鞠躬。手持杯珓导我掷，云此最吉馀难同。
窜逐蛮荒幸不死，衣食才足甘长终。侯王将相望久绝，
神纵欲福难为功。夜投佛寺上高阁，星月掩映云朦胧。
猿鸣钟动不知曙，杲杲寒日生于东。

卷 338_19【岵嵝山】

韩愈

岵嵝山尖神禹碑，字青石赤形模奇。科斗拳身薤倒披，

· 全唐诗 ·

鸾飘凤泊拿虎螭。事严迹秘鬼莫窥，道人独上偶见之，
我来咨嗟涕涟洏。千搜万索何处有，森森绿树猿猱悲。

卷 338_20【永贞行】

韩愈

君不见太皇谅阴未出令，小人乘时偷国柄。
北军百万虎与貔，天子自将非他师。一朝夺印付私党，
懔懔朝士何能为。狐鸣枭噪争署置，睚眦跳踉相妩媚。
夜作诏书朝拜官，超资越序曾无难。公然白日受贿赂，
火齐磊落堆金盘。元臣故老不敢语，昼卧涕泣何汍澜。
董贤三公谁复惜，侯景九锡行可叹。国家功高德且厚，
天位未许庸夫干。嗣皇卓荦信英主，文如太宗武高祖。
膺图受禅登明堂，共流幽州鲛死羽。四门肃穆贤俊登，
数君匪亲岂其朋。郎官清要为世称，荒郡迫野嗟可矜。
湖波连天日相腾，蛮俗生梗瘴疠烝。江氛岭祲昏若凝，
一蛇两头见未曾。怪鸟鸣唤令人憎，蛊虫群飞夜扑灯。
雄虺毒螫堕股肱，食中置药肝心崩。左右使令诈难凭，
慎勿浪信常兢兢。吾尝同僚情可胜，具书目见非妄征，
嗟尔既往宜为惩。

· 全唐诗 ·

卷 338_21【洞庭湖阻风赠张十一署】

韩愈

十月阴气盛，北风无时休。苍茫洞庭岸，与子维双舟。
雾雨晦争泄，波涛怒相投。犬鸡断四听，粮绝谁与谋。
相去不容步，险如碍山丘。清淡可以饱，梦想接无由。
男女喧左右，饥啼但啾啾。非怀北归兴，何用胜羁愁。
云外有白日，寒光自悠悠。能令暂开霁，过是吾无求。

卷 338_22【李花赠张十一署】

韩愈

江陵城西二月尾，花不见桃惟见李。风揉雨练雪羞比，
波涛翻空杳无际。君知此处花何似，白花倒烛天夜明，
群鸡惊鸣官吏起。金乌海底初飞来，朱辉散射青霞开。
迷魂乱眼看得得，照耀万树繁如堆。念昔少年著游燕，
对花岂省曾辞杯。自从流落忧感集，欲去未到先思回。
只今四十已如此，后日更老谁论哉。力携一尊独就醉，
不忍虚掷委黄埃。

· 全唐诗 ·

卷 338_23【杏花】

韩愈

居邻北郭古寺空，杏花两株能白红。曲江满园不可到，
看此宁避雨与风。二年流窜出岭外，所见草木多异同。
冬寒不严地恒泄，阳气发乱无全功。浮花浪蕊镇长有，
才开还落瘴雾中。山榴踯躅少意思，照耀黄紫徒为丛。
鹧鸪钩辀猿叫歇，杳杳深谷攒青枫。岂如此树一来玩，
若在京国情何穷。今旦胡为忽惆怅，万片飘泊随西东。
明年更发应更好，道人莫忘邻家翁。

卷 338_24【感春四首】

韩愈

我所思兮在何所，情多地遐兮遍处处。东西南北皆欲往，
千江隔兮万山阻。春风吹园杂花开，朝日照屋百鸟语。
三杯取醉不复论，一生长恨奈何许。

皇天平分成四时，春气漫诞最可悲。杂花妆林草盖地，
白日坐上倾天维。蜂喧鸟咽留不得，红萼万片从风吹。
岂如秋霜虽惨冽，摧落老物谁惜之。为此径须沽酒饮，
自外天地弃不疑。近怜李杜无检束，烂漫长醉多文辞。
屈原离骚二十五，不肯餽啜糟与醅。惜哉此子巧言语，

· 全唐诗 ·

不到圣处宁非痴。幸逢尧舜明四目，条理品汇皆得宜。
平明出门暮归舍，酩酊马上知为谁。

朝骑一马出，暝就一床卧。诗书渐欲抛，节行久已惰。
冠欹感发秃，语误惊齿堕。孤负平生心，已矣知何奈。
我恨不如江头人，长网横江遮紫鳞。独宿荒陂射鳬雁，
卖纳租赋官不嗔。归来欢笑对妻子，衣食自给宁羞贫。
今者无端读书史，智慧只足劳精神。画蛇著足无处用，
两鬓霜白趋埃尘。乾愁漫解坐自累，与众异趣谁相亲。
数杯浇肠虽暂醉，皎皎万虑醒还新。百年未满足不得死，
且可勤买抛青春。

卷 338_25【寒食日出游】

韩愈

李花初发君始病，我往看君花转盛。走马城西惆怅归，
不忍千株雪相映。迩来又见桃与梨，交开红白如争竞。
可怜物色阻携手，空展霜缣吟九咏。纷纷落尽泥与尘，
不共新妆比端正。桐华最晚今已繁，君不强起时难更。
关山远别固其理，寸步难见始知命。忆昔与君同贬官，
夜渡洞庭看斗柄。岂料生还得一处，引袖拭泪悲且庆。
各言生死两追随，直置心亲无貌敬。念君又署南荒吏，
路指鬼门幽且夐。三公尽是知音人，曷不荐贤陛下圣。
囊空甑倒谁救之，我今一食日还并。自然忧气损天和，
安得康强保天性。断鹤两翅鸣何哀，絜骥四足气空横。

· 全唐诗 ·

今朝寒食行野外，绿杨匝岸蒲生进。宋玉庭边不见人，
轻浪参差鱼动镜。自嗟孤贱足瑕疵，特见放纵荷宽政。
饮酒宁嫌盏底深，题诗尚倚笔锋劲。明宵故欲相就醉，
有月莫愁当火令。

卷 338_26【忆昨行和张十一】

韩愈

忆昨夹钟之吕初吹灰，上公礼罢元侯回。车载牲牢瓮舁酒，
并召宾客延邹枚。腰金首翠光照耀，丝竹迥发清以哀。
青天白日花草丽，玉斝屡举倾金罍。张君名声座所属，
起舞先醉长松摧。宿醒未解旧店作，深室静卧闻风雷。
自期殒命在春序，屈指数日怜婴孩。危辞苦语感我耳，
泪落不掩何漼漼。念昔从君渡湘水，大帆夜划穷高桅。
阳山鸟路出临武，驿马拒地驱频隤。践蛇茹蛊不择死，
忽有飞诏从天来。伾文未揃崖州炽，虽得赦宥恒愁猜。
近者三奸悉破碎，羽窟无底幽黄能。眼中了了见乡国，
知有归日眉方开。今君纵署天涯吏，投檄北去何难哉。
无妄之忧勿药喜，一善自足褫千灾。头轻目朗肌骨健，
古剑新劘磨尘埃。殃消祸散百福并，从此直至耆与鲐。
嵩山东头伊洛岸，胜事不假须穿栽。君当先行我待满，
沮溺可继穷年推。

· 全唐诗 ·

卷三百三十九

卷 339_1 【刘生诗】

韩愈

生名师命其姓刘，自少轩轻非常俦。弃家如遗来远游，
东走梁宋暨扬州。遂凌大江极东陲，洪涛春天禹穴幽。
越女一笑三年留，南逾横岭入炎州。青鲸高磨波山浮，
怪魅炫曜堆蛟虬。山P 讙噪猩猩游，毒气烁体黄膏流。
问胡不归良有由，美酒倾水炙肥牛。妖歌慢舞烂不收，
倒心回肠为青眸。千金邀顾不可酬，乃独遇之尽绸缪。
瞥然一饷成十秋，昔须未生今白头。五管历遍无贤侯，
回望万里还家羞。阳山穷邑惟猿猴，手持钓竿远相投。
我为罗列陈前修，芟蒿斩蓬利锄耰。天星回环数才周，
文学穰穰困仓稠。车轻御良马力优，咄哉识路行勿休，
往取将相酬恩雠。

· 全唐诗 ·

卷 339_2 【郑群赠簟】

韩愈

蕲州笛竹天下知，郑君所宝尤瑰奇。携来当昼不得卧，
一府传看黄琉璃。体坚色净又藏节，尽眼凝滑无瑕疵。
法曹贫贱众所易，腰腹空大何能为，自从五月困暑湿，
如坐深甑遭蒸炊。手磨袖拂心语口，慢肤多汗真相宜。
日暮归来独惆怅，有卖直欲倾家资。谁谓故人知我意，
卷送八尺含风漪。呼奴扫地铺未了，光彩照耀惊童儿。
青蝇侧翅蚤虱避，肃肃疑有清飙吹。倒身甘寝百疾愈，
却愿天日恒炎曦。明珠青玉不足报，赠子相好无时衰。

卷 339_3 【丰陵行】

韩愈

羽卫煌煌一百里，晓出都门葬天子。群臣杂沓驰后先，
宫官穰穰来不已。是时新秋七月初，金神按节炎气除。
清风飘飘轻雨洒，偃蹇旗旆卷以舒。逾梁下坂笳鼓咽，
嶙峋遂走玄宫闾。哭声旬天百鸟噪，幽坎昼闭空灵舆。
皇帝孝心深且远，资送礼备无赢馀。设官置卫锁嫔妓，
供养朝夕象平居。臣闻神道尚清净，三代旧制存诸书。
墓藏庙祭不可乱，欲言非职知何如。

· 全唐诗 ·

卷 339_4【游青龙寺赠崔大补阙】

韩愈

秋灰初吹季月管，日出卯南晖景短。友生招我佛寺行，
正值万株红叶满。光华闪壁见神鬼，赫赫炎官张火伞。
然云烧树火实骈，金乌下啄赭虬卵。魂翻眼倒忘处所，
赤气冲融无间断。有如流传上古时，九轮照烛乾坤旱。
二三道士席其间，灵液屡进玻黎碗。忽惊颜色变韶稚，
却信灵仙非怪诞。桃源迷路竟茫茫，枣下悲歌徒纂纂。
前年岭隅乡思发，踟躅成山开不算。去岁羈帆湘水明，
霜枫千里随归伴。猿呼鼯啸鹧鸪啼，恻耳酸肠难濯浣。
思君携手安能得，今者相从敢辞懒。由来钝騃寡参寻，
况是儒官饱闲散。惟君与我同怀抱，锄去陵谷置平坦。
年少得途未要忙，时清谏疏尤宜罕。何人有酒身无事，
谁家多竹门可款。须知节候即风寒，幸及亭午犹妍暖。
南山逼冬转清瘦，刻画圭角出崖巖。当忧复被冰雪埋，
汲汲来窥戒迟缓。

卷 339_5【赠崔立之评事】

韩愈

崔侯文章苦捷敏，高浪驾天输不尽。曾从关外来上都，
随身卷轴车连轸。朝为百赋犹郁怒，暮作千诗转遒紧。

· 全唐诗 ·

摇毫掷简自不供，顷刻青红浮海蜃。才豪气猛易语言，
往往蛟螭杂蝼蚓。知音自古称难遇，世俗乍见那妨哂。
勿嫌法官未登朝，犹胜赤尉长趋尹。时命虽乖心转壮，
技能虚富家逾窘。念昔尘埃两相逢，争名龃龉持矛楯。
子时专场夸鬚距，余始张军严鞬鞫。尔来但欲保封疆，
莫学庞涓怯孙臆。窜逐新归厌闻闹，齿发早衰嗟可闵。
频蒙怨句刺弃遗，岂有闲官敢推引。深藏箠笞时一发，
戢戢已多如束笋。可怜无益费精神，有似黄金掷虚牝。
当今圣人求侍从，拔擢杞梓收桔槔。东马严徐已奋飞，
枚皋即召穷且忍。复闻王师西讨蜀，霜风冽冽摧朝菌。
走章驰檄在得贤，燕雀纷拏要鹰隼。窃料二途必处一，
岂比恒人长蠢蠢。劝君韬养待征招，不用雕琢愁肝肾。
墙根菊花好沽酒，钱帛纵空衣可准。晖晖檐日暖且鲜，
撼撼井梧疏更殒。高士例须怜曲蘖，丈夫终莫生畦畛。
能来取醉任喧呼，死后贤愚俱泯泯。

卷 339_6 【送区弘南归】

韩愈

穆昔南征军不归，虫沙猿鹤伏以飞。汹汹洞庭莽翠微，
九疑铎天荒是非。野有象犀水贝玕，分散百宝人士稀。
我迁于南日周围，来见者众莫依违。爰有区子荧荧晖，
观以彝训或从违。我念前人譬葑菲，落以斧引以纆徽。
虽有不逮驱駸駸，或采于薄渔于矶。服役不辱言不讥，
从我荆州来京畿。离其母妻绝因依，嗟我道不能自肥。

· 全唐诗 ·

子虽勤苦终何希，王都观阙双巍巍。腾蹋众骏事鞍鞿，佩服上色紫与绯。独子之节可嗟唏，母附书至妻寄衣。开书拆衣泪痕唏，虽不敕还情庶几。朝暮盘羞恻庭闱，幽房无人感伊威。人生此难馀可祈，子去矣时若发机。蜃沉海底气升霏，彩雉野伏朝扇翬。处子窈窕王所妃，苟有令德隐不腓。况今天子铺德威，蔽能者诛荐受襍。出送抚背我涕挥，行行正直慎脂韦。业成志树来颀颀，我当为子言天扉。

卷 339_7【三星行】

韩愈

我生之辰，月宿南斗。牛奋其角，箕张其口。
牛不见服箱，斗不挹酒浆。箕独有神灵，无时停簸扬。
无善名已闻，无恶声已讙。名声相乘除，得少失有馀。
三星各在天，什伍东西陈。嗟汝牛与斗，汝独不能神。

卷 339_8【剥啄行】

韩愈

剥剥啄啄，有客至门。我不出应，客去而嗔。从者语我，
子胡为然。我不厌客，困于语言。欲不出纳，以堙其源。
空堂幽幽，有秸有莞。门以两板，丛书于间。窅窅深堑，

· 全唐诗 ·

其壙甚完。彼宁可隳，此不可干。从者语我，嗟子诚难。
子虽云尔，其口益蕃。我为子谋，有万其全。凡今之人，
急名与官。子不引去，与为波澜。虽不开口，虽不开关。
变化咀嚼，有鬼有神。今去不勇，其如后艰。我谢再拜，
汝无复云。往追不及，来不有年。

卷 339_9【青青水中蒲三首】

韩愈

青青水中蒲，下有一双鱼。君今上陇去，我在与谁居。
青青水中蒲，长在水中居。寄语浮萍草，相随我不如。
青青水中蒲，叶短不出水。妇人不下堂，行子在万里。

卷 339_10【孟东野失子】

韩愈

失子将何尤，吾将上尤天。女实主下人，与夺一何偏。
彼于女何有，乃令蕃且延。此独何罪辜，生死旬日间。
上呼无时闻，滴地泪到泉。地祇为之悲，瑟缩久不安。
乃呼大灵龟，骑云款天门。问天主下人，薄厚胡不均。
天曰天地人，由来不相关。吾悬日与月，吾系星与辰。
日月相噬啮，星辰踏而颠。吾不女之罪，知非女由因。
且物各有分，孰能使之然。有子与无子，祸福未可原。

· 全唐诗 ·

鱼子满母腹，一一欲谁怜。细腰不自乳，举族常孤鰥。
鸱枭啄母脑，母死子始翻。蝮蛇生子时，坼裂肠与肝。
好子虽云好，未还恩与勤。恶子不可说，鸱枭蝮蛇然。
有子且勿喜，无子固勿叹。上圣不待教，贤闻语而迁。
下愚闻语惑，虽教无由悛。大灵顿头受，即日以命还。
地祇谓大灵，女往告其人。东野夜得梦，有夫玄衣巾。
闯然入其户，三称天之言。再拜谢玄夫，收悲以欢忻。

卷 339_11【陆浑山火和皇甫湜用其韵】

韩愈

皇甫补官古贲浑，时当玄冬泽乾源。山狂谷很相吐吞，
风怒不休何轩轩。摆磨出火以自燔，有声夜中惊莫原。
天跳地踔颠乾坤，赫赫上照穷崖垠。截然高周烧四垣，
神焦鬼烂无逃门。三光弛隳不复暎，虎熊麋猪逮猴猿。
水龙鼉龟鱼与鼃，鴞鵂雕鹰雉鹄鷃。燂炆煨燔孰飞奔，
祝融告休酌卑尊，错陈齐玫辟华园，芙蓉披猖塞鲜繁。
千钟万鼓咽耳喧。攒杂啾唳沸麓垠，彤幢绛旂紫纛幡。
炎官热属朱冠裾，髹其肉皮通髀臀。頰胸垓腹车掀轳，
缇颜靺股豹两鞬。霞车虹靷日毂轳，丹蕤綵盖绯繡。
红帷赤幕罗脉脉，ì池波风肉陵屯。谿呀钜壑颇黎盆，
豆登五山瀛四尊。熙熙醕酬笑语言，雷公擘山海水翻。
齿牙嚼啮舌腭反，电光 礚赫目？，项冥收威避玄根，
斥弃舆马背厥孙。缩身潜喘拳肩跟，君臣相怜加爱恩。
命黑螭侦焚其元，天阙悠悠不可援。梦通上帝血面论，

· 全唐诗 ·

侧身欲进叱于阍。帝赐九河湔涕痕，又诏巫阳反其魂。
徐命之前问何冤，火行于冬古所存。我如禁之绝其飧，
女丁妇壬传世婚。一朝结讎奈后昆，时行当反慎藏蹲。
视桃著花可小蹇，月及申酉利复怨。助汝五龙从九鯤，
溺厥邑囚之昆仑。皇甫作诗止睡昏，辞夸出真遂上焚。
要余和增怪又烦，虽欲悔舌不可扪。

卷 339_21 【县斋读书】

韩愈

出宰山水县，读书松桂林。萧条捐末事，邂逅得初心。
哀狖醒俗耳，清泉洁尘襟。诗成有共赋，酒熟无孤斟。
青竹时默钓，白云日幽寻。南方本多毒，北客恒惧侵。
谪谴甘自守，滞留愧难任。投章类绶带，伫答逾兼金。

卷 339_22 【新竹】

韩愈

笋添南阶竹，日日成清閤。缥节已储霜，黄苞犹掩翠。
出栏抽五七，当户罗三四。高标陵秋严，贞色夺春媚。
稀生巧补林，并出疑争地。纵横乍依行，烂熳忽无次。
风枝未飘吹，露粉先涵泪。何人可携玩，清景空瞪视。

· 全唐诗 ·

卷 339_23 【晚菊】

韩愈

少年饮酒时，踊跃见菊花。今来不复饮，每见恒咨嗟。
伫立摘满手，行行把归家。此时无与语，弃置奈悲何。

卷 339_24 【落齿】

韩愈

去年落一牙，今年落一齿。俄然落七七，落势殊未已。
馀存皆动摇，尽落应始止。忆初落一时，但念豁可耻。
及至落二三，始忧衰即死。每一将落时，懔懔恒在已。
叉牙妨食物，颠倒怯漱水。终焉舍我落，意与崩山比。
今来落既熟，见落空相似。余存二十余，次第知落矣。
倘常岁落一，自足支两纪。如其落并空，与渐亦同指。
人言齿之落，寿命理难恃。我言生有涯，长短俱死尔。
人言齿之豁，左右惊谛视。我言庄周云，水雁各有喜。
语讹默固好，嚼废软还美。因歌遂成诗，持用诤妻子。

· 全唐诗 ·

卷 339_25【哭杨兵部凝陆歙州参】

韩愈

人皆期七十，才半岂蹉跎。并出知己泪，自然白发多。
晨兴为谁恸，还坐久滂沱。论文与晤语，已矣可如何。

卷 339_26【苦寒】

韩愈

四时各平分，一气不可兼。隆寒夺春序，颛顼固不廉。
太昊弛维纲，畏避但守谦。遂令黄泉下，萌牙夭句尖。
草木不复抽，百味失苦甜。凶飙搅宇宙，铓刃甚割砭。
日月虽云尊，不能活乌蟾。羲和送日出，恒怯频窥觇。
炎帝持祝融，呵嘘不相炎。而我当此时，恩光何由沾。
肌肤生鳞甲，衣被如刀镰。气寒鼻莫嗅，血冻指不拈。
浊醪沸入喉，口角如衔箝。将持匕箸食，触指如排签。
侵炉不觉暖，炽炭屡已添。探汤无所益，何况纆与缣。
虎豹僵穴中，蛟螭死幽潜。荧惑丧缠次，七龙冰脱髯。
芒砀大包内，生类恐尽歼。啾啾窗间雀，不知已微纤。
举头仰天鸣，所愿晷刻淹。不如弹射死，却得亲炰燂。
鸾皇苟不存，尔固不在占。其馀蠢动俦，俱死谁恩嫌。
伊我称最灵，不能女覆苫。悲哀激愤叹，五藏难安恬。
中宵倚墙立，淫泪何渐渐。天王哀无辜，惠我下顾瞻。

· 全唐诗 ·

褰旒去耳纆，调和进梅盐。贤能日登御，黜彼傲与愴。
生风吹死气，豁达如褰帘。悬乳零落堕，晨光入前檐。
雪霜顿销释，土脉膏且黏。岂徒兰蕙荣，施及艾与蒹。
日萼行铄铄，风条坐襜襜。天乎苟其能，吾死意亦厌。

卷 339_27【和虞部卢四酬翰林钱七赤藤杖歌】

韩愈

赤藤为杖世未窥，台郎始携自滇池。滇王扫宫避使者，
跪进再拜语嗢咿。绳桥拄过免倾堕，性命造次蒙扶持。
途经百国皆莫识，君臣聚观逐旌麾。共传滇神出水献，
赤龙拔须血淋漓。又云羲和操火鞭，暝到西极睡所遗。
几重包裹自题署，不以珍怪夸荒夷。归来捧赠同舍子，
浮光照手欲把疑。空堂昼眠倚牖户，飞电著壁搜蛟螭。
南宫清深禁闱密，唱和有类吹埙篪。妍辞丽句不可继，
见寄聊且慰分司。

卷 339_28【崔十七少府摄伊阳，以诗及书见投，因酬三十韵】

韩愈

崔君初来时，相识颇未惯。但闻赤县尉，不比博士慢。
赁屋得连墙，往来忻莫间。我时亦新居，触事苦难办。

· 全唐诗 ·

蔬飧要同吃，破袄请来绽。谓言安堵后，贷借更何患。
不知孤遗多，举族仰薄宦。有时未朝餐，得米日已晏。
隔墙闻讙呼，众口极鹅雁。前计顿乖张，居然见真贋。
娇儿好眉眼，袴脚冻两骭。捧书随诸兄，累累两角巾。
冬惟茹寒齏，秋始识瓜瓣。问之不言饥，饿若厌刍豢。
才名三十年，久合居给谏。白头趋走里，闭口绝谤讟。
府公旧同袍，拔擢宰山涧。寄诗杂诙俳，有类说鹏鹕。
上言酒味酸，冬衣竟未撰。下言人吏稀，惟足彪与戩。
又言致猪鹿，此语乃善幻。三年国子师，肠肚习藜苳。
况住洛之涯，鲂鱠可罩汕。肯效屠门嚼，久嫌弋者篡。
谋拙日焦拳，活计似锄划。男寒涩诗书，妻瘦剩腰褰。
为官不事职，厥罪在欺慢。行当自劾去，渔钓老葭葦。
岁穷寒气骄，冰雪滑磴栈。音问难屡通，何由觐清盼。

卷 339_29【送侯参谋赴河中幕】

韩愈

忆昔初及第，各以少年称。君颐始生须，我齿清如冰。
尔时心气壮，百事谓己能。一别讵几何，忽如隔晨兴。
我齿豁可鄙，君颜老可憎。相逢风尘中，相视迭嗟矜。
幸同学省官，末路再得朋。东司绝教授，游宴以为恒。
秋渔荫密树，夜博然明灯。雪径抵樵叟，风廊折谈僧。
陆浑桃花间，有汤沸如烝。三月崧少步，踟躅红千层。
洲沙厌晚坐，岭壁穷晨升。沈冥不计日，为乐不可胜。
迁满一已异，乖离坐难凭。行行事结束，人马何踴腾。

· 全唐诗 ·

感激生胆勇，从军岂尝曾。洸洸司徒公，天子爪与肱。
提师十万余，四海钦风棱。河北兵未进，蔡州帅新薨。
曷不请扫除，活彼黎与烝。鄙夫诚怯弱，受恩愧徒弘。
犹思脱儒冠，弃死取先登。又欲面言事，上书求诏征。
侵官固非是，妄作谴可惩。惟当待责免，耕耨归沟塍。
今君得所附，势若脱鞬鹰。檄笔无与让，幕谋识其膺。
收绩开史牒，翰飞逐溟鹏。男儿贵立事，流景不可乘。
岁老阴沴作，云颓雪翻崩。别袖拂洛水，征车转崤陵。
勤勤酒不进，勉勉恨已仍。送君出门归，愁肠若牵绳。
默坐念语笑，痴如遇寒蝇。策马谁可适，晤言谁为应。
席尘惜不扫，残尊对空凝。信知后会时，日月屡环纆。
生期理行役，欢绪绝难承。寄书惟在频，无吝简与缁。

卷 339_30【东都遇春】

韩愈

少年气真狂，有意与春竞。行逢二三月，九州花相映。
川原晓服鲜，桃李晨妆靓。荒乘不知疲，醉死岂辞病。
饮啖惟所便，文章倚豪横。尔来曾几时，白发忽满镜。
旧游喜乖张，新辈足嘲评。心肠一变化，羞见时节盛。
得闲无所作，贵欲辞视听。深居疑避仇，默卧如当瞑。
朝曦入牖来，鸟唤昏不醒。为生鄙计算，盐米告屡罄。
坐疲都忘起，冠侧懒复正。幸蒙东都官，获离机与阱。
乖慵遭傲僻，渐染生弊性。既去焉能追，有来犹莫骋。
有船魏王池，往往纵孤泳。水容与天色，此处皆绿净。

· 全唐诗 ·

岸树共纷披，渚牙相纬经。怀归苦不果，即事取幽迸。
贪求匪名利，所得亦已并。悠悠度朝昏，落落捐季孟。
群公一何贤，上戴天子圣。谋谟收禹绩，四面出雄劲。
转输非不勤，稽逋有军令。在庭百执事，奉职各祇敬。
我独胡为哉，坐与亿兆庆。譬如笼中鸟，仰给活性命。
为诗告友生，负愧终究竟。

卷 339_31 【感春五首】

韩愈

辛夷高花最先开，青天露坐始此回。已呼孺人戛鸣瑟，
更遣稚子传清杯。选壮军兴不为用，坐狂朝论无由陪。
如今到死得闲处，还有诗赋歌康哉。

洛阳东风几时来，川波岸柳春全回。宫门一锁不复启，
虽有九陌无尘埃。策马上桥朝日出，楼阙赤白正崔嵬。
孤吟屡阕莫与和，寸恨至短谁能裁。

春田可耕时已催，王师北讨何当回。放车载草农事济，
战马苦饥谁念哉。蔡州纳节旧将死，起居谏议联翩来。
朝廷未省有遗策，肯不垂意瓶与罍。

前随杜尹拜表回，笑言溢口何欢诒。孔丞别我适临汝，
风骨峭峻遗尘埃。音容不接只隔夜，凶讟讵可相寻来。
天公高居鬼神恶，欲保性命诚难哉。

· 全唐诗 ·

辛夷花房忽全开，将衰正盛须频来。清晨辉辉烛霞日，
薄暮耿耿和烟埃。朝明夕暗已足叹，况乃满地成摧颓。
迎繁送谢别有意，谁肯留恋少环回。

卷 339_32【酬裴十七功曹巡府西驿途中见寄】

韩愈

相公罢论道，聿至活东人。御史坐言事，作吏府中尘。
遂令河南治，今古无侔伦。四海日富庶，道途隘蹄轮。
府西三百里，候馆同鱼鳞。相公谓御史，劳子去自巡。
是时山水秋，光景何鲜新。哀鸿鸣清耳，宿雾褰高旻。
遗我行旅诗，轩轩有风神。譬如黄金盘，照耀荆璞真。
我来亦已幸，事贤友其仁。持竿洛水侧，孤坐屡穷辰。
多才自劳苦，无用只因循。辞免期匪远，行行及山春。

卷 339_33【燕河南府秀才得生字】

韩愈

吾皇绍祖烈，天下再太平。诏下诸郡国，岁贡乡曲英。
元和五年冬，房公尹东京。功曹上言公，是月当登名。
乃选二十县，试官得鸿生。群儒负己材，相贺简择精。
怒起簸羽翮，引吭吐铿轰。此都自周公，文章继名声。
自非绝殊尤，难使耳目惊。今者遭震薄，不能出声鸣。

· 全唐诗 ·

鄙夫忝县尹，愧栗难为情。惟求文章写，不敢妒与争。
还家敕妻儿，具此煎炰烹。柿红蒲萄紫，肴果相扶擎。
芳茶出蜀门，好酒浓且清。何能充欢燕，庶以露厥诚。
昨闻诏书下，权公作邦桢。文人得其职，文道当大行。
阴风搅短日，冷雨涩不晴。勉哉戒徒驭，家国迟子荣。

卷 339_34 【送李翱】

韩愈

广州万里途，山重江逶迤。行行何时到，谁能定归期。
揖我出门去，颜色异恒时。虽云有追送，足迹绝自兹。
人生一世间，不自张与弛。譬如浮江木，纵横岂自知。
宁怀别时苦，勿作别后思。

卷 339_35 【送石洪处士赴河阳幕得起字】

韩愈

长把种树书，人云避世士。忽骑将军马，自号报恩子。
风云入壮怀，泉石别幽耳。鉅鹿师欲老，常山险犹恃。
岂惟彼相忧，固是吾徒耻。去去事方急，酒行可以起。

· 全唐诗 ·

卷 339_36 【送湖南李正字归】

韩愈

长沙入楚深，洞庭值秋晚。人随鸿雁少，江共蒹葭远。
历历余所经，悠悠子当返。孤游怀耿介，旅宿梦婉娩。
风土稍殊音，鱼虾日异饭。亲交俱在此，谁与同息偃。

· 全唐诗 ·

卷三百四十

卷 340_1【辛卯年雪】

韩愈

元和七年春，寒气不肯归。河南二月末，雪花一尺围。
崩腾相排拶，龙凤交横飞。波涛何飘扬，天风吹幡旂。
白帝盛羽卫，鬖髿振裳衣。白霓先启途，从以万玉妃。
翕翕陵厚载，咩咩弄阴机。生平未曾见，何暇议是非。
或云丰年祥，饱食可庶几。善祷吾所慕，谁言寸诚微。

卷 340_2【醉留东野】

韩愈

昔年因读李白杜甫诗，长恨二人不相从。吾与东野生并世，
如何复蹢二子踪。东野不得官，白首夸龙钟。韩子稍奸黠，
自惭青蒿倚长松。低头拜东野，原得终始如駉蛩。
东野不回头，有如寸筵撞巨钟。我愿身为云，
东野变为龙。四方上下逐东野，虽有离别无由逢。

· 全唐诗 ·

卷 340_3【李花二首】

韩愈

平旦入西园，梨花数株若矜夸。旁有一株李，
颜色惨惨似含嗟。问之不肯道所以，独绕百匝至日斜。
忽忆前时经此树，正见芳意初萌芽。奈何趁酒不省录，
不见玉枝攒霜葩。泫然为汝下雨泪，无由反旆羲和车。
东风来吹不解颜，苍茫夜气生相遮。冰盘夏荐碧实脆，
斥去不御惭其花。

当春天地争奢华，洛阳园苑尤纷拏。谁将平地万堆雪，
剪刻作此连天花。日光赤色照未好，明月暂入都交加。
夜领张彻投卢仝，乘云共至玉皇家。长姬香御四罗列，
缟裙练帨无等差。静濯明妆有所奉，顾我未肯置齿牙。
清寒莹骨肝胆醒，一生思虑无由邪。

卷 340_4【招杨之罘】

韩愈

柏生两石间，万岁终不大。野马不识人，难以驾车盖。
柏移就平地，马羈入厩中。马思自由悲，柏有伤根容。
伤根柏不死，千丈日以至。马悲罢还乐，振迅矜鞍轡。
之罘南山来，文字得我惊。馆置使读书，日有求归声。

· 全唐诗 ·

我令之果归，失得柏与马。之果别我去，计出柏马下。
我自之果归，入门思而悲。之果别我去，能不思我为。
洒扫县中居，引水经竹间。器畔所不及，何异山中闲。
前陈百家书，食有肉与鱼。先王遗文章，缀缉实在余。
礼称独学陋，易贵不远复。作诗招之果，晨夕抱饥渴。

卷 340_5【寄卢仝】

韩愈

玉川先生洛城里，破屋数间而已矣。一奴长须不裹头，
一婢赤脚老无齿。辛勤奉养十余人，上有慈亲下妻子。
先生结发憎俗徒，闭门不出动一纪。至今邻僧乞米送，
仆忝县尹能不耻。俸钱供给公私余，时致薄少助祭祀。
劝参留守谒大尹，言语才及辄掩耳。水北山人得名声，
去年去作幕下士。水南山人又继往，鞍马仆从塞间里。
少室山人索价高，两以谏官征不起。彼皆刺口论世事，
有力未免遭驱使。先生事业不可量，惟用法律自绳己。
春秋三传束高阁，独抱遗经穷终始。往年弄笔嘲同异，
怪辞惊众谤不已。近来自说寻坦途。犹上虚空跨绿駟。
去年生儿名添丁，意令与国充耘耔。国家丁口连四海，
岂无农夫亲耒耜。先生抱才终大用，宰相未许终不仕。
假如不在陈力列，立言垂范亦足恃。苗裔当蒙十世宥，
岂谓贻厥无基趾。故知忠孝生天性，洁身乱伦定足拟。
昨晚长须来下状，隔墙恶少恶难似。每骑屋山下窥阍，
浑舍惊怕走折趾。凭依婚媾欺官吏，不信令行能禁止。

· 全唐诗 ·

先生受屈未曾语，忽此来告良有以。嗟我身为赤县令，
操权不用欲何俟。立召贼曹呼伍伯，尽取鼠辈尸诸市。
先生又遣长须来，如此处置非所喜。况又时当长养节，
都邑未可猛政理。先生固是余所畏，度量不敢窥涯涘。
放纵是谁之过欤，效尤戮仆愧前史。买羊沽酒谢不敏，
偶逢明月曜桃李。先生有意许降临，更遣长须致双鲤。

卷 340_6【酬司门卢四兄云夫院长望秋作】

韩愈

长安雨洗新秋出，极目寒镜开尘函。终南晓望蹋龙尾，
倚天更觉青巉巖。自知短浅无所补，从事久此穿朝衫。
归来得便即游览，暂似壮马脱重衔。曲江荷花盖十里，
江湖生目思莫缄。乐游下瞩无远近，绿槐萍合不可芟。
白首寓居谁借问，平地寸步扃云岩。云夫吾兄有狂气，
嗜好与俗殊酸咸。日来省我不肯去，论诗说赋相喃喃。
望秋一章已惊绝，犹言低抑避谤讪。若使乘酣骋雄怪，
造化何以当镌剡。嗟我小生值强伴，怯胆变勇神明鉴。
驰坑跨谷终未悔，为利而止真贪馋。高揖群公谢名誉，
远追甫白感至诚。楼头完月不共宿，其奈就缺行攲攲。

· 全唐诗 ·

卷 340_7【谁氏子】

韩愈

非痴非狂谁氏子，去入王屋称道士。白头老母遮门啼，
挽断衫袖留不止。翠眉新妇年二十，载送还家哭穿市。
或云欲学吹凤笙，所慕灵妃媲萧史。又云时俗轻寻常，
力行险怪取贵仕。神仙虽然有传说，知者尽知其妄矣。
圣君贤相安可欺，乾死穷山竟何俟。呜呼余心诚岂弟，
愿往教诲究终始。罚一劝百政之经，不从而诛未晚耳。
谁其友亲能哀怜，写吾此诗持送似。

卷 340_8【河南令舍池台】

韩愈

灌池才盈五六丈，筑台不过七八尺。欲将层级压篱落，
未许波澜量斗石。规摹虽巧何足夸，景趣不远真可惜。
长令人吏远趋走，已有蛙黾助狼藉。

· 全唐诗 ·

卷 340_9【送无本师归范阳】

韩愈

无本于为文，身大不及胆。吾尝示之难，勇往无不敢。
蛟龙弄角牙，造次欲手揽。众鬼囚大幽，下觑袭玄窞。
天阳熙四海，注视首不颔。鲸鹏相摩窋，两举快一啖。
夫岂能必然，固已谢黯黩。狂词肆滂葩，低昂见舒惨。
奸穷怪变得，往往造平澹。蜂蝉碎锦纈，绿池披菡萏。
芝英擢荒榛，孤翮起连茑。家住幽都远，未识气先感。
来寻吾何能，无殊嗜昌歜。始见洛阳春，桃枝缀红糝。
遂来长安里，时卦转习坎。老懒无斗心，久不事铅槧。
欲以金帛酬，举室常V 颔。念当委我去，雪霜刻以愴。
狞飙搅空衢，天地与顿撼。勉率吐歌诗，慰女别后览。

卷 340_10【石鼓歌】

韩愈

张生手持石鼓文，劝我试作石鼓歌。少陵无人谪仙死，
才薄将奈石鼓何。周纲陵迟四海沸，宣王愤起挥天戈。
大开明堂受朝贺，诸侯剑佩鸣相磨。蒐于岐阳骋雄俊，
万里禽兽皆遮罗。镌功勒成告万世，凿石作鼓隳嵯峨。
从臣才艺咸第一，拣选撰刻留山阿。雨淋日炙野火燎，
鬼物守护烦搗呵。公从何处得纸本，毫发尽备无差讹。

· 全唐诗 ·

辞严义密读难晓，字体不类隶与科。年深岂免有缺画，快剑斫断生蛟鼉。鸾翔凤翥众仙下，珊瑚碧树交枝柯。金绳铁索锁纽壮，古鼎跃水龙腾梭。陋儒编诗不收入，二雅褊迫无委蛇。孔子西行不到秦，掎摭星宿遗羲娥。嗟予好古生苦晚，对此涕泪双滂沱。忆昔初蒙博士征，其年始改称元和。故人从军在右辅，为我度量掘臼科。濯冠沐浴告祭酒，如此至宝存岂多。毡包席裹可立致，十鼓只载数骆驼。荐诸太庙比郅鼎，光价岂止百倍过。圣恩若许留太学，诸生讲解得切磋。观经鸿都尚填咽，坐见举国来奔波。剜苔剔藓露节角，安置妥帖平不颇。大厦深檐与盖覆，经历久远期无佗。中朝大官老于事，讵肯感激徒嫫媿。牧童敲火牛砺角，谁复著手为摩挲。日销月铄就埋没，七年西顾空吟哦。羲之俗书趁姿媚，数纸尚可博白鹅。继周八代争战罢，无人收拾理则那。方今太平日无事，柄任儒术崇丘轲。安能以此上论列，愿借辨口如悬河。石鼓之歌止于此，呜呼吾意其蹉跎。

卷 340_11【双鸟诗】

韩愈

双鸟海外来，飞飞到中州。一鸟落城市，一鸟集岩幽。不得相伴鸣，尔来三千秋。两鸟各闭口，万象衔口头。春风卷地起，百鸟皆飘浮。两鸟忽相逢，百日鸣不休。有耳聒皆聋，有口反自羞。百舌旧饶声，从此恒低头。得病不呻唤，泯默至死休。雷公告天公，百物须膏油。

· 全唐诗 ·

自从两鸟鸣，聒乱雷声收。鬼神怕嘲咏，造化皆停留。
草木有微情，挑抉示九州。虫鼠诚微物，不堪苦诛求。
不停两鸟鸣，百物皆生愁。不停两鸟鸣，自此无春秋。
不停两鸟鸣，日月难旋斡。不停两鸟鸣，大法失九畴。
周公不为公，孔丘不为丘。天公怪两鸟，各捉一处囚。
百虫与百鸟，然后鸣啾啾。两鸟既别处，闭声省愆尤。
朝食千头龙，暮食千头牛。朝饮河生尘，暮饮海绝流。
还当三千秋，更起鸣相酬。

卷 340_12【赠刘师服】

韩愈

羨君齿牙牢且洁，大肉硬饼如刀截。我今呀豁落者多，
所存十馀皆兀臃。匙抄烂饭稳送之，合口软嚼如牛舐。
妻儿恐我生怅望，盘中不钉栗与梨。只今年才四十五，
后日悬知渐莽卤。朱颜皓颈讶莫亲，此外诸馀谁更数。
忆昔太公仕进初，口含两齿无赢馀。虞翻十三比岂少，
遂自惋恨形于书。丈夫命存百无害，谁能点检形骸外。
巨缗东钓倘可期，与子共饱鲸鱼脍。

卷 340_13【题炭谷湫祠堂】

韩愈

万生都阳明，幽暗鬼所寰。嗟龙独何智，出入人鬼间。

· 全唐诗 ·

不知谁为助，若执造化关。厌处平地水，巢居插天山。
列峰若攒指，石盂仰环环。巨灵高其捧，保此一掬慳。
森沈固含蓄，本以储阴奸。鱼鳖蒙拥护，群嬉傲天顽。
翩翩栖托禽，飞飞一何闲。祠堂像侔真，擢玉纡烟鬟。
群怪俨伺候，恩威在其颜。我来日正中，悚惕思先还。
寄立尺寸地，敢言来途艰。吁无吹毛刃，血此牛蹄殷。
至令乘水旱，鼓舞寡与鰥。林丛镇冥冥，穷年无由删。
妍英杂艳实，星琐黄朱斑。石级皆险滑，颠跻莫牵攀。
龙区雏众碎，付与宿已颁。弃去可奈何，吾其死茅菅。

卷 340_14【听颖师弹琴】

韩愈

昵昵儿女语，恩怨相尔汝。划然变轩昂，勇士赴敌场。
浮云柳絮无根蒂，天地阔远随飞扬。喧啾百鸟群，
忽见孤凤凰。跻攀分寸不可上，失势一落千丈强。
嗟余有两耳，未省听丝篁。自闻颖师弹，起坐在一旁。
推手遽止之，湿衣泪滂滂。颖乎尔诚能，无以冰炭置我肠。

卷 340_15【送陆畅归江南】

韩愈

举举江南子，名以能诗闻。一来取高第，官佐东宫军。

· 全唐诗 ·

迎妇丞相府，夸映秀士群。鸾鸣桂树间，观者何缤纷。
人事喜颠倒，旦夕异所云。萧萧青云干，遂逐荆棘焚。
岁晚鸿雁过，乡思见新文。践此秦关雪，家彼吴洲云。
悲啼上车女，骨肉不可分。感慨都门别，丈夫酒方醺。
我实门下士，力薄蚋与蚊。受恩不即报，永负湘中坟。

卷 340_16【送进士刘师服东归】

韩愈

猛虎落槛阱，坐食如孤豚。丈夫在富贵，岂必守一门。
公心有勇气，公口有直言。奈何任埋没，不自求腾轩。
仆本亦进士，颇尝究根源。由来骨鲠材，喜被软弱吞。
低头受侮笑，隐忍碑兀冤。泥雨城东路，夏槐作云屯。
还家虽阙短，把日亲晨飧。携持令名归，自足贻家尊。
时节不可玩，亲交可攀援。勉来取金紫，勿久休中园。

卷 340_17【嘲鲁连子】

韩愈

鲁连细而黠，有似黄鹞子。田巴兀老苍，怜汝矜爪觜。
开端要惊人，雄跨吾厌矣。高拱禅鸿声，若辍一杯水。
独称唐虞贤，顾未知之耳。

· 全唐诗 ·

卷 340_18 【赠张籍】

韩愈

吾老著读书，馀事不挂眼。有儿虽甚怜，教示不免简。
君来好呼出，踉跄越门限。惧其无所知，见则先愧赧。
昨因有缘事，上马插手版。留君住厅食，使立侍盘盂。
薄暮归见君，迎我笑而莞。指渠相贺言，此是万金产。
吾爱其风骨，粹美无可拣。试将诗义授，如以肉贯串。
开祛露毫末，自得高蹇蹇。我身蹈丘轲，爵位不早绾。
固宜长有人，文章绍编划。感荷君子德，恍若乘朽栈。
召令吐所记，解摘了瑟僂。顾视窗壁间，亲戚竞覘讪。
喜气排寒冬，逼耳鸣睒睒。如今更谁恨，便可耕灞浥。

卷 340_19 【调张籍】

韩愈

李杜文章在，光焰万丈长。不知群儿愚，那用故谤伤。
蚍蜉撼大树，可笑不自量。伊我生其后，举颈遥相望。
夜梦多见之，昼思反微茫。徒观斧凿痕，不瞩治水航。
想当施手时，巨刃磨天扬。垠崖划崩豁，乾坤摆雷硠。
惟此两夫子，家居率荒凉。帝欲长吟哦，故遣起且僵。
剪翎送笼中，使看百鸟翔。平生千万篇，金薤垂琳琅。
仙官敕七丁，雷电下取将。流落人间者，太山一毫芒。

· 全唐诗 ·

我愿生两翅，捕逐出八荒。精诚忽交通，百怪入我肠。
刺手拔鲸牙，举瓢酌天浆。腾身跨汗漫，不著织女襄。
顾语地上友，经营无太忙。乞君飞霞佩，与我高颀颀。

卷 340_20【卢郎中云夫寄示送盘谷子诗两章，歌以和之】

韩愈

昔寻李愿向盘谷，正见高崖巨壁争开张。是时新晴天井溢，
谁把长剑倚太行。冲风吹破落天外，飞雨白日洒洛阳。
东蹈燕川食旷野，有馈木蕨芽满筐。马头溪深不可厉，
借车载过水入箱。平沙绿浪榜方口，雁鸭飞起穿垂杨。
穷探极览颇恣横，物外日月本不忙。归来辛苦欲谁为，
坐令再往之计堕眇芒。闭门长安三日雪，推书扑笔歌慨慷。
旁无壮士遣属和，远忆卢老诗颠狂。开缄忽睹送归作，
字向纸上皆轩昂。又知李侯竟不顾，方冬独入崔嵬藏。
我今进退几时决，十年蠢蠢随朝行。家请官供不报答，
何异雀鼠偷太仓。行抽手版付丞相，不等弹劾还耕桑。

卷 340_21【寄皇甫湜】

韩愈

敲门惊昼睡，问报睦州吏。手把一封书，上有皇甫字。

· 全唐诗 ·

拆书放床头，涕与泪垂四。昏昏还就枕，惘惘梦相值。
悲哉无奇术，安得生两翅。

卷 340_22【病中赠张十八】

韩愈

中虚得暴下，避冷卧北窗。不蹋晓鼓朝，安眠听逢逢。
籍也处闾里，抱能未施邦。文章自娱戏，金石日击撞。
龙文百斛鼎，笔力可独扛。谈舌久不掉，非君亮谁双。
扶几导之言，曲节初捭捩。半途喜开怀，派别失大江。
吾欲盈其气，不令见麾幢。牛羊满田野，解旆束空杠。
倾尊与斟酌，四壁堆罍缸。玄帷隔雪风，照炉钉明釭。
夜阑纵捭阖，哆口疏眉厖。势侔高阳翁，坐约齐横降。
连日挟所有，形躯顿胗肱。将归乃徐谓，子言得无咙。
回军与角逐，斫树收穷庞。雌声吐款要，酒壶缀羊腔。
君乃昆仑渠，籍乃岭头泂。譬如蚁蛭微，讵可陵崆峒。
幸愿终赐之，斩拔枿与桩。从此识归处，东流水淙淙。

卷 340_23【杂诗】

韩愈

古史散左右，诗书置后前。岂殊蠹书虫，生死文字间。
古道自愚蠢，古言自包缠。当今固殊古，谁与为欣欢。

· 全唐诗 ·

独携无言子，共升昆仑颠。长风飘襟裾，遂起飞高圆。
下视禹九州，一尘集豪端。遨嬉未云几，下已亿万年。
向者夸夺子，万坟厌其颠。惜哉抱所见，白黑未及分。
慷慨为悲咤，泪如九河翻。指摘相告语，虽还今谁亲。
翩然下大荒，被发骑骐驎。

卷 340_24【寄崔二十七立之】

韩愈

西城员外丞，心迹两屈奇。往岁战词赋，不将势力随。
下驴入省门，左右惊纷披。傲兀坐试席，深丛见孤罍。
文如翻水成，初不用意为。四座各低面，不敢捩眼窥。
升阶揖侍郎，归舍日未欵。佳句喧众口，考官敢瑕疵。
连年收科第，若摘颌底髭。回首卿相位，通途无他岐。
岂论校书郎，袍笏光参差。童稚见称说，祝身得如斯。
侪辈妒且热，喘如竹筒吹。老妇愿嫁女，约不论财赀。
老翁不量分，累月笞其儿。搅搅争附托，无人角雄雌。
由来人间事，翻覆不可知。安有巢中鷺，插翅飞天陲。
驹麕著爪牙，猛虎借与皮。汝头有缰系，汝脚有索縻。
陷身泥沟间，谁复稟指撝。不脱吏部选，可见偶与奇。
又作朝士贬，得非命所施。客居京城中，十日营一炊。
逼迫走巴蛮，恩爱座上离。昨来汉水头，始得完孤羁。
桁挂新衣裳，盎弃食残糜。苟无饥寒苦，那用分高卑。
怜我还好古，宦途同险巇。每旬遗我书，竟岁无差池。
新篇奚其思，风幡肆逶迤。又论诸毛功，劈水看蛟螭。

· 全唐诗 ·

雷电生睒睒，角鬣相撑披。属我感穷景，抱华不能离。
唱来和相报，愧叹俾我疵。又寄百尺彩，绯红相盛衰。
巧能喻其诚，深浅抽肝脾。开展放我侧，方餐涕垂匙。
朋交日凋谢，存者逐利移。子宁独迷误，缀缀意益弥。
举头庭树豁，狂飙卷寒曦。迢递山水隔，何由应埭篱。
别来就十年，君马记騊駼。长女当及事，谁助出悦縻。
诸男皆秀朗，几能守家规。文字锐气在，辉辉见旌麾。
摧肠与戚容，能复持酒卮。我虽未耄老，发秃骨力羸。
所馀十九齿，飘飘尽浮危。玄花著两眼，视物隔褰帷。
燕席谢不诣，游鞍悬莫骑。敦敦凭书案，譬彼鸟黏泥。
且吾闻之师，不以物自隳。孤豚眠粪壤，不慕太庙牺。
君看一时人，几辈先腾驰。过半黑头死，阴虫食枯骍。
欢华不满眼，咎责塞两仪。观名计之利，讵足相陪裨。
仁者耻贪冒，受禄量所宜。无能食国惠，岂异哀癯罢。
久欲辞谢去，休令众睚眦。况又婴疹疾，宁保躯不赀。
不能前死罢，内实惭神祇。旧籍在东郡，茅屋枳棘篱。
还归非无指，灞渭扬春澌。生兮耕吾疆，死也埋吾陂。
文书自传道，不仗史笔垂。夫子固吾党，新恩释衔羁。
去来伊洛上，相待安罟箠。我有双饮盏，其银得朱提。
黄金涂物象，雕镌妙工倕。乃令千里鲸，么麽微蠹斯。
犹能争明月，摆掉出渺瀰。野草花叶细，不辨蕤荑施。
绵绵相纠结，状似环城陴。四隅芙蓉树，擢艳皆猗猗。
鲸以兴君身，失所逢百罹。月以喻夫道，黽勉励莫亏。
草木明覆载，妍丑齐荣萎。愿君恒御之，行止杂燧燧。
异日期对举，当如合分支。

· 全唐诗 ·

卷 340_25【月蚀诗效玉川子作】

韩愈

元和庚寅斗插子，月十四日三更中。森森万木夜僵立，
寒气质夙顽无风。月形如白盘，完完上天东。
忽然有物来啖之，不知是何虫。如何至神物，遭此狼狈凶。
星如撒沙出，攒集争强雄。油灯不照席，
是夕吐焰如长虹。玉川子，涕泗下，中庭独行。
念此日月者，为天之眼睛。此犹不自保，吾道何由行。
尝闻古老言，疑是虾蟆精。径圆千里纳女腹，
何处养女百丑形。杷沙脚手钝，谁使女解缘青冥。
黄帝有四目，帝舜重其明。今天只两目，何故许食使偏盲。
尧呼大水浸十日，不惜万国赤子鱼头生。女于此时若食日，
虽食八九无噍名。赤龙黑鸟烧口热，
翎鬣倒侧相搪撑。婪酣大肚遭一饱，饥肠彻死无由鸣。
后时食月罪当死，天罗磕匝何处逃汝刑。
玉川子立于庭而言曰：地行贱臣仝，再拜敢告上天公。
臣有一寸刃，可剗凶蟆肠。无梯可上天，天阶无由有臣踪。
寄笺东南风，天门西北祈风通。丁宁附耳莫漏泄，
薄命正值飞廉慵。东方青色龙，牙角何呀呀。从官百馀座，
嚼啜烦官家。月蚀汝不知，安用为龙窟天河。赤鸟司南方，
尾秃翅觮沙。月蚀于汝头，汝口开呀呀。虾蟆掠汝两吻过，
忍学省事不以汝觜啄虾蟆。於菟蹲于西，旗旄卫旸ó。
既从白帝祠，又食于蜡礼有加。忍令月被恶物食，
枉于汝口插齿牙。乌龟怯奸，怕寒缩颈，以壳自遮。

· 全唐诗 ·

终令夸蛾抉汝出，卜师烧锥钻灼满板如星罗。此外内外官，琐细不足科。臣请悉扫除，慎勿许语令啾哗。
并光全耀归我月，盲眼镜净无纤瑕。弊蛙拘送主府官，帝箸下腹尝其蟠。依前使免操杵臼，玉阶桂树闲婆娑。
姮娥还宫室，太阳有室家。天虽高，耳属地。感臣赤心，使臣知意。虽无明言，潜喻厥旨。有气有形，皆吾赤子。虽忿大伤，忍杀孩稚。还汝月明，安行于次。尽释众罪，以蛙磔死。

卷 340_26【孟生诗】

韩愈

孟生江海士，古貌又古心。尝读古人书，谓言古犹今。作诗三百首，窅默咸池音。骑驴到京国，欲和熏风琴。岂识天子居，九重郁沈沈。一门百夫守，无籍不可寻。晶光荡相射，旗戟翩以森。迁延乍却走，惊怪靡自任。举头看白日，泣涕下沾襟。谒来游公卿，莫肯低华簪。谅非轩冕族，应对多差参。萍蓬风波急，桑榆日月侵。奈何从进士，此路转岖嶔。异质忌处群，孤芳难寄林。谁怜松桂性，竞爱桃李阴。朝悲辞树叶，夕感归巢禽。顾我多慷慨，穷檐时见临。清宵静相对，发白聆苦吟。采兰起幽念，眇然望东南。秦吴修且阻，两地无数金。我论徐方牧，好古天下钦。竹实凤所食，德馨神所歆。求观众丘小，必上泰山岑。求观众流细，必泛沧溟深。子其听我言，可以当所箴。既获则思返，无为久滞淫。

· 全唐诗 ·

卞和试三献，期子在秋砧。

卷 340_27【射训狐】

韩愈

有鸟夜飞名训狐，矜凶挟狡夸自呼。乘时阴黑止我屋，
声势慷慨非常粗。安然大唤谁畏忌，造作百怪非无须。
聚鬼征妖自朋扇，罢掉拱桷颓塹涂。慈母抱儿怕入席，
那暇更护鸡窠雏。我念乾坤德泰大，卵此恶物常勤劬。
纵之岂即遽有害，斗柄行拄西南隅。谁谓停奸计尤剧，
意欲唐突羲和乌。侵更历漏气弥厉，何由侥幸休须臾。
咨余往射岂得已，候女两眼张睢盱。枭惊堕梁蛇走窦，
一夫斩颈群雏枯。

卷 340_28【将归赠孟东野房蜀客】

韩愈

君门不可入，势利互相推。借问读书客，胡为在京师。
举头未能对，闭眼聊自思。倏忽十七年，终朝苦寒饥。
宦途竟寥落，鬓发坐差池。颍水清且寂，箕山坦而夷。
如今便当去，咄咄无自疑。

· 全唐诗 ·

卷 340_29【答孟郊】

韩愈

规模背时利，文字觑天巧。人皆余酒肉，子独不得饱。
才春思已乱，始秋悲又搅。朝餐动及午，夜讽恒至卯。
名声暂膻腥，肠肚镇煎爇。古心虽自鞭，世路终难拗。
弱拒喜张臂，猛拿闲缩爪。见倒谁肯扶，从嗔我须咬。

卷 340_30【从仕】

韩愈

居闲食不足，从仕力难任。两事皆害性，一生恒苦心。
黄昏归私室，惆怅起叹音。弃置人间世，古来非独今。

卷 340_31【短灯檠歌】

韩愈

长檠八尺空自长，短檠二尺便且光。黄帘绿幕朱户闭，
风露气入秋堂凉。裁衣寄远泪眼暗，搔头频挑移近床。
太学儒生东鲁客，二十辞家来射策。夜书细字缀语言，
两目眇昏头雪白。此时提携当案前，看书到晓那能眠。

· 全唐诗 ·

一朝富贵还自恣，长檠高张照珠翠。吁嗟世事无不然，
墙角君看短檠弃。

卷 340_32【送刘师服】

韩愈

夏半阴气始，淅然云景秋。蝉声入客耳，惊起不可留。
草草具盘馔，不待酒献酬。士生为名累，有似鱼中钩。
赍材入市卖，贵者恒难售。岂不畏憔悴，为功忌中休。
勉哉耘其业，以待岁晚收。